

O beata Solitudo! o sola Beatitudo!



A.VI.20

Biblioteka
Oleśów K. Oleśów
w Bieniszewie

GLORIOSO


S. IOSEPHO MA-
XIME AMABILI ET
MAXIME

Post IESVM & MARIAM
præ reliquis Sanctis
dilecto,

DIGNISSIMO SPONSO
Matris DEI

ET

VERBI INCARNATI
Sapientissimo moderatori.

 AGNE sancte, amator
animarum sanctita-
tem amantium, &
que in amabili solitu-
dine ad insignem profectum vi-
te latentis, cuius tu fuisti Idea in-
comparabilis, anhelant. Obla-
tum venio Aris tuis omnes meas

A 3 cogi-

DEDICATIO.

cogitationes, quas in hoc opere
Hagiophilæ impendi, & nolo, vt
prius illa in solitudinem ingre-
diatur, fructumque sancti huius
secessus iuxta directionem illi à
me propositam, degustet, quàm
intelligat, quid tibi debeam, &
quo iure tuus sim, cùm credam
hanc operam meam fore inuti-
lem, nisi prodeat sub tui nominis
auspicijs. Id verò à bonitate tua
expecto, vti has omnes paginas,
eòsque, qui illis vtentur, tuis
prosequi fauoribus ne dedigne-
ris, & vt me ab aris tuis non re-
pellas, si non satis expleo debi-
tum personæ tibi penitus deuin-
ctæ, quæque cùm in vno domici-
liorum tuorum sit, maximo iure
obstringitur, vt honori tuo la-
boret, præsertim post acceptum il-
lud

DEDICATIO.

Iud recens beneficium, quo me
ope tuâ benignissimâ à conta-
gione, quæ Lugduni grassata do-
mum hanc nomini tuo dicatam
periculosissimè cingebat, libe-
rum incolumémque conserva-
sti. Verùm quidem est: nisi amor
ipse aut pennam, aut verba sua
subministret, exprimi non posse
teneritudines affectuum, obli-
gationum, desideriorúmque ma-
gnitudinem, quibus ij, qui Ie-
sum amant & Mariam, in obse-
quia tua, & glorię tuę amplifica-
tionem rapiuntur; abstinere ta-
men idcirco non debeo, quòd
videam nihil adorandis tuis me-
ritis à me dignum adferri posse.
Beneficia, quæ à te accepi, quæ-
que in dies à paterna tua beni-
gnitate mihi conferuntur, minus

DEDICATIO.

non exigunt, quàm huius saltem
debiti testificationem; neque
erát causa, cur hic deessem,
quandoquidem pluris facio,
prosequi te reuerentiâ, amore,
& oblatione mei ipsius, quàm
Vniuerso imperare, & omnibus
hominum omnium delitijs vo-
luptatibùsque affluere.

Pro.

Propositum Authoris.

HAGIOPHILA, didici aliquando
à veteri, sed ingenioso scriptore,
ad sapientiam nihil aliud requi-
ri, quàm ut bene quis sciat unam personam
agere; eo quod multitudo negotiorum qua
amplectimur, & curarum varietas, qui-
bus nos intricamus, dissipat diuiditque mi-
serum cor, palàmque facit inconstantia
reum, dum iam illi iam alteri obiecto nos
non totos applicat; cum si unius tantum rei
occupatio in manibus sit, eadem rectè de-
fungamur, & aliunde liberi cogitationes
omnes conferamus in istud negotium, cui
vni intendimus. Hec lectio maximè est
proposito meo oportuna & ad rem eorum,
qua in usu huius libri à te exigo. Si igitur
tibi decretum est proposuis hisce Exercita-
tionibus vacare, unam tantum personam
agito, neq; alteri, quàm negotio salutis tuæ
& perfectionis incumbere. Huic per octo vel
decem dies impende omnes cogitationes,
& repuea te in semotissima Eremita dege-
re, ubi cum solo Deo & animâ tuâ loqui
liceat, Omni quidem tempore hanc agere
A 5 per-

PROPOSITVM

personam deberemus: verum quia vita no-
 stra ratio id non permittit, semel in anno
 saltem, optimo, quo potest, modo faciamus.
 In hisce Exercitationibus anima sanctita-
 tem addiscit, & veluti in munitione secu-
 rissima soli Deo placere contendit. Hic
 profectui suo utilissimam locat operam, &
 certiore, quam alias victoria proclines in
 malum affectus domat. In hac solitudine
 eximitur à vana inutilique hominum fa-
 miliaritate, & eorum vitiorum occursum,
 quæ conuersatione veluti contagione quâ-
 dam inficiunt: in hoc secessu maxima con-
 scientiæ puritate, & animi pace viuunt,
 ita ut nihil illius quietem possit perturbare,
 aut officere pulchris istis luminibus & soli-
 dis veritatibus, quas Deus extra tumult-
 um & impedimenta creatura suggerit &
 docet. Quod si huic inuitationi meæ obedis,
 & tali secessu afficeris, en me ad obsequia
 tua promptum, paratūque tibi huius li-
 belli officio deservire: neque alium appara-
 tum, quam ductoris munus prestabo, qui
 porrecta veluti manu aliquot dierum spa-
 tio te per actiones deducat, quæ iuxta Me-
 thodum

thodum à me in monitis generalibus notatam erunt instituenda. *Vi* verò tibi etiam perspectum sit propositum meum, ducam te hac solitudine per tres vias consuetas, *Purgativam, Illuminativam, & Vnitivam; iisque Meditationes, Considerationes & spirituales Dissertationes accommodaturus sum, ut si desit aliorum libellorum spiritualium copia, huius unius lectione possis aliorum defectum supplere: & quia hac Exercitia ad generalem vitæ nostræ renovationem instituuntur, non solum dicam, quid fieri necesse sit ad vitia vitæ præteritæ per annuam Confessionem emendanda, verum etiam quid fieri deinceps oporteat ad augendos Dei fauores, eiusque gratias copiosius consequendas, deductis Examinibus virtutum particularium, & alatis Deuotionibus præcipuis, ut cum, quæ desint, viderimus, redintegremus tandem serio anima nostra parvam œconomiam, eaque ratione omnia suauiter disponamus, ne mors imparatis obrepat; qui fructus præcipue his Exercitationibus intenditur.*

PROPOSITVM

Ita habes proximè, Hagiophila, scopum meum: nam quod ad titulum attinet, huic operi prafixum, & ad promptitudinem meam, quâ illud typis euulgo, post tot præclaros scriptores, qui me præcessere, non existimo lumen aliquod à te desiderari: patet idcirco vocari Solitudinem, quia qui illa uti volet, Solitarij personâ per aliquot dies agat necesse est, omni usu familiaritatêque aliorum, præterquam Dei, excluso: addere possem, quod esse in solitudine, & occupare se spiritualibus Exercitijs, idem omninò sit, si ad amorem loquendi ascetarum attendimus. Quod verò nuncupem Solitudinem Hagiophila, ideò est, ut ostendam hæc potissimum pertinere ad animas sanctitatis amantes, & ad eos, qui impensè statuunt in perfectionem incumbere, siue ij inter Religiosos uiuant, siue inter seculares: cum sanctitas ubiq; obuia sit, & tam hi, quàm illi possint eius fieri participes. Id superest, ut dicam, me non detrectauisse sequi scriptores alios, qui dignius hanc materiam tractarunt; quia cum gustus admodum differentes sint inter tot, qui annis singulis seponunt

AVTHORIS.

nunt alia negotia, ut anima sua vacent,
 tanto electio erit liberior; aut cum nihil
 gratius sit varietate, poterunt nunc esse in
 usu Exercitia praeclarorum illorum viro-
 rum, nunc aliorum, aliquando horum, ali-
 quando istorum, quae commodissima vide-
 buntur. Idem accidit animae gustui, quod
 linguae; Perdix bubulâ melior est: nihilo-
 minus eo sunt nonnulli appetitu, ut hanc illi
 praeponant, aut nunc huius, nunc illius gustu
 delectentur. Hagiophila, tibi eligendi li-
 bertas est; mihi sufficit hac tibi obtulisse:
 quidquid feceris, probabo: modò tandem
 eâ ratione animam tuam disponas, ut mor-
 te accedente omnia sint parata: seriùs
 enim illa dignoscitur, quando
 praeforibus est.



2

MONITA GENE- RALIA.

*Legenda pridie, quàm Exercitijs te
applices.*

HA **Æ** I O P H I L A, tanti momenti est
actio, quam suscipis, cùm tota ten-
dat in DEI gloriam, & animæ tuæ com-
modum, vt importunus videri possim, si
eam velim tibi commendare: satis ipsa
se commendat absque verborum leno-
cinijs & rationum adiecto apparatu.
Necessè tamen est, vt de quibusdam mo-
neam, quæ tibi reddant iter per hanc so-
litudinem & commodius, & vtilius ad
fructum illum, quem tibi proposuisti
consequendum: omnia facilia sunt,
ideóque magis amplectenda.

I.

Pridie Exercitiorum sic negotia tua
dispones, vt te sancto illo tempore non
distrahant, aut ea prius absoluendo,
quàm secedas; aut donec secesseris, dif-
ferendo. Illo tempore tanquam in de-
serto viuere volumus, vt maiori liberta-
te tantùm cogitemus de illo Deo amo-
ris

ris, quā totā æternitate de nobis cogitavit: ideo fieri nihil minus potest, quàm vt omnes curæ seponantur, quæ mentem possent ab illo auertere. Eandem ob causam nullius admittendum est alloquium, quàm Directoris, casu quo necessitas id exigat: quin & hoc parcè agendum & horis constitutis. Ista verò officia visitationum, salutationum, aue & valedictionum; commendationum in preces & sacrificia, illa obiter & perpau- cis dicta, illæ nouorum relationes, illi occursum affectati, & similia, quæ nonnunquam Iunioribus (qui exiguo sunt in DEVM affectu, & nimio in personas sibi similes abripiuntur) excidunt, omnino rescindantur, veluti penitus contraria isti animi decreto, quo statuere debemus, nulli nos placere velle, quàm sponso animarum nostrarum, maxime eo tempore, quod illi integrum dedicamus, vt illum nobis, & nos ipsos illi perfecte conciliemus: si contingat nos egere aliqua post sumptum cibum recreatione, fiat; sed cum ijs personis, quæ nos possint

possint occupare religioso sermone, nos solari, & stimulos ad virtutem adijcere, omnia ex eorum consilio, qui nos moderantur: quin primis duobus aut tribus diebus melius abstinebitur, vt nihil in mentem veniat, nisi detestatio vitæ antea actæ, & temporis inutiliter impensæ ex naturæ nostræ deprauatione.

II.

Procurandi sunt libri nostris vñsibus idonei, quales sunt vitæ Sanctorum, præsertim eorum, qui excellentius DEVM dilexerunt; Opera Rodericij de perfectione; Thomas de Kempis de Imitatione Christi; P. Pinellus de perfectione Religiosâ, alijque similes, quorum lectione potissimum capimur, & qui statui vocationique nostræ maximè congruunt, ita tamen vt ij solùm legantur, qui feriunt eor & pios sensus animis nostris imprimunt, non verò illi noui moris, qui potius auribus deliciâs faciunt, quàm cor perstringant: si tamen forent admodum spirituales, in vsu esse possent. Quod si contingat deesse libros tam vñles, in eo-

Generalia. 5

rum locum venire poterunt Dissertationes illæ, quas hîc inserui, vt explerem defectum aliorum, qui omnibus ad manum non sunt, & maximo tamen emolumento legerentur. Singulis diebus binas attribuo, quarum vna à prandio, altera à cæna relaxationis loco legi possit, modò suscipiatur integra exactaque solitudo, neque isto tempore lubeat cum aliquo colloqui: si tum non leguntur, nulla erit iactura, cùm aliàs resarciri possit; tam prolixæ non sunt, vt absolui nequeant eo tempore, quod spirituali lectioni destinatum est.

III.

Exercitiorum tempore requiritur inusitata Pietas, & deuotio: Primò visitando Venerabile Sacramentum, minimum quotidie quinies, vt illud adores, vt cor tuum cum otio illi pandas, vt feruentibus tuis precibus illud sollicites: si hæc visitandi commoditas desit, suppleri potest corpore in aliquam Ecclesiam, in qua asseruatur, conuerso. Secundò, frequenti inuocatione eius Sancti,

Monita.

ti, quem pridie tuorum Exercitiorum Protectorem, & Patronum elegisti. Tempus matutinum, quo Venerabile adibimus, eius inuocationi erit opportunissimum. Electio sit pro affectu & propensione, quâ in alios atque alios Sanctos feremur. Neque dubito, quin S. Ioseph, S. Alexius, & similes excellenti sanctitate Caelites, aliquê in hac Electione locum habituri sint; dedita opera S. Iosephum primò nominaui, quod singulari quodam subsidio adsit ijs, qui hanc solitudinem ingrediuntur; id saltem trīginta, & amplius annorum spatio, obseruauimus, neminem eorum, qui se, in Domo Societatis Iesv Lugduni, quæ ab illo nomen habet, Exercitijs spiritualibus excolendos tradidere, vnquam illo tempore, morbo fuisse afflictum, etsi plerumque mensis integer ijs impendatur; imò fuerunt, qui valetudinem etiam labefactam eâ Exercitatione persanârunt. Noui aliquem continuo capitis dolore vexatum, simul atque eam suscepit, ita conualuisse, vt felicissimè pere-

peregerit. Si tantam Sanctus iste operam confert corpori, quid non animæ præstabit? Tertiò, per amorosas Detestationes vitæ transactæ & tepiditatis, quæ nos & bonis maximis spoliavit, & in antiqua vitia egit præcipites. Commodissimè tamen id fiet quatuor primis diebus, qui Viæ Purgatiuæ annuæque Confessioni, de qua suo loco dicam, sunt assignati. Quartò, per Communionem, die Confessionis generalis, aut postridie; die ingressûs, aut exitûs Exercitiorum, aut alijs, quos Deus suggeret, & ij, quorum ductum sequimur, approbabit. Quintò, per quasdam corporis afflictationes, disciplinas, cilicia, cingula, armillas, abstinentias, ieiunia, mortificationes in quantitate, vel qualitate ciborum, iuxta facultatem nobis permissam, & vt feruor animi promptaque voluntas nos stimulat. Sextò, sancta constantique perseuerantia, quantum valetudo patietur, per octo, vel decem dies; maximè cum Paulus V. Religiosis plenam Indulgentiam addixerit, qui decem
totos

totos dies impenderint. Vnde materiam pro totidem diebus diuisi, in gratiam eorum, qui eò contendunt: ita tamen, vt quibus octo dies sufficiunt, in octauo consistant; quandoquidem huius diei Meditationes ad concludendum sint, æquè idoneæ, ac istæ aliorum duorum subsequen-
tium. Suadeo nihilominus, vt quisquis finit octauo die, reliqua nono, decimoque die præscripta, attentè postea perlegat: expendatque.

IV.

Verùm in his pietatis officijs potissimum requiro, primò, vt diligenter faciamus non solum Examina conscientie generalia, vt vocant, & particularia: vt rectè, quales simus, quidque nobis desit, discernamus; sed etiam illa Examina virtutum, quas in dies singulos propono, veluti speculum, in quo videamus nos parum in virtutibus promouisse, & vnde accendamus ad animas nostras Sanctorum operibus exornandas, cum firmo & generoso animi decreto vsurpandi eas pro Examine particulari, quibus

bus nos maximè indigere deprehenderimus. Secundò, vt quotidie assumamus tesseram aliquam spiritualement, hoc est, pulchram breuèmque sententiam, axioma luculentum, quod centies in die, in cubiculo, foris, eundo, redeundo, & quâuis aliâ occasione iteretur. Simile verbulum aptum est ad nos in diuino obsequio excitandos, subijciendumque illum animo ignem, quo sanctiores calent: conabor dare semper congruam materiam meditationi, quæ si palato tuo non arridet, plura sunt eiusmodi, quæ deligere tibi possis. Tertiò, vt sensu affectuque eodem expendas additas considerationes, quo Meditationes: cum experientia mihi probatissimum, illas tantundem atque has, & nonquam ampliùs efficere. Vt te tamen occupes eâ attentione, quâ Oratio peraguntur, non est opus; imò liesto situs corporis, aut stes, aut seas, aut etiam deambules per cubiculum, vt placidè commodèque notata puncta perpendens & ruminans, acceden-

dentibus Spiritûs sancti illustrationibus plurimos affectus & optima ad proficiendum, & ad animæ tuæ tranquillitatem & solatium proposita elicias. Quartò, vt quotidie innoues propensam tuâ voluntatē erga salutare quasdam praxes, in quibus per omnem vitam exercere te decernis; qualis est deuotio erga Augustissimam Trinitatem, B. Virginem, & aliæ, quas tibi in memoriam reuocabo. In eam rem seruire possent: *a. Paradisus apertus; sanctus apud IESVM fauor; vtile cum celestibus foedus*, quæ sunt tria opuscula à me tibi elaborata, quæque deuotiones proponendas reddent expeditiores.

*a. Le Paradis ouvert; la sainte faueur
aupres de IESVS; la riche alliance avec les
saincts de Paradis.*

§. V.

De Intentione, quam in hoc secessu habere oportet, quæque alia esse non debet, quàm vt imperfectiones nostras corrigamus, nouumque robur ad virtutes, maximè Amorem Dei comparandum

dum resumamus; de electione personæ, quæ nos dirigat, iuuet, soletur, cuique omnes difficultates nostras pandamus, uti è re nostra esse videbitur; de communi illa Instructione, ne Meditationes, aliæque hîc proposita ex curiositate percurrantur, sed ut legantur tum studiosè, quando ijs utendum est; utque inter meditandum illi maximè puncto inhæreamus, quo nos vehementiùs affici aduerterimus, deque alijs similibus: quorum pleni sunt libelli, qui artem meditandi docent, nihil est, quod dicam. Mihi cum Hagiophila rerum omnium istarum peritâ sermo est. Quantum ad materiam Meditationum, quam accipio, ne illam quidem video hîc collocandam, uti neque Dissertationum, quòd suis omnibus locus deputatus sit, aut in Tabella præmissa in gratiam eorum, qui anticipata nosse desiderant, videri poterunt.

VI.

Quod ad temporis distributionem spectat, difficile est talem præscribere, quæ omnibus arrideat, & singulis vsui esse

esse possit, quandoquidem sint, qui tres tantum Meditationes in diem desiderant, alij quaternas velint; nonnulli septem horas somni requirant, alij octo; nonnulli Communitatis legibus ratione statûs sui adstringantur, alij liberi sint; spero me tamen omnibus facturum satis, & æquus videri possum, cum cuiusque postulatis assentiar. Qui octo horas quietis exigit, habeat; tantum coarctet tempus Lectionum, aut Orationum vocalium, & cuncta in idem recident. Magnum à corpore obsequium expectamus, cedamus illi hunc somnum, blanditijs illud obstringamus; ob rem tantillam ne reddamus illud languidum ineptumque, neque efficiamus, ut toto die cogatur oscitare. Quoad Meditationes, existimo ternas sufficere, cum Consideratione, quæ si benè peragatur, quartæ Meditationis vicem & fructum præstabit: si quaternas vis, & satis firmo capite es, permitto, quartam facias ex duarum præcedentium Repetitione, quod tanopere in suis Exercitijs laudat
S. Igna-

S. Ignatius, & numerum tuum habebis. Superest vt dicam, quid agendum tibi sit, si viuïs in Communitate, quæ cibum capit aut seriùs, aut citiùs; accommoda te alijs; ante cibi sumptionem expedi, quæ post fecisses; aut postea fac, quæ priùs voluisses expeduisse, ita tibi erit satisfactum; quo etiam modo facies aliquâ die ieiunij, præsertim Lectionem, aut Examen virtutis, cui aliàs postea vacasses, & sic de cæteris: promoue, aut remoue, produue aut contrahe, vti occasio exiget: vtinam hæc in tuis exercitijs maxima sit molestia! & æquè facile te totam consecres, atque hæc difficultas composita est! prælagit enim animus, multa te tergiuersatione vsuram prius, seriò quàm te dones. Falli nihilominus velim, & iudicio errare.

VII.

Loquamur de ista distributione temporis, & ordinem, qui teneri debet, videamus. Viginti quatuor horas quotidie habemus, quæ disponendæ sunt. Octo iam tum quieti assignauimus: tres

B

Medi-

Meditationibus, vna considerationi debetur, vna duplici refectioni, duæ vtrique recreationi à prandio & coenâ; duæ Lectioni spirituali, nisi, cui septem horæ somni sufficiunt, tertiam addere placeat, Vna tum pro sacro, tum pro duobus conscientiæ Examinibus, vna pro Oratione vocali partim matutinâ, partim pomeridianâ iuxta cuiusque obligationem, aut peculiarem erga Rosarium aut Officia B. Virginis, S. Iosephi, Angeli custodis, & aliorum Sanctorum deuotionem; vna pro animi relaxatione, quando à meridie fieri licebit, aut alio negotio, quod maximè videbitur, siue ad corporis aliquam exercitationem, laborando aut in horto deambulando, siue ad conferendum cum Directore, siue ad vtrumque, aut aliud, quod ex vsu tuo erit. Vna detur tum Examine virtutis, quam hodie proponam, tum decernendæ, aut exercendæ alicui deuotioni, quam notabo Vna pro semiquadrantibus, vel quadrantibus horæ, qui requiruntur tum ad recollectionem post Meditationem.

ditiones faciendam, tum ad eius præparationem; tum ut quis se vesperi ad quietem disponat, tum ut mane se vestiat. Atque hæc omnia, si numerandi artem rectè calleo, proximè horas viginti quatuor conficiunt, id est, diem integrum. Si quid subinde temporis vacuum est, impendatur visitando Venerabili, aut legendo Thomæ de Kempis, aut Pinello, libro temerè aperto; aut luminibus, quæ Deus immiserit, describendis; aut Orationi pro tuis benefactoribus, aut relegendis hisce monitis, & Authoris proposito, aut tesserae centiescentiesque repetendæ, quæ dico, ne nihil omittam, & ut tradam tibi diem bonis operibus refertum: offerens tibi ultimi moniti loco, ut cum priuilegium sit tui secessus, statim & è vestigio adeas ad Sanctissimum Sacramentum, ibique roges diuinam bonitatem, ut in opere tanti momenti tibi adesse ne dedignetur, illique pandas animi tui decretum, quo aliter, atque hactenus, illum statuis amare, & complecti.

TABELLA
MATERIALIARVM HOC OPERE
CONTENTARVM,

**PRIMO DIE EXERCITI-
 TIORVM.**

De Fine, propter quem creati
 sumus.

I. Meditatio. *De fine, & beneficio Crea-
 tionis nostrae.*

II. Meditatio. *De Amore, quem reddere
 Deo debemus.*

III. Meditatio. *De Servitute, quam de-
 bemus Deo.*

I. Dissertatio. *De fructu Solitudinis cum
 vita communi consistentis.*

II. Dissertatio. *De spiritu secessus, & col-
 lectionis interna, qua est vera, & ap-
 petenda Cordis Solitudo.*

Consideratio pro primo die.

*Examen circa Amorem & Charitatem
 Deo debitam.*

SECUNDO DIE.

De Detestatione vitæ anteaactæ.

I. Meditatio. *De horrore peccati mortalis.*

II. Meditatio. *De conditione peccatorum venialium, & quanto ea studio declinanda sint.*

III. Meditatio. *De fructibus vera penitentia.*

I. Dissertatio. *De Confessione annua & extraordinaria.*

II. Dissertatio. *De Examine ad Confessionem annuam directo.*

Consideratio.

Examen de Amore, & Charitate proximis impendenda.

TERTIO DIE.

De miserijs vitæ tepidæ, & in Dei servitio languentis.

I. Meditatio. *De miserijs & damnis vitæ tepidæ.*

II. Meditatio. *De damnis, quæ proveniunt*

niunt ex actionibus tepide & ex consuetudine factis.

III. Meditatio. *Motiva ad fervorem & perfectionem consequendam.*

I. Dissertatio. *De Confessione ordinaria.*

II. Dissertatio. *De spiritu fervoris erga actiones etiam heroicis.*

Consideratio.

Examen de diligentia spiritali.

QUARTO DIE.

De ijs, quæ homini in extremis
accidunt.

I. Meditatio. *De Morte.*

II. Meditatio. *De Iudicio particulari.*

III. Meditatio. *De Purgatorio.*

I. Dissertatio. *Plurimum referre, perspetas esse Mortis qualitates.*

II. Dissertatio. *Prodesse ad bene moriendum. Tempus utiliter impendere.*

Consideratio.

Examen circa Humilitatem.

QVINTO DIE.

De virtutibus in Infantia, & vitâ latente
Seruatoris nostri imitandis.

I. Meditatio. *Quòd Deus nobis dederit
Filium suum, ut eius virtutes imi-
temur.*

II. Meditatio. *De Paupertate Filij Dei
Infantis.*

III. Meditatio. *De vita occulta Filij Dei.
& eius obedientia per annos octode-
cim.*

I. Dissertatio. *De particularibus Amici-
tijs.*

II. Dissertatio. *De felicitate vitæ occultæ.*

Consideratio.

*Examen circa Simplicitatem & candorem
Animi.*

SEXTO DIE.

De virtutibus imitandis in vita Aposto-
lica Christi IESV.

I. Meditatio. *De Humilitate Filij Dei.*

B 4 II. Me-

II. Meditatio. *De Comitatu & Mansuetudine eiusdem.*

III. Meditatio. *De Zelo Filij Dei erga salutem animarum.*

I. Dissertatio. *De Mansuetudine.*

II. Dissertatio. *De respectibus humanis.*
Consideratio.

Examen circa Mansuetudinem.

SEPTIMO DIE.

De virtutibus in Passione & Morte Christi imitandis.

I. Meditatio. *De Resignatione Filij Dei tempore Passionis.*

II. Meditatio. *De Amore eiusdem erga proximum.*

III. Meditatio. *De Patientia Filij Dei.*

I. Dissertatio. *De Mortificatione.*

II. Dissertatio. *De Lingua.*

Consideratio.

Examen circa Patientiam.

OCTAVO DIE.

De Amore, quem Deo debemus.

I. Meditatio. *De Motibus ad amandum Deum.*

II. Meditatio. *De Conditionibus veri Amoris Dei.*

III. Meditatio. *De Exemplis Sanctorum in amando Deo.*

I. Dissertatio. *De curâ minimorum.*

II. Dissertatio. *De felicitate Vocationis Religiosæ.*

Consideratio.

Examen circa tria vota Religionis.

NONO DIE.

De Conformitate nostræ voluntatis cum Diuinâ.

I. Meditatio. *De incitamentis ad conformandam nostram voluntatem cum diuinâ.*

II. Meditatio. *De excellentijs & prerogatiuis huius conformitatis.*

III. Meditatio. *De Exemplis Sanctorum in hac Conformitate.*

I. Dissertatio. *De damnis voluntatis propriae.*

II. Dissertatio. *De felicitate eorum, qui se Deo totos tradunt.*

Consideratio.

Examen de Sobrietate.

DECIMO DIE.

De Amore erga Venerabile Sacramentum.

I Meditatio. *De Amore, quem Deus in Venerabili Sacramento nobis testatur.*

II. Meditatio. *De Amore, quem nos Venerabili Sacramento debemus.*

III. Meditatio. *De tribus admirandis qualitatibus Venerabilis Sacramenti, qua nobis illud reddunt amabilem.*

I. Dissertatio. *De Communione.*

II. Dissertatio. *De desiderio Sanctitatis & perfectus spiritualis.*

Consideratio.

Examen de Modestia.

nos ad Te. Requiem est cor
nostrum donec requiescat in Te. Aug.

I



T. Hefman delin.

W. Hillan sculp.

PRIMVS DIES

EXERCITIORVM.

*De Fine, propter quem creati
sumus.*

CVM deceat ante omnia emundari animas nostras, & tolli, quidquid mali residet in nobis, dabis, Hagiophila, hunc & tres proximos dies viæ Purgatiuæ; inde ornabis te virtutibus ex consideratione triduana Vitæ & Exemplorum, quæ nobis Seruator noster proposuit; atque hi dies ad vitam illuminatiuam pertinebunt. Reliquum quod erit temporis, impendes, vt te vnias dilectissimo sponso animarum nostrarum, idque per semitas viæ vnitiuæ, quibus te deducemus. Hæc agenda tibi sunt, quamdiu in ista solitudine delitesces.

Hoc die, quod neque reliquis diebus negligentes, primùm saluta Venerabile Sacramentum, si domi tuæ illud asseruatur: ab hac visitatione præpara te sequenti Meditationi.

PRIMA MEDITATIO PRIMÆ DIEI.

De fine & beneficio nostræ Creationis.

O Rationem præparatoriam in hac Meditatione, & reliquis omnibus comitetur profunda animi demissio, quâ postules à Deo gratiam, ut hora Meditationis benè & cum fructu impendatur, utque omnes animæ potentia ritè munere suo defungantur; Memoria, suggerendo quidquid facit ad propositam materiam, Intellectus, penetrando occurrentes veritates; voluntas resolvendo se ad ea, quæ ad maiorem Dei gloriam, & utilitatē tuam esse videbuntur.

I. *Praludium.* Imaginare regem aliquem, qui è vilissimo Pago eductum rusticellum Aulæ suæ non tantum proponit, verum etiam inter intimos adoptatum ijs afficit honoribus, diuitijs & favore, qui solis Regni primatibus donari consuevère.

II. *Proludium.* Pete lumen à Deo, ut cognoscere possis gratias, quas te creando tibi contulit; cum ex sine compara-
tione

tione maiores sint, quam si Rex aliquis te de luto & fimo sublatam ad summos honores & gloriam euexisset.

1. *Punctum.* Creauit Deus animam meam eo fine, vt illum amem, eique feruiam; & vt eum amando eique seruiendo fiam capax gloriæ celestis, vbi eum videam, & amem æternum sine vlllo vltius mali periculo, imò in possessione, omni boni, & felicitatis. Non alium ob finem in mundo sum. O quantum hinc debeo sic amanti Creatori! Angeli propter illum sunt, & ego, Maria sanctissima illius Mater, & omnium creaturarum rerum nobilissima est propter illum, & ego. Deus ipse non alium sibi propositum finem habet, quàm seipsum, ipse & meus finis est. O anima mea, inter creaturas omnes ingratiſſima es, si tanti beneficij magnitudine non tangeris. Es perfidiſſima, si non persequeris finem tuum: si non istud agis, propter quod in Mundo es. Ipsum cælum, ipse sol, ipsa Elementa & Creaturæ omnes Deo obtemperant, & ad finem suum contendunt,

dunt, præter te vnā, ô anima mea! sed non sic impoſterum. Actum eſt, Deus meus, nolo amplius eſſe de numero rebellium tuorum: nolo alias deinceps cogitationes, nolo intentiones, quæ non ad ſeruitium tuum dirigantur.

II. Punctum. Quando Deus creauit animam meam è nihilo, poterat creare infinitas alias, quas tamen in nihilo ſuo reliquit, neque vnquam educturus eſt. Ah anima mea, quo tuo opere diuinam bonitatem excitaras, vt hoc tibi beneficium conferret? & nunc quantum illi debes propterea? an non conſtantem animi gratitudinem, ſeruitium & amorem? ſed hæc fortasſe cogitatio animum tuum hætenus non pupugit, pungat ſane impoſterum; & iam nunc obſtupeſce hanc amabilem bonitatem, hoc opus amoris incomparabilis, quo te Deus dilexit, dum eſſe te voluit, tot alijs in ſuo nihilo relictis.

III. Punctum. Quando Deus ex nihilo produxit animam meam, inter innumeras illas, quas creare poterat, &
quas

quas tamen nunquam producturus est, fuere plurime, quæ me fidelitate, sapientia & sanctitate superassent; quæ illum amassent ardentius, quæ minus offenderent, quæ maiora pro illius honore, perpetrassent; & nihilominus ijs neglectis meam selegit, ut illam crearet, & huic corpori commodaret. An non dolendum est, tot tamque præclaras animas, quæ tanta vitæ sanctitate, tanto in Deum suum amore floruisent, creatas non esse? nonnullæ sine dubio illarum æquassent S. Tereſiam, aliæ S. Catharinam Genuensem, aliæ S. Benedictum, S. Ursulam, S. Ignatium; alios aliæ virtutibus etiam anteiuisent. O anima mea, cum locum illarum occupes, an non deceret te vivere eo ritu, quo aliqua illarum vixisset? quid igitur decernis imposterum, qua ratione vivere statuis? Aperi mentem tuam Creatori tuo, & tanti beneficij magnitudinem solidis propositis & resolutionibus adæqua.

Colloquium. Primò age gratias SS. Trinitati pro beneficio Creationis. Se-

cun-

cundò roga Beatissimam Virginem Ma-
 trem, quæ tam singulariter in finem suū
 tetendit, vt tibi adsit in propositistuis.
 Tertiò recurre ad aliquem Patronum
 tuum his similibusue verbis: sic est, Pa-
 trone mi, vitio meo accidit, quòd tibi
 similis non sim! vtinam parem amo-
 rem, parem humilitatem, & parem fan-
 ctimoniam haberem! Pater, Aue.

Peracta Oratione instituenda Recollectio
 est, & quædam reuissio Meditarionis.
 quomodo successerit, quem fructum
 hauseris, qui defectus sese insnuarint.
 Fieri potest deambulando per cubicu-
 lum, aut alio quouis commodo corpo-
 ris situ: plerumque illi medius quadrans
 impenditur. Concludes illam denique,
 deprecando defectus, qui in Oratione
 admissi sunt, & pollicendo vsum eorum
 luminum, quæ tibi Ds vs largitus est,
 eorūque propositorum, quæ conce-
 pisti.

A Recollectione deliges tibi Tesseram ali-
 quam spiritalem, quam in die vsurpes
 seruire tibi hodie potest illa D. Angu-
 stini D E V M alloquentis: *Vo tempore illis*
de quo non amari et. Illam extemplo de-
 gies itera, ac deinde quoties per diem

Iubes

lubebit; lubeat verò frequentissimè & ubique, vt animum tuum teneat occupatum, suggeratque tibi suaves conceptus & amantia ad illum suspiria, quem heu! serius amasti. Si hæc tessera tibi non arridet, aliam tu delige, ista hoc & sequentibus diebus arbitrio tuo commissa libertas est; sed delige pulchram, piam & breuem, & plus centies in die repete. Aliud eiusdem D. Augustini dictum: *Domine, inquietum est cor nostrum, donec requiescat in te*, affectu plenum est, & huic diei opportunum. Vide an præ alterâ tibi sapiat.

Sequitur Oratio vocalis, aut officij ex obligatione recitandi, aut Precum aliarum siue Rosarij, siue Officij B. Virginis aut S. Iosephi, aut alterius,

Hinc ad sacrum te præpara & Communio: nem, si forte ea frui felicitate debeas.

A Sacro lege librum spiritualem, aut hanc subiectam Dissertationem, (nisi malis illam differre in tempus recreationis post sumptum prandium) aut aliud ali- quid, prout tibi post Dissertationem designabo.

DISSERTATIO SPIRITVALIS
MATVINA.

*De Fructu Solitudinis cum vita com-
muni consistentis.*

H Agiophila, cùm iam in solitudine
sis, & paruo cubiculi tui deserto;
patieris me tribus verbis excurrere in-
comendationem vitæ solitariae, vt tantò
facilius tui secessus felicitatem agno-
scas, vtque deinceps maiore animo sta-
tuas subinde in Eremum conuertere
cellulam tuam, quod medium præsen-
tissimum est, ad illam cordis solitudinē
& collectionem internam, in qua rerum
spiritualium Magistri plurimum mo-
menti ad profectum animarum consti-
tuunt, acquirendam. Nunc de priore,
seu externa solitudine agamus, à pran-
dio de altera tecum disseram.

Iam nunc securus sum, tibi futuram
cordi hanc vitam: qui enim animo per-
pendit suauem conditionem solitarij, &
deserti delicias, non potest non propen-
sissimo affectu in solitudinem inclinari.

S. Hieronymus, si quis alius degustaue-
rat voluptatem omnem, quæ posset ex
hominum usu & familiaritate proueni-
re: ille tamen ipse, simul atque auram
deserti delibauit, ah! nemo, inquit, mihi
ingerat vrbium frequentiam, conuersa-
tionem hominum, foeminarum occur-
sum, & similium creaturarum impor-
tunitatem; nullus cum solitudine con-
ferri locus potest: hic mille molestijs ex-
emptus sum, hic occasionibus Deum
offendendi careo, hic secretò & ex ani-
mi sententia cum Deo meo conuersor.
Nullus interpellator auocat, nulla red-
hibenda sunt officia, nullis litteris pe-
tor, quibus respondere sit opus, nulli at-
tendere necesse est nisi Deo & mihi: de-
nique hic delicias omnes reperiò, hic
cælicas prælibo voluptates. *Oppidum
mihi carcer est, & solitudo Paradisus.*
Et reuera solitudinem gratam esse oportet,
cum S. Ioannes Baptista ab incu-
nabulis eam adiuerit, pluribusque an-
nis coluerit, ille, inquam, inter natos
mulierum maximus. Sancta Magdale-
na,

na, etsi singulari iam gratia valeret apud Christum, aliam sedem non elegit, & sic triginta annos, qui reliqui erant vitæ, voluit transigere. Carolus huius nominis postremus Imperator, postquam regnâ suâ in Philippum filium derivasset, eandem non minore gloriâ, quàm animi voluptate amplexus est, vt annalium nostrorum scriptor asserere audeat, Carolum maiorem fuisse in sua Eremo, quàm in Imperio. Eius nepos Philippus Tertius reipsâ quidem id non præstitit, sæpius tamen in hæc verba prorupit morti vicinus (quantumvis vitam duxisset innocentem) vtinam Corona caput non cinxisset! poenitet fuisse Regem! meliùs in aliquo deserti angulo, extra mundanorum negotiorum tumultum, extra commercium hominum vixissem. Nondum lubet, Hagio-phila, centies iterare? viuat desertum, viuat solitudo! id tamen à te modò non exigo, non adeuntur amplius deserta; extra vsum iam eæ solitudines sunt: ad aliam te magisque commodam inuito;

nmi-

nimirum ad Cellule, ad Cubiculi, ad domus tuæ solitudinem, in qua subinde à cæterorum hominum commercio se iuncta cum Deo & Angelo tuo tutelari sola verferis. Neque auctor sum, ut illic te semper contineas, sed quantum poteris, & quantum id officium tuum & occupationes patientur. Si seruitio diuino mancipata es in domo religiosa, singulari affectu cellulam tuam complectere. Ne sis ex eorum vagorum, inquietorum, & libertinorum numero, qui in angulis omnibus reperiuntur, ad portam frequentissimi, ut obseruent intrantes exeuntesque, ut quid fiat, quid dicatur, explorent. Tu in cubiculo tuo te contine, & ama secessum & solitudinem, quando id temporis ratio exigit; ne per domum vaga discurras, sed ex cubiculo tuo paruulam Eremum construe. Si verò secularis es, secede in conclaue tuum, minimum semel iterumque per diem, potius quàm ut curiositati tuæ ad portam, in fenestris, in horto facias satis. Recipe te ad orandum, ad cogitan-

dom

dum de diuinis tuisque rebus, ad legendum libellum aliquem spiritalem, age denique Eremitam, ex animo, vt insignem aliquam sanctitatem consequaris, fruarisque Solitariorum felicitate, vnâ saltem quotidie horâ.

A multis studiosè inquiritur: vbi nam locorum aër sit saluberrimus, suauissimus, iucundissimus? alij asserunt in monte Olympo, alij in Arabia felici, alij alia loca assignant: quisque quod volet definiat, mea sententia est, aërem cellulae esse saluberrimum, suauissimum, & maximè vtilem illi, qui magnos facere in virtutibus progressus, se Deo penitus tradere contendit, & quidni? post Choros, Ædículas & Tempia, in quibus seruator noster quiescit, nihil reperio augustius, nihil præstantius cellulâ & conclauis alicuius probæ animæ, modò in illud tanquam dilectissimam suam solitudinem subinde se subducatur. Vt dictis fidem faciam, audi, Hagiophila, opinionem meam de cellulae tuæ excellentijs: quid illam esse arbitraris? E-

remus

remus est paruula in medio Ciuitatis
alicuius, in qua tu anachoretam agis,
quamdiu tibi libuerit illic commorari.
Illic sine teste peragis tua pietatis opéra,
tuas deuotiones, nemine obloquente;
illic humiliter terram deoseularis, illic
adoras seruatorem tuum, eiusq; vulneri-
bus labia affigis, quod alibi, & in homi-
num oculis non auderes. Illic oculos in
Cælū extollis, iungis manus, pectus pul-
sas absq; metu humani respectus, eiusq;
pessimi verbi, *quid dicetur?* denique agis
illic omnia, quæ solitarius in eremo sua
perageret. Quid enim obstat? Quid Cel-
lula? conclaue est diuini amoris: in eo
mille suspiria iacularis in cælum, in di-
lectum sponsum tuum, nemine, extra il-
lum, conscio; in eo pandis illi minutulas
molestias tuas, amantia vota tua, inno-
centes & castos affectus tuos, in eo cum
sanctissima eius Matre misces sermones,
cum Angelis, cum illius intimis, ad eius
gratiam & fauorem promerendum; in
eo extra omnem garriendi, nugandi,
murmurandi, detrahendi, mentem tuam
dissi-

diffipandi, tempus & conscientiam prodigendi occasionem constituta, illum, amanti gratoq; animo compellare potes, & dicere: O felicem; Deus meus, cui ad te offendendum defunt irritamenta! Quid censēs esse cellulam? ex mente Diui Bernardi Cælum est. *Cali & Cella, inquit, habitatio cognata; Cella & Cælum cognationem habent nominis, sic & pietatis Cælum dicitur à celando, & quod celatur in calis, hoc & in cellis; quod quaritur in calis, hoc & in cellis, nempe vacare Deo, frui Deo; Angeli Dei cellas habent pro calis & aquè delectantur in cellis atque in calis, à cella in cælum ascenditur. Cella terra sancta est & locus sanctus, ibi anima Deo iungitur. Quid gloriosius dici potest in commendationem solitudinis, quæ in cellæ custodia habetur? quid optatius, quàm in via esse, qua ad cælum itur? à Cella ascenditur in Cælum. Cætera prosequamur: Cubiculum (præsertim animæ virtutibus deditæ) Tempellum est, & sacra ædicula, cuius, qui in illa comoratur, sacerdos est,*

&c

& administer. Oratorium vicem subit-
aræ principis, Imagines & picturæ Chri-
sti cruci affixi, & B. Matris, aqua lustra-
lis non defunt : eadem prope peragun-
tur, quæ in Ecclesijs, imò teste eodem
Bernardo: *In templo & in cella diuina tra-*

clantur, sed crebrius in cella. Cubiculum
est hortus deliciarum, & area præstan-
tis animæ: hic illa recreat se suauissimo
vfu piarum cogitationum; nunquam in-
nocentiùs suis affectibus indulget quàm
quando sola est, & à creaturarum tu-
multu seiuncta. Nimirum *Cogitationes*

robusti semper in abundantia ait sapiens,
& vt alij vertunt : *Cogitationes collecti.*

Qui enim Collectus est, & secessum au-
ramque cubiculi sui diligit, sanctis &
pijs cogitationibus abundat. Cubicu-
lum est Tablinum animæ, vbi illa rei suæ
spirituali attendit, vbi omnia ad calcu-
los & rationem reuocat; expendit quid
habeat, quid desit; vbi de componendis
suis imperfectionibus, vitijs & affecti-
bus deliberat. Solitudo similibus actio-
nibus maximè idonea est, cùm per eam

animus in se facile reducatur. Huius opinionis etiam fuere Ethnici, ex quibus Poëta canit: *Tecum habita, & norio quam sit tibi curia supellex.* Conclaue est illi, qui eo veluti solitudine quadam delectatur, non conclaue, sed aula congressus & colloquij cum Angelis & sanctis. Quantumvis illic quis solus sit, optima tamen Societate stipatur, minimum quatuor personarum, Patris, Filij, Spiritus Sancti; & Angeli Tutelaris. Vt merito dici hic possit: *Numquam minus solus sum, quam cum solus*, cum fruatur eorum consortio, quorum vnus multis millibus mortalium antecellit, & verò sum cum tanta satisfactione illius, qui cor meum possidet, vt si alius interpellator se ingerat, præpediatque solitudinem meam ægrè laturus sit, & consuetos fauores subtracturus. Vir sanctitatis fama celeberrimus singulariter Annuntiatis Bituricensibus commendabat, vt ab ingressu cubiculi alieni abstinerent, quòd à Religiosa didicisset: IESVM illam inuisere solitum, noluisse amplius reuer-

uerti, postquam nonnullas alias in suum cubiculum admisisset; factiq; rationem addidisse: quòd sponsus probè zelotypus sit sponsæ suæ, neq; alteri, quàm sibi præberi aditum patiatur. Conclaue, si illud diligis, arx est aduersus hostes munita æque atque secura. Tribus fortissimis & molestissimis inimicis nos impetiaiebat S. Antonius, Oculis, Auribus, & Lingua. At si Cellam meam custodiam, cum neminem videam, nihil audiam, & silentium accuratum sit, summa fruor tranquillitate & pace. Denique Cubiculum Paradisus est, & quietis locus, de quo iure meritissimo idem dicere possumus, quod Hieronymus de suo deserto: *Mihi cetera carcer, & solitudo Paradisus*. Id saltem non ignoro, pientissimum Thomam de Kempis non alibi, quàm in Cella securiorem quietem, maiusque solatium inuenisse. Verba illius sunt, quæ grandioribus descripta characteribus tibi semper ob oculos versari deberent: *In omnibus requiem quasi in & non inueni, nisi in angello cum libello*. Ha-

giophila, nonne iniurius tibi fuissem si te celassem singulares illas prærogativas, & felices excellentias, quas ex cubiculi tui solitudine consequi potes? satis dixisse me puto, vt te eius amore inflammarem, & vt cognosceres, magno sibi damno esse eos, qui continere illic se nequeunt, seque cuiusvis obuij arbitrio indulgent. Nonne felix es, quod per dies aliquot te ad Cellæ tuæ solitudinem obstrinxeris? si me audis, præstabis idem annis singulis. Imò amplius, singulis mensibus integrum aut medium diem delige, quo Eremitam agas, & seclusis tantillo tempore negotijs omnibus, nullam aliam, quàm de Deo & conscientia tua cogitationem admittas. Principio cuiusque mensis tempus ad hoc opportunissimum est, vbi fructus referes eximios; saltem perspicies statum animæ tuæ, num in propositis tuis fueris constans, num ad mortem, quæ magnis passibus accedit, sis præparata. Atque is affectus annuæ & menstruæ secessionis procedet à quotidiana illa cellæ cu-

læ custodia, quam hac differtatione proposui. Quo ut efficacius te permoueam, finio verbis elegantissimis S. Bernardi : *O anima sancta , sola esto , ut soli omnium serues teipsam , quem ex omnibus tibi elegisti; fuge publicum, fuge & ipsos domesticos. An nescis te habere sponsum verecundum , qui nequaquam suam tibi velit indulgere praesentiam, praesentibus ceteris ?* Quî monitum hoc arridet ? optimè iudicio meo facies, si fidem adhibes verbis tanti Abbatis, & Spiritui Sancto, quoties te interno instinctu ad cubiculum inuitauerit, obtemperas. Simul atque ea cogitatio in animum tuum incurrit, recipe te, quamcumque societatem interrompe, nullo habito hominum respectu, desere omnia, nisi muneris tui ratio aut obedientia alibi te habeat occupatam. Imitare Thomam de Kempis, qui impelli se sentiens, ut in cellam orandi vel scribendi gratia se reciperet, planè fratribus dicebat, & ijs quibus cū versabatur: *Charissimi Fratres, oportet me recedere; est enim in Cella, qui me exspe-*

Stat. Cellam verò ingressus demittebat sese in genua, opusque suum his Samuelis verbis: *Loquere Domine, quia audis seruum tuum*, auspicabatur.

Habes, Hagiophila, Dissertationem, quam tibi promiseram; si aliam lectionem desideras, lege priora quinq; capita primi Tractatus Rodericij in prima parte: Aut nonum, decimum & vndecimum caput libri tertij de Imitatione Christi.

Absoluta hac Lectione renoua proposita tua circa deuotionem, quam debes Augustissimæ Trinitati; hæc deuotio deuotionum est, quam tibi præ reliquis omnibus comendo, præsertim, vt sapius iteres Gloria Patri, &c. & actiones tuas bonaque opera facias numero ternario in honorem trium diuinarum Personarum. Et ne cogar dicta repetere, vide nunc (si otium est) aut à meridie tempore recreationis, quæ de ea deuotione dixi in Sancto Fauore apud Iesum Cap. 7. præcipuè prima & quarta Deuotione, & Statue maiore quodam affectu quàm hactenus, ferri in hoc sacrum mysteriū.

Deinde para te ad Meditationem sequentem: cum enim ad amandum & seruendum Deo conditi simus, vt eo sic aliquando perfruamur, sciri necesse est, quid

quid sit eum amare, quid illi seruire & circa ea etiam binæ Meditationes versabuntur, quas adhuc hodie peragi oportet.

II. MEDITATIO.

De Amore, quem Deo debemus.

Oratio præparatoria vt suprâ.

P*Pralud.* I. Imaginare bonam aliquam & prudentem Matrem, quæ Filiam ad Amorem sollicitat, cuique respondeat Filia, se officio suo nunquam defuturam, eò adigi pluribus nominibus, in illam vnâ tendere omnes affectus suos.

Pralud. II. Roga Deum, vt cum similia à te postulet, det tibi lumen, vt agnoscas immensum illud desiderium, quo amari cupit à te.

I. Punctum. Deus nos condidit, vt eum amemus, & vt amemus præcipit. Considera Amorem illum titulis omnibus ei deberi: tum quia Pater noster est, cuius beneficio viuimus & sumus. At quid naturæ conformius, quàm amare Pa-

rentem? tum quia noster benefactor est, qui de victu, vestitu, habitatione, de omnibus denique prouidet nobis; at quis ita naturam exuit, vt eos non diligat, quorum beneficijs fruitur? tum quia Princeps noster est, & Dominus & Rex eius clementiæ & affectus, vt maximè velit nos participes & hæredes efficere Regni sui & cælestis & æterni; at quis non ferret in oculis eum Principē, quem sciret amicis suis talia destinare? Hisce omnibus titulis & alijs Deus amandus est. O amabilissime Creator qui potes omnia, iube vt te amet cor meum, & da quod iubes, rebellem meam compellendo voluntatem! ô mi sint corda mille & millies mille, eaque omnia plena, ijs affectibus, quibus abundauit cor maximi Sancti tui, vt desiderijs meis & meritis tuis respondeat amor meus.

II. *Punctum.* Deus amari vult, sed sine modo & mensura, id est ex toto corde: cùm enim cor nostrum, etsi exiguum, semper possit amorem suum dilatare, non vult terminum Deus; neque

que vnquam dicat amans, sufficit, & hucusque, non vltra amare illum volo. Primò, quia aliter tractandus est Deus, quàm res ab illo creatæ: atqui in his amandis modus est: *Diliges proximum tuum, sicut teipsum*: en mensuram. Secundò, Deus infinitè amabilis est: cùm ergo reponere amorem non possis infinitum & reciprocum, quod præscribunt amantium leges, repone quàm potes maximum, continuâ noui amoris accessione, vti S. Augustinus, S. Franciscus, S. Tereſia, & tot fecere alij. Confundi igitur meritò hîc potes anima mea, quæ toties mensuram præfixisti amorì tuo, dum diceres, id quod patrabas non omninò esse mortale, esse ex leuioribus venialibus; istud consilium, istam regulam, istam ordinationem non grauitè obligare. Itâne deinceps loqueris? tam parum amabis?

III. *Punctum*. Considera, quid impossibile facere possis, & velis, vt eum ames, vbi, quando, & quomodo, iuxta facultates & omnes vires tuas. Percurre

singula, & vbique accende ignem amoris ardentis more Sanctorum, & potissimum exemplo Sancti Sanctorum IESV Christi, qui tanta facit pro salute nostra, quam procurare vel vnico suspirio potuisset. Luculentum testimonium dederat amoris erga nos sui, quando carne nostrâ indutus iacuit in præsepi: sed an istud ei sufficit? Minimè. Et adhuc torpescit animus, neque flammæ mei IESV patientis & morientis, possunt depellere pertinax frigus cordis mei?

Colloq. Ad Dei Filium, cuius cor fornax est immensi amoris. Ora illum, vt te flammarum suarum faciat participem, faciat te in amore Seraphicum. O Deus, dignissimum totius amoris obiectum! cur non ardentè ab omnibus hominibus diligeris? vtinam ex illis essem, qui te vnice amant! *Tempus erat, quando non amabam te: at va tempori illi, quo non amavi te.* Serio emendandum hoc crimen est: esse volo inter amatores tuos, volo etiam cum dispendio sanguinis & vitæ meæ, & quidquid in hac vita charum possi-

possideo. Ita contestor : aut moriendum , aut amandus Deus est , & quidem sine mensura, ad morem Seraphinorum est amandus. Pater, Ave.

Recollectio Meditationis. Visita deinde Venerabile , institue Conscientiæ Examen, & prande.

Hagiophila, reuerteris à sumpto prandio : an non huc rediens submissâ voce recitasti : *De profundis* pro defunctis beneficiis tuis, qui suâ liberalitate & munificentiam sumptus, quibus alereris, necessarios reliquere ? Laudabilis illa consuetudo est, eidem assuesce, seu adiens, seu rediens à mensa, certoque huius officij gratiam à Deo exspecta. Quid verò nunc, quâ ratione hanc horam perages ? eius omnino sententiæ sum, ut animum relaxes aut ambulatione per cubiculū, per porticum aliquam commodam, per hortum, si tempestas anni & aëris permittat, sisque extra aliorum occursum, ut centies repetas tesseram tuam, quæ fortasse iam nunc memoriâ excidit, aut colloctione cum tali persona, quæ nullos, quàm de rebus spiritualibus sermones misceat ; nisi tantum animi tibi sit, ut velis te modico hoc solatio privare ; aut lectione matutinæ dissertationis, vel

septimi capitis ex *sancto favore*, nisi ea iam lecta sint. Saltem aliquo horum modorum te occupa, deinde nos reuifemus.

Hagiophila, iam hora recreationis peracta est, & tempus adeundi ad Venerabile Sacramentum, vt inter cetera eam quoque gratiam postules pomeridiani temporis benè impendendi.

Hinc applica te Examinei particulari, inde scriptioni eorum, quæ idonea iudicabis, vt tantisper te occupes, aut quæ voles propriâ manu exarata tibi impofterum deferuire, aut vt somnolentiâ te expedias; cui pellendæ scriptio peropportuna est. Sed age; nunquid indulgere tibi ante vel post scriptiorem debebam, vt semihoræ quadrante paullulûm oculis conuiueres, quod ad Orationem reddaris aptior? nullum mihi ius in oculos tuos vsurpo. Scient illi exigere necessitates suas, & tu eius prudentiæ es, vt plus ijs non concedas. Ad me hoc solûm pertinet, vt significarem hoc tempus esse scriptiõni commodissimum.

Quod ad scriptiõnis materiam attinet, grauâtè illam definio, cûm nesciam, cuius tu genij sis, quid tibi arrideat, quibus deuotionis exercitijs sis addicta. Verûm vtut es, suadeo, quotidie scribas ea lumina, quæ tibi Deus largiri dignabitur;

tum bona proposita, quæ feceris, deinde quod libuerit. Neque dubito, quin libellum habeas, in quo secretissimas tuas deuotiones, & sanctiores affectus annotes, & quem subinde, præsertim festis solennioribus, aut semel in mense peruolas ad renouandam tuorum propositorum memoriam; libellum arcanum, quèminque non faciliè alijs pandas. In hoc igitur notari debebunt omnia. Similem memini me nuper vidisse, spectantem ad eximium quendam Dei seruum; in quo hæc continebantur. Primò Litaniæ suorum Patronorum, vt eas quotidie recitaret. Secundò, Beneficiorum tum communium, tum priuatorum Catalogus, vt de ijs diuinæ bonitati gratias sæpius referret. Terriò, Series præcipuorum benefactorum & amicorum, quibus preces suas aut pro sacro, aut pro fine Examinum addixerat. Quartò, Res plures, quas à Deo postulabat quotidie, veluti salutis suæ consequendæ necessarias. Quintò, Nomina amicorum defunctorum, quos sperabat in cælum admissos, vt eos inuocaret, aut esse in Purgatorio, vt eos iuuaret suffragijs suis. Sextò, Nonnullæ virtutes, circa quas particulare Examen instituere volebat, vnà cum vitijs, quæ eodem Exercitij ge-

nere statuebat oppugnare. Septimò, Opera pietatis, quæ ad honorem Dei paræ singulis diebus, mensibus, & annis exercuit. Octauò, Alio, quæ ad cultum Venerabilis Sacramenti, & Passionis memoriam referebat. Nondò, Variæ Orationes iaculatoriæ, quibus totâ vitâ in oblatiis occasionibus vteretur. Decimò, Diuersæ pœnitentiæ, singulis septimanis & festorum pernigilijs subeundæ, cum breui Testamento animæ, ad imitationem eius, quod S. Borromæus fecit, concepto. Atque hæc præcipuè libellus ille complectebatur, Auctori quæ suo seruiebat loco Diurnalis, Ducis, & Directorij, ad suas deuotiones exequendas. Ex ijs punctis delige, quæ maximè tibi commoda videbuntur, & sequentibus diebus in ijs, cùm scribendum erit, te occupa; nunc in hoc, deinde in altero, vt in fine secessûs rem habeas confectam, Incipe iam, etsi temporis aliquid tibi suffuratus fuerim, aliàs emendabo me, neque hac de re ampliùs conueniam.

Ascriptione transfer te ad Lectionem sequentis Dissertationis, aut eorum, quæ tibi postea notabo, vt liberior sis; notabo autem quæ maximè in rem tuam faciunt, & repertu sunt facilia.

DIS.

DISSERTATIO POME-

RIDIANA.

De Spiritu Secessus & Collectionis interna, quæ est vera. & appetenda animi solitudo.

HAgiophila, si polliceor me ostensurum tibi rationem, quâ euadas felicissima, non tantum in cælo, ubi omnis beatitudinis & felicitatis cumulus est, verum etiam in hac ipsa vitâ tot miseris calamitatibusque subiecta, nonne dignus videbor, quem audias? & an non lubens has paginas euolues, in quibus hac de ratione dissero? ita facti dimidium à te obtinui: perficies, si ea, quæ dixero, exequaris. Sed numquid nimia sum fiducia, dum asserere audeo, solitudinem cordis, de qua nobis sermo est, reddere posse te beatam in hac sede lacrymarum, calamitatumque? dicant de me, quod volent: uti non sum in extollenda cordis solitudine, & collectione interiori præfidentissimus, ita nec videri debeo præ reliquis dignus, qui nomine reprehendar. Nostro sæculo Martyr in

Hol-

Hollandia Cornelius Musius de ea loquebatur, quando summo animi sensu affectuque erumpebat in hæc paucula verba, sed omni auro mihi chariora: *O beata solitudo! ô sola beatitudo!* planè quasi tota vitæ nostræ felicitas in ea consisteret, & ita quidem, vt inter omnia infortunia, & aduersa nouo quodam, & inaudito miraculo non desinamus esse contenti. Quam si semel possederimus, nulla erit creatura tam potens, nullus casus tam violentus, qui nos possit, nisi vltro præcipites, de tranquillitate & beatitudine nostra deturbare: nulla fortunæ, seu blandientis, seu aduersantis conditio mouebit, aut affliget. Merito igitur dicere & iterare frequenter possumus: *O beata solitudo! ô sola beatitudo!* vt verò maiore animi sensu id dicas, nonne rationi consentaneum tibi videtur, vt me declarem, vt confirmem propositionem meam, vt explicem, quid sit cordis solitudo, vt neque hoc reticeam, quàm faciliè eius vsum tibi possis reddere familiarem? id omnino est, quod pro-

proposui, nullam volens illius excellen-
tiam præterire. Vt enim verum fatear,
solitudo illa corporis, de qua hodie dis-
ferebam, bona, utilis, & aliquando
optanda est, animâ tamen caret, si ei
hæc cordis solitudo non adiungatur,
cùm hæc grauioris momenti sit, & ma-
ximè necessaria, summæque perfectio-
nis illa verò non, nisi quatenus ad aliam
disponit. Vnde ista est Magni Gregorij
maxima vox omnia complectens: *Quid
potest solitudo corporis, si desit solitudo cor-
dis?* cuius dicti veritatem tunc clarissi-
mè perspicias, vbi dixerimus, in quo sita
sit hæc cordis solitudo. Et dicere para-
tus sum, velim tamen prius mihi dicas:
an non aliquando quâdam animi pro-
pensione & amore personam aliquam
sis complexa? affirmabis omninò: ita-
que esse suspicabar. At nōne id tem-
poris creatura illa semper in corde tuo
versabatur, ita vt aliam nullam admit-
teres, aut si qua se forsan insinuasset, non
illicò excluderes, vt huic vni cogitatio-
nes omnes tuas applicares? soli illi pa-
tebat

tebat aditus ad cor tuum, illa sola istud possidebat, desipiebant omnia, nisi illam versares animo, nisi de illa loquerere. Deum eâ ratione habere in corde, eoque modo complecti, est præstans illa cordis solitudo, quam tibi conor persuadere. Cum eousque perueneris, ut omnes creaturæ flocci pilique sint, & ratione dilecti tui desipiant, illéque solus sit obiectum amorum tuorum, tuarum cogitationum, tuarumque voluntatum, tunc nimirum eâ solitudine perfrueris, de qua mihi sermo est. In mundo esse, & viuere, quasi nihil illi esset præter Deum, & te animatam, eo proposito, ut illi vni placere velis, sine cura alia, quàm ut illi satisfacias, præsertim in vsu & conuersatione hominum, (quæ tamen idcirco inculta, & aduersa charitati non erit) hoc demum est habere eam, quam deprædico, solitudinem. S. Eucherius scribens S. Hilario tradit, curiosum quendam, adijisse personam fama virtutis celebrem, sciscitatum: ubi Deus habitaret. Bone vir, re-
spon-

spondit alter, scire hoc compendio vis? manum porrige, méque sequere. Illum igitur apprehensâ manu duxit in desertum: Hîc, inquit, locus est, vbi Deus habitat. Innuens eo pacto, quòd quisquis Deum reperire desiderat, eundem quærere debet extra turbam, & Mundi tumultum, & in paruo cordis sui, ab omni creaturarum affectu semoti, deserto.

Hagiophila, nondum scire appetis, an in omni loco, & in quouis occupationum genere seruari possit hæc cordis solitudo? imò verò, dicam. Audi igitur, quòd aliquando Deus dixerit Philippo Nerio in Metropoli Orbis habitanti: Philippe, in vrbe Româ tanquam in deserto viuendum est. Id enim uerò docere erat, posse vbiuis locorum haberi illam cordis solitudinem, ita vt nec impedire eam possint occupationes ex charitate susceptæ, neque conuersatio hominum, quam status cuiusque exigat, & cui se hic Sanctus ex instituto Ordinis sui impendebat. In hoc totius rei cardo vertitur, vt scias illam vsu ipso
exer-

exercere : & ne dissimulem, eò pertingere solæ animæ regiæ possunt. Sic enim, teste D. Gregorio, intelligi debent verba illa Iobi: *Nunc silerem cum regibus terra, qui aedificant sibi solitudines* : a quasi diceret : Vis illæ abiectæque animæ, quæ non habent generosa perfectionis consequendæ proposita, ad illam collectionis internæ felicitatem peruenire non possunt defectu cordis regij, & sublimia tantum appetentis. Cum verò tu ex numero sis earum animarum regalium, & desiderare videaris, vt cortuum vertatur in solitudinem, quâ id ratione fieri possit, explanabo. Artem omnem complectitur D. Bernardus his verbis: *Deus spiritus est, ideo sola tibi indicitur solitudo mentis, non corporis. Sede solitarium, sede non corpore sed intentione, & deuotione.* b Hæc quisquis habuerit, habet materiam omnem, & apparatus tali in corde suo solitudini ædificandæ necessarium. Doleo sanctum hunc Abbatem pluribus

men-

a Iob. 3. v. 13. 14.

b Serm. 40. in Cant.

mentem suam non explicuisse : quæ mea sit, & quomodo illum intelligam, expono. Ac imprimis arbitror, intentionem illam requisitam ad cordis solitudinem, & collectionem internam in eo consistere, vt in omnibus actionibus nostris solum Deum nobis propositum habeamus, vtque hæc præcipua & sola nostra intentio sit, adeo vt cor nostrum sit ab omnibus creaturis abstractum, nudum & vacuum, itaque omnem rerum terrenarum affectum exuerit, vt inter homines, in recreationibus, in occupationibus, & negotijs sit nihilominus solum illi vni attentum, nihil quærens nisi ipsum, ipsiusque gloriam, nihil aliunde satisfactionis, aut commodi mendicans. Hæc ratione constitutum cor non tantum manet, & in principio actionum suarum de Deo cogitat, eius opem implorat, ei que offert, quidquid aggreditur, verum etiam nullum alium suorum operum, cogitationum, & dictorum scopum habet, quam Deum eiusque beneplacitum; eo planè modo, quo Architectus

rectus murum erigens continuò regulam & perpendiculum singulis lapidibus, quos ædificio applicat, adhibere consuevit.

Hagiophila, si istud agis, iam nosti ex corde tuo solitudinem construere, quæ tantum Creatori tuo & tibi seruiat. Ædificium profectò, quantumuis exiguum, superbissimis tamen Regum palatijs præstantius! & ne existimes opus esse arduum molestumque, patieris, ut narrem præclaram illam attentionem, quæ actiones omnes suas peragebat (ut eas in Deum referret) is Anachoreta, de quo vitæ Patrum: quando opus aliquod aggrediebatur seu precum, seu laboris, seu conuersationis, aut alterius rei cuiuscumque, paululum consistebat, ac veluti quid ageret, rogaretur; vide, aiebat, actiones nostræ nullius pretij sunt, multum saltem ijs decedit, si eo non collimamus, quò oportet. Reuocat id mihi in memoriam responsum illud obseruatione dignissimum, quod non ita pridem dæmon aliquis dedit, Intellexeris
affli-

afflictionem Religiosarum Laudunensium, quas maligni spiritus possidebant. Accidit aliquando, ut inter sacros ritus, qui pellendis dæmonibus adhibentur, proponeretur pulcherrima D. Domini-
ci imago: vix apparuerat, cum subito possessæ omnes terga illi obuertunt, neque adduci possunt, ut in eam oculos defigant; tandem vi exorcismorum coactæ intuentur, vnica excepta, quæ mirum in modum reluctabatur: nihilominus eadem virtute compulsæ non solum aspexit, verum etiam obtutum defixit in imaginis oculos, uti Sacerdos diabolo præceperat. His peractis exigitur à dæmone ratio, cur tantâ difficultate picturam hanc intueri detrectasset? vix obtineri responsum potuit: tandem exortæ hæ voces: Ha, inquit, cum hic Sanctus inter mortales degeret, semper in Deum intuebatur, in omnibus actionibus suis oculos habebat in illum obuertos; nos verò nos ipsas aspeximus & quia aspeximus, perijimus, & in hanc conditionem miserrimam delapsæ sumus. Post hæc
ma-

maturè considerata, fierine poterit, vt non flagremus desiderio Deum semper habendi præ oculis, cum alloquendi, & in nobis ipsis illum præsentem continuo intuendi? longè istud præstat, quàm in se oculos conuertere, quàm opera omnia, propriæ satisfactionis, commodi, vanitatis, & lubentiæ vitio labefactare. Vtinam, Hagiophila, haberemus oculos Diui Dominici! vtinam nunquam nos ipsos respiceremus! vtinam tandem sciperemus instructi admirandâ hac sententiâ, quam verissimam Deus à diabolo (mendaciorum aliàs patre) voluit enuntiari! quîn fructum aliquem ex hac historia perceptura sis, nullus dubito.

Sed quis modus perueniendi ad hanc Collectionem tam sublimem, tamque arduam, quæ tantâ occupationum multitudinem, tantâ negotiorum varietate, tantâ licentiâ imaginationis nostræ non perturbetur? aptiorem non inuenio, quàm illum S. Bernardi præcipientis, vt nonnulla deuotionis exercitia vsurpamus, quibus mirum in modum secessus
ille

ille interior redditur facilis : *Secede non corpore, sed intentione, & deuotione*, quasi cordis solitudo ex duabus alijs componeretur, solitudine intentionis, de qua nobis hactenus sermo fuit, & solitudine deuotionis, de qua nunc loquendum est. Has deuotiones ad quatuor capita refero, quæ vnita, imò verò etiam singula spiritum nostrum facili negotio collectum conseruant : eaque tantò libentiùs hîc commemoro, quòd Sanctis in vsu fuerint ad finem eundem, aut consequendum, aut conseruandum. Primum est, habere quædam quasi refugij loca, ad quæ quis se recipiat, quibûsque animò semper inhæreat : sed ita sùauiter, vt propterea negotium, quod præ manibus est, nihil detrimenti patiatur. Sic Religiosissimus Berchmannus recurrebat ad vulnera Seruatoris, & ad pallium Matris Deiparæ, vt illic protegeretur. Sic S. Catharina Senensis ex prouidentia Diuina sibi struxerat conclaue, quo se recipiebat. Ita S. Paulus iuxta mentem D. Gregorij ex occupationibus, quæ illum in-

D ter-

terris detinebant, animo in cælum euo-
 labat. *Nostra*, inquit, *conuersatio in calis*
est. Alterum est, vt Dei præsentiam ubi-
 que, & in omnibus tibi reddas familia-
 rem, Regij Vatis exemplo, qui eum sem-
 per à dextris imaginabatur. Tertium est
 ab Orationibus iaculatorijs, breuibus,
 sed sæpe iteratis, quæ mentem nostram
 accendant. Aut à tessera quadam spiri-
 tali, quam singulis diebus deligere oport-
 tebit. Noui virum, cui hæc frequentis-
 simè in ore: *Nullum bonum, nisi æternum,*
nullum malum, nisi æternum. Alteri fuit
 hæc communissima tessera: *Pro IESV*
quid vis agere, & pati decet. Sancto Xa-
 uerio illa: *Mater Dei memento mei*. His
 illi sententijs manebant continuò col-
 lecti & sui. Quartum est, quod ex ipsis
 occupationibus desumitur. Ita S. Catha-
 rina Parentibus, alijsque domesticis in-
 feruiens IESVM, Mariam, & Apostolos
 sibi proponebat. Ita pientissimus P. Fa-
 ber (primus S. Ignatio socius in itineri-
 bus Angelos locorum, & hominum Tu-
 telares, sibi comites adsciscebatur, ijque
 Clie-

Clientes commendabat. Ad eum modum, quoties hora audiebatur, S. Ignatius animam citabat ad examen actionum suarum, ut perspiceret, recte ne essent omnia. S. Teresia refricabat memoriam mortis, & Venerabilis Buzo Sancti alicuius ex ijs, quos peculiari cultu venerabatur. Hac ratione alij, si in oculos incurrat creatura formæ præstantis: ah! inquit, quàm formosior Iesus est, quàm Maria amabilior! si sunt in hominum conuersatione, aut ab ea digrediuntur; tacite dicunt: ah! amantissime Seruator, quantò suauior est illa, quæ tecum initur necessitudo, & familiaritas! si adesse coguntur personis deformibus, incultis, asperis, aut aliqua corporis, vel animi molestia laborant; ah! aiunt, quàm hoc dulce & iucundum est, si cum Inferno Purgatoriòque conferatur, quæ loca toties peccatis meis promerui! Ita illi pro occupationum varietate alias atque alias, sed semper pias & sanctas cogitationes eliciunt. nõ minore fructu, quàm animi voluptate.

Habes, Hagiophila, modum, quem ad facilitandam illam internam collectionem tibi promiseram; qualis verò foret ea tibi & mihi felicitas, si eius compotes fieri possemus? Caue rem æstimes difficilem; ut enim talis esset, minúsne, animi tibi est, quàm fuerit tot alijs, qui id consecuti sunt? quique, quod vel semel firmo mentis proposito dixerint: istud volo, ut cor meum semper in Deum dirigatur: eo tandem peruenere, vsúmque sibi reddidère perfacilem. Neque pertimescas, ne hæc attentio te morosam reddat & tristiores, quin è contrario, lætitiâ pariet, & alacritatem. Nullum enim lætius cor, quàm quod amore diuino saucium est, quòdque liberis & crebris cogitationibus versari potest circa id, quod castissimè sanctissimèque amat. Nullam alibi quære voluptatem; in hac sede mortalitatis non est vlla sincerior. Iterum inculcare placet: *O beata solitudo! ô sola beatitudo!* Scire exercitium huius deuotionis, est in hoc miseriarum loco, beatum esse, &
in-

inchoare felicitatem æternam: Est Angelorum ritu viuere, qui nostræ tutelæ deputati sunt; quantumuis enim opī nobis ferendæ, & curandis nostris negotijs intentissimi sint, non omittunt tamen Deum aspicere, de illo cogitare, illum continuo stabilique amore complecti. Ire licet, & hoc voto te dimitto, vt Raphaëlem viuendo exprimas. Hic Angelus, Tobix comes, & inter homines versatus, omnia peragebat more aliorum, differebat loquebatur, tractabat negotia, cibum sumebat, credebaturq; in hæc ferri cogitationibus omnibus, velut è triuio homo. Interim versabatur ille cum Deo, eundem sibi semper propositum & præsentem habebat, *alio cibo & potu, qui ab hominibus videri non potest*, utebatur, & Angelus erat. Eiusmodi plures in domibus Religiosis, etiam in sæculo viuunt, quos si occupatos aspexeris, dices ipsis negotijs absorberi, nullamque aliam, quàm de re præsentī voluere cogitationem. Nihilominus cor alibi est, nimirum cum Deo. Di-

centur, omnia facere vt alij, & tamen plus longè faciunt, quia faciunt omninò vt Angelus Tobiaë, omninò vt tu factura es. Amen.

Si hæc Lectio displicet, aut non sufficit, lege cap. 6. 7. & 8. Partis primæ Roderici tract. 1. vel cap. 1. lib. 1. de Imitatione Christi, aut cap. 22. & 34. lib. 3.

Post Lectionem applica te Examini virtutis alicuius, vt discas, qualis in schola Dei sis, quantumque proficias: vt erubeas, te tam parum in virtute promouisse; & maiora eius imposterum exercendæ desideria concipias. Examen istud instrui debet suauiter ad modum Lectionis, singulis tamen punctis pauxillum inherendo. Deambula, si placet, aut prope Oratorium tuum intereâ consiste.

EXAMEN CIRCA AMOREM ET CHARITATEM DEO DEBITAM.

EN vicens notas sinceri amoris diuini.

Prima. Nullum unquam mortale peccatum admittere, qualiscumq; sese offerat occasio, imò mori malle, quàm se in labendi occasionem admittere.

Secun-

Secunda. Ne venialibus quidem peccatis dedita opera & deliberatò consentire,

Tertia. Dolere & detestari omnia delicta, seu magna, seu parua, quæ aduersus Deum committuntur.

Quarta. Publicè profiteri amorem virtutis, & odium cuiuscumque vitij.

Quinta. Amare Deum ex toto corde, integrum illud ei consecrando, neque in creaturas cum præiudicio reuerentia, honoris, & obedientia Creatori debita disper- tiendo.

Sexta. Amare Deum purè propter ipsum, nullo intento proprio commodo, quamvis nullam neque in hac, neque in altera vita huius Amoris mercedem effem relaturus.

Septima. Amare quidquid Dei est, & in illo, & propter illum creaturas omnes, & non aliter.

Octaua. Amare quidquid Deus amat, præsertim ipsius mandata, consilia, & virtutes.

Nona. Maiori amore ferri in eos, quos ipse plus diligit, ut est sanctissima Virgo,

Sancti alij, viri probi, & qui peculiariter ipsius obsequijs dediti sunt.

Decimò. Dare operam, ut ametur, & gloria illius amplificetur apud omnes creaturas Amoris capaces.

Vndecima. Amare & approbare, quidquid circa nos & alios operatur, amanter omnia de manu paterna sua bonitatis acceptando.

Duodecima. Velle & delectari in omnibus, quae ipse vult, sine illa factu facilia sint, sine toleratu molesta.

Decima tertia. Privare se creaturis, earumque solatijs, & voluptatibus propter eius amorem.

Decima quarta. Sape illum versare animo, & libentius, quàm creaturas.

Decima quinta. Libenter de illo loqui.

Decima sexta. De eius Maiestate, & adorandis perfectionibus gaudere.

Decima septima. Pluris facere minimum gradum gratiae eius, & minimum donorum & fauorum illius, quàm omnes totius Orbis honores & delicias.

Decima octaua. Optare quocumq; pre-
fio

ratio Amorem illius, etiam tolerantia quorumcumq; incommodorum & cruciatuum non tantum ad tempus vite mortalis, sed etiam ad millia annorum, si Deus ea nobis largiretur.

Decima nona. *Ad visionem eius ferventer anhelare.*

Vigesima. *Crescere in dies in Amore, & aspirare ad ardentissimam, & quotidie augescentem sui Creatoris dilectionem.*

Hagiophila, vt verum fatear, credo te attonitam, dum vides, te plurimum aberrasse eâ opinione, quâ rebaris te Dei amantem, dūmque adeo paucas divini amoris notas in te animaduertis. Habeas fortasse primam, prætereà nihil. Aggredere iam nunc, & intra annum plures obtinebis; quin Deo & Virgine Matre opem ferentibus, omnes.

Succedit Examini Oratio vocalis, seu Vesperarum alicuius Officij, seu Precum aliarum ex obligatione, aut devotione recitandarum.

Hinc aggredere Considerationem hęc propositam. Quid in ea agendum iam in Monitis Generalibus declaravi. Si nimum

mium tibi videtur horam impendi integram, prudenter nunc & alias digere tempus tuum, & tantum semihoram impende. Sic sum, ut voluntati tuę me penitus accommodem.

CONSIDERATIO.

I. **Q**Uæ tibi felicitas, Hagiophila, octo, vel decem habere dies integros, quibus nullam aliam, quam de Deo atque anima tua cogitationem, curamque suscipias? Milleni Ethnici sunt, & totidem Christiani, qui mirabiles in virtute progressus facerent, magnamque vitæ sanctimoniam consequerentur, si tali otio, similibus cogitationibus, & luminibus fruerentur, quibus iam tu abundas, & quæ Deus in hoc secessu tecum adhuc communicabit.

II. Fatere verum, nunquid è numero earum animarum es, quæ velut in tenebris palpantes ad Deum accedunt? nondum ruiſti in eius amplexum. neque de omni iure penitus illi cessisti; dudum est quod cum illo licitaris. Tantane tergiversatione opus, ut tibi bonum cudas?

ah

ah quantam tibi iacturam paris! Tandem aliquando insiste vestigijs eorum Sanctorum, qui ardentissimè ea complectuntur, quæ tu tantoperè metuis; quique tantò feruentius profectum suum persequuntur, quantò propius abesse se vident à fine, propter quem conditi sunt.

III. Nonne iucundius & tranquillius est Deo seruire, quàm Mundo, & sibi? quid tibi nunc prodest, laxasse habenas cupiditatibus tuis? quem fructum, retulisti ab amore huius, vel illius creaturæ? nihil melius est, quàm Deum diligere, illique seruire: cætera omnia vanitas & afflictio animi. O Anima mea toties perfidia creaturarum decepta & afflictæ, nonne tandem in sinu conquiesces vnici & fidissimi amantis tui? nonne pertæsa infantiæ & vanitatum tuarum, omnem curam & amorem transferes in Deum sincerè amicum & vnice amabilem! qui nunquam fallit aut destituit suos, nisi quando contempnilegum suarum ignauissimè deseritur.

IV. Vbi eram ante centum annos? æternitas præcessit. Vbi eris post annos centum? sequetur æternitas, & quidem breui: cuncta enim incredibili celeritate præteruolant: sola tu anima mea testudineo passu graderis, & lentè repis in diuino seruitio, cùm plurimum itineris tibi restet peragendum.

V. Omnes illæ voluptates, quas nunc hic, nunc illic decerpit animus meus, quæq; non totæ, sed diuisim succedunt, relinquunt in fine quendam cordis amorem & occultas anxietates: unde istud? nisi quòd animus ad finem suum anhelat, expectatque visionem Dei, qui solus vti obiectum infinitum, explere potest animæ & amoris mei capacitatem, nunquam saturandam ijs, quibus hactenus cum salutis meæ periculo intendi.

VI. Hoc fortasse vltimum tuum otium est; hæc postrema Exercitia, quibus incumbes. Si id tibi constaret, quid ageres? hoc age nunc, omni posito metu & respectu, age propter Deum & te: ne
tibi

tibi blandiaris, ne procrastines. Negotium hoc tuum est, negotium maximi momenti, & cardo prædestinationis tuæ.

Peracta Consideratione trade horam animi relaxationi; declaravi ad finem monitorum Generalium, qua ratione transigi illa possit: si integra redundat impende semihoram: ita denique tempus dispersece, ut omnibus sufficiat.

Inde ora Officium, aut alias preces vocales. Visita Venerabile, ac demum præpara te ad Meditationem.

III. MEDITATIO.

De servitute, quam DEO debemus.

Oratio præparatoria consueta.

I. *Præludium.* Vide & admirare Apostolum Paulum, qui personam suam alio titulo noluit exornare, quam servi Iesu Christi: *Pavus servus Iesu Christi.* hoc potissimum elogio utitur, non dicit se patratores mirabilium, non Apostolum Nationum, non Gentilium Magistrum, sed servum Iesu Christi.

II. *Prælud.* Pete à Deo gratiam, ut

cognoscere possis, in quo sita sit felicitas, excellencia & materia seruitutis Deo debitæ, vt ex huius cognitione transeamus ad vsum eius rei, propter quam conditi sumus.

I. *Punctum.* Immensam esse Dei maiestatem necesse est, cum illi seruire, regnare sit, & maximus titulus, quem homines etiã honore & sanctimonia præstantissimi ambiunt, sit esse seruos Dei. Et verò nihil excelsius de aliquo dici potest, quàm, magnus est seruus Dei, hæc bona Dei ancilla est; multoque ampliùs, quàm si dicatur: Princeps est, Regina est, præstans creatura est, homo sapientissimus est. Malè mundo & omnibus qui illi seruiunt! Viuat Iesus & serui eius! Anima mea, quæ tanta honorum ambitione teneris, cui vis seruire?

II. *Punctum.* Seruire Deo, est primò Deum Magistrì & Domini loco habere. Dominus arbitrato suo de rebus ad se spectantibus disponit. Qui agri Dominus est, potest illum diuendere, illum colere, illum negligere, in eo serere triticum,

ticum, legumina, plantare arbores, illas
 euellere & comburere vtcumque libi-
 tum illi fuerit. Eodémne pacto ad arbi-
 trium Dei disposita es anima mea? libe-
 rè de te disponit? producisne fructus
 quos requirit à te? multùm abest, etsi
 propterea ab eo condita sis. Secundò
 est consumere se omnino ad volunta-
 tem eius, qui Magister & Dominus est
 omnium Creaturarum. Ita Domino
 candela seruit se consumens; ita cibus
 seruit sal, dum consumitur. Quæ ea fe-
 licitas mihi foret, si vita mea, quæ ad
 modum candelæ deficit, quæ diffluit sa-
 lis instar, pro Deo consumeretur? quan-
 do anima mea cum Regio Psalte excla-
 mabis: *O Domine, quis ego servus tuus?*
 Terriò est viuere cum respectu in eius
 præsentia, eique promptè, hilariter, &
 ad minimum nutum voluntatis eius ob-
 temperare.

III. *Punctum.* Tria genera seruitio-
 rum sunt. Primò Mancipij, quod pœnis
 & verberibus ad officium virgendum
 est. Secundò Mercenarij, qui mercede
 dem

dem spectat & lucrum. Tertio Filij, qui ex amore seruit Patri. Quo pacto hactenus ego Deo meo seruiui, qua ratione deinceps seruiam?

Colloquium ad SS. Virginem, quæ se Ancillam Domini nominabat, & ad alios Sanctos, qui præcipuo affectu Deo seruiuerunt. Pater. Ave.

Recollectio. Lectio obuia Thomæ de Kempis. Rosarium. Visitatio Venerabilis Sacramenti. Cæna Recreatio. Litaniæ SS. Visitatio Venerabilis Sacramenti. Preparatio crastinæ meditationis. Examen. Quies.



Domine ne memineris iniquitatum
nostrarum antiquarum.

II



J. Hoffmann delin.

1
t
n
i
R

I
n
t
&
re

SECUNDVS DIES.

De Pœnitentia vita transacta, qua Deum offendimus.

Hagiophila, peccata impediunt, quò minus ad finem, propter quem creati sumus, pertingere valeamus. Idcirco hunc diem transiges in consideratione peccati tum mortalis, tum venialis, vt inde horrorem, compunctionem & verę pœnitentię fructus elicias.

Inchoanda dies est à Visitatione Venerabilis Sacramenti, inde te para huic Meditationi.

MEDITATIO I.

De horrore peccati mortali.

Oratio præparatoria consueta.

I. Prælud. Statue te coram Deo veluti reum aliquem grauissimorum criminum, qui stet ante Iudicem catenatus, vinctus & manibus pedibusque arctissimè constrictus.

II. Prælud. Pete à Deo lumen, quo rectè miseriam peccati mortalis agnoscas,

seas, & vt illud tibi ignoscat, si fortassis eo animam tuam aliquando contaminaueris.

I. *Punctum.* Peccatum mortale tam terribile est, & tantopere Deo fonti omnis sanctitatis displicet, cum actus rebellionis sit, & iniuriæ aduersus diuinam illius maiestatem, vt vel ob vnicum, è cælo detrusi sint Angeli, & in Infernum præcipitati, vbi etiam diuinæ Iustitiæ Carnifices effecti sunt. Adam hominum Princeps & Parens vnum admiſerat, & illico non solum ipse Paradisi delicijs exclusus est, verum etiam tota eius posteritas ad misérias peccati morborum, pestilentiae, belli, reliquorumque incommodorum & aduersitatum, per totam vitam damnatur. Centum millia damnatorum ardent & æternum ardebunt ob vnicum solum commissum peccatum mortale, in quo mors illos occupauit. Tam horrendum est mortale peccatum. O Deus meus quas tibi gratias debeo, quòd, cum eorum imitatus sim culpam, eodem tamen loco cum illis non sim.

II. *Pun-*

II. *Punctum.* Nihil in mundo odibilius & detestabilius est peccato mortali. Satius foret affligi quacunque alia calamitate in bonis fortunæ, honoris, valetudinis & vitæ, imò dæmonibus omnibus possideri præstaret: cum nihil execrabilius dici excogitariue possit, quàm Dei esse inimicum. Deus ipse nihil odit nisi peccatum: ubiquè præsens cooperatur omnibus, præterquam peccato. Nulla alia re offenditur quàm peccato, aduersus aliud non indignatur, quàm peccatum, idque modo tam terribili, vt non minus, quàm æterno incendio puniat, cum est mortale. *Quis* fieri ergo potuit; vt insurgerem in Deum meum, in Dominum, in Patrem optimum, & in leges ipsius & æquissima præcepta? ob frustulum pomi Adamum accuso, & quid hoc, si cum meis sceleribus componatur! Confusio, deprecatio, propositum.

III. *Punctum.* Peccatum mortale incredibilium damnorum causa est: gratia Dei & illius amicitia nos priuat. Plurimi,

rimi, quod gratiâ alicuius Principis aut hominis excidissent, in summam animi ægritudinem, quin & mortem ipsam inciderunt: & ego qui toties Dei gratiam perdidi, minori dolore commouear! Atque hanc iacturam plura alia detrimenta consequuntur. Priuatur peccator merito sanguinis Iesu Christi, curâ & singulari prouidentiâ, quam Deus gerit iustorum, iure Cæli & gloriæ, felici societate sanctorum, eorundem meritis & suffragijs, tranquillitate Conscientiæ, qua nihil præstantius, denique Deo ipso priuatur, quod damnorum omnium damnosissimum est. Tantis me malis, peccatum mortale inuoluisti! quàm charus Deo nunc essem, quàm me complecteretur, si non inescatus à te, aliò cor meum amandassem! O amabilissime Deus, rogo te, mortem (minus est) infernum volo, potius, quàm vt te mortaliter offendam. Suaues erunt æternæ flammæ, modò te amem, & indulta sint illa, quæ aduersum te commisi.

Col-

Colloquium ad SS. Patronos orando
ut dignentur in re tanti momenti adesse
misellæ animæ meæ, pro eo affectu, quo
me prosequuntur. Oratio, suspiria &
protestatio. Pater, Aue.

Recollectio. Electio Tesseræ. Accommo-
da videtur hæc: *Momentum quod delectat,*
atetnum quod cruciat. Aut illa Davidis:
Domine ne memineris iniquitatum nostrarum an-
tiquarum. Sequitur. Oratio Vocalis aut
Officij aut alia: Deinde Sacrum: Tum
Lectio spiritualis.

DISSERTATIO MATUTINA.

De annua aut extraordinaria Confessione.

INcredibile quoddam solatium à Con-
fessione generali ritè facta colligitur,
quando omnia dicta sunt, singula per-
spicue explicata, & totus animæ nostræ
status, personæ idoneæ, spiritali & indu-
striæ commissus est. Nequit explicari
linguâ, neque calamo describi ea tran-
quillitas animi, illa interea voluptas,
quâ

quâ fruitur is, qui molestum conscientia onus deposuit. Noui præcipuæ dignitatis virum, qui, posteaquam similem de tota vita, non optimè traducta, confessionem instituisset, ad quam se magno studio diligentiaque (vti rei momentum exigit) præparauerat, dicere erat solitus: montem videri suis ab humeris semotum, neque quinquaginta annorum spatio, quos in omni deliciarum genere transegerat, se tanta voluptate atque animi lætitia fuisse perfructum, quantam illi ista suorum peccatorum exoneratio attulisset. Hanc autem spiritus tranquillitatē illico consequuntur feruentia desideria Deum amandi, & aliam melioremque vitæ rationem instituendi. B Maria Veneta puella nobilis fuerat, vt quæ maximè, tum ante, tum in matrimonio dedita vanitati. Accidit, vt marito absente & bellis detento, statuerit audiendis Concionibus temperare tedium & mærorem suum; quod ipsi plurimum, imò summum profuit: nam ita tactus illius animus est, vt
omni-

omninò decreuerit vanitati suæ valedicere, seque seriâ Confessione generali expiare; quod & fecit tam generosè talique proposito, vt à Confessione domum regressa, conscenderit in superiorem ædium partem, vbi vniones, catenulas, annulos, specula, cæteraque vanitatis & superbiæ instrumenta ita diffregit, vt vsui amplius esse non possent; cùmque Mater, quæ fortuito accesserat, eum mundum muliebrẽ sororibus, donec adolescerent, seruandum fuisse affirmaret; ah! inquit, sorores meæ plus nimio ijs affluent! quod egi, feci eo instituto, vt mihi omnem occasionẽ præscinderem repetundarum mearum vanitatum, & primum gradum seriæ conuersionis meæ & sanctitatis, ad quam contendo solidarem. Quid ad hæc, Hagiophila? credis forsitan à me tantopere genus istud Confessionis commendari, vt eam tibi modò persuadeam? minimè istud est quod à te exigo. Suppono prius à te generalem factam Confessionem, imò eius opinionis sum, vt ne mentem

tem quidem amplius aduertas, neq; implices cor temporis acti recordatione, nisi vrgens adsit necessitas; qualis foret, si dedita opera peccatum aliquod in Confessionibus particularibus contuisses, ac deinde in Generali non declarasses numerum, neque species differentes peccatorum lethalium; aut debitum & sufficiens conscientiae Examen non præmisisses. Absque his rationibus ne cogita quidem de tali Confessione iteranda. Reperiuntur nonnulli Confessarii, qui audita semel iterumque aliqua persona, statim hanc illi mentem iniiciunt, aut zelo supervacaneo & imprudenti; aut specie imbibendæ notitiæ melioris. vt commodius animas regant; aut alijs de causis, quas ipsi quidem sciunt, sed quas Deus non probat. Si tales tibi occurrunt, ne moueare & de labore, quem impensum tibi vellent, gratias habe maximas. Sunt verò etiam nonnullæ animæ sic constitutæ, quæ quotannis, si earum arbitrio res permitteretur, duodecim Confessiones generales

les peragerent, singulis mensibus vnā,
aut quotiescunque nouos Confessarios
nanciscerentur, siue ex t̄cita quadam,
& occulta complacentia vitæ præteritæ,
siue ex scrupulis conscientiæ semper an-
xiæ, & ne post centum quidem eiusmodi
confessiones pacandæ, cū fidem ha-
bere nolint ijs, qui prudentissimè mo-
nent, ne præteritorum recordentur. Ca-
ue, sis ex earum numero, & acquiesce illi
gratiæ, quam tibi Deus præstitit, vt vnā
seriam faceres. Quod si singulari affe-
ctu capereris, aut ad animi solatium, aut
ad maiorem confusionem & contritio-
nem eliciendam, aut ad alia, quæ Deus
tibi suggereret, per me licet, itera. Tem-
poris tamen habe rationem, vt expectes
aut singulare aliquod Iubilæū, aut mōr-
bum fatalem, quando pluribus id est in
vfu. ~~Quo~~ quidem pacto, vt solū ea re-
petas quæ grauiora sunt, & momenti
maioris, neque venias ad ista minuta,
quæ & ægritudini incommodum adfer-
rent, & impedirent deuotionem.

Non est igitur Confessio generalis,

E

quam

quam à te postulo, sed annua. Quòd ve-
rò in illius commendationem excurre-
rim, feci vt similiratione tibi annuam &
extraordinariam persuaderein, de qua
nunc dissero, occasione illius, quam ho-
die vel cras facere proposuisti. Dixi, si-
mili ratione, quia fructus maximus &
ineffabilis animi lætitia colligitur, si fiat
ab anno, vel vltima generali, vti oportet.
Simul enim atque peracta est, tantæ
mentem inuadunt voluptates, tam seria
emendationis & nouæ vitæ desideria,
occupant, vt nihil magis luberet, quàm
octo diebus in eo statu peractis, statim
emori, ne consueta leuitate in antiquum
torporem perfidiamque (cuius adhuc
recens est dolor) relabamur. Atque hoc
adeo verum est, vt pro vsu, quem ea-
rum rerum habeo, testari possim, me re-
perisse animas post Confessionem an-
nuam, siue extraordinariam ita conten-
tas, & in talibus melioris vitæ decretis,
vt elicerent mihi lacrymas solatij testes,
& vnà tacitos sensus ingererent: fore
me felicissimum, si vel semel talem con-
fessio-

fessionem pari fructu, similibusque affectibus possem peragere. Hagiophila, uti praesagit animus, ab his tua non abluet. Et cum viribus omnibus commodo tuo studeam, habe quae in praesentem materiam velim à te considerari, duobus capitibus distincta. Primò. Quid attendendum, ut Confessio annua bene instituat. Secundò. Qui accidere defectus possint, ut eos devites. Quantum ad Examen attinet, etsi huic Dissertationi videatur annexi debuisse, seposui tamen in pomeridianam: duo ista puncta hic sufficient.

Primum facile expediam, cum satis intelligas, quid requiratur, ut Confessio seu particularis, seu Annua bona valida, que sit. Sufficiet igitur, ut de quibusdam moneam, quae reddere possint illam perfectiorem & numeris suis magis absolutam. Primò. In ipso Confessionis exordio accusa te de ijs, quae ab ultima particulari commisisti, tum ad confusionem peculiarem, tum ad evitandam aliquorum astutiam, qui sub terminis

generalibus peccatorum aliàs confessorum suauiter insinuant ea, quæ paucis ante diebus patrauere: quo modo Confessarijs occasionē præscindunt numerū & speciem indagandi, quod tamen forsitan res exigeret. Secundò. Dic deinde ea, quæ potissimum conscientiam tuam cruciant; quæ te in diuino seruitio maximè præpediunt, & morantur, & quæ, opinione tua est vitiorum tuorum origo. Ita sufficientem accipiet tui notitiam Pater spiritualis. maximè si eo ordinariè vteris, vt nulla futura sit necessitas aperiendi peccata, quæ Confessione generali aliquando expiasti. Tertiò. Si aliquid occurrit, quod nunquam es confessa, id ipsum Confessario significa, vt te circa id interroget, si opus est. Quartò. Multò magis mature declarandum est, si fortè in confessione particulari peccatum aliquod silentio pressisses siue ex verecundia, siue alia quacumque ratione id accidisset. Hoc enim casu Confessarius attentior erit ad singula, vt te iuuet, & satisfiat confessionibus, quæ

quæ potuerunt esse vitiosæ & inutiles.
Quintò. Si Confessario nondum innotuisti, conditio & status vitæ tuæ manifestandus est. Si enim in sæculo es, unde sciet te esse matrimonio copulatam aut adhuc liberam? si in ordine religioso, unde coniectabit, professe sis an non? An vis istud onus illi incumbere, ut quotiescumque aperis peccatum aliquod contra votum admissum, te continuo percunctetur, an nouitia sis, an verò feceris professionem? quod fieri etiam necesse foret in quibusdam alijs peccatis, quæ specie differunt, grauioraque sunt in vno aliquo, quàm in alio, ob adiunctam obligationem. Sextò. Peccatis tuis etiam venialibus adijce numerum quantum fieri poterit, ut tanto magis erubescas, si modò numerus frequens est. Septimò. Explica te in omni materia verbis decentibus honestisque, ut castæ aures Confessarij offendi non possint, aut suggeri imaginationes impuræ; vtere tamen talibus, ut te perfectè intelligat. Octauò. Perfice denique tanta

animi tui satisfactione hanc Confessionem, vt post absolutionem paratissima esses mortem obire, si Deus ita statueret. Verbo, ita perage omnia, quasi postremum in vita tua confitereris. Atque hæc ad primum caput spectant; si quid hic desit, supplebit Dissertatio de confessione ordinaria, quam aliàs proponam: nunc ista sufficiunt.

Ad alterum progrediamur, de defectibus qui in confessione annua possunt accidere. Eosdem fateor committi posse in alijs quoque Confessionibus: video nihilominus aptissimè hoc loco referri, quando nobis propositum est, per illam supplere præcipuos ordinariæ confessionis defectus. Primus est, quando adferuntur termini generales & ambigui ex quibus Confessarius perfectam scelerum admissorum cognitionem assequi non potest. Vt si dicas: fecisse te actiones immodestas. At quas? fortasse instar famuli à pedibus, porticum aliquam, aut ad modum cuniculi hortum vel aream percurristi? forte calceos induens,

ducens, excessisti decentiæ modum? an protuleris obscura & ambigui sensûs verba, quæ ineptas audientibus imaginationes impresserunt? an alium traxeris, tetigeris, percusseris, aut indecoro aliquo gestu læseris castitatem? hæc aliâque similia immodestiæ nomine veniunt. At nonne vides, ita Confessarium assequi non posse, quid velis? Angitur tamen interea, & si dissimulat, inde est, quod arbitretur eâ à te in confessionibus particularibus esse clariùs explicata. Pari ratione dicet alius, malas se habuisse cogitationes: quid? voluitne naso mutilare Turcarum Imperatorem? an proximo malam crucem & mortem optavit? an consensit inhonestis affectibus? omnia ista malæ cogitationes sunt. Hinc discere melius declarare te, & nominatim dicere actionem, ut eius species, & qualis sit agnoscatur. Secundus defectus est, quando cogitur Confessarius interloqui, & interrogare, eò quod peccata, non ut oportet, proferantur. Dices habuisse te suspensiones & iudicia

E 4. teme.

temeraria ; non sufficit. Addendum est, an in materia graui , an leui : an delibèratè ita iudicaueris, an inaduertentem ea opinio perstrinxerit. Accusabis te distractionibus indulgisse, in Officio aut sacro, ad quod obligabaris: si aliud non dicis, vnde diuinabit, fuerintne longæ, an breues ; exiguæ an capaces peccati mortalis ? Pròh Deum immortalem ! quidni ita te explicas, vt statim intelligat, an graui , an leui crimine te obstrinxeris ? an delibèratè, an inaduertenter, aut modica quadam admissa negligentia ? Tertius est, inter confitendum abuti verbis quibusdam, & modis loquendi, qui affectationem sapiunt & vanitatem. Iste sui amor & complacentia vbique comes est, etiam in hoc sacro Tribnnali. At animo simplici accedere oportet, sèque claris & significantibus terminis explicare. Et optima hìc eloquentia est, quam candor & dolor exornat. Quartus est, deligere sibi Confessarium, qui nobis aduleatur, qui vitia nostra non carpat, aut cui simus ignoti ;
cùm

cùm tamen hic ad eum modum nos gerere deberemus, quo in electione medici corporum nostrorum; hunc volumus scientissimum, longo usu experientiâque probatum, & gnarissimum nostri, nostrarúmque omnium infirmitatum. Tanti profectò anima est, quanti corpus, & aliquantò præstantior. Quintus est, proprio Marte sibi formare conscientiam, nimis facilè decernendo non petitâ vllius Auctoris idonei sententia, actionem hanc peccatum non esse, aut non esse lethale, cùm tamen eiusmodi sit; vnde euenit animam aliquando esse mortali peccato infectam, nec ritè confiteri, aut sacram synaxim accedere, exponique periculo in tali statu moriendi, æternúmque pereundi. Quare consultissimum est, eos audire, qui doctrinâ pollent, qui animarum saluti incumbunt, quique hoc negotium peritè tractant, non verò sibi fidere, & suis affectibus blandiri, qui sæpe, quod reuera peccatum est, & subinde mortale, rem esse licitam, aut aliàs indifferen-

tem proponunt. Memini, quantum aliàs laborauerim, vt quibusdam hominibus persuaderem, res à tota Theologorum schola peccati damnatas, esse malas, & periculi plenas, neque satis scio, an fidem obtinuerim. Nonne lepidum est, quod creaturæ aliquæ, quæ nunquam studuerunt, nullius rei, quàm garrulitatis sunt peritæ, quæque nullum in Ecclesiâ munus obtinent, agant Doctrices, velintque resolvere & determinare puncta, soli subiecta iudicio Clauium, quas Deus Ecclesiæ suisque administris concredidit. Si sua illa loquacitate nimiaque fiducia perdiderint nonnullas animas, aut plurimorum scelerum fuerint authores, vide qualem ab ijs, alijsque qui conscientiam sibi fingunt, rationem aliquando exacturus sit supremus iudex. Hæc hætenus: à meridie, reliquæ ad annuam confessionem attentionia, prosequamur.

Si aliam cupis lectionem, lege cap. 9. & 10. & 11. tract 4. primi voluminis, partis tertie Roderici aut 21. & 25. cap. lib. 1. Thomæ de Kempis.

A lectione renoua proposita tua erga cultum D. Virginis. Non dubito, quin habeas certa honoris & pietatis obsequia quotidie illi exhibenda. Vide hodie, an non officio tuo desis, aut quid impofterum exhibere velis, decerne. Si ad manum est Paradisus apertus centum deuotionibus erga Deiparam, ne pigeat istum oculi commodare Libelli Epilogo, Monitòque illi, quod agit de perseverantia in cultu Virginis; reperiēs in vsum tuum opportuna. Aut lege deuotionem quintam, in octauo Purificationis; eaque obfirma animum tuum, ne aliam Matrem velis, quàm Mariam Dei parentem. Hinc ad sequentem meditationem te para.



II. MEDITATIO.

De conditione Peccatorum venialium, & quanto ea studio declinanda sunt.

Oratio præparatoria consueta.

I. Præludium. Imaginare cymbam, in quam se quotidie insinuant plurimæ guttæ aquæ, vel arenæ granula, à quibus tandem sic oneratur, vt versetur in proximo demersionis periculo. Par ratio animæ est, quæ indulget peccatis venialibus.

II. Prælud. Roga Deum, vt agnosce-
re possis detrimenta animæ tuæ à peccatis venialibus illata, & periculum, cui illam exposuerunt.

I. Punctum. Peccata venialia displicent Deo, quia sunt immoderationes quædam voluntariæ siue cogitationis, siue verbi, siue operis contra rationem, contra Dei voluntatem, & præcepta. Et quamuis non adæquent malitiam peccati mortalis, vt tamen sunt, Deus illa vehementer auersatur, adeò vt præstaret omnes

omnes homines mori, annihilari Angelos, & perire mundū vniuersum, quam vnico leui peccato veniali, verbulo aliquo otioso, offendi supremam Maiestatem: cū minima iniuria Creatoris, & Dei præ malis omnibus, quæ creaturas afficere possunt, magis metuenda sit, & omni conatu impedienda. Vnde consequitur, hæc peccata venialia esse totidem paruas contumelias, paruas iniurias, modicas rebelliones, modicos contemptus diuinæ Maiestatis: qui seriò amat, nullā in re displicere vult amico. Cur ergo toties Deum meum venialiter offendi? innumeræ sunt eæ paruæ contumeliæ, quibus te lacessiui; nolo amplius tibi displicere, nolo ne minimum quidem temnere, ô amabilissime Deus meus! an non satis est, quòd alij peccatores iniuriam tibi inferant, nisi & ego, qui me tui amantem profiteor, contumelias adijciam? ah nimis quàm perfidum es cor meum, cū metuas ijs displicere, quos in hac vita charos habes, & potueris toties displicere vnice amabili!

I I. *Punctum.* Peccata venialia sunt, diuersi generis, alia leuia sunt, alia grauiora; alia per malitiam, alia per inaduertentiam; alia ex consuetudine, alia ex fragilitate; alia coram hominibus, alia clàm; alia cogitationis, alia operis. O infelicissimum me, qui omnium sum reus! tantò deterius, quòd præ stupore, ista vulnera non sentiam, quasi Deus hisce non offenderetur, & quasi non aliquando meritas de ijs pœnas essem daturus, cùm tamen certissimum sit, Deum ista, non solùm in hac vita, per morbos, afflictiones, desolationes, derelictiones, per lapsus in alia peccata venialia, & nonnunquam permittendo, vt in mortale ruatur, verùm etiam in Purgatorio flammis ardentissimis castigare. O charissime Deus, aperi mihi nunc oculos, subueni mihi gratijs tuis, & esto mihi misericors.

II I. *Punctum.* Ex peccatis tuis venialibus animæ tuæ constitutionem agnosce. Primò, si ex malitia liberè, & sæpe ea committis, indicium est, miseram.

animam tuam in statu versari periculoso, & in proxima dispositione peccati mortalis; tandem hydria frangitur, quâ sæpe aquatum ijsi. Secundò, quando ex inordinato animi affectu venialia, grauiora admittuntur; Exempli gratiâ, obtrectare alicui, violare charitatem, non obtemperare, & similia, ex occulto quodam odio, ex peruicacia, item non agnoscere defectus suos, aut eos tanti non facere, vt corrigere quis velit, vel confiteri; malum signum est, & conditio metuenda. Tertiò, non cohibere peccata venialia, sed quâuis datâ occasione illa committere, signum est, quòd quis nulla profectûs sui, & perfectionis cupiditate teneatur, cum hæc requirat, amitti potiùs vitam, quàm vel vnicum deliberatè admitti, & velit eâdem animi fortitudine, minima atque mortalia excludi.

Colloquium ad Spiritum Sanctum.
O diuine Consolator animarum, quid tandem fiet de animâ meâ tot læsâ vulneribus? quâ fronte inter tot imperfectiones.

ctiones dicere se audet sponsam tuam?
quo modo in tanta deformitate diligere
illam poteris? deprecare, protestare, &
ora. Pater, Ave.

Recollectio Meditationis. Visitatio Venerabilis Sacramenti, Examen, Prandium. Recreatio. Visitatio Venerabilis Sacramenti, & Examen particulare.

Sequitur tempus scriptionis, quam hodie velim te impendere scribenda Confessione annua, ad illam te disponendo iuxta instructionem in proximè subiecto Examine tibi oblatam, quod erit tibi loco Lectionis, & admissorum peccatorum memoriam refricabit.

DISSERTATIO POME-

R I D I A N A.

Continens Examen ad instituendam Confessionem annuam.

Dissertatio, Hagiophila, quæ vix aliud complectitur, quàm Examen ad annuam tuam Confessionem directum, faciliè æquabit Lectionem spiritalem, si noueris fructum hunc colligere, vt memineris omnium tuorum vitiorum, ad Confessionem ritè faciendam.

Vti

Vti verò diuersas personas alloquor, ita non mireris, me tangere plures chordas. Excerpe, quæ tibi propria, cætera alijs relinque. Quòd si Methodus hæc & Examen tibi non arrideat, aliunde tibi prospice, plures libri sunt, qui hac in re te iuuent; sed vide, ne illam imiteris, quæ generalem totius vitæ Confessionem peractura, omnia genera peccatorum, quæ talis libellus proponebat, nullo adhibito delectu annotauit, neque omisit deinde coram Confessario enuntiare, quidquid chartæ mandauerat; illæ qui aliunde perspectam habebat huius Virginis virtutem, & innocentiam, cum audiret opinioni suæ tam contraria, primum obstupescere, demum etiam interrogare: fecissetne illa omnia, de quibus se accusabat? Ah non, inquit, mi Pater, auertat tantum malum Deus! Cur ergo ista confiteris, subiungit Confessarius? quia ita in libello meo reperi, inquit, & existimaui ex demissione animi, & virtute omnia proferri debere. Quid fieret? proximum fuit, vt lacerato imprudenti
sche-

schediafmate, ipsa sua peccata bonâ fide
enuntiaret, quod fecit paucis: vitam
enim viuebat Angelicam, quam etiam
produxit ad annum ætatis quinquage-
simum, virginitate semper illibatâ, &
insigni opinione sanctitatis, cuius præ-
mium aliquot abhinc annis in cælo con-
secuta est. Rem hanc tantò securiùs re-
tuli, quòd ex ipsius ore didicerim. For-
tassis tamen melius coram te filuissèm,
quòd non videaris eius genij, vt vel in
Tribunali sacro, vel alibi plura contra
te dicas, quàm feceris. At si non tibi,
alijs certè prodesse poterit, saltem vt ni-
hil dicant, quod non rectè intelligunt.
Nam negotium mihi fuit aliquando
cum nonnullis, qui adferebant termi-
nos, aut repertos in libris, aut suggestos
ab alijs, quorum verum sensum non af-
sequebantur, vnde eueniebat, vt Con-
fessarius hoc, aliud illi intelligerent. Ni-
hil dicere debes, quin scias quis sit, ne-
que amplius quàm feceris. Quod ad me
attinet, spero me vsurum ijs verbis, &
terminis, qui capi ab omnibus possint;
ad-

addenda tamen fuit hæc monitio pro
ijs, qui aliâ quàm nostrâ instructione,
sunt vsuri. Etiam hoc prædico, Examen
futurum satis breue, neque penè alia
tacturum peccata quàm venialia : non
enim credo te tam esse infelicem, vt
mortalibus te obstringas. Si tamen quæ-
dam propiùs eò accederent, tantùm di-
cam, vt eorum possis recordari. Tui mu-
neris erit diligenter attendere, & singu-
lis paululùm immorari, expendendo
num in ijs leuiter, an grauitè delique-
ris, & quoties proximè, vt deinde anno-
tes, & scribas peccata tua. Ordinis verò
mei ratio facilis est, exordior à peccatis
contra Deum, contra proximum, con-
tra seipsum; deinde enumero cetera,
prout sese offerunt. Incipio :

EXAMEN PRO ANNUA CONFESSIOE.

EXamina te primò circa ea, quæ pro-
ximè ad Deum pertinent, & incipe
ab exercitijs spiritualibus, sacro Officio,
Rosario, Oratione tum vocali, tum
men-

mentali, Confessione, Communionē,,
Examine conscientię generali, & parti-
culari, quā ratione omnia peracta sint :
quæ in ijs distractiones, longæ, an bre-
ues, voluntariæ, an indeliberatæ? quæ in
illis omissiones, an tempus contraxeris,
an ex eorum usu profeceris, an peregeris
sine seria applicatione animi, & ex con-
suetudine? Fuitne Confessio cum dolo-
re, & emendationis proposito, sincera &
sufficienter præparata? Communio ha-
buitne suam præparationem, & deinde
actionem gratiarum? & Lectio spiritua-
lis tempore mensæ, & alibi peracta cum
fructu, & attentione? Nihilne negle-
ctum in usu Indulgentiarum, aquæ lu-
stralis, inuocationis S. Patroni menstrui,
& annui, Orationum pro ijs, quibus
promissimus, aut quibus debemus? De
gratiarum actione post cibum sum-
ptum, de benedictione illum præceden-
te. De usu poenitentiarum publicarum,
aut priuatarum, aut in Sacramento
Confessionis impositarum. De Religio-
ne erga Augustissimum Sacramentum,
&

& Passionem Seruatoris, erga Deiparam,
Angelum Tutelarem, & alios electos Pa-
tronos. De Verbo Dei in Concionibus,
aut Exhortationibus, illi non attenden-
do, dormiendo, fabulando, non adeun-
do. De modestia in templis seruanda, per
silentium, & debitam reuerentiam. De
colloquijs in recreatione, & congressio-
nibus hominum. De exercitio diuinæ
præsentia. De matutina oblatione actio-
num nostrarū ad Dei gloriam, & quoties
aliquid maioris momenti aggredimur,
per diem. De deuotione erga Salutatio-
nem Angelicam ad pulsum campanæ, &
erga Rosarium quotidianum. De cura
dies festos maiori feruore, & pietate,
quàm feriatos peragendi. De gratitudi-
ne erga diuina beneficia, Deo rariùs &
tepidiùs gratias referendo. De gloria
Deo reddenda, de bonis successibus, non
verò illam sibi vanè attribuendo. De fi-
ducia in Deum, in afflictionibus tum,
animi, tum corporis De refugio ad il-
lum in nostris necessitatibus, & actioni-
bus omnibus, De curiositate, & dubita-
tione

tionem circa res fidei, non statim repellendo. De exiguo zelo in impediendis Dei offensis, dando nostra indulgentia & dissimulatione occasionem alijs peccandi liberius. De repugnantia, & tepiditate in exequendis sanctis inspirationibus.

Secundò. Circa defectus aduersus proximum vide, an non peccaueris eum vilipendendo aut in animo, aut etiam signis externis, aut illi adulando, aut nimium laudando, aut silendo, tum, cum opportunitas bene de illo loquendi offerebatur, manifestando eius imperfectiones magnas an paruas, publicas an occultas, Calumniando aut iniuriose accusando. Multum aut modicum mali illi optando, famæ illius detrahendo, non salutando, fastidiendo, aut contemptum alloquendo, grauius, aut leuibus imprecationibus illi maledicendo. Congressum eius declinando & alloquium. Volendo te leuiter, aut grauius vindicare de iniurijs tibi illatis, prodendo alijs antipathiam, & animi tui ab illo auer-

sio-

tionem, carpendo omnes illius actiones, genus, patriam: verbis amarioribus, & aculeatis illum inuadendo, petendo illum iniurijs, minis, verberibus. Reprehendendo indiscretè, imperiosè citra authoritatem; exprobrando illi defectus suos, & vitia à naturâ insita; negando illi operam, aut subsidium postulatam; inuidendo quòd plus aliquid præstet, magisque ametur; illum deridendo; illum exempli prauitate offendendo, & scandalizando; malè illi consulendo, eius secreta alijs prodendo. Referendo illi, quæ ab alijs dicta ad irritandum; seminando inter illum, & alios discordiam. Mendacij arguendo, delectando te; dum stomachantem vides, neque, cum posses, impediendo. Gaudendo de ipsius infortunio. de felicitate dolendo; illius afflictionibus non compatiendo; curiosè indagando, quidquid ad eum spectat; suspicando aut temerè iudicando de ipsius actionibus in materia parui, aut magni ponderis, cum firma adhæsiōe, imò illas ipsas suspiciones, & iudicia alijs

signi-

significando. Ipsius opera in peiorem partem interpretando, astutiæ nomine afficiendo ipsius prudentiam, religionem & pietatem vocando hypocrisim. Clamosè, agrè & pertinaciter contradicendo. Amando personam aliquam, potius vt propensione naturali facias satis quàm in commodum animæ; priuatis amicitijs indulgendo, neque abstinendo, etsi eâ re alij offendantur; permittendo quibusdam (eiusdem quidem sexus) aliquos actus familiaritatis, quos præsentente Confessario, aut bonæ notæ homine non permitteres. Contemnendo Parentes, aut alios, quibus reuerentiam debes: Impendendo te operibus charitatis cum personarum acceptione.

Tertiò. In ijs, quæ te contingunt, cogita, an non defuerit tibi in tuis bonis propositis constantia, maximè quoad seruitium Dei. An non fuerint recidiuæ nimis frequentes; tristitiæ quando res è voto tuo non successerunt; ineptæ & nimis lætitiæ nullâ vel vana de causa; indignationes internæ; ostentationes in

ver-

verbis; laudes tui ipsius, Parentum, & aliorum ad te spectantium; pusillanimitas in virtute prosequenda; nimia cura, & studium commodorum corporis; amor nimius tui; fuga mortificationum; vana complacentia in donis, & talentis tuis naturalibus, aut supernaturalibus; excusationes in peccatis mendacia in colloquijs; verba otiosa, & inutilia; cogitationes vanæ, impatientiæ, immoderati erga rem aliquam affectus; amor inordinatus, continuo rem amatam menti obijciens; euagatio animi in creaturas effusi; similitates, cupiditates vindictæ, præteritorum scelerum complacentia; actiones vanæ gloriæ, aut ad tui æstimationem & amorem directæ; præsumptio & nimia tui fiducia ad res benè gerendas, si adhiberis. Pigritia, nimius somni usus, aut intempestivus; tempus otio perditum, aut malè impensum; ingratitudo in Deum, & homines; ambitio, & appetitus honorum, & officiorum. Repugnantia ad benefaciendum, aut ad emendationem, etiam cum mo-

F

neris;

neris ; facilior lapsus in peccatum , eò
quòd aliàs id admiseris , aut quòd cogi-
tes eàdem operâ etiam istud confessione
expiandum ; neglectus poenitentiarum
tùm ex obligatione subeundarum , tum
ex deuotione assumendarum ; propo-
situm non confitendi quædam venialia ,
eò quòd corrigere illa nolis ; destructio
valetudinis , nimium sensualitati indul-
gendo : nimia rerum nouarum curiosi-
tas , vt nihil te domi forisq̃ lateat ; Le-
ctio librorum inutilium , iocosorum , pe-
riculosorum , & similium , qui animum
dissipant , & aliquando species minus
honestas menti suggerunt ; credulitas
somnia & diuinationibus adhibita ; hy-
pocrisis virtutem simulans ; pertinacia
tui sensûs , & proprii iudicii ; immode-
stia in incessu , risu , clamore , sermone ,
aspectu ; delectatio in audiendis obtre-
stationibus ; vanitas in habitu , orna-
tûque ; prudentia carnis , & sæculi ; dis-
simulationes , vtendo in conuersatione ,
verbis æquiuocis , ambiguis ; aulicis ,
& vanis officiorum delationibus. Agen-
dorum

dorum cura, aut nimijs negotijs te implicando, aut suscipiendo ea, quæ à vocatione tua sunt aliena, aut laboribus te eximendo sub prætextu seu sanitatis, seu imbecillitatis, nisi sint speciosi, & honorifici. Contemptus virtutis, & virtuti studentium; eos simplicitatis aut hypocrisis arguendo, qui plura præstant officia charitatis, quique ad omnia sunt promptissimi; eos etiam asperius alloquendo, carpendoque tanquam nimis faciles, & credulos. Arrogantia: nolendo sequi, nec petere aliorum consilia in rebus dubijs, neque patienter audiendo monitiones tuorum Confessorum, Superiorum, Concionatorum, alijs non cedendo, teque ijs meliorem reputando & digniorem. Gula: Intempestive edendo, aut ut appetitui tuo satisfacias, aut ne minus facias quam cæteri; quærendo cibos peculiare, specie quidem valetudinis, cum reuera aliud non sit, quam cura cuticulæ; effundendo te in cibos, eosque tantâ aviditate sumendo, ut neque lectioni, neque sermoni at-

tendas; conquerendo etiam, si quid palato tuo non arrideat. Libertas periculosa; nihil sensibus negando, viuendo ad arbitrium quasi nullæ tibi regulæ præscriptæ forent; repetendo morem viuendi antiquum, & sæcularem; separando te à communitate ex pertinacia, vel quòd ita lubeat, aut ex affectu aliquo singularitatis.

Quartò. Circa Castitatem considera, an non dederis aliquam occasionem istis turpibus somnijs istis miserijs, & illusionibus nocturnis, quæ subinde dormienti accidunt; & an euigilans aliquam delectationem, & consensum non adhibueris. An custodieris ita oculos, vt nihil lasciuium, nihil nudum præter manus, & faciem, siue in alijs, siue in te videris. An ab obscœnis imaginibus, à vultibus formosis, alijsque obiectis, quæ ad incontinentiam alliciunt, & impuras cogitationes, & motus periculosos generant, auerteris? An non commiseris, aut permiseris actum aliquem indecorum, & huic virtuti contrarium siue tecum,

cum, siue cum alia persona, & quâ intentione, cùm nulla bona sit, nisi quæ est necessitatis. An non facilè vultum, caput, manus alterius contrectaueris, & an id ex leuitate, an verò ex voluptate. An non blandiori quâdam agendi ratione, alios in tui amorem excitare volueris. An non minùs casto, & nimis ardenti affectu dilexeris aliquam creaturam, illam pascendo verbis mollibus & amatorijs, muneribus, litteris, nimîa familiaritate, eâque priuata, continuò de illa cogitans. An diligenter cogitationes inhonestas repuleris, & tentationum occasiones vitaueris. An verba protuleris minùs casta, eâque libenter audieris ab alijs. An non habeas turpes libros, an eos legeris, turpia cecineris, aut cum voluptate attenderis alijs legentibus, aut cantantibus ea, quæ puritati, & decoro aduersabantur.

Quintò. Quod ad obedientiam attinet, si in statu es Religioso, reuoca in mentem, an promptè sine oblocutione & murmure obediueris. An non volun-

tatem Superioris pertraxeris in tuam. An non malè de illo sis locuta, an debitam reuerentiam ei detuleris, cùm Dei loco te regat. An non declinaueris illius occursum, vel ad fouendam auersionem tuam ab illo, vel ne tibi aliquid mandaret. An candidè patefeceris illi omnia, quæ scire illum oportebat. An eum non contristaueris tuâ agendi ratione, per uicaciâ, murmurationibus, diâctis aculeatis, repulsâ aut obtemperandi difficultate, aut similibus superbiæ & inobedienciæ actionibus.

Sextò, Superest paupertas, si eius voto teneris. Nihilne accepisti, dedisti, commodâsti sine facultate? nihil habes in cubiculo, aut alibi superfluum? an non satagis, vt optima ad vsus tuos concedantur? an ea, quorum vsus tibi permissus est, benè conseruaris, an rem domesticam prodegeris, corruperis, & malè impenderis? an non immoderato affectu adhærescis rei alicui, ita vt agrè illa tibi eriperetur? nihilne habes reconditum, ne reperiât Superior? nihil-

ne est, quod tibi proprium facis, siue pecunia, siue aliud aliquid in cubiculo, aut alibi sine facultate & scitu Superioris?

Septimò. Adde his omnibus examen circa Regulas tuas, si es in Religione, aut Societate, Congregatione, Confraternitate: circa officium tuum, statum & conditionem; circa præcepta Dei, & Ecclesiæ, casu quo in ijs deliqueris. Hæc enim omnia ubi studiosè perpensa discussaque fuerint, maximè si accesserit etiam inspectio eorum Examinum, quæ circa virtutes, & tria vota hîc in singulos dies addidi, dubitari non debet, quia anima, quæ aliquo Dei timore tangitur, inueniat sibi factum satis, ut bonam integramque Confessionem annuam instituat, Amen.

Confessione iuxta hanc dissertationem parata, & descripta, si tempus adhuc Lectioni suppetit, lege cap. 8. & 9. tract. 7. vol. 2. Part. 1. Roderici, aut cap. 24. lib. 1. & c. 5. & 6. lib. 2. de Imitatione Christi. Sequitur Examen circa charitatem proximi, quod eodem modo institues, quod hesternum hâc eâdem horâ,

EXAMEN DE AMORE ET
Charitate proximis impen-
denda.

EN tibi nunc quindenae notas sinceri
amoris erga proximum.

Primò. *Illum diligere sicut seipsum.* Se-
cundò. *Nihil illi facere, nisi quod velimus*
nobis fieri. Tertiò. *Gaudere de omni illius*
felicitate, & commodo. Quartò. *Illius in-*
commodis & aduersis addolere. Quintò.
Non offendere, neque vlla, vel minima mo-
lestia afficere. Sextò. *Nullo indicio seu ab-*
sentem, seu presentem vilipendere. Septi-
mò. *Nunquam illum reprehendere, nisi id*
muneris nostri ratio postulet. Octauò. *Nul-*
lum illi denegare subsidium consentaneum
rationi. Nonò. *Vitia illius excusare.* De-
cimò. *Illi non obloqui contentiosè.* Vnde-
cimò. *Cordatè, & ingenuè cum illo agè-*
re. Duòdecimò. *Tolerare ipsius defectus,*
& imperfectiones. Decimò tertiò. *Hon-*
ore, & officijs humanitatis illum praeue-
nire. Decimò quartò. *Non inuidere, sed*
illius laudibus oblectari. Decimò quintò.

Pa.

Patienter sustinere, quidquid nobis molestia intulerit.

Hagiophila, hinc arbitrare, num proximum diligas: ægrè primam, & ultimam notam in te reperies: sed ne deiecto sis animo, & has & alias sufficere, potest Deus, quando promptam reperit voluntatem, qualem tuam esse non diffido. Nunc erubescere, quòd tam parum instructa sis vero proximi amore, & statue peculiari studio deinceps ill incumbere.

Examen excipit Oratio vocalis, aut Officij, aut alia, hanc sequitur consideratio.

CONSIDERATIO.

I. **O**Mnis Theologia consentit, nullum esse dolorem tam acerbum, nullam tam molestam ægritudinem, nullum tormentum neque rotæ, neque ignis, neque plumbi liquati, aut aliud, esse tam terribile, ut maiora non mereatur etiam vnum peccatum veniale. Cur istud igitur non expendo, qui tam facile in ea peccata labor, quique tam ægrè inducor

ducor ad poenitentias, delendis & expiandis vite praterite peccatis necessarias.

I I. Ah! qui animo assequeretur, quantum Deo displiceat minimum peccatum veniale, quam se studiosè contineret! exigua Davidis Regis vanitas, quâ subditorum numerum iniri iusserat, trium dierum pestilentia, & iactura septuaginta millium hominum castigata fuit. Post hæc ausim ego aliquando me permittere vanitati, aut minimo veniali peccato indulgere?

III. O Deus! quam immeritò querimur de aduersis, quæ sustinemus, quæque Deus nobis immittit, si aduertamus animum ad scelera, quæ perpetravimus, & ad poenas, quæ ista promerentur. Etiam si non admissemus nisi peccatum vnicum, diuina Maiestas (quæ eo laudatur) tanti est, vt omnes totius Mundi cruciatus præstandæ satisfactioni legitimæ non sufficiant. Irruat igitur in me, quidquid durum, quidquid asperum, non querar, quin vbique & semper proficebor me duriora, asperioraq; mereri.

IV. Fer-

I V. Fertur diuina bonitas visâ no-
strorum peccatorum, etiam venialium,
multitudine, plurimum remittere de
amore erga nos suo; & protectionis suæ,
& auxiliorum gratiam subtrahere, quâ
deficiente pronissimus in ruinam & le-
thale peccatum est lapsus. Heu! & istud
mihi infortunium, æternæque damna-
tionis periculum accidere posset pro-
pter insignem illam licentiam, quâ mi-
nutis istis me noxis obruo. Mortem, ô
amantissime Deus. mortem ipsam flagi-
to, aut verò gratiam, quâ à vitijs istis ve-
nialibus sim immunis.

V. O quanta harum animarum feli-
citas, quæ cælum incolunt! nullo vn-
quam scelere offendunt Deum. O quàm
illas vel inde complector, quod æter-
nùm cælo excludi mallent, eâque af-
fluentiâ, & magnitudine gloriæ, quâ
fruuntur, privari, quin & præcipitari in
æternos inferorum cruciatus, aut anni-
hilari, quàm minimam venialem noxam
committere Is modus est, quo viuere
deinceps desidero, & eligere infernum,

& in nihilum meū reuerti potiùs quàm peccare.

VI. Verè dictum olim à S. Catharina Genuensi, quòd si homo cognosceret, quando dignum odio, fugaque esset peccatum vel vnicum, existere mallet in ardenti fornace, ibique viuus consumi, quàm illud admittere; & si totum mare foret igneum. potiùs in illud ad fundum vsque se demergeret, neque vnquam enataret, si crederet sibi emerfuro obuium fore peccatum, eoque se contaminandum. Nihil illo verius, cùm nihil in Mundo præter peccatum, & offensionem Dei timeri debeat: si scirent istud homines, & ego, vt par est, istud apprehenderem, in alium sanè virum ab eo qui sum, euaderem, & omnes sancti essemus.

Adest hora relaxationis: Deinde Officij aut orationis vocalis, tum visitandi Venerabile, denique præparandi sequentem Meditationem.

III. MEDITATIO.

De fructibus vera Pœnitentia.

Oratio præparatoria vt aliàs.

P*ralud. I.* Propone tibi ob oculos S. Ioannem Baptistam alta voce clamantem : facite fructus dignos pœnitentiæ; & quidem hæc tibi denunciari cogita, cum maximè ex usu tuo sint.

Pralud. II. Pete à Deo peculiare subsidium, quo possis penetrare hos fructus, & vt eosdem in anima tua, producere, & conseruare dignetur.

I. Punctum. Insignis pœnitentiæ fructus est, contritio & dolor habitualis de offenso Deo, quem si tota vita continues, sic vt passim in actum erumpat, indicio est, fructum esse maturum. Considera varijs id modis fieri posse, eiusque exercitium esse vtilissimum. Recordor me Deum offendisse, & quid vetat, ne suspiriolum, ne oculos in cælum dirigam, ne leui pugno contingam peccatus? quid prohibet, ne submissa, aut etià elata, si sine arbitris sum, voce con-

tester : Deus meus propitius esto mihi peccatori ; delicta iuventutis meæ & ignorantias meas ne memineris Domine ? O dulcissime , malletm mortuus esse , quàm te offendisse ? Statue igitur vti simili exercitio , sine quo nulla tibi dies abeat ; & iam nunc incipe iuxta instinctum Spiritus Sancti. En actum perfectæ Contritionis , quo nunc & aliàs vti poteris : Dulcissime Iesu , vere Deus & Homo , diligo te ex toto corde meo , & quia infinitè bonus es , detestor & execror omnia peccata mea supra quidquid detestabile & execrabile est , & propono me nunquam amplius te offensurum , succurrente gratia tua & meritis mortis & Passionis tuæ , in quarum unione offero tibi omnes actiones meas , Amen.

II. *Punctum.* Alter fructus poenitentiae satisfactio est , cui idcirco danda opera , quòd in domo Dei omnia persolvantur seriùs aut ociùs. Et verò præstat , vt nos ipsi soluamus Deo , dum vivimus , quàm vt in Purgatorio trada-

mur tortoribus infernalibus, donec de nouissimo quadrante satisfiat. Statuam igitur & decernam poenitentias, quibus tota vita constanter uti volo delendum præsentibus peccatis, tum præteritis: in hebdomade vel mense tot disciplinas, toties cilicium, toties ieiunium, toties abstinentiam, & alia, ad quæ me Deus stimulabit, & quæ non negligam nisi coactus aduersa valetudine. Confusio ob præteritam ignauiam. O anima mea! quis sensus Dei tui & sanctorum, qui vident tam parum te ad hæc attendisse, tam nihil te motam consideratione talium flammæ purgantium? inauditus hætenus tepor tuus est. Centum anni Purgatorij, & suppliciorum, & aspectus dæmonum, & ardentium flammæ tibi minimùm debentur, neque commoueris? ô Deus misericordiarum, quid tandem erit de me? loco castigationum, quas corpori deberem, blanditijs illud mulceo, & omnes patiendi occasiones declino. Largire mihi, Deus meus, cor aliquod Davidis contritum.

tritum & humiliatum, da cor Magda-
lenæ, quod triginta annis egit pœniten-
tiam: Hic vre, hic seca, modò in æter-
num parcas

III. *Punctum.* Excellens etiam est fru-
ctus pœnitentiæ, horror peccati præser-
tim mortalis, & metus vel leuissima of-
fensione Deum prouocandi. Plurima
me ad hunc timorem instigant, ac im-
primis inconstans naturæ nostræ condi-
tio; tot præclari viri post tam singula-
res conuersiones & pœnitentias, post
tam seria bene viuendi proposita, post
tot illustrationes animi, post exercita-
tiones spirituales tam accuratè obitas,
tandem defecere, & fortassis periere: ipse
ego sæpius mores mutaui; adeò vt qui
totos quinquaginta annos diuino ser-
uitio impendisset, nullam sibi securita-
tem posset polliceri, & ego ea ætate iu-
uenis non metuā? maximis præditi vir-
tutibus deficere possunt, quid ego, qui
nullam habeo, aut admodum exigua?
Angelus simili carne, parique naturæ
genio indutus timeret; & ego conscius
rebel-

rebellionis & violentiæ, qua me caro lacerasset, cuius indoles mutabilis, superba, & impatiens, non verebor? quid scio, qualis mea post annum, post decenniū, si eo vita prorogetur, futura sit voluntas? suspectam igitur anima mea habet inconstantiam tuam, & relapsum, & ruinam time. O Saluator animæ meæ! moriar nunc; si periculum est, ut aliquando te deseram, aut ab hisce propositis meis discedam. Permittite, aiebat B. Aloysius Gonzaga morti proximus, & viginti quinque tantum annos natus permittite, ut moriar; si enim vixero diutius, quid de me futurum sit, ignoro. Ita omnino forsitan satius tibi esset, o anima, ut hinc discederes ocissimè, quàm ut vitam longiùs trahendo, degeneres in deteriora.

Colloquium ad tres Personas Augustissimæ Trinitatis, quæ immutabiles sunt, & constantes in amore & decretis suis. Utinam eas æmularer! utinam de constantia, veræ poenitentiae comite, forem secuta! dabis mihi illam, o adoranda.

Tri-

Trinitas: hâc ipsâ viuo, & sic mori spero, Pater, Ave.

Recollectio Meditationis. Lectio Thomæ de Kempis, temere libro aperto. Rosarium. Visitatio Venerabilis Sacramenti, Cana, Recreatio, Litaniæ SS. Visitatio Venerab. Sacramenti. Præparatio Meditationis in sequentem diem. Examen. Quies: sed memineris prius à B. Virgine petere benedictionem obuertendo te, ad aliquam eius sacramentum. Fuit hæc olim Religio B. Stanislai Kostkæ Tyronis in Societate nostrâ, quam tu imitaberis, vt tantò securius dormias. *Quidquid enim B. Virgo benedixerit, erit benedictum.*



TER.

Maledictus homo. qui facit opus DEI negligentem.



TERTIVS DIES.

*De miseris vita tepida, & in seruitio
diuino languentis.*

ORigo peccatorum nostrorum maxime prouenit ex languore spiritali, & ex tepiditate negligentiaque, quâ Deo seruimus. Illam igitur meritissimo iure oppugnabimus hodie, & sic indagabimus calamitates, quibus animam nostram depopulatur, vt eam reliquo vitæ tempore velimus exclusissimam.

More tuo adi Venerabile Sacramentum;
inde ad Meditationem hanc te dispone.

MEDITATIO I.

*De miseris & damnis vita
tepidâ.*

Oratio præparatoria vt aliàs.

I. P*Ralud.* Statue te in conspectu Dei, veluti hominem, cuius membra omnia inutilia sint, sine auribus, sine naso, sine labijs, corpore toto vlceribus & plagis operto, ita tamen vt nulla lethalis

lis sit. Talis proximè conditio est animæ, plurimis defectibus, & tepiditati subiectæ.

II. *Pralud*, Ora Deum, vt videre possis, an talis conditio sit animæ tuæ.

I. *Punctum*. Infelix est vita tepida in Dei seruitio, quòd Deum prouocet ad fastidium, nauseam, & indignationem aduersus animas torpentes, vique eò, vt parum absit ab illo vomitu, de quo Scriptura loquitur, plane quasi obnoxius illi esset, & ad instar eius, qui potâ aquâ tepidâ, vix vomitum cohiberet: *Quia tepidus es*, inquit, *ego incipiam te euomere ex ore meo*. Vt vt est, status hic plurimum Deo displicet, & maxima damna inducit. Primò hebetat splendorem & pulcritudinem Communitatis Deo seruientis. Vnus tepidus sufficit ad turbandâ dedecorandamque domum integram, Par insolenti Militi, qui ordinem militare dissoluit; similis amico perfido, Filio inobedienti, sponsæ infideli. Secundò anima tepida prorsus ingrata est, malum bono rependit, & amoriniuriâ. Ter-
tio

tiò à communitate benignas prouidentia diuinæ dispositiones auertit, & fontem donorum caelestium, tum spirituum, tum temporalium obstruit. Quartò semper diuinis inspirationibus resistit. Quintò valetudine corporis, quam Deus ad feruenter sibi seruiendum impertit, abutitur. Sextò decipit eos, qui siue in cælo, siue in terris mira à nobis sperant & expectant. Quid tibi videtur anima mea, nonne examussim hisce coloribus depicta es, & vti vixisti, expressa? verbo tantum opus est. Dic Duci tuo, Patri & sponso tuo, quid impofterum? ut vel præteritas negligentias tibi indulgeat, vel omnino te destituat, indignam tali Principe, tali Patre, & sponso tali, quem nihil delectat, nisi feruor, & alacritas bonæ vitæ.

II. *Punctum.* Tepidus iniuriam facit Ecclesiæ, & ijs quibuscum viuit Primò alter aliquis, millies melius ageret quàm ego: cur igitur locum illius occupo & absumo panem eius, qui esset feruens? Secundò, Vana sunt omnia auxilia, quæ
Deus

Deus largitur per Sacramenta Confessionis & Communionis, per poenitentias, per lectiones & colloquia spiritualia, per adhortationes, per Exercitia: frustra his omnibus tempus teritur.

Tertiò. Communitas, in qua viuo, magnam famæ, & existimationis patitur detrimentum: cum enim ex toto habitu corporis mei, ex verbis, & actionibus meis appareat tepiditas, facile de Sodalibus meis concipitur eadem opinio.

Quartò. Tantundem alij meo abrepti exemplo faciunt, facientque, & dicent, ista olim in me fuisse dissimulata & tolerata.

Quintò. Non sit vllus processus ad virtutem, sed potius regressus, cum in domo Dei non progredi, regredi sit. Sextò. Tandem obduratur cor, neque amplius aduertit ad conscientie morsus, quos pridem neglexerat, ut nihil iam propius sit, quam ruina in grauem aliquam noxam.

III. *Punctum.* Vita tepida est febris hectica, qua, qui laborat, dum credit plurimum adhuc vitæ superesse; ita paulatim

tim consumitur, vt subitò extingvatur :
vnde tepido idem inculcari potest; quod
Angelus cuidam in Apocalypsi obijcit :
Dicis quod Diues sis, & locupletatus, &
nullius egeas; & nescis quia tu es miser,
& miserabilis, & cæcus, & nudus. No-
men habes, quòd viuas, & es mortuus.
Mortuus ! ô Deus meus, quid erit de me ?
en paratissimus sum, ad omnia deinceps
feruenter peragenda.

Colloq : ad sanctos, quos meminero
in vita sua feruentes fuisse. Pater, Ave.

Recollectio. Electio Tessera. Idonea hodie
videtur hæc : *Maledictus homo, qui facit opus
Dei negligenter. Aut ista S. Gregorij : Do-
minus vigilat iustis, dormit reprobis.*

Deinde Oratio vocalis, aut Officium. Sa-
crum. Spiritualls Lectio.

DISSERTATIO MATVINA.

*De Confessione ordinaria, quæ hebdo-
matim, aut frequentius in-
stituitur.*

A Bripior stupore, Hagiophila, quo-
ties mecum reputo, tot personas,
quæ

quæ siue in Religione, siue in sæculo, virtutis & deuotionis studium profitentur, cùm progredi maximè deberent, turpissimè retro ferri, & vitam in Dei seruitio ducere penitus tepidam, segnem & ignauam, ita vt pluribus annis hoc pacto decursis, sint imperfectiores, minus deditæ pietatis exercitijs, quàm ipso Conuersionis exordio; quin & vitijs sca- teant crebrioribus, & grauioribus, magisque periculosis. Sæpe causam huius indagauì curiosius, & postquam versauì animo plurima, non reperio aliam, quantùm ego quidem iudico, solidiorem, quàm à frequenti vsu Sacramentorum, sine debita animi dispositione. Itur enim ad Confessionem, ad Communionem ex more quodam, ex consuetudine, & defunctoriè, animo non preparato, sine seruire, & sine serio (quod tamen requireretur) emendationis proposito: vnde accidit, vt Sacramenta, quæ non operantur nisi iuxta dispositionem suscipientis, careant effectu suo, hominemque relinquant ijsdem vitijs

tijs obnoxium, & immerfum: eadem, semper in Confessione proferuntur, & in peiora prolabimur, eodem frigore, & ariditate Communiamus, & è malo ruimus in deterius: ubi è contrariò, si accederemus, vti par est, eas reciperemus gratias, quæ bonæ dispositioni admenfurantur, & singulari fortitudine roboremur aduersus vitia & peccata, quorum seriam Deo generosamque promiseramus emendationem.

Quamobrem dissertationem hanc accommodo Confessionis ordinariæ: quandoquidè ea, si male instituitur, sit ignavia nostræ, & repidæ vitæ, quam hodie impugnamus, origo. Alibi de Communionem loquemur, decimo nimirum die, quando de religione erga diuinissimum Sacramentum disserere proposui. Obuia tamen Confessionis fundamenta nō attingo: suppono enim ab ijs satis instructam Hagiophilam meam, neque ignorare quid huic Sacramento essentialē sit. Neque etiam dubito, quin adhuc eorum meminerit, quæ de Confes-

sione annua, huc referenda, disceptauit. Verfor hic circa conditiones, quas habere necesse est Confessionē illam, quæ octonis diebus, aut etiam sæpius instituitur, prout quemque deuotio ad vsum huius Sacramenti exstimulat. Varius enim, etiam apud Sanctos, fuit. S. Epictetus, non nisi semel in hebdomade fieri volebat. S. Catharina Senensis, S. Birgitta, S. Carolus Borromæus, & S. Patriarcha noster Ignatius quotidie usurpabant; vtcumque libuerit, ego eas qualitates proponā, quas arbitror esse consideratione dignissimas: ad decadem omnes reuoco, & ex occasione dico, quidquid attendi debet, ne erretur, & quid obseruandum sit, vt bene & cum fructu peragatur. Ordiamur à præparatione.

I. *Preparanda* est non solum quotidianis Conscientiæ examinibus, vbi defectus annotantur, & eo, quod prius paulò, quàm Sacerdoti nos sistamus, instituitur, quando præuidemus ea, quæ nobis dicenda sunt, verum etiam, idque

præ-

præcipua quadam ratione, per actum doloris, & boni propositi, peccatorum Confessioni præmittendum: quod commendare satis non possum, cum sciam subinde graviter hic delinqui etiam à viris probis, qui istud Sacramentum, sine actu contritionis, aut attritionis accedunt: fatebuntur quidem omnia, verum defectu doloris sufficientis, siue omissione motiuo contritionis, aut attritionis, & quia deest vitæ emendandæ propositum, eorum Confessio erit nulla, quin & insigni sacrilegio, mortali que crimine vitiata, iuxta rationem admissæ negligentiae: accedit huic Communio, aliaque deinceps eodem fortassis pacto institutæ Confessiones, & proinde miserimus animæ status: è quo non emergitur, nisi tempore Confessionis annuæ, quando accuratiùs omnia discutiuntur. Ut verò hic tibi aperiā, quod sit Contritionis, quod Attritionis motivum, quoniam iam scias, nullus dubito: quisquis contritus est, dolet se Deum offendisse ob eius bonitatem & amorem; qui autem

est Attritus, etiam dolet, sed ob peccati
foeditatem, & ratione poenarum sibi im-
pendentium. Dixi, alterutrum horum
actuum esse Confessioni præmittendū,
gratia securitatis; quia illum differre
velle, donec aut Sacerdos te adhortetur,
aut absoluat, periculo te exponis, aut ut
illius non sis memor, aut ne otium de-
sit illi vacandi: cum animus alibi disti-
neri possit, siue an dixeris omnia, siue
in recolenda poenitentia tibi à Sacerdo-
te imposita, siue alia quacumque re.
Quando verò actus ille præcessit, iam
extra sollicitudinem es, & discrimen sa-
cilegæ Confessionis: & in potestate tuta
est, eundem in fine iterandi, si opportu-
nitas & otium sese offerat.

II *Sit utilis & proficius.* Nunquam e-
nim adire debemus ad Confessionem,
quin peccatum aliquod deponamus; etsi
enim optima sumus voluntate emen-
dandi omnia, tamē eò potissimum con-
niti debemus, ut ab vno aliquo peculia-
riter expediamur, cui deinde post Con-
fessionem studiosius intenti, omnes re-
laben-

labendi occasiones euitemus. Atque in eo nostrarum Confessionum fructus existit; nam, ut corrigamus omnia, difficile est: miseri peccatores sumus, innumeris lapsibus obnoxij: ea tamen animi magnitudine, & propositi firmitate esse possumus, ut superemus illud, quod nobis præfixerimus peccatum, aut penitus non admittendo, aut quàm antea, rariùs, aut saltem minori deliberatione, malitiâque; quod maximum sanè erit emolumentum: fietq; ut inter pauculos annos, quin & menses, multam de peruersis nostris habitibus, & malâ naturæ propensione victoriam reportemus.

III. *Animosâ.* Ipso statim exordio dicendo id, quod acriùs grauat conscientiam, & cuius nos præcipuè pudet, idque non tantùm nostro ordinario Confessori, verùm etiam illi, qui eius locum occupauerit, si fortasse contingat alterum absentem esse, aut ægritudine impeditum; memores, quòd quicumque nos audierit, Dei vices gerat. Quo in genere nonnulli deficiunt, quibus tam ægrè est,

vt alteri confiteantur, vt vel aliqua sub-
ticeant cum periculo sacrilegij, vel sui
reditum Confessarij præstolantes, ma-
lint se confessione Communioneq; pri-
uare. Qui profectò defectus non leues
sunt in ijs, qui virtutem vitamque spiri-
talem videntur profiteri: multumque
abeunt ab imitatione B. Mariæ Venetæ,
quæ sui Confessarij absentiam æquissi-
mo animo tolerabat. Consultissimum
quidem est, eodem vti Confessario: ve-
rùm si casus aliquis accidat, quo mutare
cogamur, generosè id faciendum est, &
cogitandum, Confessarios omnes Diui-
ni numinis esse Vicarios, neque graui
culpâ vacaturos, si propter illorum æ-
mulationem aut imprudentiam, liber-
tas nobis demeretur alteri confitendi.

IV. *Breuis.* Quia non omnia peccata
venialia dicenda sunt, neque eo esse de-
creto debemus, vt ne vnicum quidem
omittamus: sic enim nullum reperire-
mus dicendi finem, vsque adeò fragiles
sumus. Sufficit pandi nonnulla, præci-
puâque, cæteris diuinæ misericordiæ

commiſſis, aut in Confessionem annuam dilatis. Neque etiam ad eum modum peccata referenda ſunt, quo narrari hiſtorix ſolent, plenè omnia minutimque recensendo; aut certis quibuſdam dicendi formulis, more eorum, qui reliquias publicè oſtendunt, à quibus ſi vel minimùm aberraffes, credas te irritam feciſſe Confessionem: cuius adeò genij reperiuntur homines, vt ad alium ſe Sacerdotem conferant, qui talibus hiſtorijs, & narrationibus patientes aures accommodet. Cauendum prætereà eſt, ne talia dicantur, quæ uſum alium non habent, quàm vt Confellariũ reddant ſollicitum, vt materiam conferendæ abſolutioni reperiatur. Erunt, qui dicent: non amaui Deum, quemadmodum decuit; non orauì, vtì debui; charitatem non exercui, quantum oportuiſſet, & alia lyra ſimilis, quæ aliò non ſpectant, quàm vt Confellio protrahatur, aut vt impatientià vexetur Confellarius, & illi, qui poſt te confelluri ſunt. Dic ſolidum aliquid, hoc eſt, aliquid factum malè, &

specie benè expressa, & mitte inutiles illas Litanias, vt Confessio tua brevis sit, & sine fastidio. Nihilominus quando exigo, vt sit brevis, non intelligo talem esse debere, vt tibi non satisfacias, neque animus tuus plenè Confessario tuo perspectus sit : ad hoc instituta Confessio est, & si quisquam sese opponeret, meo nomine significa, nefas esse, quamuis ipse tuus Confessarius foret : munus ipsius est, audire te debet, modò dicas solida (neque eandem cantilenam perpetuò recantes, aut ista, de quibus sæpe monita es, vt in cogitationem amplius non admittas) faciásque ea, quæ fieri oportet. Quòd si poenitentibus alijs te secuturis tua Confessio non satis brevis esse videatur, quod volent, dicant, modò tu tibi in re tanti momenti satisfeceris, quid curas? dic, vt patientiam habeant; te illis non aduersari, cùm lentè placidèque sumunt cibum: velle te spiritale istud alimentum capere cum otio, properare te hìc non posse. Ista mihi reuocant in memoriam domos quasdam Religiosarum diuersi
Ordi-

Ordinis, in quibus quæcumque breuissimè confessionem absoluebat, maximè egregia habebatur; quæ diutissimè, pungebatur potissimum, vexabaturq; à Reuerendis scilicet matribus, & charissimis sororibus. Ita vsuueniebat, vt plures non omnia, neque integrè confiterentur. Quod idcirco affirmare possum, quia nonnullæ me rogarunt, vt huius rei quærimoniam apud eos, ad quos spectabat, deponerem, emendarémque. Quod feci, & cum diuina gratia faciam hoc scripto, vbi demonstrabo zelum, quo volunt adeò breues esse Confessiones, vt si paupercula Virgo suam protrahat ultra spatium vnius *Miserere*, oporteat eandem vestis attractu moneri, tumultum excitari in vicinia, pulsari sedem Confessionalem, vt sciat abunde se fecisse, deinde etiam verbis illam castigare, & extorquere lacrymas: neque esse Deo acceptum, neque consentaneum rationi, quæ vult animas in hac actione, quæ nulla ad salutem grauior est, quiete suâ & solatio frui, cæteris, (quæ forsan re-

claudarent) prudentiæ Confessarij commissis: qui sciet providere, finemque imponere, vt locus alijs concedatur. Non omnibus vna conscientiæ ratio est. Huic plura dicenda erunt, illi pauciora; hic proferet omnia, ille mediam & potiorem partem subtilebit. Hic magnam molestiam, ille nullam experitur: modo nihil illi producat, quod non spectet ad Confessionem, & ad hoc Tribunal, quis queri meritò poterit? quod lubet, obtrectent alij: ego existimo maiorem exhiberi charitatem homini non posse, quàm permittendo, dandoque operam, vt illius anima veram pacem, tranquillitatēque consequatur, quantumvis Confessio etiā cum nausea protraheretur. Quid prodest latitiam ficto vultu gestūque simulare, si cor dolore premitur, & pacis est expers? valde metuo, ne ij, qui hanc animorum tranquillitatem impediunt, insignem aliquando Iudici supremo rationem reddant, exsoluantque, aut in hac, aut altera vita id quod indiscretus, & ineptus ille zelus

com-

commeretur. Suaderem nihilominus,
vt qui præuideret se insolita quadam
prolixitate vsurum, tempus aliud op-
portunum deligeret, ne expectantium
patientiam abutatur. Absque hoc casu,
habeat patientiam, qui vult. Hagio-
phila, vtere commoditate tuā, dic accu-
ratè omnia, & contenta recede ab hoc
opere, sepositis humanis respectibus.
Recta facientem, dicta aliorum curare
non decet. Neque patere, vt te genio
quarundam personarum, minus pietati
deuotionique addictarum accommo-
des, vt Sacerdos te non dirigat, non sole-
tur, non plenam (cum ijs quæ antecede-
re & subsequi solent) formulā proferat
absolutionis. Bonæ enim apprecationes
sunt, & Ecclesiæ orationes pro te, quæ
id etiam efficiunt, vt omnes secuturæ
actiones tuæ & gloriam cælestem me-
reantur, & expiandis peccatis tuis ser-
uiant. Quo fructu priuareris, si temporis
lucrandi gratia, solū simplicem abso-
lutionem verbis pauculis comprehen-
sam enuntiaret. Vbi otium tibi fuerit,

inquire, quid velint ea verba, quæ ab-
lutioni præmittuntur, & postponuntur,
Videbísque non imēritò tibi à me com-
mendari, vt ea dici à Confessario postu-
les, quemadmodum cōmunis fert vsus,
nisi obstet pœnitentium multitudo.

V. *Prudens*, tum in modo confiten-
di, non nominatis complicibus, aut alijs
personis, quæ ad peccatum aliquid con-
tulerunt: tum ratione Confessarij non-
tam prope accedendo, vt eum contin-
gas, deinde non vtendo nimia cum illo
familiaritate: fiducia adesse debet, non
familiaritas; grauiter adeundus est, &
cum terminis honore reuerentiâq; ple-
nis; quòd etiam extra Confessionem
obseruandum, si contingat illum adiri
oportere: quod ego quidem fieri velim
rarissimè, & solùm occasione vel dubij
alicuius resoluendi, vel obtinendæ cu-
iusdam facultatis, vel ex singulari quo-
dam desiderio profectûs, & diuini amo-
ris augendi, quæ sola motiua B. Mariam
Venetam, vt Confessarium extra Con-
fessionem conueniret, impellebant.

VI. *Seria*: vt te geras tanquam in actione maximi ad salutem momenti, & singula ita peragas, quasi statim post moritura: exemplo Religiosi illius ex ordine D. Dominici, qui in infirmitate grauiſſima monitus, vt ad mortem ſeſe diſponeret, Superiori reſpondit: ah mi Pater! triginta iam anni ſunt, quibus quotidie confeſſus ſum, & Miſſam celebraui, quaſi ijs peractis vitâ eſſem illico exceſſurus. Vnde concludo, omnem actionem eo tempore procul abeſſe debere, quæ aliquam redolet leuitatem. Reperiuntur, qui eâ tunc ſunt immodeſtiâ, quaſi recreando animo tempus concederetur: quin eoſque ſe effundunt, vt ſua apud alios peccata inquirant, aut aliorum inſpicere Confeſſionem velint, vt forment ſuam. Quæ agendi ratio nequitiam & animum arguit inſolenter diſſipatum.

VII. *Humilis*: oportet enim accuſare ſe potiùs, quàm excuſare, vituperare, quàm adulari: ad maiorem deinde humilitatem, & conſuſionem dici debet,

non solum numerus proximus peccatorum venialium, sed etiam scelus aliquod vitæ antea actæ. Verum quidem est id vltimum pluribus esse in vsu, sed non hoc instituto. Satagunt illi dare materiam, absolutioni sufficientem, planè quasi deesset, si non emendicaretur à leui aliquo mendacio, aut actu vanæ gloriæ aliàs admissæ, cuius ad finem mentio fit. Magni istud non facio, si aliud non intenditur, cum inde poenitenti sit aliqua vanitatis occasio, sibi de innocentia sua sic blandienti, vt pro materiâ confessionis necessaria, sit opus recurrere ad manifestum aliquod crimen præteriti temporis. Quare consuetudo quidem illa retineri potest, sed alio ex motiuo subeunda, nimirum vt magis te humilies, vt actiones vitæ tuæ magis magisque detestere: quo pacto; si in cæteris defuerit, absolutionis materia, in hoc vltimo subiicietur, & occasio subtrahetur vanitati.

VIII. *Fidelis* Confessario: vt non referas alijs, quæ ille tecum confidenter. & ad animæ tuæ salutem communicauit.

Non

Non quòd eodem iure obstringaris, quò
ille tua silere cogitur : è re tamen esse vi-
detur, vt non recantes ea, quæ ille tibi di-
xerit: aliàs reddes Confessionem ex par-
te illius odiosam, adimésque libertatem,
ne tibi aliisq; ex animi sententia loqua-
tur, ne rectè fungi audeat officio suo. Pa-
tereris tu, vt referret ea (non dico scele-
ra) sed alia quædam, quæ ex occasione,
& fiducia, illi hoc loco sacro commisisti?
quâ igitur fronte tu reuelas ea, quæ ipse
arcana esse voluit? si me audis, nihil
euulgabis eorum, quæ tibi in hoc Sacra-
mento dicuntur, ne poenitèntias qui-
dem tibi impositas: displicet id Confes-
sario; præterquam quòd illa etiam ra-
tione animi tui statum alijs manifestas,
qui probè norunt æstimare, quibus casi-
bus eæ poenæ debeantur.

IX. *Secreta*: Cùm æquum non sit, vt
alteri, quàm Confessario, peccata nostra
innotescant, malè illa cum vllò alio
communicantur: neque facilitatem il-
lam nimiam, quâ Confessio seu particu-
laris, seu generalis subinde familiaribus,

aut

aut alijs, quantumuis aliquo officij genere præpositis, ostenditur, possum alio quàm leuitatis, aut impudentiæ, aut puerilitatis nomine compellare. Grauiùs profectò apprehendi debent eæ, quæ in Deum admissæ sunt iniuriæ, etsi exiguæ videantur. Néque mihi probari similes communicationes possunt, & quæcumque rationes adferantur, non assequor, nec vt illum agendi modum admittam, inducor. Non augetur inde Contritio, imò contrà accidit: nam insinuat se hîc tacita peccatorû complacentia, & quædam approbatio, quòd hoc illûdue feceris, aut quòd vitam minùs peruersam duxeris: vnde vanitas animum titillat. Non redditur hinc pœnitens instructior, ne quidem, quando Nouitia illam Superiori suæ aut Præfectæ ostenderet: nam illarum officia ad Confessiones non ordinantur, neque solet Deus ijs conferre spiritum directionis tali vsui necessariû: præterquam quòd assequi nequeant intentiones, quibus huic vel illi vitio indultum est; & sæpe ne naturam quidem horum

horum peccatorum intelligant, fortasse nec nomen, cum primâ ætate Religionem ingressæ sint: itaque discent ea, quæ nunquam sciuerunt, quæque scire nunquam deberent. Quòd valde absurdum est, &, quàm credi possit, periculosius. Atque inde plurimum anguntur, vt decernant, quid ex ijs, quæ chartæ commissæ sunt, confiteri, aut reticere oporteat; nisi eorum intelligentiam sibi velint arrogare, eousque, vt animas exponant periculo ruinæ, bonamque Confessionem impediant. Sed ponamus aliquam hinc hauriri posse instructionem, satius tamen foret eam à Confessario proficisci, quamquam constaret aliquo temporis & patientiæ dispendio, quàm ab ope alterius personæ, ad quam talium rerum notitia non spectat. Et Confessarij (cuius aliàs officium est) molestia, tanti non est momenti quanti periculum quod alteri ex lectione, & notitiâ eorum, quæ in arcano Confessionis tribunali tantum tractanda sunt, impendet. Ita vt non videam, cur modus iste, & libertas inspicien-

ciendi Confessiones ; debeat tolerari. Quòd si in quibusdam Religiosis domibus ea viguerit consuetudo , non sequitur eam debere propagari : non vsus est, sed abusus, isque grauißimus quem imprudentia introduxit, fouitque mala curiositas earum personarũ, quæ nec Confessionis dignitatem (pace illarum dixerim) intelligebant, neq; institutum suum à similibus facultatibus alienum ; neque incommoda inde emanantia, neq; morsus Conscientiæ, quibus impeti meritò possent, & à quibus aliquando, ad rem illã confessione expiandã, adigerentur.

Tantum igitur abest, vt ille abusus tolerari debeat, vt è contrario sit penitus abolendus, diffamandusque narratione damnorum inde emergentium, quæ sane exigua non sunt. Primum est à sacrilegijs, quæ hãc occasione committi solent. Persona enim, quæ nouit prius inspiciendam suam Confessionem, quam Sacerdoti eam enuntiet, neq; aliàs considerat, non teneri se, vt eam sic scribat, quemadmodũ Confessario dicenda est,

ex horrore ignominiae, & ne suam viuendi rationem ipsa publicet, certò certius admittet grande sacrilegium, nisi aliud Confessario dicat, quàm quod inscriptum est, cùm omnia non inscripserit, quæ Confessione forent expianda, vt si aliquid mortale in Confessionibus ordinarijs sciens reticuiisset. Neque ista cerebri mei inuenta sunt, aut sine certa cognitione prolata. Scio talia sacrilegia accidisse, & ad eum quidem modum, vt misera quædam creatura per plures menses (ne dicam annos) & ante, & post Professionem in hoc statu damnationis hæserit: & quæ huius mali causa? præclara illa Superior, quæ scire omnia cupiebat, omnium perlustrare Confessiones, quæque iram vultu prodidisset, & peius aliquid, si quæpiam fuisset eius frontis, & animi, vt chartulam porrigere detrectasset: at audacter ista, inquires, imò verò loquor audacissimè, & quidni? cùm malo medicina adhibenda sit, & facultatem habeam hîc ista proclamandi, vt cæteri resipiscant, & vt mul-
tum

tum dicam, non metuo, ne innotescat, in quem agrum hic lapis destinetur. Cum enim me pluribus Congregationibus diuersorum Ordinum impenderem, quis poterit assequi coniecturâ, vnde hic ictus accidat? præsertim cum non sit vnicus tantum Ordo, in quo istud, quod persequor, fuerit vsurpatum. Alterum est à curiositatibus, quibus eæ Confessionum inspectrices in vitam alterius intendunt; & ijs, quæ (præcipuè in materia Castitatis) cogitationes suggerunt impudicas, & tentationes (adeò vt etiam periculo exponantur, nisi magna sint, præditæ virtute) plurimum notitiam quaestionibus extorquendi, quod facere Confessarius non auderet, quòdque grauitè eas offendit, quæ suam Confessionem ostendunt: vnde non omittunt hæ conqueri datâ opportunitate, vti reipsâ sæpe questæ sunt, & detestatæ illam agendi rationem, dolentes quòd aliquando chartam suam inspiciendam porrexissent, aut omnia adolescentiæ suæ flagitia adnotassent. Tertium est à periculo manifeste-

nifestandi id, quod hoc pacto cognoscitur, aut exprobandi, vt alicubi factum scio: cum enim secretum hinc tale non sit, quale in sacro tribunali Confessionis, facillimè aliquid excidit, præsertim apud foeminas, quæ secreti tenaces esse non possunt. Quartum est à molestia, quam pleræque in ostendenda sua Confessione experiuntur: à grè faciunt, quidquid vultu simulent, faciunt inuitæ, ne displiceant, ne minùs cæteris præstent, ne incurrant indignationem; nihil adfero, quod non sciam, quodque non multis, grauibusque experimentis didicerim. Nec miror horrorem illum & difficultatem: si enim molestum sit vitam suam & occultas actiones patefacere Confessario, qui tantà secreti lege tenetur, & qui aliunde supremi Sacerdotis Christi locum occupat: quid tandem erit se manifestare foeminæ, ab istis conditionibus remotissimæ, & cui ius nullum est penetrandi abdita conscientiarum, soli Deo, eiusq; Vicario referanda?

Hisce ergo rationibus & incommo-
dis

dis impulsas esse arbitror Superiores
Ordinis cuiusdam Religiosarum, quas
magno affectu honoréque prosequor, ut
ad euitandam notam, quæ à tali consue-
tudine illis immincebat, statuerent, vel-
lèntque promulgari in omnibus sui in-
stituti domicilijs: nò esse mentem suam,
ut ea facultas per Ordinem proserpat, &
si alicubi abusus aliquis aut impruden-
tia circa illam accidisset, illicò reme-
dium adhibeatur, neque vlla Superio-
rum Directricum, aut Nouitijs Præfe-
ctarum sit tam temeraria, ut deinceps
defectum tam perniciosum, qui infama-
re Ordinem, & multiplici culpâ Deum
posset offendere, admittat. Spero illa-
rum exemplo cæteros Ordines, consue-
tudini huic obnoxios, pariter prospectu-
ros, & opportunis occursuros edictis ex-
sententia suorum Prælatorum, quos pro-
pensos experientur. Quod ad te attinet,
Hagiophila, ne tuam alteri quàm Con-
fessario Confessioné indices, aut osten-
das, veto. Si alicui testari velis sincerum
& confidentem animum tuum, per me
licet,

licet, testare, sed in negotio alio: in hoc, iterum veto, & vt mihi auscultes, rogo. Vtq; sum, si etiam postea quàm mihi confessà es, legendam mihi porrigeres chartam tuam, certò tibi persuasum habebas, me eà facultate non vsurum; acciperem quidem eam ad comburendum, non verò vt eam inspicerem, etsi omnium per te iam forem conscius. Et quandò eam de facultate tua legissem, non obstante illa bona venià, istud vitium confiterer: tam à re, & ratione abhorrentem existimo illam alienæ Confessionis inspectionem.

X. *Pacata, & tranquilla.* Conditio hæc non seruit nisi animabus scrupulosis; & idcirco, Hagiophila, si scrupulis non angaris, non est, quòd ultra intendas huic dissertationi, quæ iam nunc modum & propositam mensuram excedit. Si verò scrupulosa es, primi moniti loco tibi author sum, vt scrupulos eamque cogitationem, quæ te reddit anxiam, in diem Confessionis destinatum seponas. Faciebat id B. Aloysius Gonzaga, eaque ratio.

ratione animum necessariâ ad reliquas pietatis exercitationes quiete componebat; vbi è contrario si mentem aduertisset ad scrupulum suum, continuâ sollicitudine, forétne peccatum, an plenus adhibitus consensus, an confessione exprimendum, similibusque curis caput & valetudinem labefactasset Alterum, quod tibi offero, monitum est, vt vtaris punctis sequentibus, quæ viri æqua sanctitatis, & doctrinæ laude florentes præscribunt. & quæ ego dedita opera ad opem scrupulosis ferendam collegi. Sed priusquam illa pertractem, existimo præmitti debere: quid sit anima scrupulosa, & quandonam censeatur capax eorum, quæ dicturus sum. Animam ergo assero scrupulosam esse, quæ perplexa, dubia, & in assidua anxietate est, vtrum peccauerit, an non, consenseritne cogitationi, an non, & sic de cæteris. Quando verò persona aliqua sic est, talisque à Confessario, & alijs idoneis viris iudicatur, & aliunde gerit curam animæ suæ, cum proposito, vt nolit Deum vllâ ratione

tionem mortaliter offendere, habeatque illam experientiam, quod ab eo tempore, quo proposuit diuino seruitio se mancipare, nullum vnquam peccatum mortale, aut vix vllū sciens admisit; quando, inquam, persona eiusmodi est, securè, & sine vllō metu, poterit vti hisce punctis. Primò: Persona scrupulosa, qualem iam descripsi, non obligatur confiteri id, de quo non ausit iurare fuisse mortale peccatum, quando illud perpetravit, aut esse mortale, quod perpetratum est. Atque hæc regula multò verior est circa peccata venialia, de quibus dubitatur, fuerintne dicta in Confessione: si enim non auderes iuramento affirmare quod nunquam illa dixeris, nulla confitendi obligatio est. Secundò: Si circa præterita dubitat: consenserintne, an non, vtrum aduerterit, an non; vtrum confessa sit, an non; vtrum contra conscientiam dictamen egerit, an non; vtrum illud semouerit, an non; iudicare debet, & credere, se in nullo horum deliquisse, aut peccasse, neque confessione opus est.

H se,

se, & debere se esse tranquillâ securâque
 conscientia; adeò vt etiam si reipsa pec-
 catum fuisset, Deus tamen nullam ab
 ipsa rationem exacturus sit, neque quòd
 ita determinauerit, neque quòd illud in
 Confessione reticuerit. Tertiò: Si inter
 anxias dubitationes, quæ animæ scrupu-
 losæ occurrunt, accideret aliqua huius-
 modi, an nimirum peccaret, an non,
 istud dicendo, vel faciendo, aut hanc vel
 illam rem omittendo peccatum fieret,
 quamdiu tam manifestè illi non propo-
 nitur, vt iurare possit esse peccatum, hoc
 casu debet affirmare peccatum non esse,
 neque illud patrando se peccaturam.
 Tutius tamen tum foret, probè in rem
 inquirere, eamque omittere, donec per-
 specta sit, modò omitti commodè pos-
 sit: nihilominus si fecerit, non erit pec-
 cati rea. Quartò: Fidem habere debet,
 suumque iudicium subijcere dictis &
 consilio Confessarij in ijs omnibus, quæ
 ad conscientia directionem pertinent.
 Si lubet, præter hæc, subinde peruoluere
 poterit Tractatum de scrupulis, qui in-

ter.

ter Opera Rodericij reperitur, & singulari quâdam Religione ferri in cultum S. Iosephi, & S. Ignatij fundatoris nostri, eorum opem quotidie implorans, ut à scrupulorum molestia liberetur: faciet, quod erit è re sua, & commodo; quam quoque gratiam postulare poterit, quoties in Missa populo Sacratissima Hostia demonstratur.

Atque hæc de ordinaria Confessione dicenda occurrerunt, prolixior me fuisse fateor, sed cum cœpisssem, præterire nihil volui; alias ero breuior, neque tam multis te detinebo.

Si hæc Lectio non placet; lege cap. 3. 4. & 5. tract. 2. part. 1. Rodericij, aut cap. 19. & 21. lib. 1. de Imitatione Christi.

Peractâ Lectione renoua deuotionem erga animas in Purgatorijs flammis existentes; illas eò tepiditas præcipitauit. Aptissimè hodie, quo damna ignauia spiritalis consideras, earum recordaberis; ut deinceps opem, & solatium conferas. Vide igitur, quid hætenus illarum gratia egeris, quid agere impofterû decernas. Consulere potes ea, quæ ad initium Nouembris, in Anno Sancto à me con-

cinnato, proponuntur, aut ipsa modos subsidij ferendi excogita, Dinius Dominicus plurimas pro illis pœnas & corporis macerationes subibat; S. Malachias Missarū illis applicabat sacrificia, S. Xaverius merita indulgentiarum; Alexander Lusacius multas preces, & sæpenu-merò defunctorum Officia ijs liberandis recitabat.

Dispone te iam ad sequentem Meditationem.

II. MEDITATIO.

De damnis, quæ proueniunt ex actionibus tepide, & ex consuetudine factis.

Oratio preparatoria solita.

I. P *Præludium.* Contemplare Deum in Paradiso creantem, & producentem omnia non defunctoriè, sed perfecte Perfecta enim sunt opera Dei, & valde bona.

II. Prælud. Pete à Deo gratiam, quâ cognoscere possis, in quo consistat imperfectio, omnia sua defunctoriè, & tepide paragendi, vt ab ea consuetudine desiscas.

I. Pun-

I. *Punctum.* Actiones suas perfundere, & ex usu facere, est primò, facere, quidem substantiam operis, sed sine debitis circumstantijs; oras, sacro interer; at quo modo? sine attentione: quantum? contrahis debitum tempus. Cur? sine recta intentione, vt ab hominibus videaris, ne minùs cæteris facias. Quod in alijs quoque actionibus vsuuenit, vt si idcirco compositè incedas, quod alij te aduertant. Secundò, est ludere in incertum, & aërem verberare, vt Paulus loquitur; cùm nec finem, nec scopum debitum actionibus meis proponam, aut intendam id, quod à voluntate Dei est alienum, etsi in speciem bonum videatur. Ita Saul armentis optimis pepercit prætextu sacrificij, quâ tamen re vehementer Deum offendit.

II. *Punctum.* Actiones sic factæ tria nobis damna inferunt: Primò, subinde nos ad mortale peccatum disponunt. Diebus feriatis sacrum audiens oro ex usu quodam, & omnis generis distractiones admitto, ijsque immoror; tan-

tundem deinde aut etiam peius facio in
sacro festæ diei, & en peccatum morta-
le, si ista mentis euagatio voluntaria est,
& cum morâ notabili. Idem accidit in
Officio Canonico, ei qui iure ad hoc
obligatur. Secundò hac agendi ratione
prius me solatio, & tranquillitate ani-
mi, quam ij possident, qui actiones suas
cum feruore exequentur. Careo lætitiâ,
& meritis Sanctorum, quæ tamen sum-
ma esse oportet, postquam annum inte-
grum, imò decem, aut viginti, aut etiam
triginta annos Deo feruenter, summâ-
que perfectione impenderunt. Tertiò
faciunt hæ actiones, vt ad perfectionem,
ad quam tamen obligamur, attingere
non possimus. Quidquid creatura pro-
ducit, conforme est fini & perfectioni
ab ea requisitæ. Quid aliud à malo ex-
spectas quàm poma? prodigium foret,
si produceret saxa. Vide ergo, an fru-
ctus feras tuæ perfectionis: cui sanè per-
fecta esset Confessio tua generalis, mi-
ra isthic monstra, & portenta depre-
henderet. Admirare, anima mea, Dei
poten-

potentiam, bonitatem & benignitatem: sufficiunt illæ, vt cor tuo durius emolliant, & ad feruorem animum accendant.

III. *Punctum.* Media aduersus hunc languorem, aut languidam consuetudinem. Primò, Examen particulare plurimum proderit, si per menses aliquot, & statis horis seriò in istos defectus inquiras. Secundò asperitate aliquà opus est, vt tibi ipsi pœnam imponas, quoties deliqueris. Ex mente Ludouici Granatensis, cor nobis esse debet filiale aduersus Deum, maternum erga proximum, & Iudicis erga nosipfos. Tertiò candidè, & sincerè commissos defectus aperi vel Confessario, vel ei, qui animæ tuæ curam gerit, rogando, vt tibi pœna publica priuatâque imponatur. Quartò exercitium præsentiæ Dei, quæ te operantem obseruat. Quintò tibi propone IESVM, Sanctissimam Matrem, aut alium Sanctorum aliquem, & considera, quâ ratione istud operis peragerent.

Colloquium ad Spiritum sanctum.,
qui totus ignis est & fervor. Et dic: vo-
lo, ita ratum est, volo, cum fervore mea
deinceps exequi, & cum gratia Divini
illius Spiritus fieri. Amen. Veni Creator.
Pater, Ave.

Recollectio. Visitatio Venerabilis Sacra-
menti. Examen. Prandium. Recreatio.
Visitatio Venerabilis Sacramenti. Exa-
men particulare. Tempus scripturæ, no-
sti, quid scribendum sit. Lectio spiritualis,
aut dissertationis proximæ, aut eius
quod postea notabo.

DISSERTATIO POME-

RIDIANA.

*De spiritu fervoris erga actiones etiam
heroicas.*

HAgiophila, Nonne magni fauoris
loco numerares; si tibi panderem
secretum aliquod summi ad salutem
tuam momenti? candidè; quid scire
aueres in hoc grauissimo negotio? pol-
liceor me tantam tibi daturum satisfac-
tionem, quantam exigere vix auderes.
Non petes autem, an è numero sis præ-
desti-

destinatorum: nam reuera id à me intelligere non potes; & Deus auertat, vt id perspectum habeas. Si enim istud tibi manifestaretur, ne tu per dies aliquot cum S. Francisco, à mente abalienareris! præ gaudij vehementia contineri non posses, quin ad instar Mænadis alicuius per domum, per porticus, per compita discurreres. Istud nuntium auertat Deus. Et quis scit, an non de salute tuâ reddita certior, inciperes negligere studium virtutis. & magnæ gloriæ in cælo consequendæ desiderium? Vei, si significaretur, te esse reprobam, tunc enim subduci omnes funes deberent, ne aliquo gulam tibi frangeres desperabunda; nisi fotassis animus tibi foret illius Abbatis, quem malus Angelus è reproborum esse numero asseuerauerat. Reproborum? inquit Abbas: non obisto: fiat Dei voluntas. Verum quid agendum mihi sit, noui: quandoquidem æternum dammandus sum, & priuandus felicitate Deum semper amandi, reliquum vitæ meæ impendam in ardentissimum illius

amorem, & quia beatitudo celestis in
amando Deo consistit, si amare illum in
altera vita non possum, in hac amabo; &
hoc exiguo tempore, quod mihi restat,
caelo fruar. Quam aliam curiositatem
scire desiderares? (nam quoad illam
credo tibi excidisse appetitum) velles
scire, diem, annum, & locum mortis
tuae? at illius rei notitia, adhuc alterâ
perniciosa est. Si enim tempus proxi-
mè instaret, inconsolabili animi agri-
tudine opprimereris; sit verò procul ab-
esset, eò feruorem tuum, & bonorum
operum exercitationem differres. Quo-
ad locum, fremeres, quoties illius me-
minisses: quid si adire cogereris? si me-
audis, elige rem aliam icitu vtiliorem.
Voles forsan intelligere, dimissane sint
peccata tua? Ad hæc æquè inepta curio-
sitas est. Si enim negetur, iam despera-
tioni proxima es; si asseratur, frueris ali-
quot dierum solatio, sed postea sollici-
tudo eadem te affliget: nouis enim scele-
ribus admissis, nescies, an hæc tibi indul-
ta sint. Optime igitur renuntiabis omni-
bus

bus ijs curiositatibus, & arcani secretif-
fimi loco require à me viam, quæ recta
deducit ad cælum. Sic, sic loquendum
est, ista placet curiositas, cuius auidos
esse mortales omnes oporteret: lubens
illi satisfaciam, & respondere paratissi-
mus sum. Sine dubio reperiuntur rectæ
ad cælum viæ, alioquin non diceret Sa-
piens cap. 10. *Quod iustum deduxit Do-
minus per vias rectas, & ostendit illi re-
gnum Dei.* Neque debet à me discepta-
ri, quænam viæ sint rectæ, si verum est
eas esse rectissimas, quæ sunt breuissimæ.
At breuiorem non inuenio, neque pro-
inde rectiorem, quàm sit illa feruoris
spiritualis, modò ea, quâ dicturus sum, ra-
tione accipiatur, intelligaturque. Duo
solum genera sunt eorum, qui feruent
in diuino seruitio: sed vtrique in via ad
cælum progrediuntur, incredibili velo-
citate: vnde in eam opinionem venio,
feruorem animi plurimum valere apud
Deum, & mirum in modum accelerare
iter ad egregiam sanctitatem. De primis
loquamur; Præstantissimus feruor est

eorum, qui dant operam actionibus heroicis, generosis, & ita sublimibus, ut radiorum suorum splendore consuetudinem obfuscent vulgarium actionum. Fertur natura in sinu suo gestare reconditas quasdam productiones extraordinarias, & effectus gloriosos qui vulgi iudicio prodigia miraculaque existimantur. In India arbores sunt pomiferae, quae identidem non nisi vnicum fructum producant, sed eius magnitudinis atque ponderis, ut robustissimi hominis vires, non dico, ferendo, sed vix leuando oneri sint pares. Tale pomum, naturae nisus est, qui spectatores in admirationem rapit & stuporem. In terra Promissionis tam grandes, & graues botri colligebantur, ut vnicus duorum fortissimorum virorum humeros fatigaret. Botrus istiusmodi erat naturae miraculum, quod Israelitas ad illius terrae desiderium inflammabat. In Parquaya, Occidentalis Indiae Prouincia, reperitur gemma, quae vna reliquarum oranium gemmarum elegantias comple-

plectitur. In ea Adamantes, Amethy-
sti, Rubini, Carbunculi, Smaragdi alij-
que similes, ita insiti, vt in Granato po-
mo grana: Tam elegans gemma, vt ob
formæ præstantiam gemma admirabi-
lis, & vnio sexaginta elegantiarum no-
minetur. Habet id quoque commodi,
quod è terræ visceribus, tanto impetu
tumultuque gignitur, vt crederes nu-
bem aliquo tonitru dissilire, idque Inco-
lis indicium est, vt hanc tot pretiosissi-
marum gemmarum congeriem colli-
gant. Atque ista magnum profectò na-
turæ prodigium est, quod in pluribus
quoque alijs ostendi posset. Ad eum
modum gratia se habet; habet ipsa pro-
ductiones & nisus suos, ac actiones nimi-
rum heroicas, sed quæ duntaxat ad eos
spectant, qui feruent magno animi spi-
ritusque ardore, & calent alio sangui-
ne, quàm vulgus commune mortali-
um. Vt clarius mentem meam assequa-
ris, dico Actiones hasce potius angeli-
cas esse, quàm humanas, & esse adeò
excellentes, vt si Deus inter homines

verlaretur, non aliter eas exerceret, actiones omninò altas, sublimes, generosas, feruentes, Angelicas & diuinas, quibus, quicumque incubuerit, fructum refert incredibilem, & tam singulares in sapientia progressus facit, vt homines, Angelos, & Deum abripiat in sui admirationem & amorem. Eius generis fuit sancti Alexij fuga, quâ se è domo paterna proripuit, primâ nocte nuptiarum, sponsam intactam relinquens, paupertatis propter Iesum experiendæ studio, & amore Castitatis. Erat isthæc actio heroica, feruens & generosa, effectûsque insignis eius, quo æstuabat, feruoris. Talis fuit etiam despicientia dignitatû mundanarum in sancto Ludouico Gallici sanguinis Principe, qui deseruit omnia, vt S. Francisci vilem pauperemque habitum indueret. Similis prætereà fuit in sancto Casimiro Polonici Regis filio, amor integritatis. Vitæ periculum adibat is, nisi matrimonium iniret. Castitæ valetudinem labefactante: at maluit vitam amittere, quàm virginitatem.

Hæc

Hæc sanè actio, & sexcentæ aliæ huic pares, quas, vbi occasio sese obtulit, magni nominis sancti exercuere, omninò actiones sunt heroicæ, gratiæ prodigia, & germina spiritualis illius feruoris. Verùm enimuerò, quia nihil egisse videbor, nisi hoc iter ad cælum esse rectissimum, breuissimùmque demonstrēm: aio id adeò certum esse, vt vnicus subinde actus heroicus sufficiat, non solum ad aucupandam diuinam gratiam, sed etiā ad illum ipsum feruorem deinceps obtinendum conseruandùmque. Sic accipio illud Cantici Canticorum, vbi sponsus affirmat se abreptum esse, vnicā cogitationum illius: *Vulnerasti cor meū soror mea sponsa in vno crine Collis tui.* Prima B. Virginis cogitatio, quā se sub ipsam Immaculatam Conceptionem suam, integre Deo dedicabat, sic diuinum cor, & affectū rapuit, vt illicò fauores omnes, & gratias in illam congesterit. Maria eximia est, sine pari est, nimium supra mortalitatis nostræ conditionem eminet: Mariam aliam addeamus, videlicet
Mag-

Magdalenam ; ab vnica heroica , & feruenti actione , insolitum illum Christi fauorem beneuolentiamque est consecuta. Videre Puellam nobilem (qua nulla Ierosolymis naturæ dotibus instructior, qua pompa luxuq; cæteras omnes anteibat) humi prostratam ad pedes viri, inter epulas, præsentibus conuiuis, vt illum, quem Deum supremumque Dominum suum credebat, sibi conciliaret, nonne est hoc, habere præ oculis ipsam feruoris idæam & actionum heroicarum archetypum? *Pia impudentia*, inquit, Augustinus, *quesiuit sanitatem, irruens importuna conuiuio, opportuna beneficio.* Vocat ille piam impudentiam, ego feruorem indigitare malo, & assero hoc vnicum opus heroicum fuisse fontem, ex quo admirandi illi diuini amoris riuui, quibus deinde affluxit, emanarunt. Deus à creaturis suis, vinci humanitatis officio non vult: amat illas, blanditur, & longè alia ratione, quàm soleant terrarum Domini suorum subditorum, agnoscere obsequia, remunerat.

mus ex historijs Ottomannorum, quendam Mahometē, qui intimus & carissimus Solymanno fuit, nō aliter peruenisse ad tantos honorum & fauorum gradus, quos sub Solymanno, & alijs duobus Turcarum Imperatoribus occupauit, quā actionis vnius feruore animosoque plenæ officio. Epistolam legebat. Solymannus innixus fenestræ, qua in Viridarium erat aspectus, hæc legentis manibus excidit, viridario illapsa est: illicò tota nobilitas aulæ ad gradus currere; volare ad chartam: vt quisque prior referendarum litterarum honorem occuparet. Quid fecit Mahomet, vt anteuenteret cæteros? præcipientem se de fenestra dedit, sublatamque Epistolam primus Principi suo retulit. Actus ille tam acceptus fuit Solymanno, vt statim Mahometem authoritate, dignitateque præ cæteris auxerit, atque per omnem vitam habuerit in delitijs. Tantum potuit hæc affectus & feruoris in Principem deuotissimi testificatio. Ament sanè Solymanni, & orbis moderatores,

tores, tam illustrem, & amore plenam actionem; facilius tamen & admirabilius capitur diuina bonitas: opus vnicum plenum affectu & feruore, & aliqua nota insigne, obitum in ipsius seruitio, eam deuincit, vt tales amantes non solum in hac vita, singularibus fauoribus, verum etiam in altera magno gloriæ incremento prosequatur. Per texamus telam, quam orsi sumus: vnus actus heroicus, & extra ordinem feruens, diuinam maiestatem (si ita loqui liceat) rapit in admirationem, & incredibilia elicit reciproci amoris argumenta. Ob hanc rationem surrexit è throno Iesus, stansque S. Stephanum pro inimicis tanto animi ardore supplicantem spectauit, veluti huius stupore prodigij attonitus. Fecerat aliquando S. Teresa illustre, & feruens, nescio quod, opus: crederes Deum sibi imperare non potuisse, quin diceret: Teresa, si mundum non condidissem, illū iam tui gratia, & ex propensissimo erga te affectu crearem, Vides, Hagiophila, quid sit ferri

ferri in actiones insignis alicuius feruoris. Et nonne gratum est, quod de ijs tecum differam? addam igitur: equidem mihi persuades, te fieri sanctam velle, & ad sublimem perfectionē aspirare: Imò verò dicam, vnico solo actu heroico, & illustri opus esse, vt ad sanctitatem pertingas: & huc animum mecum aduerte, Sanctorum vitas percurrendo: plerumque reperiēs, principium sanctimoniae ipsorum ab aliquā generosa, & illustri actione promanare. Vnde coeperit S. Alexius, iam supra retuli, & peculiari animaduersione dignum est, quod in Ecclesia Dei nullus colatur Sanctus aut Sancta, Generosi vel Generosæ nomine, nisi ipso die S. Alexij, qui in decimum septimum Iulij incidit: Quasi Deus, permittendo, vt isthoc solū die S. Generosus, & S. Generosa mortem oppeterent, indicare vellet, eos viros, qui piē Generosi esse desiderarent, & mulieres, quæ etiam Generosæ esse cuperent, incipere debere ab actionibus heroicis, S. Alexij exemplo. Adeo verū est ab vna generosa

nerosa feruentique actione dependere, sanctitatē. Eximius ille vir Cæsar Buzius euasit in sanctum, talisque esse perrexit, simul atque (vti alio loco narraui) hoc à se obtinuit, vt Augustissimum Sacramentum nudato capite, & facem manu prælucens, contempto nobilium familiarium occurſu, à quibus se ridendum, vilipendendumque præuidebat, ad ædes ægroti deduceret. Notum est omnibus, quid Imperatorem Theodosium, ad tantam vitæ sanctimoniam perfectionemque euexerit. Adulabatur sibi Eremita, non nemo, quòd in aliquem perfectionis gradum euasisset, cum ab angelo monetur, longè ab eo abesse; & Theodosium quantumuis sæculi curis & Cæsarea dignitate implicitum, maiora habere sanctitatis, & perfectionis argumenta. Quare statuit is adire ad Imperatorem, & in eius mores vitamque inquirere, quid tandem illum in numero perfectorum collocaret. Obtento aditu: sacratissima, inquit, Maiestas tua dignetur mihi suum viuendi modum, suas deuo-

deuotiones, & reliqua sua pietatis exercitia patefacere. Pater mi, reponit Theodosius, facio quod alij statutis temporibus Deum oro, mane, Vesperis, & in Missa. Timeo diuinam Maiestatem, quam ne propositis quidem totius Orbis coronis, offenderem. Studeo Castitati, & coniugali continentia. Hæ deuotiones meæ sunt, hæc tota viuendi ratio. Non acquieuit istis Eremita, secum reputans, quod non illa tantum, sed etiam maiora præstaret, vtpote matrimonij expers; adeò, vt statuerit vrgere Imperatorem, ne quid clam haberet. Videns igitur Theodosius rursùm se peti ab hoc homine, asseruit se nulla dissimulatione, vt, duntaxat habere se illam præterea consuetudinem, in ludis theatralibus, frænandi oculorum licentiam, & curiositatem: quotiescunque enim occurreret aliquid aspectu iucundum gratumque, & populus magnis lætitiæ vociferationibus spectaculo acclamaret, tum se demittere, aut omninò claudere oculos solere, ne quid eorum cupiditati indul-

dilgeret. Quod cum audiisset Pater, istud, inquit, erat quod volebam, abunde mihi satisfactum est. Abijt, & tam excellenti virtute attonitus, maiori quā hactenus studio decreuit applicare animum actionibus heroicis, feruentibus & generosis, cum ab ijs homines tanto pere attollerentur. Nonne ergo recte dixi, Hagiophila, vnica solū actione tali opus esse, vt sanctitatem consequaris? vnica sufficit, vt in rebus difficillimis, quæque sensui toto maxime aduersantur, non dico, nullam molestiam, verū etiam facilitatem experialis. Simulatque S. Xauerius os vlceri illius afflicti hominis admouit, vt pus exsugeret, nullum deinceps naturæ horrorem sensit in aspiciendis contrectandisque ægris, qualicumque demum morbo laborarent. Vna actio satis est, vt spectatores omnes permoueas, rapiasque animos etiam eorum, ad quos huius notitia permanabit. Socius S. Xauerij, cum in publico foro apud Indos concionaretur, in vultu contumeliosè despuitur à

præ-

prætereunte Idololatra. Quid egit? am-
 insolens facinus iusta iracundia, & indi-
 gnatione persecutus est? siluit, & im-
 moto animo vultuque, faciem sudario-
 lo deterfit, & inchoatam Catechesin
 peregit. Actus ille heroicus patientiæ,
 incredibiles peperit animorum motus,
 & conuerfiones. Adeo verum est, vnam
 solam illustrem actionem omnibus in-
 gentia adferre emolumenta, & illis præ-
 fertim, qui eam exercent. Vnde non
 immerito dixit sapiens, egregios & fer-
 uentes viros suis operibus opes præstan-
 tissimas colligere: *Manu fortium diui-
 tias parat.* Ah quàm promptum est, bre-
 ui ditescere! quàm est facile consequi
 sanctitatem! nullo enim apparatu opus
 est alio, quàm generositate feruoreque
 horum diuinorum Amantium, & huius-
 viæ ingressu, quæ rectà securissimèque
 ad cælum deducit.

Addamus aliquid de secundi generis
 feruentibus, qui quoque rectà ad cælum
 gradiuntur: fortasse priores animum
 tibi euertunt, & difficulter induci po-
 tes,

tes, vt talem de te reportes victoriam :
 insiste igitur vestigijs aliorum, nec me-
 prius desere, quàm accensam te sentias
 horum vel illorum feruore. De hisce
 loquitur sapiens cum ait : *Vidisti virum
 velocem in opere suo? coram Regibus sta-
 bit, nec erit inter ignobiles.* Quasi dice-
 ret : obseruastine aliquando egregios il-
 los Principis assēctas, qui tanta animi
 promptitudine omnibus illius manda-
 tis obsequuntur? siue res imperata sit,
 difficilis, aut facilis; magna aut exigua;
 gloriosa vel abiecta, prompti æque pa-
 ratique sunt, eamque exequuntur in-
 credibili celeritate atque alacritate: eo-
 que pacto ita sibi deuinciunt Principis
 animum, vt eos abesse nolit à latere suo,
 quin ad nobilissima officia euehat, præ-
 cipuasque dignitates. Aduertisne etiam
 personas in Dei obsequijs promptas, &
 ad omnia quæ illis significantur, & præ-
 ciipiuntur, ita paratas, vt neque excipi-
 ant, neque obloquantur, neque diffe-
 rant, neque cogitent: cur istud mihi,
 & non alteri? non attendant conditio-

nem

nem personæ imperantis, siue ea par-
 siue inferior, siue superior sit? hîc au-
 dacter pronuntia, tales esse eos, quos
 imitari te oporteat, & nisi in ijs sit fer-
 uor spiritus, nescire te vbinam locorum
 ille resideat. S. Patriarcha noster Igna-
 tius aliquando obuium habuit aliquē ē
 suis, qui tepidē segnitérque commissum
 sibi negotium peragebat, cuius, inquit,
 gratia, mi Frater laboras? cūmq; is re-
 spondisset: Dei; itane verò, ait S. Pater,
 Dei opus tam negligenter? nā longē
 alio feruore & alacritate, tanto Domi-
 no exhibendum obsequium est! quo-
 ties in memoriā mihi reuoco, quanta
 promptitudine B. Magdalena surrexe-
 rit, simul atque intellexit à sorore, sese à
 IESV citari (*Magister adest, & vocat te.*
Ille ut audiuit surgit citò, & venit ad eū)
 toties mihi persuadeo, cum esse feruen-
 tium morem: arbitrantur à IESV se vo-
 cari, ad hoc illudue peragendū; & qua-
 lecūque sit, eò tendunt, ferunturque
 eā lætitia, & feruore, quem meretur is,
 cuius gratia, suas actiones suscipiunt, &

prosequuntur. Hagiophila, nonne fas
esset æmulari studium illorum, aut sal-
tem proximè facere, quòd mundi ama-
tores, & Aulici in suorum Principum
seruitijs ardentissimè exhibent? an mi-
nus obsequij promeretur Iesus à te, quæ
te illius sponsam profiteris? quando di-
ligis creaturam aliquam (quæ vt plu-
rima habeat amoris incitamenta, non
aliud est, quàm terræ vermiculus) tan-
to affectu ardereque raperis, curris, vo-
las, vt illi adsis, illique seruias, aut vt ali-
quam tui in illam amoris testificatio-
nem demonstras; quid igitur te facere
non oportet, imò quantò ardentiori
amore feruoreque, debes sequi omnes
nutus tui amabilissimi seruatoris, eius,
inquam, qui tibi millies tenerius affici-
tur, quàm affici possent omnes totius
orbis creaturæ, quamuis omni amoris
lenocinio abundares? ad feruorem, ad
feruorè, Hagiophila, ego te inuito; istic
egregius amor est, istic decus, & perfe-
ctio diuini amoris consistit: & si eius
amoris habes socias, pia quadam æmu-
latio.

latione satagant singulæ, vt altera alteri
 generosè, heroicèque operando, lau-
 ream præripiat. Tu cæteras feruore su-
 pera, & præsta te dignam Alexio filiam,
 qui totos triginta sex annos continuis
 actionibus heroicis feruentibusque im-
 pendit. Iam hinc à temporibus Debo-
 ræ certamen fuit, quisnam feruoris &
 magnanimitatis laudem reportaret:
*Cum Debora facta est contentio magnani-
 morum.* Reuocare ista tempora non pos-
 semus, & sancta quadam ambitione cæ-
 teros in stadio feruoris præuertere? fa-
 cies id, chara Hagiophila, quandoqui-
 dem non frustra studiosè inquisieris re-
 ctam & breuem viam, quâ feliciter ad
 cælum peruenires.

Si lectio ista non sufficit, lege cap. 6. 7. & 8.
 Tract. 2. Primæ Partis Rodericij. Aut
 cap. 20. & 21. l. 3. Thomæ de Kempis.

Adest iam tempus Examinis circa diligen-
 tiam spiritualem, quam habere nos o-
 porteret; & ecce materiam, ex quâ facillè
 agnoscemus, an spiritualis feruor in no-
 bis hætenus fuerit.

EXAMEN.

De diligentia spiritali.

Q Vindecim notas tibi præfigo è quibus aduerteres, num habeas illam diligentiam, quam Dei amantes tantopere ambiunt.

Prima. *Magno ferri desiderio, ut in vita spiritali proficias, teque penitus Deo conseres.*

Secunda. *Generosè superare ea, quæ proprius amor maximè formidat; Contemptus, confusiones, humiliationes, & omne genus mortificationis, & abnegationis voluntatis propria.*

Tertia. *Sæpe facere bona, firmæque & constantia proposita.*

Quarta. *Operibus præteritis & propter Deum peractis non attendere, sed peragendis studere, & ad anteriora, ut Apostolus ait, se extendere.*

Quinta. *Labores suos, etsi assidui sint, & note alicuius, tamen modicos existimare. paruique facere.*

Sexta. *Declinare usum earum personarum, siue saculares, siue Religiosæ sint,*

qua

que nos distrahunt, & negotijs, aut cogitationibus, ab recollectione interna alienis, implicant.

Septima. Nullam ab ordinarijs exercitijs exemptionem aut immunitatem querere, aut admittere, ut liberius arbitrio nostro uiuamus.

Octaua. Amare sanctam illam captiuitatem, quã multarum rerum minutarum obseruationi adstringimur.

Nona. Affici studio Orationis, eamque cum gustu, & animi attentione peragere.

Decima. Facile reuocare animum ad interiora sibi que attendere.

Vndecima. Sedulo examinare conscientiam, cum animaduersione defectuum suorum, & emendationis proposito.

Duodecima. Molestè se rebus exterioribus impendere, nisi sit ad opem proximo ferendam, aut boni alicuius operis exercitationem.

Decima tertia. Amare disciplinam Religiosam, aut antiquas nostras deuotiones, eodem affectu quo illas initio conuersionis nostra prosequeremur.

Decima quarta. *Libenter sese occupare, & otium fugere.*

Decima quinta. *Impensè in salutem animarum incumbere.*

Peracto hoc Examine sequitur Oratio vocalis, Officij, vel alia. Deinde hæc Consideratio.

CONSIDERATIO.

I. Sic est profectus noster, vt nullum illi comparando negligi tempus queat; continuò prosequendus est, magnâque assiduitate, neque in itinere benè coepto fatigari, aut lentescere nos oportet. In cæteris omnibus sua sint intervalla, & tempora quietis, hîc nulla conceduntur.

II. In arbitrio meo est, magnam consequi sanctitatem: solius defectu fervoris gloriosam illam coronam, quam Deus offert, amitto. Multum perdo per ignaviam meam, vtinam non omnia!

III. Quid servius meretur, qui loco laboris, quem impendere Domino suo deberet, totos dies consumit risu, nugis, otio, desidiâque? quid ille dicet Dominus,

mus, operæ suæ mercedem exigenti? ah, ego seruus i. de sum!

IV. Præcepit Dei Filius, vt arbor, quæ non facit fructum bonum, exscindatur, & in ignem mittatur. Vtinam anima mea sit arbor bona, quæ firmas agat radices, vt quâcumque occasione extendere, & impendere virtutum exercitio me possim; vt vndequaque crescam per intentionem, & feruorem actionum mearum; vt non producam fructus vanâ gloriâ, aut amore proprio, humanôque quasi corruptos!

V. Omnia nos stimulant, vt tandem pigritiâ nostræ pertæsi, magnum in virtutibus progressum facere satagamus. Primò: Crescit corpus, & iustam suam perfectionem assequitur, quidni & anima mea quoque suam? Secundò: Laude dignus mercator est, qui maximum questum facit, & labore suo amplificat rem familiarem: opes ego maiores comparare mihi possum. Tertiò: Suspicitur Princeps, qui armorum virtute iustoque bello nouas ditioni suæ Prôuin-

cias, nouaque regna adiungit: & impedire nihil me potest, quin exiguo labore regna occupem excellentiora. Ignauus sit, qui uolet ego esse deinceps nolo.

VI Potior est dies vnicus in feruore, & actionibus ex Dei amore peractis decursus quàm mille alij, qui sensuum cupiditatibus, & propriæ voluntatis satisfactioni impenduntur: quia ex mente Diui Augustini, quodcumque tempus amando Deo non impenditur, perditur.

Adest iam hora Relaxationis, deinde Officij, aut vocalis Orationis. Tum uisitationis Venerabilis Sacramenti. Denique Meditationis præuidenda.

III. MEDITATIO.

*Motiuum ad feruorem, & perfectionem
prosequendam.*

Oratio præparatoria consueta.

I. **P***reludium.* Ob oculos tibi propone Israëlitas, qui exploratum iuerant tetram promissionis, *Num. c. 13. & 14.* eamque aduerterant omni frugum, & fructuum genere affluentem, manantem lacte & melle, denique studijs omnibus expecten-

tendam : at in ipso aditu, plurimis animi concidère, horrore difficultatum, quas imaginabantur : *Terra illa*, inquiebant, *deuorat habitatores*. Vt pulchra, vt fertilis sit, nimio tamen constabit, nimia sunt subeunda pericula, vt eam adipiscamur.

II. *Prælu*. Pete gratiam à Deo, vt eius generis metus, & tanta animi pusillanimitas, te in via salutis non impediant.

I. *Punctum*. Mundus, Diabolus, Caro, Amor proprius, & Sensualitas perpetuò nos infectantur, & suggerunt: nimijs difficultatibus, & incommodis septam esse viam perfectionis, illam vel istam virtutem obtineri omninò non posse. Quid faciam? aurem præbere ijs debeo? ita videlicet ijs adnumerarer, qui ex ignauia, semitam salutis deferentes, ière in æternam perniciem. Si essemus ad portas inferni, innumeros audiremus, qui non aliud horribili vociferatione clamarent, quàm : *Ignauia nos, nos pusillanimitas, hoc dedit precipites*. Ex Purgatorio idem occinitur; & inter sæculares quot sunt, qui ob eandem pusillanimitatem

non adierunt claustra religiosa, quò tamen Deus eos vocabat, vt tantò securius animarum suarum saluti nauarent operam; atque vtinam isti non perirent? Quia igitur monitus exemplis aliorum audeo, & rem ago maximi momenti, quæque tam peculiariter ad me attinet?

II. *Punctum*. Non est negotium vsque admodò arduum, seruire Deo perfectè: sola initia dum quis assuescat, difficilia videntur, cætera usu, & internis delicijs facilliora fiunt. Christi vox est: venite ad me; iugum enim meum suauè est, & onus meum leue. Quis ad hanc amorosam inuitationem animos non assumat? S. Andreas crucem suam appellitabat *bonam*, & *plus desideratam*. S. Paulus in infirmitatibus, in aduersis, in cruce potissimum gloriatur. Tot Sancti ab ætate ineunte (quamuis conditione præstantes, habitu tamen corporis tenero, & delicato) difficultates omnes ludibrio habuerunt, feceruntque ea omnia, quæ facere ego possum, & debeo, & quæ cum diuina gratia, facturus sum. Reuoca in memoriam

riam eos, quorum nosti virtutes, eorū-
que stimulis te anima.

III. *Punctum.* Propone tibi difficul-
tates omnes, quæ in prosequenda perfe-
ctione subeuntur: continuam corporis
mortificationem, oppugnationem pas-
sionum; indolis rebellionem, respectus
humanos, & eius generis plura: sed quid
hæc, si cum præmio, eoque æterno con-
ferantur? si cum poenis infernalibus,
quas hac tui victoriâ euadis? si cum in-
commodis, quæ mundi asseclæ subeunt,
ut ad aliquem honoris, aut diuitiarum
cumulum pertingant? quid hæc deni-
que, si compares cum ijs, quæ Iesus tuus
pro te? tanti dolores, tantum sanguinis
effusum pro te, facile promeretur, ut ei
rependas aliquid laboris, si non sangui-
nem, & vitam. Resolutio, Magnanimi-
tas.

Colloquium tecum. Nil magnum,
anima mea, sine labore obtinetur. Hoc
pretio, scientia, Principum fauores, &
diuitiæ constant: nihil mundani omit-
tunt, quo ad honores, & propositas sibi


dignitates grassentur IESVS manum tibi porriget, non deerit diuinum subsidium, ipsi Sancti tibi aderunt & exemplo, & patrocinio. Pater. Ave.

Recollectio Meditationis. Lectio Thomæ de Kempis fortuita. Rosarium. Visitatio Venerabilis Sacramenti. Cœna. Recreatio. Litaniæ Sanctorum. Visitatio Venerabilis Sacramenti. Preparatio crastinæ Meditationis. Examen. Quies. Sed prius statue te cras fore in surgendo diligentem, neque cum cervicali tuo, vt mos est, disputaturum. Inde totius diei feruor inchoandus est, & exiguum sanè fructum hodie retulisti, si matutinam illam diligentiam non proposueris. Molestiæ quidē nonnihil senties, sed quid refert? Angelum tuum tutelarem ora, vt te excitet, aut Patronum, cui religiosius afficeris, ne actionum tuarum primitiæ sint tepidæ, languentésque. Quam in rem occurrit: aliquando in festo S. Ioannis Euangelistæ, à S. Mechtilde visum IESVM formâ pueri decennis, sorores è somno singulari quâdam gaudij testificatione excitantem, & S. Ioannem vni alicui assistentem, quæ peculiariter illi erat deuota. Hisce vale, & feliciter quiesce.

QV AR.

Moriendum est, & post hac Iudicium. IV





QVARTVS DIES.

*De ijs, quæ homini in extremis
accidunt.*

Nihil, Hagiophila, potentius consideratione Mortis, & Iudicij, & Purgatorii, quæ illam consequuntur, vt benè animam tuam disponas, emundes, & optimis propositis munias. Qui enim horum cogitatione non euincitur, nescio, quid commouere illum possit. Occupabimur ergo in his hodie, & quàm poterimus moderatissimè; nullam enim inferni mentionem facio, à quo te scio satis, & meritò alienam. Satis ista, quæ dicturus sum, ferient.

Visita Venerabile Sacramentum, & si absque arbitris es, ter terram deosculare, vt te eâ die humilies, quo agnitura es te nihil aliud esse, quàm terram, & lutum. Faciebat id quotidie è lectulo consurgens B. Franciscus Borgia. Inde ad meditandum te dispone.

MEDITATIO I.

De Morte.

Oratio præparatoria solita.

I. Præludium. Imaginare te in extremis constitutum, offerri Christi cruci affixi imaginem, accendi cereum sacrum, atque intonari tibi à Sacerdote: *Proficisci ere anima Christiana*. plurimis interim circum orantibus, & animæ excessum præstolantibus.

II. Prælud. Roga Deum, vt mortis horrore te percèllat, quo melius ad eam te pares.

I. Punctum. Decretum infallibile; *Moriendum esse*: hac iter est omnibus, & iuuenibus sæpe, & minimè arbitrantibus, & ijs qui robore corporis, & valetudine plurimum pollere videntur; nemini mors parcat, omnes aggreditur, & pleno cursu: singulis enim momentis fit propinquior. Quare eò sæpe aduertamus animum, ne incurios adoriatur; & iam nunc faciamus, quod tum fecisse vellemus. Sibi benè non attendit, qui non semper attendit.

II. Pun-

II. *Punctum.* Vt morte nihil certius est, ita eadem nihil est incertius. Et annus, & dies, & momentum, & locus, & modus, aliâque omnia morti adiuncta, incerta sunt. Percurre singula, & scito ab hac incertitudine seriam nobis sollicitudinem, & vigilem curam indici. Vigilate, monet Dei Filius, quia nescitis diem, neque horam.

III. *Punctum.* Mors corpori animæque terribilis: Corpus doloribus, & debilitate obruitur: quis tum modus orandi, peccata ritè expiandi, & attendendi sibi? si adest suprema lucta, peius est: visus deficit, & auditus, frigent extrema corporis, ipsumque olere iam terram incipit & foetere. Horrent, quæ nobis feruiunt, & quibus delicatiores sunt nares, nos deserunt, cæteri cum molestiâ fastidiôque circumstant. Miserum corpus inutile est, neque aliud mouetur quàm manus, quæ dum cortinas, & lintheamina contrahunt, testantur, ægrum iam sarcinas colligere, & ad abitum se parare. Istud tibi subeundum est, ô corpus, quid

quid ergo iuuat me, tot blanditijs mulcere te? tum temporis, simul atque anima mea te deseruerit, fies vitæ expers & motus, vermibus corruptionique obnoxius. Lecto & domo te efferent, vt non minùs memoriam tui, quàm te humo obruant.

Neque Mors minùs est terribilis animæ. Quis dolor, deferere corpus tanto-perè dilectum, tam molliter & blandè habitum, cuius maiorem curam quàm sui gesserit? quæ molestia, perpetuū vale amicis dicere, separari ab ijs omnibus, quæ habebat in delicijs? relinquere opes & honores, quibus affectu tuo incumbebas? quantæ angustiae ex patrum scelerum recordatione, ex aspectu daemonum extremam pugnam indicentiū, & vitæ rationes exprobrantiū, ex incertitudine mox ferendæ sententiæ, & loci, cui deputanda sit? meritò hæc terrorem, & quidem grauissimum incutiunt. O felicem eo momento, qui Deo seruiuerit, mortificârit carnem suam, & huius voluptates, & delicias contempserit!

Col-

Colloquium ad Sanctos, qui magnâ animi alacritate & solatio mortem obierunt: vtinam morte simili defungar! vtinam nihil me terreat in hoc vitæ excessu! vtinam in hac lucta mihi adsit præsidium SS. Matris, quæ toties alijs opportunè adfuit! vtinam tum tutelaris meus Angelus conuerteret in fugam hostes meos! vtinam frui liceret beneficio Sacramentorum! vtinam moriar amando Deum meum, & extremis suspirijs ingeminando IESVS, MARIA, IOSEPH! Amen. Pater. Ave.

Reuisio Meditationis. Electio Tesseræ hodiernæ: fortasse arridebit hæc: *Moriendum est, & post hoc iudicium.* Vel illa Thomæ Kempensis: *Quid prodest diu viuere? quando tam parum emundamur?* Quin proderit etiam sæpe inspectis manibus suis dicere: hæc aliquando manus à vermibus rodentur.

Sequitur Oratio vocalis, aut Officij, aut alia. Deinde Sacrum. Tum Lectio spiritalis, aut eius dissertationis, quæ sequitur, aut aliorum, quæ postea notabo.

DISSERTATIO

MATV'TINA.

*Plurimum referre, perspectas esse
Mortis qualitates.*

OLeum & operam perderem, Hagio-
phila, si tibi demonstrarem, mori-
endum esse: Tribus facibus ea veritas
perpetuò nobis ob oculos ponitur: pri-
mâ sacrarum litterarum, quæ id in o-
mnibus propè paginis decernunt; altera
rationis naturalis; quæ luculentissimè
euincit, cum è terra, & quatuor elemen-
tis simus compaginati, nos interitui esse
obnoxios; & tertiâ experientiae: nam
ab Adamo hucusque, hac omnes iuère,
& nos ibimus, & quotquot nos sequen-
tur, ibunt. Solennis mortis est professio,
ad hanc omnes homines spectant, se-
riùs, aut citiùs. *Eà conditione intrans, ut
exirem.* ait Senecâ, nullus, quantuscum-
que sit, ab hac lege eximitur. Et Deus
post aduentum Filij sui, in capite Eccle-
siæ mirum huius rei argumentum nobis
proposuit. Summum enim illud Orbis
caput peculiariter debet huic experien-

tia
di
ict
an
na
qu
eu
S.
ill
M
m
co
bi
fi
ob
pe
fi
m
pe
qu
Pe
Q
ac
br
pe

tia
di
ict
an
na
qu
eu
S.
ill
M
m
co
bi
fi
ob
pe
fi
m
pe
qu
Pe
Q
ac
br
pe

tiæ suffragari, ne existimemus eos, qui
 dignitate cæteris præstant, extra mortis
 ictum quoque consistere. Elegans hæc
 animaduersio, est Petri Damiani Cardin-
 alis. Rogauerat illum Alexander II.
 quâ fieret, quòd ad Sedem Pontificiam
 euecti tam citò viuere desinerent, vt nec
 S. Petri annos assequerentur: respondit
 ille: Deum toti Mundo velle imprimere
 Mortis memoriam, illiúsque omnes ad-
 monere: cùm enim Papa vnicus eam
 conditionem obtineat, sitque veluti Or-
 bis Monarcha, vt Bartholus, & Accur-
 sius loquuntur, simul atque mortem
 obit, certior redditur tota Christianitas:
 per totum Orbem, cùm vbique Chri-
 stiani sint, fama diuulgatur; itaque o-
 mnes mortis meminérunt, faciléque sibi
 persuadent, hac omnibus eundum esse,
 quâ tantus præcessit. Parratio Summi
 Pontificis est in terris, quæ Solis in cælo.
 Quando hic Ecclipsin patitur, omnes
 aduertimus: diffusæ per Orbem tene-
 bræ produnt: si stella aliqua lumine suo
 priuetur, nemo id percipit, nisi fortè ali-
 quis

quis immerſus Aſtrorum ſtudio Mathe-
 maticus: Ita ſi moriatur aliquis eorum,
 qui minoribus iſtis ſideribus ſimiles
 ſunt, quis ſciat præter vnius Urbis, Pro-
 uinciæ, aut Regni incolæ? ceſſerit verò
 fatis Pontifex, iam Sol oculis noſtris ere-
 ptus eſt, nemo id ignorat. Quòd ſi acci-
 dat, conſtitutos in eo honoris faſtigio
 non diu vitam prorogare, ſeruit hoc
 ad renouandam mortis recordationem,
 quæ ita frequentius fit, quàm ſi ea digni-
 tate ad annos quinquaginta, vel octo-
 ginta fruerentur. Satis igitur notum eſt,
 Moriendum eſſe; ſed nocet plurimùm,
 non eſſe ſatis naturam mortis, & quali-
 tates perſpectas: huius enim cognitionis
 defectu plurimi inueniunt ſe deprehen-
 ſos in hora mortis, hoc eſt, ſeriùs, & eo
 tempore, quo prouideri nihil ampliùs
 poteſt. Nolim ego te hoc incommodo
 laborare, Hagiophila, & vt te eximam,
 quidquid mali animus meus de Morte,
 mihi ſuggeret, dicere aggredior: viu-
 iam coloribus à planta ad verticem de-
 pingam, Ordior à pedibus,

Mors

Mors cursor est, semper est in viā & itinere, vt uos assequatur; noctu diūque properat incredibili velocitate. Tria dicuntur esse signa velocitatis: Primum, si maturē cursus inchoetur; at tam mature incipit Mors, vt simul ac viuere incipimus, incipiamus etiam mori. Vnde, amabo te, dicebat Iob: *De utero translatus sum ad tumulam?* Id veri similitudinem non habet, Princeps magne, dum hæc dicis: iam per multos annos vixisti, regnasti, affluxisti delicijs, etiam aduersantis fortunæ impetum excepisti in fimo: nullus adhuc feretrum tibi composuit, & aliquot centenorum annos reliqua tibi vitæ ominamur. Fare, quod lubet; ab ipso vitæ meæ exordio, ad mortē, ad tumulum abripior: dum te alloquor, eodem propero: ipsa verba, ipsæ actiones omnes, sunt continui ad mortem gressus. Secundum, si cursus non interrumpatur morâ, aut quiete; ita prorsus aduenit Mors. Vbiq̃ue quietis aliquid conceditur, præterquàm in Mortis itinere: *Bella suas habent inducias, pausas Musi-*

ca,

ca, Viatores sua interualla, & hospitia, Rabulæ suas ferias, suas vacationes studiosi, quietem opifices: sed nihil horum Mors habet; siue comedam, siue vigilem, siue quiescam, semper illa pergit, acceditque. Quotidie morimur, quotidie pars aliqua vitæ nostræ demetitur, & dum crescimus, vita nostra decrescit, ait Seneca. Tertium, si summa diligentia conatúsque adhibeatur. Neque hoc Morti deest. Olim segniùs ire videbatur, & pede quasi plumbeo. Centum, ducentis, quingentis annis, aliquando etiam diutiùs; vita ducebatur, nunc omnia intra sexaginta & octoginta annos peraguntur. Quid mirum? nunc equo Mors vtitur. Ita illam equitantem vidit S. Ioannes cap. 6. suæ Apocalypseos Scire eis, quàm feratur celeriter? planè instar cursoris: *Dies mei velociores fuerunt cursore.* a Instar navis vento impulsæ: *Pertransierunt quasi naues poma portantes.* Instar aquilæ volantis: *Sicut aquila volans ad escam,* Solis instar, qui minutis singulis novies mille, & quingentas leu-

cas, & vnicâ horâ quingenta & septuaginta leucarum millia decurrit : *Dies mei sicut umbra praterunt.* a Vixerat Mathusalem annis quingentis, sed eam ætatem, quòd tam citò diffluxisset, nihil pendebat ; historia eiusmodi est, fidei Authoris commissa : Postquàm tot annos vixisset, ferunt ab Angelo monitum, vt ex Dei voluntate domicilium sibi construeret, totidem omninò annis adhuc victurus ; quid, inquit, domicilium ad vitam annorum quingentorum ? ad ætatem tantillam ? si plus non restat, quàm vixi, operæ manum non admoueo. Quidquid hætenus vitæ fuit, tantâ celeritate præterijt, vt nonnisi diem vixisse mihi videar. Non inducor, vt opus illud suscipiam, quin enixè rogo, vt excusatum me apud diuinam Maiestatem velis. b Egregia vox magni Epaminondæ, affirmantis tam esse celerè vitæ humanæ cursum, eúmque tam breuem, vt præter tria verba vix dici quidquam viuenti possit. A Natiuitate ad annum

a *Psal.* 143. b *In fasciculo temporum.*

num tricesimum, quid aliud dices, quàm *Aue*, ab anno tricesimo ad quinquagesimum *Ades*: post quinquagesimum verò dic illi *Vale*, ad occasum enim spectat, neque aliam, quàm de discessu suo admittere debet cogitationem. Optimè Thomas de Kempis: *Modicum est, quod cum tempore transiit*. Utinam, Hagiophila, quâ par est attentione, hunc inevitabilem & celerrimum mortis accessum, expenderemus! Cogita, obtestor te, neque ampliùs anhelâ, ut menses annique transeant; transeunt enim verò, etiam voto citiùs. Istud velim satagas, ut tam promptè ad Deum festines, quàm promptè Mors ad te accedit. Certatim agite, tu an Mors celeriùs properetis, illa ad te, tu ad Deum. Imitare illam, maturè incipe, procede sine interruptione, & summâ adhibitâ diligentia, & ita timere illam desine; nocere enim non potest, nisi ijs, qui gradum sistunt, aut vitam ducunt inertem.

Ab hoc incessu ad illius dolos transcamus. Fraudulenta Mors est, fallit, cir-

cum-

cumuenitque mortales & ruri, & domi,
& vbiq̃ue. Frustrà de hospitio homines
solliciti sunt, velint, nolint, omnes ad
mortem dolosam hospitantur; signum
hoc domibus omnibus præfigi oportet,
serius enim aut ocyus Mors fallet
omnes inquilinos. Errare Veritas non
potuit, dum dixit illam furis instar, cum
minimè putabimus, irrupturam. *Veniat
Mors super illos, & descendant in infer-
num viuentes,* & iuxta aliam versionem:
Decipiat illos Mors, inquit regius Pro-
pheta. Et verò tam dolosa Mors est, vt
nemo illius dolos euitare possit. Decipit
iuuenes, quia licet plurima coæuorum
suorum funera præ oculis habeant, for-
tem tamen illam ad se nondum specta-
re, arbitrantur. Fallit senes, nemo enim
vsque adeò decrepitus est, quin speret
vitam suam adhuc anno prorogandam,
& vbi id assecutus fuerit, etiam sequen-
tis anni spe se lætabit. Circumuenit in-
firmos, quia adulantur ijs Medici, recu-
perandæque valetudinis opinione im-
buunt. Ipse humani generis hostis po-
tius

tius Medici personam induet, quàm vt fallendi artificio Mors destituatur. In Franciscanorum monumentis proditum est, missum aliquando Massiliam à Diuo Francisco Fratrem Christophorum, virum sanctitate illustrem: accidit hic, vt ægrum adiens duos Medicos offenderet (erant pace tuâ, sic personati, Cacodæmones) qui ægro persuadebant leuem, esse ægritudinem, minimèque periculosam, breui euasurum: Agnouit vir sanctus veteratores illòs, eorùmque versutiam, quin & ægrum in statu esse peccati mortalis: quare signo Crucis manu formato, languentem commonefacit, & scelèrum suorum Confessionem extorquet. Interea euenti illi Medici euauèra, & otium moribundo fuit, vt feliciter obiret; vidè igitur, fidè sine habenda sit talibus Medicis, aut alijs, qui mortis periculum dissimulant? sed qui maxime decipiunt infirmos, propinqui sunt qui discrimen celant, ne fortè illius gnari Testamentum, aut Codicillòs conficiant, vel aliquid immutent, legentque alijs.

alijs. Infortunati amici, qui Proditorum officio funguntur, quique has miseras animas decipiunt, quasi absque ijs Mors satis fraudulenta non foret! verum, vos agri, multò infortunatiores, quibus tam barbari, & ab omni humanitate alieni propinqui sunt, ut pluris faciant centum aureos, quàm animam, quæ vna omni auro, cunctisque terræ opibus præstantior est! In ipso etiam supremo articulo, Mors misero patienti imponit, persuadetque satis virium superesse, ut euadat, aut saltem viuat in crastinum. Adeò ut si de Confessione loquaris: Ah, inquit, quætēm mihi modò cédite, eras ista. At Cras illud ei non conceditur, nisi Cras æternum, quod illum in supplicia suis sceleribus debita præcipitat. Et postea, opportunè scilicet, dicitur: præreptus est herus, abrepta est Domina, confitendi facultatem non habuit: multum eæ lamentationes illorum malis medebuntur. Ah quàm præstat, semper paratum esse, & vivere in amore Dci, ne Mors imparatos circumueniat! Felicem!

te, Hagiophila, quæ talibus occasione-
bus excessisti; Deo fida es, illum amore
constanti prosequeris, inter eas versaris
personas, quæ tibi adulari nescient, sed
candidè suggerent, adesse horam opta-
tam, quâ abeas in amplexus sponsi tui,
te sistas incomparabili Mariæ, & reliquæ
Beatorum societati adiungas

Addo præter ea, quæ dixi, Mortem
esse contentiosam, rixisque deditam. Eò
tempore miser infirmus plurimis in ani-
ma iurgijs, & exprobrationibus impeti-
tur: *Ab eo qui portat coronam, usque ad
eum, qui operitur lino crudo. tumultus, flu-
ctuatio usque in diem sepultura, & timor
mortis, & contentio immutat scientiam.* a
Deus nos obiurgat, exprobratque gra-
tias & inspirationes, quas nobis per o-
mnem vitâ largissimè concessit: tot bo-
na verba, quæ nobis suggessit, ut in alio-
rum utilitatem loqueremur, erunt toti-
dem testimonia, quæ nobis opponet.
*Tot cōvincar testibus, quot me proficuis ser-
monibus adiunxisti.* Sed molestissima est

tum

tum propria conscientia; prior illa in nos insurgit, & iurgiorum acerbitate, potissimum exagitat, Iuuenem noui genere, quàm moribus, nobiliorem, quem Mors, intereà dum ocreas inducit amicum aditurus; sic adorta est, vt intra semihoram confecerit: nullum illi otium aliud fuit, quàm vt Conscientiæ exprobrationes exciperet. Non adfuit tempori Confessarius. Eæ solùm voces, testes Mortis, & conscientiæ reprehendentium, audit: *Misella anima, quo ibis?* Impetit etiam nos dæmon, & stolidissimis imaginibus mentem nostram diuehat, asserit nos in Confessionibus nostris multa reticuisse, & cùm viuentibus magnam pacem indulserit, morituros conatur perturbare, & amplificare peccata, quæ prius leuia esse, & exigua persuaerat. Ne dubites, Hagiophila, tu multus & obiurgationes tum esse grauissimas, paucosq; earum expertes esse: inuaduntur sæculares; Heu miserum, me exclamabat sub mortem Secretarius nonnemo, viginti quinque papyri volumina

mina impendi litteris scribendis & obsequijs Domini mei, & mediū folium bonæ Confessioni scribendæ non impendi. Ah quàm forem beatus (aiebat moriens Philippus III. Hispaniarum Rex) si vitam omnem in angulo deserti alicuius traduxissem! impetuntur Religiosi: testis est ille, qui cum aduersus Regulæ præscriptum in mensa micarū collectionem neglexisset, vidit Morti vicinus diabolum horribili specie, qui saccum micis refertum obijciebat oculis, ut eum terreret, turbaretque, & si fieri posset, etiam redigeret in desperationem, à qua parum aberat, nisi cæterorum Religiosorum vota, precēsque subuenissent. Testis præterea ille in Societate nostra adulescens, qui ab hinc aliquot annis in Gallia Narbonensi fato proximus cum gemitu dicebat. Quid profuit Pindarum tanto studio peruoluisse? quò nunc tot curiosæ Lectiones? itane prius euocor, quàm legerim eadem contentione, & assiduitate libros ad animæ salutem facientes, quique amore Dei inflammare potuiss-

potuissent? Denique Sancti ipsi diue-
xantur: S. Elzearius hac ite; hac S. Hila-
rion, qui ut se tutaretur, alebat: *Egrede-
re anima mea, quid times? septuaginta an-
nis seruisti Deo, & adhuc mori times?* Bre-
uiter: *Omnibus Mors obmurmurat.* Quò
tendunt ea morientium suspiria, hi in-
cælum proiecti aspectus, illæ vultûs dis-
tortiones, hæc dubia responsa, hæ voces
intercisæ? quid significant ea manuum
signa, is tremor membrorum? impetus
sunt huius contentiosæ mortis, dispu-
tat, pronocat, contestatur. O molesta
iurgia! ô graues exprobrationes! ô into-
lerandam prouocationē! ah! in supre-
mo mortis agone mihi iam esse videor,
& cum conscientia mea colluctari, vi-
deor hoste me inuadente obmutescere;
deficere verba, quibus me tuear, neque
aliud superesse; quàm vt cum Iobo Iudi-
cem meum compellē: *O custos hominum,
quid faciam tibi?* quâ ratione pacabo? ô
benignissime & mansuetissime Seruator,
melius non possum, quàm vt me abij-
ciam ad pedes tuæ tremendæ, sed vnâ
etiam

etiam misericordissimæ Maiestatis, toroque cordis affectu exclamem: *Domine vim patior, responde pro me.*

Hagiophila, hæc omnia attentâ consideratione expendenda sunt, idque maturè. Et, si nos sapimus, tu & ego, ne expectemus tempus illud, vt ad benè moriendum nos disponamus; non erit tunc otium eâ de re cogitandi. *Frustrâ parantur remedia, cum mortu imminet pericula;* scilicet, tempus sit tunc arma poliendi, cum ad tympani sonitum hostis inuadendus est? tempus sit excauandi tum terram, puteumque perfossa rupe querendi, quandò haustus siti pellendæ petitur? tum scilicet Medicus vocetur, quando æger animam expirat? fera illa sunt, alio tempore disponenda; *Frustrâ parantur remedia, cum mortu imminet pericula.* Miser homo exclamat Bernardus, *quare omni morâ te non disponis? cogita te iam mortuum quem scio necessitate moriturum.* Hæc nobis agenda sunt, & sæpe reuocandum in memoriam, quòd Mors sit Cursor, sit decepatrix, sit con-

ten-

tentiosa : nihilque satius esse, quàm securum reddere negotium suæ salutis, & perfectionis, quandoquidem de æternitate agatur : *Nulla satis magna securitas, ubi periculatur aternitas.*

Placet alia aliqua Lectio : lege cap. 19. 20. tract. 8. volum. 2. part. 1. Rodericij, vel cap. 23. primi libri Thomæ de Kempis.

A Lectiōe renoua deuotionem erga eos Calites, qui sub mortem suis Clientibus adesse consueuerunt. Quod spectat caput vndecimum Fœderis à me conscripti. Maximi momenti est ea deuotio, vide ne negligas.

Sequitur præparatio sequentis Meditationis.

II. MEDITATIO.

De Iudicio particulari.

Oratio præparatoria consueta.

I. *Paludium.* Imaginare Dominum aliquem, qui à seruo rationem exigat decem millium aureorum censûs annui, quorum administratio penes illum fuerit ab annis omninò triginta : rationem verò tam accuratam petit, vt scire etiam cupiat, quem vsum mini-

mus teruncius expensus sit. Eodem pacto cum hominibus agat Deus.

I. *Pralud.* Pete à Deo gratiam, ut ita nunc rationes tuas in eas, ut reprehendi nihil in ijs possit.

I. *Punctum.* In Iudicio particulari, quod tum subitur, quando anima excedit è corpore, exigit Deus rationem totius vitæ nostræ, etsi illa ad centum usque annos producta fuisset, omnium, inquam, actionum nostrarum; ah omniū! omnium verborum etiam otiosorum, ah innumera sunt! omnium cogitationum; ah infinitæ sunt! eæque tam fatuæ, ridiculæ, & ineptæ! atqui vel idcirco subeundum est iudicium. Idcirco ad diuturniorem in Purgatorio poenam, damnabimur; denique ratio reddenda est omnium, quæ nobis acciderunt ab eo tempore, quo uti ratione, coepimus, quæ interdum, quæ noctu; quæ coram alijs, quæ clàm; quæ bona, quæ mala, secundum intentiones, quibus ad operandum inducti fuimus; quorum etsi apud nos nulla extet memoria, nihilominus omnia

omnia in arcanis Dei tabulis notata reperiuntur. Huic rationi, si subinde mortales animum aduerterent, tantane viverent libertate procaciaque? ipsi viderint, ad me quod attinet, deinceps advertam, & ita supputabo singula tum meis Examinibus seu generalibus, seu particularibus, tum Confessionibus accuratis, ut & rationes dispungantur, & errores perfidiaue lacrymis & contritione diluantur.

II. *Punctum.* Iudex erit Christus Iesus, tantæ sapientiæ, ut falli non possit, qui excusationes de admissis sceleribus non recipit, qui occultissima cordium arcana perscrutatur, qui nullius veniam delicti amplius indulget, qui gratiam nulli, ne dilectis quidem sponis suis, præstat, qui à sententia semel prolata non dimouetur; tantundem tunc tenax iustitiæ, quantum prius in misericordiam inclinabat, Iudex magne, quidni iam promerendis favoribus tuis adlaboro? quidni te preno, ut ad sis causæ meæ, & causæ tanti momenti? quidni adeo te

sæpius in Venerabili Eucharistia, in O-
ratorio? quidni continuo te sequor, vt
miserum animæ meæ statum commen-
dem? & dicam: Domine, non intres in
iudicium, cum iueruo tuo, quia non iu-
stificabitur in conspectu tuo omnis vi-
uens?

III. *Punctum*. Præsentes iudicio ad-
sunt, IESVS, vt me iudicet, vel eius loco
S. Michael inde Diabolus, vt me accu-
set; tum Angelus tutelarior, vt proferat
opera mea bona, & animam meam, vel
in cælum, vel in Purgatorium deducat,
si ea sententia feratur; quemadmodum
Diabolus condemnatas animas abripit
in Infernum. Aderit etiam B Virgo, &
cæteri sancti Patroni mei, modò pecu-
liaribus obsequijs, & singulari veneratione merear hanc gratiam. O horribi-
le iudicium, etsi particulare! ab hoc
enim particulari pender sententia, quæ
in vniuersali iudicio proferetur; quôque
vel ad dextram, vel ad sinistram collo-
cabitur.

Colloquium ad IESVM, & SS. Ma-
trem,

trem, in his enim summa præsidij spes est; ne tamen prætereas eos sanctos, qui morientibus assistunt, Ave maris Stella.

Recollectio Meditationis, Visitatio Venerabilis Sacramenti. Examen Conscientiæ, Prandium, Recreatio, Visitatio Venerabilis Sacramenti. Examen peculiaris. Tempus scriptoris. Lectio spiritualis, quæ sequitur,

DISSERTATIO POME-

RIDIANA.

*Prodesse ad bene moriendum, Tempus
utiliter impendere.*

AVderemne, Hagiophila, primo statim aditu tibi proponere Paradoxum aliquod? id quidem à communi sensu videbitur alienum, quia tamen existimo verissimum, & plurimum conferre ad ea, quæ sum dicturus, volens lubensque tibi patefaciam. Iuvenes opulentissimi sunt, & inter mortales omnes felicissimi. Istud est, quod in ipso huius dissertationis exordio proferre volui, neque fidem mihi deroga; nam tempus possident, quæ res totius

mundi pretiosissima est, idque vſu & emolumento maiori, quàm reliqua pars mortalium. Non puto te ignorare pretium Temporis. Familiare dictum erat S. Bernardi: *Nihil pretiosius tempore invenitur.* Et recte quidam Poëta aſſeruit, minimam eius portionem etiam cui-cumque pretio anteaſtare: *Non poterit pretio, vel breue tempus, emi.* Ludouicus XI. Galliarum Rex, ſingulis diebus ultimæ ſuæ ægritudinis, quingentos aureos Medico ſuo numerabat, vt ope medicamentorum tempus ſibi prorogaret. Optimus ille Princeps auro argenti-que tempus licitabatur, ſed *non poterat pretio, vel breue tempus, emi.* Præſens aliquando adfui morienti Ieſuitæ (cui moleſtiſſimum erat, quod in ætatis primo flore decedere cogeretur) cum propius à morte abeſſet, dixit illi ſuperior: Alexander (id iuueni nomen erat) quid à me petis? cedo, mi frater, quid deſideras, quid poſtulas? Vitam, inquit, Pater mi, Vitam poſtulans, nihil ſanè aliud volebat, quàm tempus, quo vita longius tra-

traduceretur. Sed neque superior, neque alius aliquis, id dare poterat: carius est, quam vt emi possit: *Non poterit precio, vel breue tempus emi.* Chrysaorius ille, de quo Magnus Gregorius, cum à Dæmonibus citaretur, ad reddendam, flagitiosissimæ suæ vitæ rationem, magnis vociferationibus obtestari cœpit, vt modicum aliquid temporis indulgerent. *Inducias usque mane: Inducias usque mane.* Quid non obtulisset ad exigui temporis vsuram? non pepercisset opibus, & facultatibus omnibus suis, si tam vili, tanta res venalis fuisset: sed *non potest precio, vel breue tempus emi.* Quod cum ita sit, quis non videt Iuuenes, qui iuxta naturæ cursum, habent in potestate sua plus temporis, esse, in affluentia rei tam preciosæ, cæteris opulentiores, felicioresque? ego quidem nullus dubito; astringo tamen opinionem hanc; dicoque eos omnium esse opulentissimos, felicissimosque, qui bene tempore vtuntur: abundant enim Iuiores copia temporis, habeantque annos centum, si placet, transigendos; si
tamen

tamen tempus malè collocant, patianturque interire rectè faciendi opportunitates, miserrimi sunt, atque egentissimi, quantumcunque vivant, neque finem sortiri possunt, nisi deplorandum. Ut dicto fidem faciam, in medium adduco, duas duntaxat propositiones, quarum hæc prior.

Quem æstimas diem anni serenissimum, optimumque? Non est Paschæ dies, neque is, quo Sol Oriens illustrioribus radijs emergit, nec ille, quo cælum omni nube deteresa vestem cæruleam, terris ostendit. : Dies anni pulcherri-
mus, & optimus est ille, qui optime impenditur, & quo tempus congruentissime collocatur. Dies omnes, quos decurrimus, nihil aliud sunt, quam portio quædam, & specimen illius vnicè pulchri bonique diei, fortunatissimæ æternitatis. Omnes dies quos ducimus, aut potius, qui continuâ serie nos ducunt, non sunt, nisi vigiliæ quædam & Vesperæ illius æterni diei: quatenus igitur illi referuntur ad serenum illum diem æternitatis (qui semper erit in usu glorioso,
&

& amabilibus æquè ac admirandis occupationibus) catenus dies sereni sunt, & boni. At, quem diem vocas benè impensum, quod tempus rectè collocatū? an quando ab aurora in Vesperum, magna contentione studioque, operi cui-cunque incumbitur? minimè verò. Sed quando, quidquid agitur, propter Deum agitur, eiusque ex amore. Etsi mancipij instar laborares, diffuereque sudore, etiam sanguineo, nisi ad Deum referas, quidquid id est, vanum est, merissima-que insania. Si verò Dei causâ agis, tunc demum, ipsius Dei opulentiâ te ditas. Audi, quid aliquando dixerit IESVS homini comparandis opibus intento, qui-que tempus omne rei suæ familiari amplificandæ impendebat: *Stulte, hac nocte repetent animam tuam à te. que autem parasti, cuius erunt?* Stulti nomine, compellatur is, qui multum defudauerat, tempusque suum anxijis laboribus insumpserat. Quis vero conferri, cum hoc stulto ineretur? illum designat IESVS, dum subiungit: *Hic est, qui thesaurizat sibi, & non est in Deo dives.* Stul-

us igitur est, quisquis sibi, non Deo laborat; sed eo labore se dicit, sed honoribus augetur, sed auctoritatem acquirit, sed euadit in virum egregium, prudentem, admirandum, idque sua industria, adhibitoque conatu proprio, non refert, quanquam se redderet inter homines eminentissimum, mundi oraculum, omnium thesaurorum, opumque possessorem, nisi inter opes suas Deum numeret, eiusque gratia laboret, delirus est, & amens; *Hic est, qui thesaurizat sibi, & non est in Deo dives.* Frustra laborat, prodigit tempus, satiusque illi foret otio indulgere, quam tam inani operâ se fatigare. Et hac ratione, accipiendum est illud dictum S. Augustini, quod asserit omne tempus perdi, quod amando Deo non impenditur. Quasi dicere vellet; Deum amare, non in eo consistere, vt tantum quis actus diuini amoris exerceat: aliâs ad tempus bene collocandum opus esset, continuò profectui hoc exercitium, quod in hac mortalitate fieri non potest, sed vt quis omnes actiones suas ad eum referat, eiusque

que amoris honorique studeat: quisquis
id non facit, nullam temporis sui habet
rationem, sed illud stolidissime perdit.
Videre cupis, tempus illud amitti, quod
Dei amoris eiusque obsequijs non im-
penditur? animam aduerte ad Sacros
Regum libros, ubi Saul nonnisi duobus
annis regnasse dicitur, cum tamen ma-
nifestum sit; eum diademate corona-
tum publicèque regem habitum, per an-
nos omnino quadraginta. Vtrumque
istud sacro textus asserit, quod tamen
conciliari non potest, nisi D. Grego-
rio assentiamur, quod cum Saul duo-
bus tantum annis amauerit Deum, ei-
que fideliter seruauerit, reliqui regimi-
nis nulla in Dei volumine ratio habea-
tur; ita ut anni triginta octo euante-
rint, nobisque insigne relictum sit do-
cumentum, plures nos vitæ annos nu-
merare non posse, quam quot benè uti-
literque impendimus. Ex quo in eam
opinionem inducor, sæpe nonnullos
existimare, quod diu in Religioso statu
vixerint, qui fortè nonnisi horam, aut
diem vnicū vivere, cum propter Deum
pau-

pauca, plurima verò propter vsus suos, propter amorem proprium, tepidè ignauiterque peregerint. Reperies permultos, qui de decem, viginti, triginta annis, in Religione traductis, gloriabuntur, & erunt Tyrones sex mensium, qui illos virtute anteuertent: vnde accidit, vt Deus hos, triginta, aut multorum annorum æstimet, illos verò, paucorum, despectâ ea ætate, qua illi ad vanam gloriam, & ostentationem plerumque abutuntur. Quæ res à Thoma Kempensi has voces extorsit: *Multis computant annos conuersionis: sed sepe est paruus fructus emendationis.* Per Deum immortalem! cur non ista nunc perpendimus, dum adhuc otium, & tempus superest? nuper Dæmonum aliquis ex obsessâ affirmavit, si Deus post extremum iudicij diem, illi spei aliquid & temporis ad cælum promerendum commodaret, solum iè pro Deo plura, quàm vniuersos homines peracturum. Ante hunc, maiora dixerat alius; cùm enim rogaretur, quid maximè illum in Inferno affligeret? heu, respondit, quod tempus illud

illud, quod amando Deo, & beatitudinī merendæ concessum fuerat, tam malè collocarim! plus tamen, quàm horæ semissem, Angelos rebelles non habuisse, communis fert Theologorum opinio. Nos, Hagiophila, qui tantū temporis habemus, tot horas, tot dies, tot septimanas, quid agere nos non oporteret, vt ea benè collocaremus? non mouebunt nos exempla eorum, qui multum, sed frustra laborant, ijs similes quos D. Augustinus ait. *Bene currere, sed extra viam?* & pares illi, in quem vetus dīctērium: *Saltauit benè, sed non in stadio?* plurimi huius sortis sūnt, tum inter sēculares, tum inter Religiosos, qui plurimum labores vni sustinent, sed nullo operæ fructu, quandoquidem sibi, suis cupiditatibus, suæ gloriæ, non Deo, laborant. Hæc exempla nullum stimulum nobis imprimēt, vt rem pretiosissimam vtiliter, & cum fructu dispensemus? præsertim cū occasio semel neglecta reuocari amplius non possit? Olim obtulerat se miles Alexandro Magno, promittebatque artem obtinendi
spatio

spatio sex dierum ea nuntia, quæ alias viginti quinque diebus vix deferebantur. Ludibrio excepit Rex hominem, & à se repulit. Duabus horis post, re maturius expensa, hominem inquiri iussit, sed frustra; nusquam enim amplius comparuit. Ah longè alia temporis iactura est, reperiri hic homo potuisset adhibita diligenti inquisitione: at tempus quod præterijt, nulla potest ratione recuperari, recipi cætera possunt, non illud:

Damna fleo rerum, sed plus fleo damna dierum,

Rex poterit rebus succurrere, nemo diebus.

ingeniosè quidam cecinit. Et profecto ita se res habet: amittam enim decem aureorum millia, fortunas omnes, honorem, aliaque eius generis: deflere quidem lacrymis possum iacturam; verum Rex sua munificentia restaurare omnia potest; at ubi dies meos, & tempus perdididi, nemo est, qui damnum resarciat, perdita que reuocet. Vnde sequitur videntum esse tempore, dum in nostra

est:

est potestate; & quidem ad animæ salutem utendum; quo nos inuitat Apostolus dicens: *Dum tempus habemus, operemur bonum.* Et hic modus erit comparandi omnia; ad bonam mortem obeundam; necessaria. Vulgaris paroemia est; *qualis vita, talis mors*; si ergo vita bona fuerit; ex optima dierum & temporis usura; non poterit non esse mors bona; gloriosa; talisque; qualem exercitatio-
ne earum actionum; quæ vitam nostram illustrarunt; intendimus.

Verum enim vero non solis actionibus tempus rectè impenditur; sed etiam cogitationes multum eò conferunt; & pariter atque illæ ad mortem bonam disponunt. Ut animi sententiam planius explicem; venio ad alteram propositionem; quam tibi promiseram. Ecce iam dignissimam considerationem.

Bonitas & sanctitas nostræ mortis à cogitationum nostrarum bonitate; sanctitateque dependet; ita ut, si viuentes bonis sanctisque cogitationibus animum occupauerimus; certissima spes esse possit mortis bonæ. Ratio est, quòd mors
fit:

sit quædam Echo vitæ. Clames alicubi, ubi talis Echo resonat: *Euge*: remitter illa vocem eandem *Euge*, & quidquid illi acclamaueris. Idem mors facit; & cogitationes, quas per vitam tantoperè volutauimus, hoc casu recurrunt; & omnes affectus amoris, vindictæ, auaritiæ, aut ambitionis, quæ mentem nostram, dum viximus, occupatam tenere, etiam dum moriemur, occupabunt. Vnde vsuuenit, vt blasphemus, Deique eiurator, moriatur blasphemando, eurrandoque? vnde accidit, vt amens aliquis amator, moriens, non nisi de suis loquatur amoribus? & ita de cæteris deliris, & nimio rerum mundanarum affectu implicitis. Non aliunde ista contingunt, quàm quòd Mors sit Echo vitæ. Vnde est quòd Angelus ille, de quo Venerabilis Beda (cui vox erat familiaris: *Diabolum me auferat*) in voce eadem expirarit? Vnde aurifaber quidam, qui tota vita nullam aliam, quam de auro argentoque cogitationem admiserat, petit moriturnus ab eo, qui auream Christi cruci affixi effigiem, ad pios animi
motus.

motus excitandos, offerebat, quanti vicia veniret? Vnde ille fœnerator (cuius mortē paucis abhinc annis accepimus) cū in extremis de peccatorum confessione admoneretur, postulauit, viline frumentum venderetur. & an bona spes foret vindemiæ? Vnde Prælati ille, quem scio maiorem argenteæ suppellectilis, quàm conscientiæ curam habuisse, animam exhalauit, contrectans manibus sua salina, pelues, lancesque, quas in supremo agone, coram adferri iusserat? Vnde nobilis ille Sabaudus, qui omnem suum amorem Mulieri cuidam impenderat, obiit dicendo, iterandoque milles: Corculum meum, deliciæ meæ, ita ne auellor à te? nimirum Echo vitæ est Mors. Et, vt alterius quoque generis exempla proferamus, vnde est quod quædam S. Ursulæ Religiosa, quæ in longa sex mensium ægitudine, sæpius solenne B. Victoriæ carmen iterauerat:

*O IESV, mi dulcis Amor, nil diligo
præ te,*

*Tu sponsus meus es, Mens mea sponsa
tua est,*

L

pro-

proximis annis Camberij obierit, hæc verba repetens? vnde est quod tot egregiæ animæ, quæ millies habent in ore: Viuat IESVS, MARIA, IOSEPH, idem in morte etiam suauissimè eloquantur? totum id inde accidit, quòd Mors sit Echo vitæ: adeò verum est, cogitationes, & affectus, qui nobis familiares, & in vsu fuerunt, sub id tempus recursuros. Cui igitur bono ex vanæ, inutiles, & forsitan perniciosæ cogitationes, siue Amoris, siue Vindictæ, quæ tantoperè insident animis nonnullorum? Quorsum hæc Castella in aëre, hæc fictæ machinæ, illæ votorum Chimæræ, illæ vagæ imaginationes, quæ multis plurimas bonas horas suffurantur? nulli rei ista seruiunt, nisi (præter Dei offensam ratione perditæ temporis) vt mortem quoque producant infelicem, & obitum in quo minima sit de Deo cogitatio; quia enim mors vitæ est Echo, & finis tragœdiæ, quidquid in theatro comparuerit, iterum se sistet, & ex cogitationes cupiditatesque postremum recurrent. Nonne præ-

præstaret mentem, optimis cogitationibus imbuisset, & hæc etiam parte utiliter tempus collocasset, ut omni modo mortem meliorem acceptioremque consequeremur?

Hæc omnia stimulant me, Hagiophila, ut alia, quàm fecerim antehac, ratione tempus meum impendam; nec minus te facturam existimo, quin etiam amplius. Quod ad me attinet, totus horrore concutior, quoties mecum reputo tanti iacturam temporis, tot actiones, quas ad Deum non retuli, tot vanas inutilisque cogitationes. Heu! omnium istorum rationem exigit à me Deus. Quotidie mihi ferè septem horæ sunt, aut ut loquar, aut ut de diuinis rebus loquentes audiam, aut ut Deum orem, deque illo cogitem: elapso anno, aut elapsis annis decem, quantus horarum numerus est, de quibus exquireret Deus, an, uti par erat, eas expenderim? Heu me! Quid dicam, cum interrogabor de decem, aut quindecim millibus horarum Orationis, de viginti, vel viginti quinque millibus quadrantium Examini, & ita

de tempore aliorum meorum spiritua-
lium Exercitiorum, secundum ætatem,
quâ sum in obsequio diuino ! scio quan-
to tepore, quantâ negligentia, quantis
distractionibus, tam bonas horas con-
sumpserim, vt taceam reliquum tempo-
ris mihi concessi. Subit hinc cogitatio,
quod Deus quartam horæ partem Dæ-
monibus exprobrauit, quâ benè vsi non
sunt, ideoque cruciatibus æternis sunt
addicti. Et ego, qui centuriatim centu-
ruas prodegi, quò deueniam, si Deus
tam insolentem exaggerare iacturâ in-
cipiat ? reuoco hinc in mentem, pluri-
mos esse inter damnatos, qui idcirco
perierint, quòd aliquo semiquadrante,
& momentis aliquot temporis abusi
sint : & ego abuti pergo septimanis in-
tegris, mensibus, annis, imò vitam o-
mnem inutiliter consumo, nihil propter
Deum facio, ad me refero omnia ; ubi-
que & in omnibus me specto, etiam ipsis
cogitationibus, quas noctu diuque co-
hibere vix possum. Millenæ & millenæ
euolant, & pleræque vanæ omnes, o-
mnes ridiculæ, omnes ineptæ : interim
Deo

Deo, ut par foret, non seruitur, neque
tempus mihi indultum, uti oporteret,
benè collocatur. Quandocumque hisce
considerationibus animum aduerto, fa-
teor contremiscere me, & panè appre-
hensionibus diuinorum iudiciorum ab-
sorberi. Erigor tamen, & solatio per-
fundor, quoties intelligo, posse me præ-
teritam iacturam, resarcire bono usu
eius temporis, quod mihi superest, quan-
tumuis exiguum & breue sit: tam utili-
ter collocare istud possum, ut opes in-
gentes ipsaque sanctitas, inde mihi pro-
ueniat. Medius horæ quadrans, momen-
tum vnicum temporis benè vsurpatum,
magnos producere affectus potest. Te-
stis est ille, de quo sacrae paginae affir-
mant: *Consummatus in breui expleuit
tempora multa.* B. Stanislao Kostkæ Ty-
roni, nouem menses suffecerunt, ut san-
ctitatem assequeretur; Aloysius Gonza-
ga, quatuor, aut quinque annorum spa-
tio Beati titulum conditionemque pro-
meruit. Hæ fortunatissimæ animæ modi-
co tempore laborârunt, sed ad eò impen-
sè atque utiliter, ut magnos apud Deum

fauores, & sublimem inter Caelites locum sint adepti. Quæ profectò animi diuersa me plurimum solantur, vnàque animos addunt, vt rem omnium preciosissimam benè dispensem, neque in aliud crebriori cogitatione, maiori curâ, & affectu incumbam, quam in vtilem quæstuosumque vsum temporis, mihi à Deo adhuc concedendi; credens mihi inculcari illud à D. Bernardo, quod cuidam amicorum suorum aliquando scripsit: *Esto, tibi multa annorū curricula restent; quid necesse habes amittere tanta tempora, tanta lucra? nihil pretiosius tempore. Transcunt dies salutis, & nemo recogitat.*

Si hæc non sufficiant, lege cap. 22. & 23. tract. 8. vol. 2. part. primæ Rodericij, vel cap. 16. 17. & 18. lib. 3. de Imitatione Christi.

Sequitur Examen circa virtutem; ea, circa quam hodie te examinabis, erit Humilitas, prorsus è re: quandoquidem, Mortis consideratio, multum ad hanc virtutem accendat. Hinc agnosce, num humilis sis.

EXAMEN CIRCA HUMILI-
TATEM NOBIS NECES-

SARIAM.

Primò. Existimare se vilem, & abie-
ctum, & ab alijs talem haberi velle, eli-
gendo ex negotijs, & occupationibus ea, qua
viliora, atque molestiora sunt.

Secundò. Cateros omnes sibi præferre,
attendendo in ijs, dona Dei & gratias; &
obstupescendo, quòd aliquis reperiat, qui
nostri dignetur meminisse, aut etiam ali-
quo nos amore prosequi.

Tertiò. Credere se ineptum, & inuti-
lem ad boni aliquid faciendum; plurimis
nihilominus præstare, sed inde nullo modo
gloriari.

Quartò. Sape animum advertere ad
suas misérias, relapsus & imperfectiones,
inde sumendo occasionem se demittendi,
parvique pendendi; peccatorum suorum
gravitatem, ut timerentur, agnoscendo.

Quintò. In omnibus actionibus nostris,
quancumque bonæ videatur, reperire quod
carpamus, ut quæ referta sint imperfectio-
nibus, qua oculos nostros fugiant.

Sextò. Eligere semper incommodissima in corporis commoditatibus, quasi melioribus essemus indigni, & communia onera libenter exactéq; subire, nullam immunitatem, aut exemptionem admittentes.

Septimò. Nunquam se aut sua iactare, neque de vlla re loqui, tanquam auctoritatem habentes, ne de rebus quidem spiritualibus.

Octauò. Fugere omnem curiositatem, que ad anima nostra bonum, & salutem non spectat.

Nonò. Nihil unquam in alios sibi arrogare, neque fastuosè, aut affectata quâdam gravitate incedere.

Decimò. Sese alijs propter Deum subijcere, præsertim superioribus.

Undecimò. Omnem honorem, & bona, que nobis conferuntur, ad Deum referre, indignos nos reputando, & auersando, si forte hinc ab alijs laudemur, aut astimemur.

Duodecimò. Non existimare sibi aliquam prerogatiuam, aut honorem deberi, sed in congressibus postremum locum occupare.

Deci.

Decimò tertio. *Non turbari aut affligi, quòd aliquid in nobis sit, unde reddamur contemptibiles, aut quòd simus inter eos, qui sunt abiecta conditionis.*

Decimò quarto. *Non excusare admis-
sam culpam, sed eam candidè agnoscere.*

Decimò quinto. *Omnia aliorum di-
cta factaque approbare.*

Decimò sexto. *Declinare omnem lo-
quendi, aut agendi modum, quo videamur
honesto loco nati, aut aliquando in saculari
dignitate fuisse.*

Decimò septimò. *Sibi ob proprias im-
perfectiones irasci, seque serìò reprehende-
re, & gaudere, quòd alijs nostra miseria
sint perspecta.*

Peracto hoc Examine recita Officium, aut
alias Orationes vocales. Inde aggredie-
ris hanc Considerationem.

CONSIDERATIO.

I. **M**Irabiliora verba non reperio,
quàm hæc tria: Semper, Æuum,
Æternitas; quò plus ea meditor, eò ma-
gis me angunt. Futurus sum semper, &
in Æuum futurus sum corpore, & ani-
mâ, vel in æternitate tormentorum, vel

æternitate deliciarum, idque pendet ab arbitrio & electione meâ. O mira verba ! ô semper ! ô ætuum ! ô æternitas ! nunquam animo meo excidite !

II. Insignis amentia est, laborare pro rebus caducis, & quæ pereunt vnâ cum tempore. Optimus is labor est, qui Æternitati impeditur. Quis iam meminit fortium illorum, qui vitam & sanguinem, in bellis, in Regum obsequijs prodegerunt ? quis recordatur eorum Diuitum, qui tot sudores periculâque congerendis opibus exantlârunt ? quis iam loquitur de formosis illis, quæ omne studium suum colendæ pulchritudini, vanitati, quæ sectandæ impenderunt ? hæc omnia sepeliuit obliuio : nōne igitur satius est, ijs actionibus incumbere, quæ vitam promerentur carentem fine, quæque à Deo approbabitur, & notabuntur in annalibus felicissimæ æternitatis ?

III. O quantus ille est, cui seruo, & quàm tremendus, quandoquidem etiam cogitationum mearum sibi dari velit rationem ? Verum id ita esse, vehementer

gaudeo. Millies millenas concipiam, quæ illi erunt acceptæ, quæque illius amorem beneuolentiâque mihi conciliabunt: nullam vnquam cogitationem admittam, quæ illum à me auertat; Nimium, heu! antehac tempus perdidisti, nolo, nolo perdere æternitatem.

V. O Deus, aliquânè stoliditas est, quæ cum nostra debeat comparari? Mortem timemus, quæ nobis aditum ad pulchram æternitatem patefacit; horremus illam, quæ nos carceris nostri calamitatibus liberat; & illam fugimus, etsi nos eximat occasionibus offendendi Deum nostrâ peruersitate. A desdum amoena, amanda, & desiderabilis Mors. Nunquam mihi præmaturè aderis. Nunc quando te perspicuam habeo, de te potissimum cogitabo, te amabo. Vituperet quisquis volet, volo mortem amare, vt amem Deum.

V. Vix adducor, vt credam mihi non fuisse locum iam in inferno designatum, meque alicuius sanctæ animæ patrocínio esse reuocatum in spem cali conse-

L 6 quene

quendi. Digitis duobus abfui ab inferno,
& proximus vt perpetuò priuarer aspe-
ctu IESV, & MARIE. Ah quid me facere
non oporteret, vt gratus forem tanto
beneficio! ferò nimis morior, nimis diu
ignoro, cui debeam hanc inæstimabi-
lem charitatem. Scio quid loquar, sum
filius lacrymarum, & suspiriorum: sed
cuius? istud est, quod adhuc nescio.

VI. Multùm esset, si euitare possem
Purgatorium, & flammæ illas incredi-
biliter excruciantes; sed quis modus?
quandoquidem me tantoperè reddam
obnoxium peccando, & tam parum sa-
tisfaciam patiando? saltem illic parùm
detinerer! sed audio diuinitus manife-
statum, quod è nostra Societate quidam
quatuor annos illic detentus fuerit, etsi
in magna virtutis opinione vitam tra-
duxisset; & nobilem quandam puellam
totis quingentis annis, ob aliquam vani-
tatem, quâ iuuenum animos offenderat,
Quod si ita est, iam ad triginta, vel qua-
dra

a. *Ex Annal. SS.*

b. *Ex Alano Ord. S. Dominici,*

draginta annos, quin forsitán ad finem
vsque Mundi, flammis illis terribilibus
deputatus sum, nisi mortificatione, alijs-
que pœnis vitam meam expiem.

Adest hora quietis, & deinde Orationis
vocalis, vel Officij. Visitationis Vene-
rabilis Sacramenti, & demum disposi-
tionis ad sequentem Meditationem.

III. MEDITATIO.

De Purgatorio.

Oratio præparatoria consueta.

I. Præludium. Imaginare ingentem la-
cum plumbi, vel æris fusi, & pror-
sus igniti, qualis solet esse materia fun-
dendis campanis præparata, & in hac ar-
dentissima lebete, vide plurimas animas
miserum in modum cruciari. O triste
spectaculum!

II. Prælud. Pete lumen, vt agnoscas,
quis sit hic ignis, & quinam in eo tor-
queantur.

I. Punctum. Poenæ Purgatorij & eo-
rum, qui hoc lacu continentur, sunt eæ-
dem, quæ Inferni, præterquam quòd

L. 7 æter-

æternæ non sint, quôdque is, qui illas patitur, non sit Dei hostis, neque priuatus donis & gratijs, quas viuens consecutus est: idcirco neque desperat, neque maledictis in Deum & alios insurgit, imò ne minimum quidem impatientis animi signum præbet, sed cum incredibili resignatione cuncta de manu Dei accipit in satisfactionem suorum peccatorum. Ah quidni corrigo mores meos! quidni desero paruam illam & vanam agendi libertatem, quâ diuina bonitas sic irritatur, vt me huic incendio sit adiudicatura, & quis scit ad quantum temporis interuallum!

II. *Punctum.* Poenæ sensus erunt horribiles. Quantum erit, præ oculis continuo habere inusitatas dæmonum species, adeoque horrenda spectra, vt ea nunc sine animi deliquio spectare non possemus? quid, auribus haurire blasphemias & vociferationes eorundem diabolorum? quid alia sensuum aliorum tormenta? vri & peruri eo igne, cum quo si noster focus comparetur, non
alius

alius quàm coloribus expressus ignis esse videatur? magnam sibi profectò iniuriam faciunt mortales, dum corpus non affligunt, neque conantur pœnitentijs redimere tormenta. vsque adeò terribilia! vnus horæ doloribus integrum annum Purgatorij cōmutare possent. At mecum ista: pergámne ego tam esse profundo stupori immerſus, vt mihi parcam, neque obediam tot instinctibus, qui clamant, tandem tempus esse, vt macerationibus corporis alijsque bonis operibus res meas disponam?

III. *Punctum.* Tormentum præterea erit maximum, non videre faciem Dei, neque illam B. Matris, & tot dilectissimorum Sanctorum, qui nos expectant. Quod si verò id diu, & ad plures annos differatur, ò quàm intolerabilis est hæc mora! esse præ foribus cæli, & tamdiu ingredi non posse! mortem optasse idcirco, vt in conspectum Dei admittereris, & excludi nihilominus tanto temporis interuallo! quis non summo commiserationis affectu moueretur qui videret

deret prolem aliquam, quæ solo Parentis videndi desiderio à centum milliari-
bus aduolasset, statim ab aduentu dam-
nari ad panem & aquam, ad humicuba-
tionem, totóque anno excludi Parentis
alloquio, & conspectu? magnò mihi sta-
bitis peccata mea: scilicet, licebit olim
inter flammæ gemere, & ingeminare:
*Miseremini mei, miseremini mei saltem
vos amici mei, quia manus Domini tetigit
me!*

Colloquium ad Angelum Custodem
vt isto tempore me soletur, vtque viuen-
tes præsertim amicos excitet ad oran-
dum pro me, & impetrandum à Deo,
vt B. Virgo temperet dolores meos; tum
vt exaudiantur sacrificia & preces, quæ
pro misera mea anima offerentur.

Recollectio. Lectio fortuita Thomæ de
Kempis. Rosarium. Visitatio Venera-
bilis Sacramenti. Cœna. Recreatio. Li-
taniæ Sanctorum. Visitatio Venerabilis
Eucharistiæ. Præparatio Meditationis
crastinæ. Examen. Somnus, sed prius
Mortis recordare, & quam sis sedem to-
tâ æternitate habitura.

QVIN.

inspice, & fac secundum Exemplar. V



QVINTVS DIES.

*De virtutibus in infantiâ, & vitâ latente
Seruatoris nostri imitandis.*

EXcessimus, Hagiophila, viam Purgatiuam, & Illuminatiuam ingredimur, vt trium sequentium dierum spatium insistamus considerandis ijs virtutibus, quæ plurimum in vita & Passione IESV Christi, optimi Magistri nostri, eluxerunt. Hodie eius Infantiam & vitam latentem inspiciemus.

Saluta Venerabile Sacramentum, & ad
meditandum te dispone.

MEDITATIO I.

*Quòd Deus nobis dederit Filium suum, vt
eius virtutes imitemur.*

Oratio præparatoria consueta.

I. *Præludium.* Imaginare Regem aliquem, qui de Moderatore excellenti prospicit Filio suo, vt illum in moribus, & totâ viuendi ratione instruat. Docet illum igitur moderari gressus, sermonem ornare elegantijs, vestes aptè
com-

componere, & reliqua, quæ scire Regulum oportet.

II. *Pralud.* Cùm Deus sit iste Rex, qui nobis Filium suum proposuit in exemplar actionum nostrarum, pete gratiam, ut eum proximè imitando assequaris.

I. *Punctum.* Ex pluribus rationibus, propter quas Deus nobis dedit Filium suum, præcipua est, ut illius verbis, & exemplo disceremus, quid credere, quidque agere ad consequendam nostram salutem nos oporteret, fieremusque hac ratione illi quàm simillimi. Non vult nos uti alio Magistro, quàm Filio suo, vnde in monte Thabor hanc vocem detonuit: *Hic est Filius meus dilectus, in quo mihi benè complacui, ipsum audite.* (Matth. 17.) Et ipse Filius de se: *Magister, inquit, vester vnus est Christus.* (Matth. 23.) Et alibi (Ioan. 13.) *Vos vocatis me Magister, & Domine, & benè dicitis, sum etenim.* Nam propterea *Exemplum dedi vobis, ut quemadmodum ego feci, ita & vos faciatis.* Dederat olim Deus hominibus plurimos eximios Sanctos, Enoch,

Enoch, Moysen, Iosue, Dauidem, & alios in exemplum: sed cum nemo illorum numeris omnibus esset absolutus, tandem placuit eum proponere, videlicet Filium suum, in quo nihil carpi posset, nihil desiderari: Ita ut hoc solum nunc desit, ut quemadmodum ipse fecit, ita & nos faciamus. Desiderium, gratiarum actio.

II. *Punctum.* Æquissimum est, ut IESUM Christum imitemur. Nam primò hæc est amoris certissima tessera. *Qui dicit se in ipso manere, hoc est, diligere, debet, sicut ille ambulavit & ipse ambulare.* Ita Filius Parentem imitatur, Discipulus Magistrum, Ducem Miles. Secundò in eo sita est perfectio nostra: cum enim Deus perfectissimus sit, imò ipsa perfectio, fieri non potest, ut ei fiamus similes, quin vna eademque opera reddamur perfecti, expressione videlicet virtutum eius, quantum eas exprimere fragilitas humana potest. Tertiò desiderat istud à Filijs suis Mater Ecclesia, desiderat. *Communitas, in quâ vivimus, desiderant*

rant Superiores nostri, vt omnes fiamus
Christuli, iuxta illud, quod Galatensibus
vouebat Apostolus: *Donc formetur in
vobis Christus.*

III. *Punctum.* Lucifer hinc allicit ho-
mines, vt illum sequantur, promittit vo-
luptates, honores, & diuitias; omnem
agendi libertatem permittit; interim te-
git ea, quæ post hanc vitam illis euentu-
ra sunt, intolerabilia per totâ æternita-
tem tormenta. Nihilominus innumeri,
qui præsentia tantum habent præ ocu-
lis, illum sequuntur, & pereunt. Inde
IESVS etiam homines inuitat, vt per
contemptum rerum caducarum, per
sui ipsius abnegationem, per semitam
virtutum, quam ipse tenuit, illum con-
sequantur, & cælum æternamque omni-
um bonorum possessionem; mercedis
loco, promittit. Anima mea, quid sequi
lubet, an voluptatem temporaneam, &
pœnam æternam? contemptum an ho-
norem? paupertatem an diuitias? vitium
an virtutem? Luciferum an IESVM?

Colloquium ad Seruatorem, quem
tibi

tibi Magistrum elegisti, & ad SS. Matrem, vt te Filio suo commendare dignetur. Pater. Aue.

Recollectio. Electio Tessere. nescio an hæc tibi arridebit: *Vivat IESVS, viuant quotquot illum diligunt. An forsan ista; Gloria magna sequi Dominum. Num seuerius illud dictum D. Pauli? Qui non amat Dominum IESVM, anathema sit.*

Sequitur Oratio vocalis, aut Officij, aut alia. Sacrum. Lectio spiritalis de Amicitij; particularibus, quæ magno detrimento sunt illi amor, quem Christo debemus.

DISSERTATIO MATUTINA.

De particularibus Amicitij.

SI istud dicerem, Hagiophila. non in-
secundas esse particulares Amicitias,
fortasse in vultum mihi inuolares, &
ægrè arcere possem violentiam tuam,
adeò suauiter illi vitæ humanæ com-
mercio addicta es. Ne indignare, loque-
mur ex voto tuo; & quia ratione duce-
ris, polliceor me nihil in medium allatu-
rum, quòd non sit maximè consenta-
neum rationi, & scio istud à te desidera-
ri.

ri. Enimuero contrahendæ amicitiaæ sunt: quis enim dubitat? naturâ ad amandum ferimur, negari non potest, ad hoc habemus cor: Amicitia elementum est, in quo viuimus; Amor est Sol, qui lucem, qui vitam impertit: soli barbari, & ab omni humanitate alieni, illum intueri non possunt. Ipsæ sensus expertes creaturæ hoc sidus adorant, & amare satagunt:

Ipsa suas etiam patiuntur sidera flammæ,

Ipsam etiam credo, nouit amare mare.

Plurimum me cepit ingenium illius, qui ut hanc veritatem illustrâs ob oculos poneret, subtili admirandæque Emblemate duos Amores, Geniorum habitu, ludentes pila expressit: pila hæc Mundi formam figuramque præferebat; ut hoc præclaro inuento doceret, Mundum, & quidquid eo continetur, solius Amoris tactu impulsûque promoueri, resque omnes, quantum cuiusque vires patiuntur, huic esse affectui subiectas. Profecto si id creaturis omnibus accidit, quomodo eximemur nos, quibus cor est, ubi

Amor

Amor residet, & quod vnum ineundis, admittendis, conseruandisque Amicitijs est aptum? quidquid erit, miseri erimus, si absque Amore, si Amicitijs destituti. *Va soli*, ait Sapiens, *quia cū cecideris, non habet subleuantem se.* *Quis est ille solus*, exclamat D. Augustinus in hunc locum, *quis est ille miser? ille*, inquit, *solus est, qui sine Amico est.* Tanti est, fidelem habere Amicum, vt vel solus illius aspectus temperandis propulsandisque animi ægritudinibus & molestijs sufficiat, quod olim Euripides quoque cecinit:

Adferre amico maximum solatium

Præsens amicus, rebus afflictis solet.

Bonus Amicus incomparabilis thesaurus est; vnde Alexander Magnus cū interrogaretur, vbi thesauros haberet reconditos, demonstrans eos qui peculiari Amicitiae vinculo illi erant obstricti, hi, inquit, thesauri mei sunt. Verus Amicus, est summa huius vitæ felicitas, eiusque iactura satis defleri non potest. Hinc Prometheus, qui olim Ægyptijs
leges.

leges tulit, docebat nihil æquè deplorari debere, atque Amici iacturam: cætera omnia esse instabilia, & arcæ, aut domûs angustijs contineri, Amicum verò animum atque cor occupare. Sed quid pluribus est opus? omnia verbo astruit Sapiens: *Amico fidelis nulla est comparatio, & non est ponderatio digna auri, & argenti contra bonitatem fides illius. Amicus fidelis, medicamentum vitæ & immortalitatis.* Quare non miror, plurimos etiam Sanctorum fidis Amicitijs adhæsisse. S. Cyprianus Episcopus Carthaginensis complexus est Cæcilium suum. Basilium Gregorius Nazianzenus, & (ne diutius immorer rei manifestæ) Petrus Paulum, de quibus prope quotidie canit Ecclesia: *Gloriosi Principes terræ, quomodo in vitæ suæ dilexerunt se, ita & in morte non sunt separati.*

Hiscæ positis, quâ fronte particularibus Amicitijs bellum indicerem, quo iudicio eas condemnarem? non facio. Omnino amandum est, fidelis Amicus habendus est. Abnuere nemo potest, nisi
for-

fortè Timon ille Atheniensis, ille Misanthropus, hominum osor, ille de quo merita vox: *Nec amat, nec amatur ab ullo.* Fidus & sincerus Amicus quærendus est, & in hoc particularis amicus consistit. Itaque factum tibi satis, Hagiophila, uterque nostrum opinione & sententiâ conspirat. Sed audi reliqua, quæ dicturus sum, fortasse minùs consentire videbimur.

Verum est, concessas esse Amicitias etiam particulares, cum fidelem Amicum habere permissum sit: sed in eo vertitur cardo difficultatis, ut talem aliquem nanciscamur, cum quo iniri contrahique sincera possit Amicitia.

Melopepones Amicè

Nunc temporis videntur,

Sunt plurimi probandi,

Ut unus approbetur.

Malum Amicum reperire, proclive est, at bonus, ne in Centuriâ quidem, invenitur; & inde electio difficillima est, quòd intentiones & proposita eorum, qui se nobis Amicos simulant, ignore-

M

mus.

mus. Nonnulli Amicitias ineunt ex quadam naturæ inclinatione, quòd exterior tua species, tua forma, tua indoles & comitas, tuus conuictus & sermo illis arri-
dent; lato iucundòque ingenio es, fac-
tijs, iocis, epulis, temporèque hilariter
ducendo delectaris, hinc te complectun-
tur. At ista veri Amici nota non est,
Amor iste est concupiscentiæ, non bo-
na sinceræque amicitia; simul atque for-
ma defluxerit, perierit decor, copia, &
valetudo; diffluet peribitque Amicus.
Illi verò Amici non sunt, qui tam facile
Amicitijs renuntiant, imò secundum
Aristotelem: *Non est Amicus, quisquæ
amare desijt.*

Alij amant ideò, quia amantur. Ma-
ledicta lex, aiebat S. Tereſia, ideo reda-
mare velle, quòd amer! & reipſa, ſatis
non eſt; vt eum deligam Amicum, qui
me amat: quid enim ſcio, an habeat
conditiones veræ amicitiaſtabiliendæ
requiſitas? an non peruerſo aliquo ad
me amandum affectu compellatur? an
non Amorem externâ ſpecie tantum
ſimu.

simulet? prius salis modium cum illo comedē, vt illum explores. & tunc de-
mum, citra periculum, aliquid de amici-
tia decerne.

Alij alios diligunt, quos reperiunt,
pronos in omnem viuendi libertatem,
qui sceleratus Amor est hominum liber-
tinorum, qui Deum non timent, qui
vnā nequitij se dedunt, quorum vsus
est alijs obrectare, murmurare, coire in
conuenticula, à communibus officijs, &
Regularū obseruatione secedere, quan-
dam morum insolentiam & immodera-
tionem induere, verbo: qui sunt inferni
pabulum: *Stupa collecta, synagoga pec-
cantium.* Perniciosissimā isthæc Ami-
citia est, qualem Latrones ineunt, nullo
alio nixam fundamento, quàm malitiæ,
& flagitiorum, in quæ conspirant. Nun-
quam subeat ista animum tuum cogita-
tio, inter eas personas veram esse amici-
tiam, quæ Dei timore non tanguntur.
*Non potest, inquit D. Ambrosius, homo
homini esse Amicus, qui Deo fuerit in-
micus.* Aliqui amant, vt Amicorum co-

piâ & authoritate stabiliant res suas, itaque se, & emolumentum suum sibi propositum habent, vel vt satisfaciant genio, & pruritu suo: non tam amare ipsi, quàm amari ab alijs volunt, similes Canni villosi, qui obuijs omnibus blanditur, adulaturque; vel denique ob alia motiua à tramite bonæ sinceræque amicitie aberrantia. Quis nunc modus est tanta permistione variarum intentionum, quibus duci homines possunt, inter tot fraudes & inconstantias, verum sincerumque discernere & deligere Amicum? vis modum illum tibi patefaciam? vt benè deligas, nullus deligendus est. O, Hagiophila, scires, quantis damnis & periculis septæ sint Amicitie particulares, nunquam crederes te illis, sed veneni instar, & pestis deuitares. Tribue hoc mihi, ne te ijs committas, nisi velis libertatis tue iacturam facere, & cor tuum redigere in seruitutem. An non est esse mancipium vinctumque, semper mentem habere vni creaturæ obnoxiam? ad illam noctu diuque anhelare? ijs deside-

rijs

rijs indormire? sæpe noctem insomnem
ducere? si præsens adsit, iam deferri non
potest, defigi in illam obtutus debent,
tangere opus est, manum apprehendere,
testificari, quòd illam amemus, expro-
brare illi frigus affectûs sui, permittere,
vt viuat arbitrio suo liberè, neque car-
pere audemus vitia illius, ne offensa ali-
quid de suo erga nos amore remittat. Si
euigilamus, prima animo occurrit, si
dormimus, eius imago somniantibus
objicitur. An non ista insolens quædam
seruitus est? Ex hisce malis ruitur in pe-
iora, ex seruitute in ingens tormentum,
delaberis. Quod tormentum grauius es-
se potest, quàm quando diuelli oportet?
quando accedit æmulatio? quando cre-
dis te non amari? quando langues expe-
ctatione eius, quem diligis? quando lon-
giùs abest id, quod amas, & metus est, ne
non redeat, aut non nisi post diuturnum
temporis interuallum? quando cogeris
ad conferenda munera, & noua affectûs
tui argumenta? quando diuinam absen-
tiam terre non potes, & nimia sollici-

M 3 tudi-

tudine nuntium de illo expetis, vix rei alterius memor? nonne hoc insigne tormentum est? sed ista tanti non forent, nisi conscientia quoque laderetur: quando vnâ sunt, liberè animus effunditur; maledicatur, obrectatur, murmuratur; iudicia & suspiciones de hisce aut illis referuntur, conspiratur, violatur silentij lex, regulæ & ordinationes Communitatis; tempus teritur, de rebus suis multus sermo, mutua adulatio, excusatio reciproca suorum vitiorum, de rebus diuinis altum silentium, aut si ab his factum initium est, tandem deflectitur ad colloquia inepta, nugatoria, vana, testantia mutuum affectum, & cuius satis amplâ significationem dare non possunt. Ipsa etiam sæpe Castitas periculo exponitur, præsertim inter iuniores: isti blandi aspectus & diu defixi, hæc suspiria, hæc voces truncatæ, quæ primo aditu omnem personarum affectum prodere non audent, illi gestus alij, qui etiam sine voce loquantur, vim inferunt, flammæ excitant, & inordinatis cogitationibus animum,

num, & corpus prauis motionibus affligunt. Quòd si hæc amicitia vigeat inter personas diuersi sexûs, vâ! longè certius discrimen est. Et quî non esset, quandoquidem inter eos, qui eiusdem sunt sexus, nimis quàm sit manifestum? constat aliquos eouque exorbitasse, vt actiones admiserint igne publico expiandas.

Et vt ista non essent, profectus animæ, propria perfectio, & virtutum exercitium negligitur. Rarò videbis eas personas, quæ hisce affectibus adhærescunt, ad aliquem virtutis gradum promoueri. Et fieri non potest, quandoquidem Dei Amor apud illos exiguo loco pretioque sit. Hæ animæ non amant Deum ex toto corde, quantumvis id externâ specie præferant, verbóque multùm protestentur, non inducent me, vt credam. Diuisum cor illarum est, partem Deus, partem Amicus, vël Amica occupant: quod creaturæ superest, Deus obtinet, nam diuturniores, & impensiores cogitationes illam spectant, reliquum Dei est; cum certissimum sit, tantundem.

Amoris demi Creatori, quantum impendimus creaturæ. Optimè S. Augustinus Amorem manui comparat: *Putate, inquit, Amorem hominis, quasi manum anime; si quid tenet, tenere aliud non potest: ideo qui amat aliud, Deum amare non potest, occupatam habet animam.* Manu teneas aureos quinquaginta, si eadem apprehendere manum meam velis, illamque stringere, necessariò aurei illi dimittendi sunt; ita prorsus se habet, quamdiu manus amoris aliqua creatura, quam diligis, occupatur, fieri non potest, ut amabilissimus Deus debitum ibidem locum obtineat. Quare iterum te obtestor, Hagiophila, ut hisce particularibus Amicitijs te expedias. Insana es (præsertim si adhuc ætate flores) nisi missas facis ineptas hæc animi tui occupationes. Id aio, quòd sciam hoc proprium esse iuventuti, ut similibus studijs affectibusque dent operam. Exime, exime te his omnibus, asserere libertatem tuam: ne ultro te tormentis, & horum indiscretorum perturbationi subijce,
gere

gere curam conscientiae, & perfectionis
tuae, neque puritatem tuam discrimini
exponas: fac ut Amor Dei in te domi-
netur, & in corde tuo veluti throno suo
resideat; si aliqua præterea amanda per-
sona est, ametur moderatè, non effli-
ctim, non anxie, sed eo pacto, ut Com-
munitas, in qua degis, carpere nil meritò
possit, neque offendi, cum illo Dei timo-
re, ut nullum, ne veniale quidem, pecca-
tum admittatur, nunquam vlla Regula
violetur; eà compositione morumque,
modestià, quæ Angelis sit admirationi;
eà cautione, ut nihil propales eorum,
quæ ad Conscientiam tuam attinent,
quæque soli Confessario, aut illi, qui ani-
mam tuam regit, debent esse perspecta.
Hæc enim si Amico, vel Amicæ reuela-
res, tentari forsitan posset, atque ea di-
scere, quæ hætenus benè ignoravit. Di-
uersa Arcanorum ratio est, Arcana ani-
mi & cordis intima, nulli patefacienda
sunt, quàm Deo, eiusque Vicarijs, qui
nos illius nomine gubernant. Volésne
post illa omnia talibus imposterum

Amicitijs, de quibus nobis hæcenus sermo fuit, indulgere? At fortè obijcies, me nunc longè alium à me videri: priùs me dedisse bona verba, eaque visum approbare, quæ nunc tantopere rejicio, & damno; te magno quidem, sed breui, gaudio persulam, cum plurimum absis ab eo, quod putâras. Nihil aliud est, quod opponas? iterum dico, & repeto: Nihil melius, nihil felicius est, quàm fidelem habere Amicum. I E S U S suum habuit Ioannem, suum Paulum Petrus: in eo momentum est, vt benè deligatur. Benè delige, & adstipulatorem me habebis. Nõne oportet, vt tibi singula suis nominibus indigitem, & quod bonum est bonum vocem, & malum, quod malum est? ne terreant te dicta mea, si Cor reperis postulatis conditionibus instructum, illud ama: sed secura sis, quòd Deum præ omnibus timeat, quòd in amore constabit, quòd te non amet sui commodi gratia, sed purè propter Deum, & in Deo; quòdque tu etiam non alijs stimulis ad amorem impellaris,

ris, non subiiciendo te ijs seruitutibus,
tormentis & periculis, quæ malas ami-
citas consequuntur. Si occurrit sic dis-
positus animus, & tu etiam eodem pa-
cto præparata sis, audacter & sine scrupu-
lo contrahe amicitiam, non repugno.
Si reperire posses, qui te non aliò quam
ad Deum stimularet, maximè id foret
e re tua. Talis fuit Tereſia quædam
Bernardina, quæ hoc fœdere amicam
ſuam obſtrinxerat, vt quoties vna alte-
rius meminisset, toties animas ſuas diui-
næ prouidentię regendas penitus com-
mitterent. Talis ille, qui monuerat ami-
tum, vt quodcumque, & vbiſcumque
obuius fieret, continuò ſuggereret iſtud:
Illicne es? vt diuinæ præſentiæ ſemper
recordaretur. Tales magno tibi forent
emolumento. Plura iam dicenda non
occurrunt. Vellèſne, vt tibi deſignarem
perſonas, quas eligere deberes? facerem
id non inuitus, ſi cognitam haberem.
Communitatem tuam, & dicerem: ne
huic perſonæ te credas; tota in iocos &
garrulitatem effuſa eſt, eſt inconfans,

deceptrix, dicax, cui summa & vnica virtus sit, aliqua vrbánitas; tenere secretum nequit, inuida est, superba, sui amans, tibi ista non seruit. Atque hæc tibi suggererem: si autem aptam aliquam reperirem, quod quidem mihi prodigij instar esset (cùm rectè olim nonnemo dixerit, centum annos minimum requiri, vt duo, perfectâ numerisque omnibus absolutâ amicitia, colligentur) liberè, pro eo, quo in commodum tuum feror, affectu, & vt me tuæ ad amandum pronitati aecommodarem, essem tibi author, vt illi animum, & cor tuum affigeres. Sed cùm personas illas, cum quibus versaris, non norim, hac in re satisfacere tibi non possum. Nihilominus quia vrgere pergis, vt nominem tibi personam aliquam, quam deligas, & quam sanctam Amicitiam ineas, non moror, cedo voluntati tuæ: Delige & incharum amicum assume IESVM, Mariæ Filium, huic vni animum & Amorem tuum dedica; summè amabilis est, & vnicum veræ sinceræque amicitiae obiectum,

iectum. Quid amare hic potes, quod à
proditionibus, fraudibus, inconstan-
tijs, fastidijs, invidijs & spinis sit immu-
ne? nihil horum habet IESVS: Nulla
voluptas est amare Creaturam, vix vni-
untur cum diuidi oportet: non pro vo-
to satis frequens congressus est, ne mu-
tui quidem aspectus omninò liberi sunt,
arbitros habent alios, & tandem mors
ipsa perpetuum diuortium indicit, & vt
aliqua esset voluptas, mille molestijs &
doloribus animus labefactatur. Amici-
tia cum IESV, & amabili Maria, volu-
ptatem adfert puram & defæcatam: si
lubet, semper illi adsumus: adimus &
alloquimur, quando & quantum lubet.
Ipsa mors amoribus nostris patrocina-
tur: velum enim subducens, vt perpe-
tuo eius aspectu fruamur, efficit. Tam
ergo delirabis, Hagiophila, vt alteri,
quàm IESV, cor tuum largiaris? non-
ne anima mea sponsa illius est? cui igitur
potius consecrabis Amorem tuum,
quàm sponso tuo? I & IESVM MARIE
filium Amicum habe, illum præ omni-

bus ama, & omnia in illo, & propter illum. Et tali lata sponso iam nunc concine, & deinceps quoad viues, millies & millies cum B. Victoria.

*O IESV, mi dulcis Amor, nil diligo
quàm te:*

*Tu sponsus meus es, mens mea sponsa
tua est!*

Hagiophila, si lectio hæc non sufficit, lege, ut magis exciteris ad eligendum IESVM in Amicum, cap. 7. & 8. lib. 2. de Imitatione Christi, cap. 8. lib. 1. aut Rodericij cap. 18. 19. & 20. Tract. 4. part. 1.

Peracta Lectione renoua deuotiones tuas erga Filium Dei, ad quod seruire poterit, Caput 3. & 5. mei sancti fauoris, si fortè ad manum est.

Sequitur præparatio sequentis Meditationis.



SECUNDA MEDI-
TATIO.

De Paupertate Filij Dei Infantis.

Oratio præparatoria solita.

P*ralud.* I. Propone tibi ob oculos Iesū recens natū, iacentem in præsepio non in cunis; in stabulo, non in domo; inter inopem Matrem & S. Iosephum, qui ne quidē impetrare potuerint, ut illi domicilium in Bethleem concederetur.

II. *Pralud.* Pete gratiam bene intelligendi illam filij Dei paupertatem, ut eam imiteris saltem cor non affigendo diuitijs, aut commodis huius vitæ.

I. *Punctum.* Extrema fuit paupertas filij Dei, in eius natiuitate: nam, etsi foret rerum omnium, & vniuersi Dominus, tamen in mundum ingrediens, ad deserti stabuli vilem angulum reijcitur; Matrem habet pauperem; paupertinis panniculis inuoluitur; Lectus est fœni pauxillum & straminis, qualis animalibus substerni solet. Omne subsidium illi est ab inope fabro, quem præsens omnium

mnium rerum penuria grauitè afficiebat; deinde à sancta Virgine Matre, cui neque famulus, neque ancilla parturienti assisteabant. Admiratio super his, ac deinde Inuestigatio, quorsum hæc tanta Filij Dei paupertas. Primò, vt admiratione complerentur Angeli, dum vident eum, cui Cælum thronus est, qui- que decore suo induit omnes creaturas, iacere in præsepi iumentorum, & malè fartis panniculis inuolui. Secundò, vt damnarentur immoderatæ cupiditates filiorum Adam, & diuitiarum vanitas detegeretur. Tertiò, vt eius virtutis pretium innotesceret hominibus, eaque illius exemplo persuaderetur, maximè Religiosis, qui meritò patienter ferent modica corporis incommoda, atque aliquam in victu, vestitu, & habitatione egestatem, si viderint Seruatorem suum maximis incommodis, rerumque omnium inopia laborasse.

11. *Punctum.* Non fuit hæc paupertas Filij Dei fortuita, aut à S. Iosepho, vel B. Matre procurata, sed designata à Deo

Deo ab æterno, & tandem in tempore mandata executioni. Vtque hæc melius ex decreto diuini consilij, succederet; fuere Parentes, etsi familiâ nobilissimi, re tamen familiari egentes: eundum ijs fuit in Bethleem, vbi nec diuersorio reciperentur. Neque ignorabant Angeli, hæc omnia sic esse diuinitus destinata: nam cum Natiuitatem huius Infantis Pastoribus annuntiarunt, meminerunt pannorum, quibus inuoluebatur, & præsepj, in quo iacebat. Gaudete ô voluntate affectuque pauperes, Ducem habetis IESVM! consolamini pressæ afflictæque animæ, nihil fortuito, aut casu vota vestra, & desideria intercipit: omnia nutu, & decreto Dei accidunt.

I II. *Punctum.* Hæc voluntaria Christi paupertas fuit prima virtutum, quas in Exordio vitæ suæ manifestauit, eandemque tota vita sua constanter exercuit. Fuit egens in Natiuitate, fuit & paulò post: nam tres Reges veluti pauperi in summa egestate constituto, stipem erogarunt. Egens fuit in Præsentatio-

tatione; nam cùm Matri facultates de-
 essent emendo Agno, offerri turtures
 debuere. Ægyptum petens, ibique se-
 ptem annis commoratus, magna inopia
 laboravit. Duodennis, ex penuria sti-
 penti trium dierum spatio vicatim col-
 legit Ierosolymis, eo nimirum tempo-
 re, quo Mater perditum credebat. In of-
 ficina fabri lignarij, per octodecim in-
 tegros annos, instar tyronis & opificis,
 operam suam adhibuit. Nulla illi do-
 mus, nulli redditus, nullæ pensiones, nil
 æris, aut argenti: solis S. Magdalenæ, S.
 Marthæ, aut aliarum piarum mulierum
 eleemosynis inter prædicandum susten-
 tabatur. Victus fuit vulgaris, nullo mo-
 do delicatus. In vestitu nihil superfluū,
 nihil vanum, aut curiosum, Tandem
 nudus in Cruce moritur: adijcine ad
 istam paupertatem aliquid potest? Con-
 sidera cur in hac virtute cœperit, & fi-
 nierit; an quòd hæc sit charissima, quòd
 difficillima, quòd maximè necessaria, &
 cæterarum fundamentum? Imitatio,
 Resolutio, Amor,

Col-

Colloquium ad sanctos Paupertatis
amatores, S. Franciscum, S. Alexium &
similes: quidni vos imitor, ô sancti ele-
cti? quidni tibi similis sum, ô IESU Ma-
gister mi! Pater. Ave.

Recollectio. Visitatio Venerabilis Sacra-
menti. Examen Conscientie. Prandium
sed memineris priusquam cubiculo pe-
dem efferas, osculari plagas tui Cruci-
fixi, saltem pedum, rogando per Ago-
niam suam, vt tibi in hora mortis tuæ
benignus, & misericors esse dignetur.
Vel deosculare aliquam B. Virginis ima-
giuë, postulata illius benedictione. Vel
etiam vtrumque præsta. Quid enim
exire audes hoc officio IESU & MARIAE
non exhibitæ? vide ne negligas, & iam
nunc, hanc in consuetudinem, & à Deo
magnis aliquando solatijs idè perfun-
deris. Recreatio. Visitatio Venerabilis
Sacramenti. Examen particulare. Tem-
pus scribendi proposita tua, præcipuè
istud: nunquam te egressuram cubicu-
lo, aut regressuram, quin flexis genibus
adores IESUM & Mariam, eorumque
opem & fauorem implores, aut alia, quæ
tibi occurrent, annotanda. Sequitur Le-
ctio spiritualis.

DISSERTATIO POME-
RIDIANA.*De commodis, & emolumentis vite
occulta.*

NE existimes, Hagiophila, dum te ad vitam occultam inuito, me tibi persuasum velle, ut aliquò te conferas, ubi sis incognita, exemplumque Alexij, Rochi, Ioannis Calybitæ, Euphrosinæ, Eusebiæ, & similium imiteris; vel ut alicubi te sic abdas, lateasque occulta, ut à nemine, quàm à Deo, & Angelis videre, ad imitationem Pauli Eremitæ, Mariæ Ægyptiacæ, Rosaliæ, plurimæque aliorum. Non est illa vita occulta, quam hodie tibi deprædico: sic latendi iam usus exolevit: Nihilò magis arbitrere, quòd hoc loco tibi suadeam, ut ita tuis oculis subducas optimas sanctissimasque tuas actiones, ut illas Deus, & alij obseruent, tu verò minimè, non attendendo ad bona, quæ agis, sed ad mala, quæ à te committuntur. Iob tam eximia & illustria sanctitatis opera peragebat,

bat, vt suo splendore Solem prouocarent, & Lunam; nihilominus ijs ipse non aduertebat animū: *a Si vidi Solem cum fulgeret. & Lunam incedentem clarē.* Ita probi faciunt, teste D. Gregorio; *b Soli electi bona sua non vident, quæ in se videnda omnibus ad exemplum præbent.* Nimirum hac in re Patronem imitantur, vt ait Petrus Damianus; *videt in pedibus rusticum aliquod, quod despiciat; ignorat in cauda, quid eum mirabilem reddat; te quoq; quod in te virtutis est, lateat, sed quid vero vitiosum, ab aspectus tui iudicio, non recedat.* Sed neque ista est vita occulta, quam tibi propono; actus potius humilitatis est. Latius patet vita occulta, neque vnius virtutis finibus coarctatur. Id præterea ab opinione tua remoue, quod velim te ita incumbere bonis actionibus, vt nemo earum conscius sit; repugnaret istud Euangelio, & obligationi, quâ ad proximum ædificandum adstringimur, quod sine publico virtutum splendore fieri nequit: Sic

luceat

a Iob. 3. b I. 21. Mor. l. 2. Epist.

luceat lux vestra coram hominibus; ut videant opera vestra bona, & glorificent Patrem vestrum, qui in calis est. Ellet ea quidem vita occulta, sed nimium latens, & digna vituperio.

Vita occulta, de qua mihi sermo est, in eo consistit, ut non solum probas actiones iuxta instituti nostri rationem, in aliorum oculis producamus, verum etiam exerceamus quasdam secretas, nullique cognitatas, nisi Deo, & ijs quibus intima nostrarum animarum arcana debent esse perspecta: ita ut si boni æstimemur, simus tamen adhuc, quam eorum ferat opinio, meliores: qui notus admirabilis est mundum sanctè fallendi. Iesus hanc occultæ vitæ rationem tenuit totis annis octodecim: publicè bonus, deuotus, obediens, & omni genere virtutum præditus videbatur; at priuatim & clam, in cubiculi sui secreto, noctu diuque dabat operam actionibus sanctitatis, orationis, oblationis sui Deo Patri, Resignationis, Patientiæ, & plurimarum aliarum virtutum, quæ si
cogni.

cognitæ fuissent, eam vocem extorsissent ab omnibus: longè illum esse sanctiorem, quàm crederetur. Quoties noctes orando consumpsit? quoties peccatis hominum illacrymatus est? quoties erupit in suspiria, humi prostratus oravit, humi decubuit, mille sustinere cruciatus, eosque intolerandos pro vnoquoque mortalium voluit? & ita de cæteris actionibus, quæ nunquam innotuerunt. In illis sita erat vita illius occulta, qualem deinde suis ipse verbis commendavit: *a. Tu autem cum ora ueris, intra in cubiculum tuum, & clauso ostio ora Patrem tuum in abscondito, & Pater tuus, qui uidet in abscondito, reddet tibi.* Hoc instituto vixere viuuntque, plerique Sanctorum, Magistri sui vestigijs insistant, vitam degunt latentem; quàm vulgus opinetur, sunt meliores, eaque operantur, siue in pœnitentijs, siue in virtutum internarum exercitatione, quæ si cognoscerentur, mortales omnes insigni admiratione stuporeque.

a. Matth. 6.

réque defigerent. S. Clara adhuc inter mundi delicias constituta, secreto carnem suam cilicio affligebat, dum inter aequales, & inter illecebras amantium versaretur: nonne, Hagiophila, istud insolens est? B. Franciscus Borgia, adolescens. quoties nobilium foeminarum, consortio interesse cogebatur, simili veste corpus suum obarmabat: quid videtur? S. Hedwigis, Poloniae Princeps, lectum insignem, & superbo apparatu instructum habebat in cubiculo, eumque ad se adeuntibus monstrabat, dicens thorum esse Principis Poloniae; nihilominus in eo cubabat nunquam, sed in altero vili, duroque, quem Hedwigis lectum indigitabat. Idem in usu fuit Cardinali Baronio, lectum suum, lectum Caesaris appellanti, & alterum, qui in speciem erat expositus, lectum Cardinalis Baronij; erat iste pauperissimus, & abditus, hic opere & pretio magnificentissimus; in illo noctu quiescebat, in hoc nunquam. O prodigium! Gabriella Gadagnia in Gallia Comitiss-

fa, cūm filium vnicū, spem familiæ, & vnicè dilectum amisisset, sæpe in secretissimis orationibus suis Deo gratias referebat de filij morte; tam erat in Dei voluntatem resignata. Soror Angela de Trinitate, Carmelitana filia Mareſchalli de Brissac, cūm, ob formam aliāque naturæ dona, à magnis Proceribus in Matrimonium expeteretur, faciem aqua imbutam soli exposuit, vt decus formæ deperiret, & procorum oculis minùs arrideret, in conuictu etiā nobilium, fatuam se bardāque simulauit, proposito suo nulli, quam sibi, perspecto. Soror Maria Bonilloudia, Visitationis sanctæ Marię Religiosa, vt illuderet vanitati, quæ cæteræ armillas induunt, clām alijs, brachia vrticis, rubis & similibus circumcinxit. P. Elzearius quidam Societatis nostræ, qui paucis ante annis, Aquis in Prouincia, gloriose mortem in seruitio peste infectorum obiit, semper vestitus indormiebat, neque vnquam se dabat quieti, quin acri flagello se diuerberasset, neque vllus huius rei erat con-

N

sciens,

scijs, præter superiores, neque putabatur eò virtutis & austeritatis processisse, maximè cùm esset amplæ conditionis, & magnus natû, suisque capiendis commodis assuetus, ad nos accessisset. Plurimi alij talem vitam degunt, dissimulantque poenitentias suas, & recondira animi sui, & virtutum internarum ornamenta. Sunt qui non omittent stans diebus gestare cilicium, aut zonam asperam, corpus flagello cædere, quotidie per horam aut semissem vacare Orationi mentali, Virgini Deiparæ cultus peculiare genuflexionum, & adorationum exhibere, quorum Deus & Angeli tutelares soli sunt arbitri. Reperiuntur, qui ex virtutis affectu, & perfectionis proposito, nunquam de vlllo malè loquentur, nunquam vlli obgannient; sese ex vero sensu humilitatis creaturarum omnium vilissimas abiectissimasque existimabunt; ex amore pudicitia in nullo faciem obtrutum defigent. silebunt de rebus suis, ijque omnibus, vnde aliquam aucupari existimationem, & gloriam

riam possent; nulli vel minimam molestiam facient, nulli postulatam officium, & charitatem negabunt; mente semper adhærescent Dēo, in cuius præsentia continuò ambulant; nullo in rebus ullam affectu ferentur; incredibili resignatione sese diuinæ dispositioni committent, etiam parati Infernum subire, modò possent Deum semper Amore prosequi. Et nullus tantas tamque illustres virtutum exercitationes aduertit. Hagiophila, si omnia ista opera, si præstantes illæ actiones, quæ conferunt ad vitam sanctè reconditam, de quibus nunc memini, non rapiant cor Dei & Angelorum, quin & hominum, ubi illis innotuerint, nescio; quibus possint alijs actionibus permoueri. Saltem ex his clarè perspexeris, quid sit vita occulta, de qua tecum dissero; quanti verò illam faciam, adhuc mihi dicendum est; aliàs tibi tantoperè actiones heroicas commendavi, dixique non nisi vnica opus esse, vt salutem consequamur, euadamusque in eximiam sanctitatem; etiã-

num in ea opinione persisto; audeo tamen pronunciare, secretas hasce actiones, nullo modo, esse alijs interiores: illæ pronæ sunt, vt in aliquam vanitatem, & animi elationem nos attollant, cùm sint oculis omnium expositæ, indèque laudemur; hæ verò carent periculo, cùm ab omnibus ignorentur. *Utile est abscondere magis, quam ostentare, si quid habemus boni* ait B Bernardus. a Publicis bonis Latrones & Vanitas insidiantur. Sponsa quamdiu latuit, nullo laborauit incommodo, nisi quod Amore languerit, sed simul ac prodijt in publicum, & plateas, & vicos oberrando, quæsiuit sponsum, verbera & plagas retulit; *Quæsiui, & non inueni illum: inuenerunt me custodes, qui circumuehant ciuitatem, percusserunt me, & vulnerauerunt me, tulerunt pallium meum mihi custodes murorum.* b. Et hæc ratio est, cur Sancti, qui versari inter homines coguntur, & publica illustriæque munera obire, prius se in actionibus vitæ occultæ exerceant, exemplo Christi Seruato-

a Serm. 4. de Adu. b Cant. 5.

uatoris, qui antequàm tribus annis concionaretur, & patraret miracula, abdidit se per annos omninò octodecim. Insignis ad rem propositam est animaduersionis S. Hieronymi in facto Niniuitarum, qui cùm Saccis & ieiunio poenitentiam agere statuissent, initium fecere, à ieiunio, quod priuatum occultumque opus erat: *Ante, ieiunium, & sic Saccus; ante, quod occultum, & postea, quod palam; & si è duobus necessarijs unum detrahendum est, magis ieiunium absque Sacco, quàm Saccum eligam absque ieiunio.* Preclarior in commendationem actionum occultarum proferri nihil potest, quàm si dicamus, cum eo Ecclesiæ Doctore, eas semper alijs esse antepponendas. Sed si alià quoque ratione easdem consideremus, adhuc magis amandæ, ambiendæque videbuntur, nimirum quia ab illis totus decor, & vigor animarum nostrarum promanat. *a Omnis gloria filiae Regis ab intus, ab eo quod intus latet, & hominum oculis semotus est, b Pulchra*

N 3

a Cant. 4. b Prouerb. 31.

es amica mea, inquit Sponsus, *absque eo quod intrinsecus latet*, quasi diceret: Pulchra es ab elegantia actionum tuarum externarum, verum alia, quæ latent, quæq; nulli, quàm mihi perspectæ sunt, te efficiunt sine comparatione pulchriorem. Vigor & robur, aduersus tentationes ab illis quoque procedit: *fortitudo & decor indumentum eius*. Hæc vita occulta nobis est loco indumenti, quo tegere corpus solemus, tempestatum arcemus iniurias, illudque roboramus natiuo calore conseruato, quin & robur illud etiam in morte se prodit. *Et ridebit in die nouissimo*. Reipsa fuere, qui in hoc terribilissimo agone, morti insultarunt, eamque exceperunt tantâ animi constantiâ & fortitudine, vt nec dæmon, neque extrema lucta, neque quidquam eorum, quæ tantoperè alios percellunt, fuerit ijs terrori. At hæc magnanimitas, felicissimûsque successus alteri causæ adscribi non potest, quàm vitæ tam secretò traductæ, aut extraordinario alicui actui & habitui virtutum occultarum,
à qui-

à quibus illorum animæ coram Deo triumphabant. Accipe ex his vnum. Narrat Anastasius Abbas Montis Sinai, quendam è suis Monachis, qui vitam quoad ieiunia, disciplinas, ceterasque Carnis macerationes, fatis tepidam duxisse videbatur, cum propius à morte abesset, latari, ridere, maximaque animi voluptate perfundi cœpisse: Id aduertens Abbas, monuit, vt lætitiæ modum poneret, vitam tepidè actam hac gaudij significatione malè concludi: sed respondit Religiosus: pacem illam animi atque alacritatem ex eo provenire, quod toto vitæ tempore à temerario de alijs formando iudicio semper abstinuisset; toleraui, inquit, afflictiones omnes & molestias mihi ab alijs illatas, ijsque ex animo condonaui, non iudicando, minùs, illos damnando; imò quantum fieri potuit, excusaui, atque hæc mea cura singularis fuit, & interna secretaque occupatio, propter quam Deus mihi nunc istos fauores exhibet; & per Angelum me de salute.

mea reddidit certiolem, cum stare velit
promisso suo: *Nolite indicare, & non iudicabimini.*

Ab hac æstimatione vitæ occultæ
non oblectaberis, Hagiophila, si te,
priusquam finem facio, inuitem, vt illi
te applices, conerisq; melior esse, quàm
videri. Delige quasdam actiones, quas
Deus tibi suggeret, & illis incumbere con-
stanter tota vita tua, tibi que sufficiat,
harum testem & arbitrum habere so-
lum Deum. Et quandoquidem in eo
consistat mysterium deuotionis perfe-
ctionisque, ita insiste, vt dici aliquando
de te possit, quod de defuncto fratre suo
Cæsario dixit Gregorius Nazianzenus: *a*
Vinebat Cæsarius solis Deo cognitus, quod
maioris est pietatis. Negari non potest,
quin restent nobis debita aliqua diuinæ
Maiestati, quam quotidie offendimus,
persoluenda: at hic optimus pacandi
modus est: *b* *Munus absconditum extin-*
guat iras. Si alicuius cervicali subijcio
centum aureos, eo ignorante, vt illius
necessitatibus occurram, vbi rescierit,
a *Orat. 7. b* *Proverb. 21.* *ma-*

magno me affectu complectetur, etsi prius alieno à me animo fuisset. Si ita se gerit homo terræ vermiculus, quid non faciet Deus summæ bonitatis, qui sciet millenas & millenas actiones secretas, quas ad illius honorem, in testimonium affectus erga illum mei, & in scelerum meorum expiationem peregi? *Pater tuus, qui videt in abscondito, reddet tibi. Munus absconditum extinguit iras.* a Dubitari prætereà non debet, quin magno desiderio afficiaris, chara Hagiophila, multùm promerendi, vt sublimem in cælesti beatitudine gloriam obtineas. Ad medium huic rei opportunissimum est illud, quod tibi offero. Ah! quàm ordo in cælis erit alius ab eo, quem homines in terris occupât! is qui hic omnibus anteit, illic erit in pòstremis; ille nunc vilissimus & despectus, ineffabili tunc honore perfruetur; & qui nunc honoratissimus est, vix vltimi subsellij locum obtinebit. Illustre est ad rem propositam, quod legitur in Annalibus Collegij Neapolitani nostræ Societatis

Coadiutorum aliquis obiit, &, non multis post diebus, visendum se præbuit Medico, qui nostris ægris suam, commodabat opëram, & defuncti, nostrique Ordinis erat amantissimus. Attonitus hoc fauore Medicus rogat illum, saluûsne sit? Religioso annuente; liceat mihi, subiungit iterum Medicus, vnum alterumue ex te quærere: an Philippus secundus Rex noster inter Cælites est, & vter vestrum gloriam maiorem possidet? respondit Coadiutor, Philippum quidem cælo ascriptum, quòd verò ad gloriam attineret, tanto illum interuallo à suâ gloriâ abesse, quantò ipse viuens abfuerat ab eius summa Maiestate, quantum scilicet pauper & abiectus Religiosus distat à præcipuo Orbis Monarcha. At quæso te, quid tantopere euexit hunc Coadiutorem, & supra tantum Principem, qui aliàs optimo fine, & morte benè præparatâ vitam clauserat, collocauit? nihil aliud, meo iudicio, quàm vita occulta, & bonæ actiones secretò factæ. O quot tales

erunt in cælo, qui alij tunc apparebunt, quàm nunc esse videantur! Hic Ianitor, hic Coquus, hic nullius nominis administrator, excedet gloriæ magnitudine suum Superiorem, suum Rectorem, & suum Prouincialem: Abiecta illa soror, illa sacristana, illa nouitia, Reuerendam Matrem gloria superabit, quia magnum inter actiones discrimen intercessit; quicumque vitam occultam sanctius traduxerit, præmium excellentius & maiorem beatitudinem reportabit. Quòd si nolis tam procul ad vitam alteram remitti, audi sublimem hanc fauorem cui-dam personæ concessum, quæ vitam degebat occultam, & hinc disce, quàm hæc agendi ratio Diuinæ Maiestati sit accepta. Sed maturè illum expende. Decima septima Nouembris, Græci duarum illustrium personarum memoriam recolunt, Ioannis & Zachariæ. Ioannes ex opulentissimo pauperem se fecerat, distributis in egenos omnibus facultatibus suis, ita vt stipem, aliorum more, emendicare cogeretur. a Solebat is Con-

a *Ex Radero in Virid,*

stan-

stantinopoli, vbi sedem fixerat, vigilijs
& orationibus vacare. ad ædem S. Sophiæ. Quodam Vespere, dum huius Ecclesiæ foribus assidet, intentus precibus, prospicit venientem, eminùs quendam venerandâ canitie spectabilem, mirâ luce circumfusum, qui simul atque ad fores accessit, demisit se in genua, breuiculam orationem fudit, & demum signo Crucis expresso fores aperuit. Ingressus in templum prolixè precibus indulgit, quibus peractis dum egreditur, obseratur porta, & iterum lux adfuit virum, sanctum domum deductura. Ioannes, qui hæc omnia prodigia clàm obseruabat, prosequitur senem, aduertitque illum ingredi in vilem casulam, pulsato leniter ostio, & coniuge, vt aperiret, modestè monitâ. Placuit præterea ad motis auribus explorare, quomodo reliquum noctis domi traduceret, & intellexit illum insomnem suendis calceis dare operam (erat opificio sutor) neque his contentus, pulsat fores, sibi que aperire rogar, denique prouolutus ad viri
san.

sancti genua, nomen inquit, & genus vitæ, & virtutum. Senex ipse quoque se in genua demisit, asseruit se Zachariam vocari, de reliquo suturem se esse miserumque peccatorem. Planius amabo te, inquit Ioannes, tam enim miranda vidi hoc vespere, quando ad S. Sophiae te contulisti, ut obstupescam, discernamq; pedem hinc non efferre prius, petitioni meæ quam satisfeceris. Ah, reposuit Zacharias, fuerit phantasma aliquod, in mei gratiam Deus miracula non patrabit. De istis aliàs, ait Ioannes, nunc cedo mihi vitæ tuæ modum. Pauca à me discas, respondet Zacharias; quod propter Deum ago, est: seruo cum vxore, quam vides, virginitatem illibatam, & ut ea occultior sit, dico cæteris, vxorem sterilem videri. Reliquum laboris mei, quod à victu necessario superest, diuido in pauperes, & cum metu diem Iudicij exspecto. Hæc tota vita mea est, non magni sanè facienda. His auditis Ioannes, cum voto suo factum fuisset satis, abit, & domum notat. Re-

dire eòdem voluit post pauculos dies, sed iam hospites illi aliò se receperant, declinantes omnem vanitatis occasionem, cùm dubitare non possent, quin ille, cui se patefecerant, eòdem esset reuersurus. Restaret illud, Hagiophila, vt tibi gloriæ magnitudinem, quam in cælo consecuti sunt Ioannes & Zacharias huius vitæ occultæ merito, enarrarem, sed cùm id facere non possim, tibi perpendendum committo.

Adde his, si otium est, Lectionem cap. 13. part. 1. tract. 1. Rodericij, agit de bono exemplo, nihil enim vita occulta derogare debet ædificationi, quæ proximo impendenda est. Lege præterea cap. 5. & 6. lib. 3. de Imitatione Christi. Sequitur Examen.

EXAMEN CIRCA SIMPLICI- TATEM ET CANDOREM

ANIMI.

Simplicitas, alio nomine sinceritas & candor, est virtus parum hominibus cognita, & paucioribus in vñ admirabilis tamen, & Deo acceptissima, cuius

cuius est proprium inclinare, & efficaciter permouere hominem, vt suis verbis & operibus nullam duplicitatem, simulationem, dolum, aut malitiam admisceat, verum sit purus, sincerus, verus, & exteriora omnia interioribus consentiant. Vnde patet multum virtutem hanc discrepare ab ea simplicitate, quæ vulgò est ignorantia quædam, & stoliditas nonnullis à natura insita. Hæc, de qua nunc agimus, virtus ex præceptis non postrema est. Si scire desideras, Hagiophila, huiusne virtutis aliquid, an nihil habeas, notas hæc inspicere.

Prima. Nihil aliud sibi in actionibus suis habere propositum, quàm vt Deo placeamus; alia enim motiua quæ possent concurrere, facerent, vt actio non simplex sed duplex foret.

Secunda. Rectè in Deum tendere, non reflectendo ad respectus humanos, & quid alij dicturi, aut cogituri sint.

Tertia. Non uti restrictione mentali, vt aliter dicas, aliter cogites.

Quarta.

Quarta. *Abominari quidquid mendacium redolet.*

Quinta. *Exteriora interioribus conformare, præterquam in commotionibus passionum, cum non sit contra simplicitatem, eas ita premere, ut non emicent.*

Sexta. *Sibi & Deo attendere, non immiscendo nos ijs, quæ ad alios spectant.*

Septima. *Non malè suspicari, aut indicare de alijs, nisi indicia sint manifesta; benè de omnibus opinando.*

Octaua. *In conuersatione, directè loqui & respondere, non uti verbis ambigui sensus, aut alium ab aliorum consortio abstrahere, aut sermonem mutare ad accessum alterius.*

Post Examen lege Officium, aut alias præces vocales. Deinde vaca huic Considerationi.



CONSIDERATIO.

I. **A**UT IESVM falli necesse est, aut Mundum. Quærit hic honores, diuitias, voluptates, & obsequi propriæ voluntati: IESVS complectitur, & suadet contraria, contemptum, paupertatem, sensuum mortificationem, & abnegationem suiipsum, decerne anima mea; vter sapientior sit, & in eius sententiam concede. Et memineris non esse aurum, quidquid splendet.

II. Insignis dementiæ est inire vias deuias, regium & tritum iter tenendum est, quale est iter virtutis. Dei Filius & Sancti omnes hac iære. Desipiat, qui volet, volo ego tenere istud iter, quod sapientissimi triuerunt.

III. Amare IESVM, ars est certissima benè beatèque viuendi, nihil in hoc Amore perditur. Hic Diuinus Amans minima etiam & occultissima suspiria, compensat. O insanas creaturas, quæ ad alium quàm ad IESVM suspiratis! quæ & vnde merces tot suspiriorum!

IV. Nihil beare te potest in hac mortali-

talitate, nisi Amor Verbi Incarnati, Tempus quod abripit omnia, quodque tam celeri cursu præterlabitur, non permittit, ut occurrat aliquod obiectum, amabile, cui affectus nostros applicemus. Vix applicuissimus, & iam de recessu cogitare oporteret. Solus Amor IESV solidam habet atque integram felicitatem, nam ab hac vita pergīt ad alteram, ut ibi æternū continuetur.

V. Bona huius vitæ non delectant nos, nisi dum ea prosequimur; imaginabamur incredibilem fore nobis voluptatem, si eorum compotes fieremus, at consecuti, ijsdem quibus antea cupiditatibus perturbamur, & alia sequi obiecta incipimus; quod si ijs studijs lædatur quoque conscientia, iam magis decepti sumus, qui spinas repererimus, ubi rosæ quærebantur. Solus Amor IESV & in prosecutione, & consecutione amabilis est. Solus ille sine spinis est, totus ille coronatus est rosis.

VI. Quo tandem deuenerunt omnes illi Amatores creaturarum, virorum, mulie.

mulierum, amicorum, parentum, honorum, opum, ædificiorum? quid profuit omnem ijs amorem affixisse? iacturam temporis fecerunt, accumularunt tædia & tormenta, quæ illicito Amori deesse non possunt, & ex his gradum fecerunt ad alterius vitæ tormenta, quæ modum & finem non habent. O qui sciret IESUM serio complecti Amore! absque hoc Amore, tristis & horribilis infernus est: cum illo dulcis & desiderabilis Paradisus!

Hora quietis & relaxationis animi. Deinde Officij, Vel Orationis vocalis, Visitationis Venerabilis Sacramenti, Demum præparationis ad sequentem Meditationem.

III. MEDITATIO.

De vita occulta Filij Dei, & eius Obedientia per annos duodecim.

Oratio præparatoria consueta.

I. *Præludium.* Imaginare exiguam domunculam, & officinam S. Iosephi, Fabri Lignarij; vilem lectulum, & cellulam

Iam IESV, totam denique familiam tribus IESV, MARIA, IOSEPHO, comprehensam intuere.

II. *Pralud.* Pete à IESV optimo Duce tuo, & Seruatore, vt virtutes illas, quas domi per octodecim continuos annos exercuit, maximèque illius Obedientiam, imitatione assequaris.

I. *Punctum.* IESVS ab anno ætatis duodecimo vsque ad tricesimum vitam duxit occultam, nullique nisi Deo Patri, sanctæ Matri, & B. Iosepho cognitam. Et profectò dolendum est, ignorari à nobis, quid toto eo tempore fecerit, dixerit, aut cogitauerit. Quidquid enim fecit, fuere miracula; quidquid dixit, oracula; quidquid cogitauit, sanctissima consilia, & eminentes actus perfectionis. Inuestiga proximè, quid fecisse, quid dixisse, quid cogitasse potuerit, & ad eam formam te reforma. Attende nihilominus, cur vixerit vitam hanc occultam. Primò, vt suggereret materiam insignem meditandi de ipsius occupationibus; de colloquijs cum Matre, & S. Iosepho;

pho; de Orationibus pro genere humano, & nominatim pro me fusis, de admirabili silentio, de flexanima conuersatione, quando Parentes inuisebantur; & de feruore, quo actiones omnes suas exequabatur. Secundò, vt nos doceret optimam vitæ partem Dei oculis subijcere, & subtrahere oculis hominum, qui sæpe eò nos abripiunt, vt opera nostra ex vanitate, & ob respectus humanos faciamus. Tertiò, vt disceremus nos subducere ex usu hominum, & priuatis exercitationibus vacare, priusquam arduum aliquod opus aggrediamur: tribus tantum annis concionandum illi erat, & totos octodecim voluit, vt eò se disponeret. Quartò vt intelligeremus eum sub obedientia, & alterius arbitrio viuentem, plus egisse, nihil agendo (teste S. Bonauentura) quàm si quid quid fieri poterat, fecisset. Deus bone, quot documenta pro me in hac vita occulta!

II. *Punctum.* Considera, cur inter reliqua opificia potissimum Artem fabricalem

lem elegerit. Imprimis, certum est, illum alijs quoque domesticis obsequijs fuisse occupatum; ipse mensam instruebat, ipse ianitorem agebat, ipse ollas & scutellas eluebat coquebat, alijsque similibus se impendebat, nihil enim declinabat; imò cum esset admirabili fervore, præditus, cuncta ad se trahebat munia, ut dilectissimam Matrem, & Iosephum subleuaret: plurimus tamen erat in officina, ut fabri officio fungeretur. Hoc enim erat illi gratissimum. Primò, quòd esset laboriosum & molestum. Secundò, quòd ita cogeretur exercere actiones abiectas, humiles, & plenas mortificatione; uti erant: deferre ad forum scabellum, aut sedile, venalia; & extruendis reparandisque domibus operam commodare. Tertiò, quòd inter laborandum frequens occurreret memoria Crucis pro nobis aliquando tolerandæ, cum quoduis lignum illi trabem Crucis præsignaret. Ah cur ita mihi parco! cur detrecto pluribus officijs, quibus par essem, me impendere?

III. Punctum. Obedientia Iesv istis octodecim annis fuit admirabilis. Fuit prompta, & alacris, quis enim non illicò obtemperaret Mariæ, & Iosepho, opem, & subsidium postulantibus? fuit cæca, non inquirendo, cur hoc, vel illud imperatur? cur impendor sedili fabricando, quî nutu possem mundos fabricare? fuit perseverans, ad octodecim planè annos, etsi sub finem virili esset ætate & annorum triginta O quantum interest inter meam & obedientiã Iesv! *Petitio veniæ, Emendatio, Imitatio.*

Colloquium ad Filium Dei: Gratias agendo, quòd tale tibi exemplum dederit; quòd animos etiam tibi subijciat ad imitandas eius virtutes, & obedientiam; denique. quòd isto tempore, tam clementer tui meminisse dignatus sit in sacrosanctis suis precibus. *Pater. Ave.*

Recollectio. Fortuïta Lectio Thomæ de Kempis. Rosarium. Visitatio Venerabilis Sacramenti. Tandem semel pro me ora, quòd fortassè hætenus à te factum non est, cum tamen simili subsidio egeam,

ut qui maximè. Tanti tibi non erit vn̄-
cum AVE MARIA; seruiet tamen, ut
memineris, subinde eos habere in pre-
cibus tuis commendatos, qui bono tuo,
presertim tuæ animæ, student. Cēna.
Recreatio, quam si cum aliquo peragis,
omne colloquium tuum sit de amore,
Iesv, quàmque immeritò ab homini-
bus non summè diligatur. Litanie San-
ctorum. Visitatio Venerabilis Sacra-
menti. Præparatio Meditationis crasti-
næ. Examen. Quies cum hac cogitatio-
ne, te fore felicissimam, si illo, quo nunc
es, pacto disposita, à Deo euocareris.
Tanti refert dies benè sanctèque, & in
amore diuino traduxisse.



ni.
vt
re-
uo,
na,
gis,
re,
ini-
an-
ra-
fi-
io-
unc
ris.
in

quem ibimus verba vite aeternae habes.



H. del.

W. K. sc.

SEXTVS DIES.

De virtutibus imitandis in vita Apostolica Christi IESV.

Non fuit otium, Hagiophila, considerandi virtutes omnes, quæ in Christi infantia, pueritiâque emicuerunt. Duas solùm proposui, & tamen Humilitas, Modestia, Mansuetudo, & quæ non aliæ, fuerunt admirabiles. Iisdem angustijs constringor hodie, & ex plurimis virtutibus, quæ vitam illius Apostolicam commendant, tres dumtaxat deligam, quæ cum animæ tuæ perquam necessariæ sint, sunt etiam ad imitandum faciliores. Iam decretum tibi est amare Paupertatem, & Obedientiam; tantundem de Humilitate, Mansuetudine & animarum Zelo decerno.

Salutatio Venerabilis Sacramenti, & præparatio ad Meditationem.

—(o)—

O

I. ME.

I. MEDITATIO.

De Humilизate Filij Dei.

Oratio præparatoria consueta:

I. Præludium. Propone tibi IESVM dicentem Apostolis suis, & tibi: *Discite à me, quia sum humilis corde.*

II. Prælud. Pete à Deo Patre, vt tibi manifestet excellentiam humilitatis Filij sui, ac deinde eius virtutis gratiam faciat.

I. Punctum. IESVS fuit humilis in verbis. Primò, optimus erat, & tamen bonus dici non vult. Quid me vocas bonum, reponit illi, qui hisce illum interpellauerat: *Magister bone, quid facià, vt habeam vitam æternam?* Secundò, dignissimus erat, cui omne obsequium præstaretur, & tamen dicit non se venisse ministrari, sed ministrare. Tertiò, erat sapientissimus, ait nihilominus: *Doctrina mea non est mea, sed eius, qui misit me.* Vide vt vbique capter omnem se humiliandi occasionem. Quartò, erat Dei Filius, & tamen plerumque se Filium hominis indigitat. Quintò, post Transfiguratione-

gurationem, an non meritò ab omnibus coli adorarique debebat? at prohibet. Apostolis, ne ullam apud alios huius visionis faciant mentionem. Sic amabat supra vulgus non eminere. O quantum hæc verba dissentiunt à meis! totus sum, ut me laudem, iactitem, commendem, ut de me factisque meis loquar. At ille modus non est honorem Deo deferendi, *Deus ab humilibus honoratur.* (Eccl. 37.) neque gratias obtinendi: *Humilitas sola meretur gratiam*, teste Bernardo.

II. *Punctum.* Nullius pretij sunt verba, si facta defint: fuit Iesus humilis in actionibus suis. Primò; volunt illum Regem creare, fugit. Secundò, solennem ingressum habet in Hierusalem; at Asino insidet. Tertiò, Deus Pater, ex Ruperti sententia, optionem filio fecit, ut Mundum redimeret, aut subsidio honorum, & Maiestatis; aut per opprobria, & humiliations; at quid ipse elegit? an non *proposito sibi gaudio posuit crucem confusione contempta*? id egit per omnem vitam, multoque amplius tum, cum se abiecit ad pedes Iudæ proditoris

fui, & mori voluit inter duos latrones nudus in cruce. O grauem & intolerabilem meam superbiam! Ecce Deus totius Maieftatis ſc humiliat, & quodammodò annihilat in omnibus, & abiecti ſumus terræ vermiculus, hoc eſt, ego, audeo de me præſumere, me extollere? neque quidquam grauiùs timere, quàm humiliari, & ab alijs contemni? certiſſimum indicium eſt, nullam me habere virtutem, quandoquidem *tantum quiſque habet Virtutis quantum Humilitatis*, vt ait Caſſianus.

III. *Punctum*. Exteriõres actiones fallere poſſunt, ſi cor à manu diſſentiat. Ieſus etiam animo & corde fuit humiliſſimus. Primò, *ego vir videns paupertatem meam*, videns me nihil eſſe, ſed quidquid poſſideo, eſſe à benignitate Dei. Secundò, benè illi erat, ſi contemneretur; ſi pro Filio Iosephi haberetur; ſi diceretur fabri Filius; ſi crederetur ſimplex, imperitus & vilis, iuxta conuiuium in Nazareth familiare: Hic puer idiota eſt; vt Iosephi Filius, qui duo verba profari nō poteſt, neque ad quidquam eſt idoneus.

(S. Bo-

(S. Bonaventura.) Tertiò, pacato lætò-
que animo excipiebat omnes in se con-
tortas iniurias, vr haberet occasionem
se demittendi. Tanta Seruatoris tui hu-
militas, ô anima mea, non id poterit, vt
cum, & illam ames? *Quo vilior eo mihi
charior*, aiebat Tertul'ianus.

Colloquium ad Filium Dei, quòd se-
riò imitaberis eius humilitatem in ver-
bis, factis, & cogitationibus, eoque indi-
cio testari velis amorem tuum; Paruus
Dominus, & amabilis valdè, ob tantam
nimirum humilitatem nostri causa su-
sceptam. Pater. Ave.

Recollectio. Tesseræ diurnæ electio. Ser-
uire poterit hæc sancti Petri vox:
Domine ad quem ibimus, verba vita aeterna habes.
Aut iste versus omni auro pretiosior:
Sola salus seruire Deo, sunt cetera fraudes.
Sequitur Oratio vocalis Officij, aut alia.
Sacrum, Lectio spiritualis.

DISSERTATIO MATUTINA.

De Mansuetudine.

FAtendum est sine suauitate confide-
rari non posse suauissimam illam.

mansuetudinem, quæ emicabat in con-
uersatione dilecti nostri Seruatoris,
quando hic in terris inter homines ver-
sabat; O quàm iucundum erat oculis
spectaculum, videre illum loquentem,
incedentem, conuersantem, incumben-
tem operi, docentem, respondentem,
interrogantem in templo, in hospitij
amicorum, in domo Matris, in itineri-
bus, in campis, in plateis vrbis Hieroso-
lymitanæ, vbique! hæc omnia erant,
aspectu gratissima, quia decore admira-
bili temperata, vt prædixisse videbatur
Dauid Rex, & Propheta: *Dominus deco-
rem induit* est. Sed, quod decorem hunc
reddebat admirabiliorem, erat incredi-
bilis quædam suauitas, & mansuetudo,
quâ non solum audientium, sed etiam
spectantium animos rapiebat. Et tanta
fuit tamque flexanima, vt Hebræi illum,
teste Galatino, Suauitatem appellârint;
& Iesum adituri dixerint, adeamus ad
Suauitatem. Fertur D. Petrus propè con-
tinuò lacrymis maduisse, & putatur ex
dolore, quòd optimum Magistrum ab-
negasset; S. Antoninus fatetur quidem
illam

Illam ex rationibus vnā fuisse, addit, nihilominus, præcipuam tantarum lacrymarum causam prouenisse à recollectione dulcedinis, & mansuetudinis Filij Dei conuersantis, quā se priuatum videbat. Nonne diceres Bernardum Christo conuixisse, dum illum audis ita loquentem: *Dulcis est Iesu in voce, dulcis in facie, dulcis in nomine, & dulcis in opere?* Sed quo tendit suauis hæc, de dulci conuersatione Iesu, consideratio? nimirum, vt aliquid sublime de affectu mansuetudinis, de quo nunc differere statui, concipiamus. Viuat suauitas, & mansuetudo, Regina enim animorum est & præcipua earum virtutum, quæ cordibus Dei, Angelorum, & hominum potenti cum imperio dominantur. Non statuo tibi ob oculos ponere omnem eius pulchritudinem, & perfectionem, quæ amplissimè se extendit, nimis parum temporis habeo, vt hanc telam adoriar; Sufficit vt dicam, quod ad animæ tuæ salutem, & spiritalem profectum est vtilissimum, & vt tibi magnam imprimam huius mansuetudinis existimatio-

nem, præsertim in sermone, quæ est præcipua portio dulcis gratæque conuersationis. Quod ad me attinet, tanti illam facio, vt arbitrer, ab hoc ordiri debere illum, qui conuersationi suæ debitum modum ponere vult, seque ad virtutum & sanctitatis acquisitionem præparare. Totum Salomonis templum erat ligno Cedrino, & laminis auri purissimi vestitum, exornatumque: portæ tamen, per quas aditus erat *ad Sancta Sanctorum*, non alio, quàm oliuarum, ligno constabant. Voluit Deus hoc facto nos docere, quandoquidem oliua dulcedinis & mansuetudinis sit symbolum, quòd qui ingredi ad sanctitatem cupit, & virtutum possessionem adire, transire debeat per mansuetudinem, & ab illa virtute, præcipuè acquirenda, inchoare. Ob hanc eandem rationem Dei Filius vult à se primum disci mansuetudinem, deinde humilitatem: *Discite à me. quia mitis sum, & humilis corde*. At maximè necessaria humilitas est; nil refert, porta illius est mansuetudo, & per hanc illa aditur. Atque hinc aduerto, primam.

tia.

tincturam virtutum omnium, illi qui ritè proficere desiderat, esse mansuetudinem; vt opus aliquod architectonicum benè inauretur, pluribus tincturis est opus: vt animæ nostræ inaurentur perfectissimè, vna sufficit, quam nunc commendavi, mansuetudo. Sed ne te diutius suspensam teneam dico suauitatem sermonis esse omnium aptissimam, vt formet numerisque omnibus animam perficiat, aut eam saltem disponat ad magnas opes spiritales faciliùs comparandas. Viuat Apicularum Regulus, qui nulla arma, ne spiculum quidem, gerit, sed benè mel in ore. Dicamus aliquid ampliùs: Regnet Dei seruus, qui nullis alijs armis, nullo alio regiarum virtutum apparatu vtitur, quàm melle in ore, & verborum suauitate. Hac dulcedine integram illasamque conseruat charitatem componit animi sui motiones, corda aliorum sibi subijcit, votorum denique suorum fit compos. *Lingua placabilis, lignum vite.* a inquit Sapiens, reipsa virtutibus animam addit, & tum au-

O s. dica.

a *Prou, 15,*

cienti, tum proferenti solatium, & alacritatem. Magnus ille Dei servus Moyses, qui Spiritus sancti testimonio, *Dilectus Deo, & hominibus, cuius memoria in benedictione est, a* quibus potissimum gradibus ad tantam vite sanctimoniam ascendit? à qua virtute initium fecit? profectò non alia, quàm mansuetudine: *In fide & bonitate ipsius sanctum fecit illum;* & ut sciremus id à sermonis suavitute potissimum processisse, addit Sapiens: *& in verbis suis monstra placavit,* verbis melle & mansuetudine manantibus passiones omnes suas, quæ vera monstra sunt animarum, superavit; quin & fluxit duras cervices, & illa portenta crudelitatis & barbarici, quæ inerant duobus millionibus personarum, quibus imperabat: sermonis sui dulcedine totam illam gentem sibi subiecit: ut ab omnibus minus in modum amaretur. Quàm suavitas in verbis est efficax! fluat quem aliquo iræ, vindictæ, invidia, tristitiæ affectu: si loquor, si respondeo suaviter, iam componi tota ista tempestas potest: *& in verbis meis monstra placabo.*

a Eccl. 45.

tabo. Insurgat in me offensus aliquis,
diraque comminetur, si mansuetè allo-
quor, leniam, eiusque auersionem &
iracundiam in mei amorem commuta-
bo: & in verbis meis monstra placabo.
Mulier quædam videns egregium illum
in Scotia Martyrem, P. Ioannem Ogil-
bæum, coepit in illum maledictis &
contumelijs inuehi, exploso etiam ocu-
lorum errore, qui obliquum intueban-
tur: cui Dei seruus blando & amœno
vultu; Domina, inquit, Deus elegan-
tem tuam formam tueatur, diuque con-
feruet incolumem. Adeo emolliuit ea
vox ferocientem mulieris animum, vt
publicè fateretur, iniuriâ se in virum il-
lum insurrexisse, & facti poenitere, con-
testâdo prætereà se imposterum de illo,
non nisi honorificè, & debita cum re-
uerentia locuturam. Adeo verum est,
sufficere blandius verbum ad inflecten-
da corda maximè exacerbata. Quare,
Hagiophila, author tibi sum, vt absti-
neas ab omni genere verborum, quæ
mansuetudini aduersantur, ideoque
nunquam vtaris verbis mordacibus,
O 6 con-

contumeliosis, fastuosis, & austeris; nunquam responsionibus acribus, impatientibus & siccis; nunquam dictis, quæ audaciam, insolentiam, impudentiam, & animi rancorem redoleant; cauetonos illos imperiosos, illos accensus authoritatis, eos sermones, qui gestibus, propriâ tui fiduciâ, aliorum contemptu despicientiâque corrumpantur. Hæc omnia digna vituperio sunt. & à spiritu dulcedinis mansuetudinisque aliena; cum sociabiles simus, vitæque communione delectemur, conuersationem nostram perpetua quadam suauitate & gratia condire debemus, vt nulli molestiam, nulli tædium adferamus, ne minimùm quidem charitas violetur, non contristetur proximus, sed ea loquendi respondendique forma utamur, quam ab alijs exigimus. Imò etiam tum adhibenda suauitas est verborum, quando de vitijs, & defectibus alienis sermo instituitur, etsi vitia forent manifesta. Nunquam de alio dici debet, superbus est, ineptus, fatuus. At talem esse, nemo ignorat; Nil refert; eiusmodi verba

ba tolerari possint in ore aliorum, non tuo, quæ virtutem profiteris, quæque Christi mansuetudinem desideras imitari. Verum si me læsit, si in me inuasit iniurijs, despectu, contumeliâ, non erit mihi licitum de illo queri, & facti insolentiam exprobrare, aut meritis coloribus apud alios depingere? ergò mel illi propinare debebo, qui tam copioso felle me proluit? vrges me profectò. At audi: ne tum quidem alijs, quàm suauibus verbis, vtendum est. Dic: te minus blandè ab illo acceptam, adhiberi modum alium, & gratiorem ab illo potuisse, sed caue ne de illo malè loquaris, ne vocem acerbam & aculeatam vsurpes. Læsus erat Iacob, & perfidè à socero suo deceptus, nullam tamen in illum iniuriam intorquet. Compellare poterat impostorem, fraudulentum, callidum: abstinuit; pauculis verbis dolorem suum testatus est: *quid est quod facere voluisti, quare imposuisti mihi?* S. Michael Archangelorum Princeps, cum Satana contendens de Moyfi corpore poterat illum maledictis obruere, vo-

care damnatum, Inferni titionem, reum
læsa diuinæ Maiestatis, infamem, & sex-
centis eiusmodi nominibus, quæ is com-
merebatur. *a* At noluit, & non est ausus
iudicium inferre blasphemia, sed dixit:
imperet tibi Dominus, nullo asperiore,
verbo usus est, & rationem adfert S.
Hieronymus: *Merebatur Diabolus ma-*
ledictum, sed per Angeli os blasphemia
exire non debuit. *b* Idem tibi inculco:
etsi optimo iure videreris posse alium
linguæ flagello proscindere, siste tamen
impetum. Ista linguæ licentia, & ser-
monis libertas te non decet. Angelos
tibi in exemplum vitæ tuæ proposuisti,
eorum igitur verba imitare; & quamuis
aliqua persona tanto digna odio, quan-
tum Diabolus aliquis incarnatus com-
mereretur, te iniurijs affecisset, dissimu-
la, neque aliter de illa loquere (si mo-
dò loquendum est) quàm blandè, atque
mansuetè.

Adijcere hic monitum oportet,
quandoquidem te tantoperè ad sermo-
nis suauitatem inuito; estque illud, vt
atten-

a Ep. Iude, *b* Ep. ad Tit. cap. 3.

attendas ne hæc suauitas (siue in con-
uersatione, siue in colloquijs) abeat in
quandam affectationem, nimumque
verborum delectum, aut adulationem,
& studium alijs placendi: Ille enim mo-
dus aulam redoleret, non Religionem.
Conuersatio nostra, & sermo de gene-
rare non debet in illum placendi affe-
ctum, vt specie affabilitatis, & vrbanita-
tis fiamus Religiosis Regulam, consue-
tudinem, aut communem ordinatio-
nem euertentes. Ad silentium violan-
dum inuitor, ad ingressum cubiculi a-
lieni, ad hoc vel illud faciendum, quod
voto, quod regulæ repugnat; &, præ-
textu vrbanitatis affectatæ, inducor ad
voti, ad regulæ transgressionem. Non
est ista vrbalitas, non in eo spiritus
mansuetudinis, & sanctæ beneuolen-
tiæ consistit, præstat Deo placere, quàm
homini, & conscientiæ suæ satisfacere,
quàm acquiescere huius creaturæ vo-
luntati. S. Magdalena rogata ab Ange-
lis lacrymarum causam; *Mulier quid
ploras?* respondit: *Quia tulerunt Domi-
num meum.* Et hæc cum dixisset, conuer-
sa est

sa est retrorsum, dorsum illis obuertit. Quæ ista morum ciuilitas est, à puella huius conditionis, benèque institutâ? saltem erga Angelos vrbaniozem exhibere se debebat, quid verebatur? eius loco respondet Origenes: *Nolo Angelos videre, nolo cum Angelis manere, si cœperint mihi multa narrare, & voluero illis ad omnia respondere, timeo ne amorem meum magis impendant, quàm expediant.* Si hæc Dei amatrix, ita Angelos deserit, quid non facere nos oportet, vt expediamus nos ab eo placendi studio, quo regulæ violantur, & amor Deo debitus imminuitur, talibus personis occurrentibus, quæ nec Angeli sunt, nec propiùs ad illorum mores accedunt? omninò generosis Magdalenæ vestigijs insistere debemus, & posito metu lædendæ mansuetudinis, aut ita nos contineamus, aut etiam recedamus, vt intelligant, nos malle integrum Diuini Numinis amorem conseruare, illæsis regulis, quàm illorum gratiam, cum aliquo nostræ perfectionis detrimento, aucupari. Vt autem Religioni

nomen non dederis, æquè tamen obligaris ad deuotandos hos placendi affectus, qui in oculis sæcularium videri quidem possent actiones vrbanitatis, & mansuetudinis, cùm tamen reuerà assentationes sint, quæ culpa non vacent. Nunquam eò comitas tua progredietur, vt sapiat adulationem, vt falsum proferat. Prudenter exprimenda veritas est, verbis honore, suauitate & reuerentia plenissimis. Proponi illa aliquo sermonis lenocinio potest, nihil interest, modò ab illo, quem alloqueris, capiatur. Et quamuis foret aliquis ex primis terræ moderatoribus, si ex officio tuo monere illum debes, aut opinionem tuam illi declarare, cùm conscientia tuæ leges transgredi non possis, fac istud generosè cum debito respectu, neque putes te aliquid à spiritu suauitatis alienum admittere. Propone tibi Danielis exemplum, incumbibat illi, vt ingratham aliquam Veritatem Regi Nabuchodonosor aperiret, fecit profectò cum honore, reuerentia & dulcedine, nihil tamen eorum quæ dicenda erant.

præ-

prætermisit. *Hæc est interpretatio alissimi, quæ peruenit super Dominum meum Regem. Quid suauius? suum illum Regem & Dominum compellat. Sed subiicit: Ejicient te ab hominibus, cum bestiis, ferisque erit habitatio tua, & fœnum, ut hos comedas.*

Proposueram quidem adferre regulas nonnullas, quæ ad hanc mansuetudinem in occasionibus maxime periculosis conseruandam videbantur, opportunæ, sed quis modus illas explanandi, cum ad dissertationis metam peruenerim? hæc vna tamen erit instar omnium, quæ erat B. Francisco Salesio familiaris: *Nihil contra Deum.* Tantum comitatis, tantum hilaritatis, tantum vrbanitatis, dulcedinisque, quantum voles, modò sit *Nihil contra Deum*, nihil, quo lædi offendi que possit.

Post hæc nihil superest, Hagiophila, nisi vt te orem, cuiuscumque status, aut conditionis existas, vt in spiritu mansuetudinis des operam saluti, & perfectioni tuæ, quod vt facilius, & efficacius à te obtineam, vtar verbis S. Pau-

*li: a Obsecro vos, ut digne ambuletis vocatione, qua vocati estis, cum omni mansuetudine. Ita Apostolus loquitur, quod virtus hæc, postquam cæteris virtutibus patefecerit aditum, easque in animam nostram introduxerit, easdem illic conseruet ac tueatur, earumque veluti iure hæreditario acquisitarum possessionem asserat: b Beati mites, quoniam ipsi possidebunt terram. Virtutes apud mansuetos tanquam in solo patrio commorantur; Melancholicis, inuidis, superbis & quibus similes affectiones dominantur, suæ subinde virtutes sunt; minimum tamen est, quod illos de earum possessione deijcit, facillimè ipsæ elabuntur; soli mites & spiritu mansuetudinis præditi, perstant, ipsa animæ pax & tranquillitas illos in perpetuo victoriarum & felicitatis vsu constituit. c Mansueti autem hereduabunt terram, & delectabuntur in multitudine pacis. Qui hunc suauitatis affectum non habent, occupant virtutes (si modò aliquas occupant.) non quasi proprias, sed velut aliunde
fibi*

a Eph. 4. b Matth. 5. c Ps. 39.

sibi elocatas; quid mirum si facili negotio eripiuntur? si verbum asperius, si contemptus aliquis, si modica vanitas illas auferat? alia penitus mansuetorum ratio est, mortificati sunt, victorijs æque ac virtutibus abundantes, hereditaria illis virtutum exercitatio est. Et ad hoc potissimum seruit suauitas verborum, effectus gignit mirabiles, tum in ijs, qui ea vtuntur, tum in alijs, ad quos dirigitur: & sicuti sufficit verbum vnicum, acre & aculeatum ad exasperandum & imbuendum perenni rancore alicuius animum: ita vnica vox blanda & suavis satis est, ad animos exasperatos, & maximè à nobis auersorum conciliandos. Quidam Orientalium Rex fertur hostiles ciuitates in potestatem suam rede- gisse, non alio stratagemate, quàm affuso ad portas oleo; sed affirmare ego possum, maiorem adhuc vim inesse verborum suauitati, illa actionibus nostris dominatur, & Cælitum iuxta ac mortali-um corda suæ subijcit ditioni.

Si lubet præterea alteri lectioni vacare,
lege cap. 18, 19, 20, & 22, Tract. 3. Vol. 1.
2. Part.

2. Part. Rodericij, ubi de humilitate loquitur: aut Imit. Christi cap. 2. 7. & 22. lib. 1.

Peracta lectione renoua deuotionem erga Patronos tuos SS. Iosephum, Alexium, Ignatium, Benedictum, Franciscum, Vrsulam, Tereſiam, aut alios qui tibi erunt peculiare. Si nullum haſtenus delegiſti, hodie incipe, minimum ſaltem renoua deuotionis affectum erga Angelum tuum Tutelarem. Super hac re videri poſſunt ea, quę in Anno ſancto dixi ad feſtum S. Michaelis. Denique para te ad ſequentem Meditationem.

SECUNDA MEDITATIO.

*De Comitatu & Manſuetudine
Filij Dei.*

Oratio præparatoria conſueta.

I. *Prælatum.* Propone animo S. Ioannem Baptiſtam, qui dum loquitur de Filio Dei, eumque digito commonſtrat, ei nomen Agni attribuit: *Ecce Agnus DEI, qui tollit peccata Mundi.* Non temerè ſed dedita opera, ſic compellans ob ſuauiſſimam Comitatem, & inno.

innocentem Mansuetudinem, qualis in Agno esse consuevit.

II. *Præluđ.* Pete gratiam à Deo Patre, vt benè addifcas hanc Lectionem, quam Iesus te docet.

I. *Punctum.* In verbis habebat Iesus admirabilem suauitatem. Primò. Vnico alloquio animum audientis sibi deuinciebat, tamen erat influens sermo, melle dulcior, & gratior cælesti nectare. *Ad quem ibimus? verba vite æternæ habes.* Secundò. Cæcus aliquis importunis magnisque vociferationibus efflagitat ab illo oculorum curam: quiuis indignaretur alius, extra Iesum, qui suauissimè interrogat: *Quid vis, vt faciam tibi?* Tertiò. Simon; qui Iesum conuino exceperat, & alij, aduersabantur. Magdalenæ; at tam bonus est Iesus, vt eam aduersus omnes tueatur, eam soletur, & repleat melle, & suauitate verborum suorum. *Vade in pace, fides tua te saluam fecit.* O probrum, quod in verbis adeo sim asper & morosus! Rubo similis, attingi non possum, quin pungam aliquè, & aliquo indicio prodam passionem

nem meam. O Rex mansuetissime, rege & moderare sic verba mea, vt à tua loquendi mansuetudine non discedam!

II, *Punctum*. Mansuetudo Iesu eminebat ex vultu, & toto habitu corporis. Primò. Refertur, affictos & Melancholicos eius temporis, vt aliquod solatium ex facie benignissimi Seruatoris colligerent, ita inuitare se solitos: Visum eamus filium Mariæ. Secundò. Ingens illa multitudo, quæ eum in desertum, in montem, & vbique sequebatur, satis aspicere, amare, & admirari tantam eius suauitatem non poterat; & cum non continuò concionaretur, solo illius aspectu sic pascebatur, vt ne cibi quidem, aut victus necessarij meminisset: *Ecce iam triduo sustinent me, nec habent, quòd manducent*. Tertiò, Comitas denique ac benignitas Seruatoris maximè tum in vultu emicuit, quando in morte Lazari fudit lacrymas. Benè dixeras, ô benignissime Iesu, adeundum te esse, vt discatur vera mansuetudo & benignitas.

III, *Punctum*. Mansuetudinem etiam

factis.

factis ipsis Iesus demonstrauit. Primò, ab hac processit insignis illa erga afflictos commiseratio. Hinc panes miraculo multiplicati: *Misereor super turbam;* hinc, in nuptijs Canæ Galileæ, aquam in vinum commutare non recusauit; hinc tandem voto mulieris Cananæ factum est satis. Secundò, Cogit illum Benignitas, vt magnis promissis compenset exigua officia; vitrum aquæ postulat, & in vicem totum cælum, & vitam æternam promittit. Tertiò, Quin & ad peccatores se extendit: Mulier in adulterio deprehensa, in eius clementia asylum inuenit: *Mulier ubi sunt, qui te accusabant, nemo te condemnauit?* respondente illa: Non Domine neque ego, inquit, te condemnabo. O clementiam ineffabilem! ô suauitatem! quis mihi det de melle, & oleo humanitatis tuæ, vt omnes actiones meæ simili suauitate condiantur!

Colloquium ad IESVM, Magistrum mansuetudinis Reum te age apud illum de asperitatibus & morositatibus tuis, alijsque aduersus hanc virtutem vitijs.

Pro-

Propositum emendationis. Desiderium
huius amabilis admirabilisque virtutis.
Pater. Ave.

Recollectio. Visitatio Venerabilis Sacra-
menti. Examen Conscientiæ. Prandium.
Recreatio. Visitatio Venerabilis Sacra-
menti. Tempus scriptiois. Lectio.

DISSERTATIO POME-
RIDIANA.

De respectibus humanis.

Nihil nobilius, nihil excellentius po-
test excogitari, quàm placere Deo;
oblectare supremam illam maiestatem,
quæ nullo alio, quàm se ipsa perfectè ob-
lectatur, nonne actio est, omnium ima-
ginabilium actionum præstantissima? &
hanc veritatem, Hagiophila, sic appre-
hendo, ut pluris facerem vnicum opus,
quo constaret me Deo placuisse, quàm
mille milliones eorum operum, quibus
toti humano generi, omnibusque simul
Angelicis spiritibus placuissem, etsi etiã
defixissem eos mei admiratione, & me-
ruissem ab ijs per plura sæcula com-
mendari. Tam mihi cordi est pondus,

P. &

& felicitas, vel vnius actionis, quæ grata Deo dici mereatur, vt, si scirem me posse talem aliquam exercere, quæ illi arrideret, illa peractâ mori illicò non detrectarem; & verò morine possem gloriosius, quàm placendo, quàm oblectando DEI viuientis adorandam Maiestatem? ex hac opinione mea videor meritò posse dicere; plurimum aberrare eos, qui humanis ducti respectibus, malunt placere creaturis, quàm Creatori. Videas nonnullos, qui non audebunt virtutum actiones exercere; frequentare Sacramenta, hospitalia inuisere, serere sermones de rebus diuinis, & spiritualibus, silentij legem, aliàsque Regulas, si Religiosi sunt, obseruare; ne vellicentur, ne dicantur hypocritæ, aut qui deuotulorum, aut Reformatorum Ordini accenseri velint. Maledictum illud, *quid dicitur?* obstaculo ijs est, boni quid agant, & ne alicui irreligioso, aut garrulo displiceant, paruipendunt Deo displicere. Alios reperias, qui è contrario incumbunt sedulò bonis operibus, obedientiæ, humilitati,

rati, charitati, candori & regularum
 observationi, sed quam ob causam; &
 quamdiu? donec nimirum ille Reueren-
 dus Pater, eorum erit Director, & Supe-
 rior, quamdiu præerit ea Venerabilis
 Mater. Accidat enim mutatio aliqua, &
 alter, qui non sit ad gustum, aut adtem-
 peratus illorum genio & affectui, præ-
 ficiatur; si aliò optimus ille Superior
 amandetur, vale obedientia, valete vir-
 tutes, actum est, fuistis. An non hæc no-
 ta est infallibilis, nihil factitatum esse
 purè propter Creatorem, sed propter
 creaturam, propter hanc Reuerendam
 Matrem, ptopter hunc egregium Pa-
 trem spiritualement, qui maiore quàm
 Deus apud illos pollebat authoritate?
 Istiusmodi homines pleni sunt respecti-
 bus humanis: non symbolum aliud, ne-
 que aliam cogitationem habent sibi
 propositam quàm pessimum illud: *quid
 docetur?* & verbo, omnes illi ex Ordine
 sunt (liceat mihi in re absurdissima, et
 inepto vocabulo). Placentinorum. Qua-
 re decreui placentinis illis, in aurem tria

verba admurmurare, quæ probè intelligent; nullam iniuriam faciam, solùm veritatem ingenuè, & sine fūco eloquar; quod dicam, grauissimum erit, eos esse, socordes, & animalia, inter bipedes; ignauissima; nulla ratione mereri nomen seruorum Dei, quantumuis id esse se simulent; & pro conclusione, esse temerarios, & penitus ineptos.

Quod ad illorum socordiam, & ignamiam attinet, prorsus incredibilis ea est; nihil talibus amicis fingi debilius potest. Conceperint admiranda proposita post Confessionem annuam, post bonam Communionem, post Meditationem ardentem peractam, in Exercitijs spiritualibus, in alijs occasionibus eiusdem generis; si illos audias, aut legas eorum decreta, iurares fore rupes immobiles, constantiæ prædigia, nullius Creaturæ impetu vnquam percellenda: & mox verbum vnicum, vnicum scōmma, vnicum, *quid dicetur?* subito efficit, vt tonitruum mutent, tentationi succumbant, & omnium propositorum suorum

rum obliuiscantur. Tales mihi non videntur abludere à Pica Tonforis cuiusdam, qui illam humanas voces imitari perfectè docuerat; pronuntiabat hæc articulatè symbolum Apostolorum: *Credo in Deum*; mille iocos viciniae & transeuntibus faciebat cantando Litanias Virginis Lauretanæ, aliâque lepidæ garrulitatis argumenta proferendo; Dixisses, illi in omnem vitam abundè de scientia prouisum esse. At quid accidit? die quodam, non procul ab ædibus Tonforis, excitatur tumultus, & solennis quædam proclamatio ad tubæ sonitum, qui cùm insolitus esset, sic miseram picam perturbauit, confuditque, ut omnis latinitas totâque garriendi peritia illi excideret, ipsâque natiuæ stupiditati restitueretur, iam cæteris syluestribus par. Pica hæc plurimas habet socias. Omnes illi loquaculi, de quibus mihi tecum fermocinatio est, similibus casibus obnoxij sunt. Exprimunt optimè linguam Sanctorum, & Apostolorum idioma, dum feruore spiritûs ca-

lent. Nunquam, inquit, verbo lædam
famam vllius, nunquam superioribus
obmurmurabo, nunquam de victus ra-
tione conquerar, nunquam talem Re-
gulam violabo, nunquam me istorum,
hominum consortio, & familiaritati im-
mittam. O sermonem elegantem! ô ver-
ba non alio quàm Sanctorum ore pro-
ferenda! sed quid? occurrat persona,
cui displicere hic non auit, quia illa
murmurat, obtrectat, regulam violat,
tantundem ille faciet. Dicatur verbu-
lum aduersus deuotionem, aduersus eos,
qui maiori quâdam obseruatione res
suas peragunt, subito itur in antiquam
syluam, in pristinum & laxum viuendi
morem, ne à cæteris dissentiat: vnicus
sonus, non tubæ, sed joci, efficit, vt obli-
uiscantur omnia axiomata eius sapien-
tiæ, ad quam aspirare videbantur. Mise-
ri mortales, qui (omnibus benè perpen-
sis) nihil habent, quàm verba, quæ ven-
tus, discutit! Funestæ picæ, quæ ad tem-
pus garrire didicerunt, neque opere ex-
plent, quod conscientia, quod ratio,
quod

quod Deus docuerat ! An non æquissimo jure tales, debiles in supremo gradu, atque ignauissimos pronuntio ? quid enim ? debiliusque aliquid esse potest, quàm semper trepidare, ibique timere, ubi nulla timendi materia est ? hoc eos indicio notavit. Propheta Regius a dicens: *Illic trepidauerunt timore, ubi non erat timor.* Animos illorum sine causa Timor occupat, sed timor abominandus, quandoquidem tum timeant, huic vel illi displicere, quando virtus exercenda, & diuinis inspirationibus obtemperandum est. Cogor aliquid addere de damnis, quæ illos sequuntur, & tibi ob oculos proponere Ducem horum, vecordium, & ignauorum, quibus ad bene faciendum, idcirco animus deest, quòd vermis humanorum respectuum, omne illis robor arrodat. Fortasse perspecta huius hominis miseria, & infirmitate, detestaberis hanc Placentinorum progeniem, neque eorum ritu viuere voles. Dux igitur illorum & Princeps, & qui, vt placens viueret, lepræ per-

petuæ periculo se exposuit, est Naaman
Syriæ Regi charus & supremus militiæ
præses, laborabat ille lepra tam atroci,
vt caro propè diffunderet: vt curaretur,
mandauerat illi Elisæus, ad quem opis
gratia aecefferat, vt septies in Iordane
se lauaret. Verùm Princeps, qui alium
valetudini recuperandæ apparatus ex-
spectauerat, hoc præscripto sic attoni-
tus fuit, vt obedire detrectaret: humani
respectus tantâ vi animum illius iaua-
ferant, vt propè mallet, per omnem vi-
tam, lepra cooperiri, quàm in hoc flu-
uio se diluere. Quid? aiebat, aquæ no-
stræ, & Syriæ flumina, salubritate infe-
riora sint, & cedant aquis Israël, & flu-
uio Iordanis? quid dicet Rex meus, ubi
audierit me tantum iter confecisse, vt
septies me lauem in hac aqua; quæ nul-
lâ virtute nostram antecedit? quid di-
cet Domina Coniunx, quæ profectio-
nem illam impedire conabatur, maluis-
setque me vti domestico balneo, quàm
hîc, in tertâ peregrina, omnium ocu-
lis exponi? quid dicent Duces mei, quid
Milites?

Milites? ridebunt me profectò, cùm intelligent; supremum suum Præfectum, tantum viarum dispendium fecisse, vt septies se lauet. Hisce cõgitationibus fluctuabat Naaman, adeò infirmus in proposito curandæ valetudinis, (quàm quouis pretio modisque omnibus quærere debuisset) vt parum abfuerit, quin ob funestum illud (*quid dicetur?*) leprosus, idẽmque qui abierat, in patriam reuerteretur; & nisi Minister aliquis eum ad experiundas aquas animasset, actum erat, perierat, omni spe salutis deposita. Adeoque Naaman ad viuum mihi exprimit placentinos illos, eorũque debilitatem & ignauiam ad executionem boni etiam non difficilis neque ardui, quantumcumque solida, atque sancta proposita præcesserint.

Ne igitur mireris, si post tantam ignauiam ausim affirmare, eosdem nullâ ratione seruos esse DEI. Non ab eo à sententia Apostoli asseuerantis: *Si hominibus placerem, Christi seruus non essem.* At

in domo Religiosa diuinis obsequijs me
mancipari, eadem ego, quæ alij, præter-
quam, quòd ex isto placendi affectu, qui
mihi quasi à natura insitus est, omnia
faciam ad oculum; & vt placeam alijs
præcipuè familiaribus, & amicis meis,
ideòne minùs existimer seruus Dei? dic,
quidquid voles, Dei seruus non es: pro-
nuntiauit Apostolus, oraculum est.
At optimis voluntatibus, & desiderijs
plenus sum, si perspectum me haberes,
non tam faciliè expungeres me ex nu-
mero seruorum DEI; si me intuereris,
nihil reperires dignum vituperatione;
in serie meliorum me collocares, nullo
alio vitio laboro, quàm ista placendi
omnibùsque satisfaciendi cupiditate,
quà subinde delinquo: hæc vna noxa
mea est, neque de alia à multo tempore
me in Confessionibus meis accuso. Ni-
hil refert, sancti Pauli decretoria senten-
tia est: seruus Dei non es. Aliquid for-
san tibi præ D. Paulo arrogas? subire
hoc debes, velis, nolis. Et tu quoque,
Hagiophila patiere, vt tibi denunciem,

si fortè hâc imperfectione laboras, te Dei
non esse ancillam. Verum boni serui ar-
gumentum est, quando omni conten-
tione satagit placere Dômino suo, eius-
que obsequium, & beneplacitum obse-
quio anteponit aliorum, quos omnes
præ illo parui pendit. Ad rem facit, quod
notant Physicarum rerum inuestigato-
res, quando de Aquilarum natura dis-
serunt. Aiunt Aquilas, vt experimen-
tum faciant, exploréntque, quinam pulli
sui sint legitimi, & à patria virtute mini-
mè degeneres, solere illos adhuc implu-
mes vnguibus attollere in altum, & soli
opponere, quem si fixa, immotâque
oculorum acie intuentur, habentur pro
legitimis, & in nidum reuecti, velut sin-
cera soboles, educantur. Hoc eodem ex-
perimento filij & serui Dei agnoscu-
tur, si rectà in Deum oculos defigunt,
non verò detorqueant in terram, &
creaturas, illa optima seruorum Dei no-
ta est; si contrà accidat, falsò tanti di-
gnitatem nominis arrogabunt. Si ob-
temperetur Domino, si Superiori, nō ob-

præclaras illas dotes, neque ex naturali erga illos propensione, aut affectu, sed quia in ijs Deus, cuius personam gerunt, agnoscitur, non attenta illorum gratia, vel ut nobis propterea blandiantur, nos laudent, colantque; signum perspicuum est, diuinum numen spectari, neque aliud intendi, quàm ut illi soli placeatur. Talem se exhibuit Religiosus ille, qui per annos duodecim obsequium suum seni morosissimo, à quo præter dura & aspera verba, (forte & verbera) nihil referebat, constanter impendit. *a* Ea sanè constantia satis prodebat illum nihil aliud spectasse, quàm ut placeret supremo Domino, cuius personam in hoc sene intuebatur: & verò quando felicem animam efflauit, coactus fuit molestus hic Superior presentibus profiteri, & dicere: Fratres mei, non homo hic, sed Angelus est, quandoquidem totis annis duodecim, quibus mihi seruiuit, & ægrotanti adfuit, etsi asperrimè tractaretur à me, nihilominus omne obsequium, & obedientiam mihi præstitit,

a In prat. spiru,

cum

cum singulari diligentia incredibilique alacritate. Ille erat verus Dei servus, non autem placentini illi, qui malè ob humanos respectus agunt, aut qui bonum non purè ob Dei amorem, sed propter creaturas operantur.

Finiamus: Non hoc solum damnum & detrimentum est: inepti sunt, & reverà temerarij, cum supra vires & facultatem aliquid moliantur, & quod fieri non potest, facere tamen ipsi velint. Modum accipe: nunquid certissimum est, nullum adhuc hominem in rerum natura extitisse, qui omnibus omninò satisfacere potuerit? fac optimo, quo potes, modo, semper aliquis reperietur, qui factum carpere, cui aliquid displicebit. Agas bene, fatui vituperabunt; male, damnabunt sapientes; cesses ab opere, ut nec malum agas, nec bonum, jam hi & illi tibi illudent. Imò nonnulla ingenia sic à natura corrupta sunt, ut reprehendant omnia seu bona, seu mala, his vide ut placeas, ut facias satis. Actiones etiam sanctissimæ vellicationibus

obnoxia sunt. Abbas Poponius magnâ & munificâ charitate pauperes peregrinos excipiebat. Plurimus hac de re inter Monachos sermô, multi aiebant prodigum esse, bonâque monasterij dilapidare, alij contra affirmabant bene illum facere, & eius charitatis intuitu Deum fortunare rem familiarem. Quid esse melius potuit, quàm quod clamabat cæcus Euangelicus: *IESV fili David, miserere mei.* Acceptus erat hic Christi clamor, non item alijs, qui hinc indignabantur, & qui præbant increpabant eum, ut taceret. Ipsi Angelici spiritus satisfacere omnibus hominibus non possunt: Quando Angelus, solaris cæli motor, solem stirit, ut voci Iosue obediret, ipsi Iosue placuit, eiusque exercitui, at alij, qui cladem patiebantur, ægrè ferebant hanc stationem, & solem motoremque diris deouebant. Christus IESVS ut Filius Dei foret, id consecutus non est: tota illius vita quasi scopus fuit contradictionis: verba ad homines facit, dicunt aliqui, nunquam sic locutum esse hominem, alij obire-

obtreſtant, eſſe ſeditioſum, aptumque
ad plebem in Dominos animandam. Sed
quo pacto Angeli, vel Sancti, vel Ieſvs
omnibus placuiſſent, cūm ne Deus qui-
dem eā poteſtate, quā eſt, id faciat? te-
ſtatur Alphoſus decimus, Rex Hiſpa-
niarum, dictus Astrologus, cui cenſura
hæc aliquando excidit: ſi Deus Mun-
dum conditurus ſe in conſilium adhi-
buiſſet, ſe multa oſtenſurum fuiſſe, quæ
ordine meliori diſponi potuiſſent. Te-
ſtatur præterea alius ille, qui hominem,
aiebat, præclarum eſſe Dei artificium,
deſſe tamen in pectore fenestellam, quā
cordis arcana penitus inſpicere poſſe-
mus. Res certa eſt, fieri nihil poteſt,
quod ad guſtum ſit omnium, & tamen
eō conſtituntur noſtri placentini, Deo
placere volunt, & creaturæ, quod poſſi-
bile non eſt. Ne eos imitere, Hagiophi-
la, temerarij ſunt; Deum ſpecta, huic ſac-
ſatis, & conſcientiæ tuæ, & cætera omnia
floccipende. Illi qui reſpectibus ducun-
tur humanis, nullos à Deo fauores con-
ſequuntur, imò Deus diſſipant omnia co-
rum

rum, qui hominibus placent; Cùm è contrario in eos munificentissimus sit, quibus animus est, vt illi placeant, parum curantes, quid dicturi aut cogitaturi sint mortales. Præclarum huius rei testimonium est in B. Margaretha Iprensi Religiosa sancti Dominici: adhuc puella obuium habuit adolescentem satis à naturæ dotibus instructum, eiusque amore per oculos admissio capta est; & aliquamdiu Amicitiam illam fouit intra terminos omnis decentiæ & honestatis, non quòd vllò coniugij cum illo contrahendi desiderio teneretur, sed vt affectui suo, naturaliter in illum propenso, satisfaceret. At Deus, qui solus amari ab illa cupiebat, tam validè perculit illius animum, vt decreuerit se penitus amore illo exuere, & adolescentis consuetudinem deuitare. Peracto hoc proposito, accidit post pauculos dies, vt eidem illa in plateis occurreret, jamque in eo erat, vt consueto more alloqueretur; verùm propositi memor, & semoto omni respectu humano, tergum illi, satis inurbanè,

nē, obuertit, incurritque in proximam Ecclesiam, vt ad pedes Christi cruci affixi prouoluta meritas de hac victoria gratias referret. Tantoperē id Deo Filio placuit, vt visendum se præbens, illam insigni coronâ condecoraret. Sufficeret forsā vna talis actio, & similis humanorum respectuum contemptus, ad conciliandos nobis diuinos fauores, & sanctitatem comparandam. Cur solliciti erimus, vt placeamus creaturis, quæ nos non iudicabunt, neque debitam nostris actionibus mercedem redhibebunt? nonne præstat placere Creatori, eoque vti symbolo: Dum licita faciam; quod lubet, alij dicant.

Nisi hac Lectio sufficit, prosequere ea apud Rodericium, quæ manē de humilitate incēpimus, aut cap. 2. 3. & 5. lib. 2. de Imitatione Christi. Deinde sequitur Examen.

EXA-

EXAMEN CIRCA MANSVE-
TUDINEM.

Primò, *Submissè loqui, & humiliter, & sine strepitu.* Secundò, *Non uti verbis austeris, pernicacibus, imperiosis, aut quæ contemptum aliorum reddeant.* Terriò, *Non contradicere alijs, neque cum ullo contestari.* Quartò, *Nullum contristare siue verbo, siue gestu, siue ope recusata, quantum vilis & abiectus videatur.* Quintò, *De nullo queri, nisi iniuria nos affectisset; quæ si est, fiat id verbis blandioribus, quæ excusent, & eleuent refutanda illam.* Sextò, *Si quispiam nos laesit, non expectemus, donec ille culpam agnoscat, eiusq; veniam à nobis postulet, sed ipsi illum praeniamus, & deprecemur, quòd indignandi occasionem dederimus.* Septimò, *Non reprehendere aut increpare alios sine gravi causa.* Octauò, *Aliorum defectus, & infirmitates benignè tolerare, neque admodum curare, quòd nostri defectus alijs sine noti.* Nonò, *Nullò indicio demonstrare antipathias quasdam, seu auersiones à non-nullis, siue illæ à natura indita sint; siue usu*
con-

comparata. Decimò, Nunquam exhibere se fastidiosum, seu vultu, seu gestu, seu aliâ quadam ratione. Undecimò. Facile concedere in sententiam, & opinionem aliorû, reiecto proprio iudicio. Duodecimò, Nunquam in peiorem partem verba aliorum interpretari. Decimò, tertio, Quodam commiserationis affectu ferri in afflictos, earumque miseras & calamitates sentire. Decimò quarto, In copia negotiorum & occupationum, tranquillitatem & hilaritatem animi præferre, vultu sereno, & composito.

Hagiophila, hæ præcipuæ mansuetudinis notæ sunt, da operam, vt illas obtineas, & fructum reportabis incredibilem.

Tempus est jam Officij, aut precum aliarum vocalium, deinde huius Considerationis.

CONSIDERATIO.

I. **C**Vi bono cætera, nisi per exercitium, & acquisitionem virtutum fiamus veri Dei ministri? præcipuum hoc est, cui attendi debet, reliqua tan-

tum accessoria sunt. Dositheus in suo Monasterio patrabat admiranda, in conuersatione sua erat amabilis, in eorum obsequio obstupescendus: at hinc aliqua gloriæ & vanitatis titillatio illum inuasit, quam aduertens S. Dositheus, hoc dicto, quod pluribus conuenire potest, illum perstrinxit: Dosithee, insignem aliorum famulum te præstas, & egregium complacentem, sed nondum Dei seruus effectus es.

II. In tua situm est potestate, ut maximas præstantissimæque virtutes consequaris, gratia Diuina nobis non deest, sed nos desumus gratiæ. Vult Deus nos ad sublimem perfectionis gradum euehere, nos non aliam, quàm mediocrem, virtutem volumus. Quis Aulicus dignitates & fauores sibi à Rege oblatos recusar? at molestia in virtutis acquisitione reperitur: quis ignorat? sed neque hoc ignoratur: rosam esse spinis septam, & in concha, vnionem. Hac molestia cælum emitur; an pretio nimio, & pernitendo?

III. Non aduertunt homines, & nihilominus verum est, acquisitionem vnus virtutis, at exercitium vnus actus virtuosi, maioris pretij esse, plurisque aestimandum, quàm si celebrem aliquam de hostibus victoriam reportasses, aut acquisiisses centum millia aureorum annui censûs, aut Regni alicuius sceptrum, & diadema obtinuisses. Virtus Christiana bonum Dei est, cuius intuitu, quantumuis exigua sit, omnibus tamen totius naturæ donis antestat, vt omittamus mercedem, quæ erit sempiterna.

IV. Quàm me olim poenitebit quando videbo me propterea non esse affectum eum gradum virtutum & meritum, quem Deus mihi destinauerat: quòd nimium rei alicui creatæ ah hæserim, aut quòd repudiauerim Diuinam gratiam, eique non omni modo fuerim obsecutus. Ah! quàm charo mihi stabunt hæc commoditates & deliciae, quibus nunc, cùm grauissimæ virtutum negotiationi studere oporteret, indulgeo!

vtinam

utinam solo Purgatorij pretio & gloriæ
imminutione luam!

V. O virtus! quisquis perspectum
haberet valorem & meritum tuum, illi
res omnes terrenæ viles, & suo affectu
indignæ viderentur: & ut nullo alio, ad
illam amandam, stimulo compellerer,
quàm quòd IESVS & MARIA candem
tanto amore persecuti, complexique
sint, volo amare, & credere, nihil esse
amabilius eo obiecto, quod ambo illi sa-
pientissimi rebus omnibus prætulerunt.
Tantis ducibus aberrare non possum.

VI. Vah rerum terrenarum amores!
dum gustantur, desipiunt. Vivat virtus,
illa, illa est aqua Samaritanæ proposita,
quam qui biberit, sitiet iterum, quæ ipso
sui usu appetitionem accendit. *Aqua est
salens in vitam æternam.* O Domine, da
mibi hanc aquam.

Sequitur hora quietis, deinde Officij, &
aliarum Orationum, tum Visitationis
Venerabilis Sacramenti, & preparatio-
nis ad sequentem Meditationem.

III. MEDITATIO.

De Zelo Filij DEI erga salutem animarum.

Oratio præparatoria consueta.

I. Præludium. Imaginare pastorem, qui quærat aliquam à grege auulsam & aberrantem ouiculam; peruagatur omnia, sursum, deorsum, per valles, per montes, per planitiem, nullum denique locum non studiosè perlustrat. Iesus talis pastor est, qui venit idcirco in Mundum, ut hominem ad verum ouile reducat.

II. Prælud. Pete gratiam, ut ex hac diuini Pastoris charitate proficias, eandem sic agnoscas, ut in amorem illius vehementius accendaris, & pro ratione statûs tui, te pereuntibus animabus impendas.

I. Punctum. Filius DEI zelo incredibili fertur in salutem animarum. Primo, ille est Pater filij Prodigii: quidquid enim Parens perduto suo filio exhibuit, cum recepit in gratiam, id omne IESVS

præ-

præstitit hominibus. Secundò, IESVS est magnus ille Medicus, qui descendit de cælo, vt curaretur magnus ægrotus, qui jacebat in terra. vt ait Augustinus, qui idè corporibus medicinam faciebat, vt animæ sanarentur: propter illas, erant insignes illæ curationes; & morbi corporis, quibus medebatur, animæ morbos, febrem, surditatem, cæcitatem, paralytim, similésque affectiones representabant. Attentiùs perpende singula, & sollicitum studium huius amantissimi Medici; *Non egent qui sani sunt, Medico.* Tertiò, ille est, qui se meritò comparat Gallinæ pullis suis addictissimæ: *Quoties volui congregare filios tuos, sicut Gallina congregat pullos suos sub alis, & nolui? O Pater amantissime, ego sum. Filius ille prodigus! O Medice diligentissime, ex afflictissimis illis ægrotis vnus sum! O Pater, qui materno homines affectu complecteris, pullus sum aberrans, qui de sinu tuo me abstraxi, vt cæterorum more ruerem in perniciem! per zelum illum, quo totam Galilæam,*

&

& finitimas regiones peragrabas, misere-
rere operis tui, & obiecti primorum, &
veterum amorum tuorum. Gratiarum
actio pro te, & toto genere humano:
Propositum.

II. *Punctum*. Filius Dei subibat labo-
res ineffabiles, vt Euangelium, & amo-
ris legem prædicaret. Oppidatim ibat
pedes, eleemosynis piorum hominum,
se sustentans, contemptu, iniurijs &
contumelijs appetitus, continuando
molestias, & fatigationes illas, tribus in-
regris annis, posteaquam quadraginta
dierum ieiunio ad hoc se præparasset.
Expende anima mea huius diuini Pasto-
ris sollicitudinem erga populum illum,
quin & erga nos illius successores: die
pascit illos verbo, & exemplo, nocte vi-
gilat, vt eosdem precibus suis tueatur.

III. *Punctum*. Semper patuit zelus il-
lius, sed præcipuè in conuersione mulie-
ris Samaritanæ: fatiscebat ex itinere, &
inedia: loco tamen cedere prius non
vult, quàm prædā cæperit, *fatigatus ex
itinere sedebat sic supra fontem*. De cibis

inij-

inijcitur sermo: *Alium*, inquit, *cibum habeo manducare, quem vos nescitis*: Hic cibus meus est, hæc quies, conuertere istam animam. Tot conuersiones aliæ; tot ardentissimæ prædicationes; vt de ijs diceretur: *Nunquam sic locutus est homo*: quarum vni cessit Magdalena; hæc minæ inferni, iudicij, eorūque, quæ ad alteram vitam spectant; istæ Parabolæ, seu Historiæ de vinea, de diuite Epulone, & alijs, manifestissimè zelum illius testantur.

Colloquium ad IESVM, vt dignetur nobis largiri zelum suum, tum ad nostram, tum aliorum salutem procurandam. Pater. Ave.

Recollectio. Lectio Thomæ de Kempis fortuita. Rosarium. Visitatio Venerabilis Sacramenti. Cæna. Recreatio. Litanix Sanctorum. Visitatio Venerabilis Sacramenti. Præparatio Meditationis in crastinum. Examen conscientix. Quies, ad quam te componens cordi tuo imprime Mariæ nomen, vt eius illa Cuius nos sit.

Christo confixus sum Cruci. VII



D

A

tu

m

gi

pe

fo

on

re

fig

et

at

R

SEPTIMVS DIES.

De virtutibus in Passione & Morte Christi imitandis.

Adest, Hagiophila, dies molestissimus Seruatoris nostri: Viginti quatuor postremæ horæ continent Epitomen eorum omnium, quæ per annos triginta tres gessit. Sæculis opus foret, vt perpenderentur singula, quæ paucis hinc horis acciderunt. Inprimis, virtutes omnes, quàm aliàs, illustriores apparere. Verùm duas potissimum attendo: Resignationem illius, & Patientiam; si aliæ etiam se insinuant, tuum erit illas æquè atque alias, quas tibi propono, imitari.

Visitatio Venerabilis Sacramenti, & præparatio ad meditandum.

I. MEDITATIO.

De Resignatione Filij Dei tempore Passionis.

Oratio preparatoria consueta.

P*reludium.* Propono animo Seruatorem in Horto orantem, humi-

Q. 2. pro-

prostratum, & dicentem : *Pater, si possibile est, transeat à me calix iste. verumtamen non mea voluntas, sed tua fiat.*

II. *Prelud.* Pete gratiam à Deo vt benè intelligas, quanti momenti sit hæc Resignatio Seruatoris nostri, vt eam oblati occasionibus imitère.

I. *Punctum.* Maxima fuit hæc Filij Dei in Patrem Resignatio : velle quidquid ille quoad Passiōē volebat. Primò quod patiendū illi erat, fuit tam atrox & insolens, vt S. Hieronymus asserat, nemini hæcenus innotuisse omnia, quæ ille tolerauit; dolores illius fuisse ineffabiles, neque magnitudinem illorum, ab vllō homine in hac vita, concipi posse. Omnia præuidebat, & capiebat Seruator, & nihilominus se resignat. Secundò, obtulerat se Deo Patri, vt pro nobis etiam summo iustitiæ rigore faceret satis; ah! si ob vnicū peccatum mortale, tanta tormenta homo sustinet in inferno, & ob veniale in purgatorio : quid apprehendisse Iesvm censes, qui extremum ius luere debebat tot millenorum & mille-

millenorum millium peccatorum? juxta naturæ appetitum eximi quidem voluisset, accommodat se tamen Patris voluntati: *Pater, si possibile est, transeat à me calix iste, veruntamen non sicut ego volo, sed sicut tu.* Tertiò, vltèrius processit; plus passurus erat, quàm mererentur scelera mortalium; & passurus dolores adeò intolerabiles, vt nisi vita miraculo prorogata fuisset, moriendum illi fuerit solo malorum imminentium metu. Vnde meritò aiebat: *Tristis est anima mea usque ad mortem.* Et reipsa, nisi diuina vis animam retinuisset, in isto sudore sanguineo, obrutus tristitia & tormentorum apprehensione, in ista flagellatione, & in ista spinea coronatione, viuere desisset. Enimuerò formidabat tot, tàmque enormia supplicia; sed animi resignatio in Dei Patris voluntatè, facit, vt ad omnia promptum se exhibeat. Vnico suspirio, vnica sanguinis guttulâ satisfecisset omnibus, at paratissimus est ad extrema, si Patri placuerit. Quartò, videbat omnem ho-

minum perfidiam, omnia illorū scelera;
 inutiliter sanguinem suum profundi, tot
 dolores tantāq; tormenta subiri, sine ul-
 lo fructu, hæc incredibili mœrore ani-
 mum percellebant: nihilominus vult, si
 Pater velit. O amabilissime Redemptor!
 ecquando tandem me diuinis tuis vo-
 luntatibus accommodabo? quantum-
 vis magnæ occurrant difficultates, &
 plurimum appetitus meus naturæque
 reluctetur?

II. *Punctum.* Resignatio Filij Dei fuit
 admirabilis in ijs omnibus, quæ Carnifi-
 ces voluere, ad torquendum sacrosan-
 ctum illius corpus. Huius dicti verita-
 tem collige ex eo, quod *Pilatus tradidit*
eum voluntati eorum; hinc, permisit ca-
 put sibi septuaginta crudelissimarum,
 spinarum aculeis configi, hinc suis hu-
 meris assumpsit pondus Crucis intolera-
 bilis; vellent plura peioraque Carnifices,
 vellent etiam Iesus. O amabilis Redem-
 ptor! modò agnoscant homines se di-
 ligi à te, & maximè tibi cordi esse, sa-
 lutem illorum æternam! paratus es ad
 omnia

omnia, quæ volent hostes tui, ah! cur non simili affectu excipio contradictiones hominum, easque, propter amorem tuum, gratas habeo?

III. *Punctum.* Resignatio Filij Dei eò usque processit, vt paratus fuerit etiam omnia, quæ à dæmonibus inferrentur, sustinere. Ab his, teste Chrysostomo, possessi fuere barbari illi milites, qui eum flagellârunt. Perpende hanc laniationem; ista sex, & amplius millia, ictuum; illam flagellorum mutationem; iterationem Carnificum cùm pulsando fatigarentur; nihil aliud ista sunt, quàm furia militum obsessorum, & dæmonum, qui hos satellites ad tantam crudelitatem stimulabant. Et optimus Iesus ad hæc erat promptissimus, quin & ad peiora, si inferre voluissent. Quid accidere mihi, post hoc exemplum, potest, ad quod non debeam esse Resignatus?

Colloquium ad Salvatorem, cū protestatione: nihil aliud imposterum volendi, quàm quod ipse vult & permit-

tit, vndecumque id eueniat; cum plena detestatione & abnegatione nostrę proprię voluntatis, cū illa laxet habenas cupiditatibus omnibus, & præcipua miseriarum nostrarum sit origo. Pater. Aue.

Recollectio: Elige diurnam tesseram. Placebit hæc, cū sit magni illius Episcopi Geneuensis: *Vivat Iesus qui per mortem, monstrat amorem nobis feracem, Velea d. Ieremia: aut pati, aut mori.*

Sequitur Officium, aut alia Precatio vocalis. Tum Sacrum. Deinde Lectio.

D I S S E R T A T I O M A T V T I N A,

De Mortificatione.

DVrum vocabulum est, Hagiophila, quod vestibulo huius dissertationis præfigo. Aut nullo, aut admodum in exiguo amore est Mortificatio. Plures eam nolunt experiri, & magni beneficii loco acciperent, si nullus vnquam de ea sermo apud illos institueretur. Ægri sunt, qui cuperent sanitatem, sed remedia sine quibus ea recuperari non potest,

test, oderunt. Laudetur Deus, quòd nō sis ex eorum numero. Tuum illud sanctimoniz, & perfectionis desiderium satis testatur, te Mortificationem diligere, tibi que placere, vt quid de hac sentiam, liberè profitear. Operam verò luderem, si tibi eam proponerem, veluti omnibus mortalibus, cuiuscunque sint conditionis, necessariā; jam pridem est, quòd scias hominem peccato esse deprauatum, debilitatūque, cui cupiditates & caro continuum bellum moueant, rebellētque aduersus spiritum, ac proinde necessarium illi esse, vt se mortificet, & mortificationis fræno subigat rebelles illos appetitus, rationis que imperio substernat; vt idcirco dixerit Iob, vitam hominis super terram, esse militiam, quā seponi arma non possunt, sed semper ad manum esse debent. Nihilò magis ignoras, quòd ij, qui peculiare perfectionis studium profitentur, vti tu, debeant se huic exercitio impendere, cū ad insignem aliquem virtutis gradum peruenire non possint, nisi singu-

lari curâ, eâq; assidua oppugnent appetitus naturales, seque abnegent; vim perpetuam inferentes naturæ suæ, & continuo in sensum custodiam excubantes; unde meritò sancti Patres statum Religiosum, verum Martyrium appellitarunt. Scis omnia. & plura, quàm ego suggerere tibi possem, de Mortificationis necessitate comprehendis, si intelligis dictum istud Seruatoris: *Regnum celorum vim patitur, & violenti rapiunt illud.* Plus hic vno verbo insinuat, quàm contineant libri omnes, qui de mortificatione loquuntur. Et cum iam dudum ista didiceris puto maiorem me gratiam apud te initurum, & vnà lucrum temporis facturum si potius tibi declarem conditiones, veræ & utilis mortificationis, quàm si ijs immerer, quæ iam antè cognita perspectaque sunt.

Incipiamus ab ea, quæ, meo iudicio, est omnium pulcherrima: pulcherrimam autem censeo, quæ vniuersalis est, & vbiq; reperitur; S. Ignatius eam continuam vocat: *Continuam in rebus omnibus*

bus mortificationem. Oportet igitur, vt sit in corpore. refecando amorem illum, quo in id, eiusque commoditates ferimur, & cuius defectu, Hosius Cordubensis Episcopus, ex mente S. Hilarij, se perdidit: *Quod sepulchri sui nimium amans fuerit*, id est, nimis corpus suum coluerit: totque, cum illo, alij æternum periēre, quod carnem suam luxu eduliorum & vestium, alijsque sensuum, delitijs & voluptatibus nimium indulger habuerint, cum obsequi D. Paulo debuissent, dicenti: *a Semper mortificationem lesu in corpore nostro circumferentes, vt & vita lesu manifestetur in corporibus nostris.* Quod ideo non adfero, vt ingentes quasdam austeritates & insolitas poenitentias suscipias; vt imiteris B. Eleonoram de Vanegas Religiosam Tertij Ordinis S. Dominici, cuius victus ordinarius, pane & aqua constabat, & lauticiarum loco, coctis herbis; quæ nudis, hyeme, pedibus ambulabat, quæ humi cubabat, aut in aslere, saxo

Q 6

cer-

a 2. Cor. 4.

cervicalis vicem subeunte; cui cilicium
diu noctuque humeris affixum (scalprū
illud erat ex ferro, quod ita carnem pe-
netrabat, vt à morte auelli non porue-
rit, quin simul corporis partes abstra-
herentur) quæ modico somno vteba-
tur, vt largiūs orationi vacaret; cui fre-
quens per septimanam flagellatio, &
plerumque cruenta, vt omittam eas,
quas in honorem Patronorum, & alio-
rum Sanctorum celebrium, adhibebat.
Non ago, vt tali ratione tractes corpus
tuum, auertat Deus: ne quidem vt facias,
quod B. Maria de S. Spiritu eiusdem Or-
dinis, quæ corpus suum triginta qua-
tuor diuersis locis candelula adurebat,
vt Christum patientem imitaretur, &
solatium aliquod purgantibus animabus
adferret; neque vt vsurpes cilicium in-
solitæ asperitatis, aut supponas crinibus
insignem spinarum numerum, vti fecit
B. Maria de Purificatione, itidem eius-
Ordinis, inuento ad maximos crucia-
tus idoneo. Non conor talia tibi tor-
menta persuadere, quando te ad corpo-

ris mortificationem inuito. Ad Spiritum Sanctum spectat ea suggerere: sufficit mihi, vt dicam, macerandum & mortificandum esse corpus, cum prudentia & moderatōne; non concedendo illi, quidquid postulat, & tantum poenæ, & doloris illi infligendo, quantum ratio nobis dictabit, & ij, qui nos regunt, permittent: Frustra enim existimamus obtineri cælum posse, nihil patiēdo, & carni indulgendo quidquid appetit: *a Mortificate membra vestra, quæ sunt super terram. Vt credamus nos delicijs deditos, nolentesque vt vel minimum corpori desit, quo eius cupiditatibus satisfiat, peruenturos ad culmen virtutis & perfectionis, nimia & insana fiducia est, fieri hoc nequit: Sapientia non inuenitur, in terra suauiter viuētium.*

Mortificatio hæc, uon tantum corpus, sed etiam spiritum afficere debet, vt rationi subijciatur: frænanda igitur uoluntas est, deponendum iudicium pro-

Q 7 prium;

a Coloss. 2. 5.

prium, frangenda pertinacia, non standum suis sententijs, & opinionibus: omnes affectus iræ, odij, vindictæ, doloris, amoris, gaudij, inuidiæ, auaritiæ, ambitionis compescendi. Vbiq̃ue esse, & dominari debet mortificatio, vbiq̃ue sibi vim adhibere oportet, ne hostis humani generis aliquod de nobis lucrum referat, & vt generosis nostris certaminibus eam recuperemus innocentiam, quam vitio primi Parentis amisimus: Tali vsu mortificationem præstabimus vniuersalem, & maximè gloriosam. Sed vt clarius me explicem, vide quo fieri modo possit vniuersalis. A summo mane, à prima cogitatione, quæ euigilanti occurrit, vsque ad vltimam, cùm somnus initur, mortificatio sit continua. Neque vlla prætereat actio aut opus, vbi affirmare non possum, me mortificationem quæsiuisse, saltem in aliqua circumstantia. Excitaris mane vt surgas nullo consilio cum cervicali inito, proripe te statim & te mortifica. Prima diei mortificatio est, has Deo primitias offer.

offer. At non edormiui, non satis quie-
ui, adhuc pauxillum, & sufficiet. Heus!
surge & admitte hanc mortificationem.
quid? omniane corpori indulgebis? sed
non succedet Oratio, noui me, & fre-
quenti experientia didici, toties me fru-
ctum nullum ex Meditationibus retu-
lisse, quoties plenè non edormiuoram,
Heus! proripe te, & magno animo te
mortifica, plus meriti hac mortifica-
tio adferet, quàm vnius horæ Oratio.
Surgamæquidem, sed commodè, seu vt
frigus declinem, seu vt conuenientiùs
me lauem, seu vt inter vestiendum ali-
quas preces perfoluam. Heus!
promptè fac & diligenter, etiam in hoc
te mortifica, & festina ad salutandum
Venerabile Sacramentum, si in tuis æ-
dibus est, vt cæteros eo salutationis
officio anteuertas. Quid dicet aliàs An-
gelus tuus tutelar, qui studiosè atten-
dit an Deus diei primitias a te sit obten-
turus? quid dicet, vbi viderit corpus
tuum præualere, & hostem de tua desi-
dia, & immortificatione lætari? Ain?
for-

fortasse, tantilla ab Angelo non curari?
imò verò, maiore eum solatio afficere
non posses: ab hac prima mortificatio-
ne de totius diei euentu bene omina-
tur. Nimis quàm certum est, hanc vim
& sanctam surgendi promptitudinem,
illi esse acceprissimam. Plenæ sunt san-
ctorum historiae, & fidem faciunt, ipsos
etiam Angelos Tutelares, non rarò Ex-
citorum officio functos, idque tam-
diu gessisse, donec sancti illi minùs se in
surgendo promptos exhibuerunt, tunc
verò, quasi talem desidiam detestaren-
tur, postridie non excitasse, aut quam-
diu culpam illam clientes non expias-
sent: quod euident argumentum est,
illos non parùm simili negligentia of-
fendi. Instar omnium erit quod nostro
æuo accidit: Deuota Anna Santonica è
Sodalitate Vrsularum, eam gratiam
à DEO obtinuerat, vt ab Angelo suo
semper his verbis: *Anna, surge excita-*
retur. Vix Angeli vocem audiebat,
quin statim, & admirabili diligentia se
proriperet è lectulo. Verùm euenit ali-
quan-

quando, vt paululùm tergiuersaretur, & sensim iterum indormiret, cùm redijt quidem Angelus, sed voce solito acerbiorē. *Domina*, inquit, *non placet surgere*? suffecit ea monitio, vt illicò obtemperaret, culpamque agnoscens & poenitens statueret, in posterum non tergiuersari.

Hagiophila, hanc mortificationem tibi potissimùm ad exemplum produxi, quòd ignorem, quas alias huius exercendæ occasionēs habeas, & certus sim, hanc tibi non defuturam. De cætero per diem continuò mortificationi intenta sis, neque tibi parcas. Dum egrederis in publicum, oculorum cohibe curiositatem, ne aspice, quod desiderare non licet, visum depressum & modestum gere: Magdalena Redonia tertij Ordinis Dominici Professa, quæ paucis ab hinc annis sanctimonia Tolosæ claruit, per urbem incedens nihil præter filices & lutum intuebatur, & qua molestius iter erat, gradiebatur. Dum versaris inter homines, in eorum faciem ne obtu-

obtutum defigas, seu reuerentiæ, seu modestiæ gratiâ. Vidit aliquando S. Mechtildis, dum festo S. Ioannis Evangelistæ sacris interest, B. Virginem, & hunc S. Apostolū, illustrem radio splendoris admirabili, qui ex oculis emicans in faciem Deiparæ dirigebatur, dumque hæret isto prodigio attonita, audit à Ioanne: illum, dum inter mortales viveret, ea fuisse erga Virginem Matrem reuerentia, vt defigere in illam oculos nunquam fuerit ausus. Saltem eorum vultum, qui sexu differunt, ne aspice, & ea sit aliquando tuæ mortificationis materia. B. Aloysius Gonzaga in vultum faminarum nunquam intuebatur, ne Imperatricis quidem, etsi aulicis officijs ei deseruiret. S. Clara de Montefalco, hac etiam in re studebat mortificationi, & oculos à viri facie abstinebat. Offert se aliqua curiositatis occasio? adhibe mortificationem. S. Carolus Borromæus nunquam per vllam fenestram prospiciebat. Pia Magdalena Redonia cuius etiâ antè memini, quando ad

do ad illam filij litteræ deferebantur, ad tres quatuorue dies tenebat obfignatas, tum vt curiositatem suam frangeret, tum vt teneritudinem affectus materni compesceret. Id subinde imitari, cum à charis epistolas accipimus, foret mortificatio Deo acceptissima. Tempestas frigida est? ampla mortificationi seges offertur, si toties ad ignem non accedimus, quoties cupiditas nos rapit. B. Ioanna de S. Catharina, Religiosa Ordinis S. Dominici penè igni per hyemem irascebatur, quòd carnis suæ delitijs, tam esset accommodus; vnde in asperrimis frigoribus, tot præceptis adigi ad focum debebat, quot adhibenda sunt, vt delicatulus quisquam, & otiosus inde auellatur. Aliquis te verbo, repulsa, contemptu, aut alia ratione offendit: Optimè, iam præclara adest te mortificandi occasio si taces, si non queris, si pro eo deprecaris qui iniuriâ te affecit. Soror Maria de Ascensione, Religiosa Hispali, in Monasterio B. Virginis de Gratia, si molesto aut aculeato aliquo

aliquo dicto perfringeretur, illicò se-
propriebat ad SS. Eucharistiam, gra-
tias actura, & tum candidè, simplicita-
teque admiranda dicebat: En, Domine
mi, munus, quod ad te defero, vt acce-
ptum sit precor, & ignosce sorori meæ,
cui non cogitanti talia exciderunt. Ver-
saris in periculo violandi silentij, aut
Regulæ alicuius, aut præstandæ inuti-
lis & otiosæ urbanitatis? generoso re-
cessu, & mortificatione declina. Me-
morix proditum est, de Ioanna Celeris
Atrebatî Religiosa, quòd rarò ad lo-
cum congressus, & colloquij adiret, ne-
que vnquam, nisi de rebus omninò ne-
cessarijs, loqueretur. Vnde ab alijs qui-
busdam sororibus, maiori licentiæ de-
ditis, soror sylvestris appellata est, sed
illa tali conuitio immobilis à sua con-
suetudine non recessit, semper seria &
accurata in omnibus, quæ illi mortifi-
catio suggererat. Cibum sumis? etiam
hic, in quo frangas appetitum tuum, re-
peries, siue à qualitate ciborum, siue à
quantitate. Nunquam sine aliqua vi-
gloria

etoria recedendum est. Nolim tamen, vt solitudinem Magdalena Redoniæ imiteris, quæ eo tempore, sic in omnes mortificationis occasiones intendebat, vt rogata aliquando à Confessario, quot victorias in vnus oui comestione, de se reportasset; minimum octo recensuerit. Omitto cætera in quibus exerceri hæc virtus potest, ex his quæ attuli, faciliè de reliquis iudicabis. Gradum faciamus ab vniuersali mortificatione ad particularem, quæ est omnium maximè necessaria, intelligo illam, quæ est vitiorum nostrorum & affectionum. Quisque ab vna præcipuè passione diuexatur: *Nemo sine defectu, nemo sine onere*, inquit Thomas de Kempis. Et in ea mortificanda, & debellanda potissimum studium collocari debet, isque dies perijsse existimandus est, quo nihil aduersus hunc gestum, nulla victoria relata est. Vnde vtilissimum est, non solum manè, statuere quoties oppugnare illam velis, verùm etiam præuidere huius pugnæ occasiones, vt animus maiori

iori generositate præparetur. Nimis
 prolixus forem, si vellem pluribus mor-
 tificationis huius momentum tibi com-
 mendare, sufficiet, si vniuersè de hac, &
 quauis alia affirmem, tantum te habi-
 turam virtutis, quantum mortificatio-
 nis, nec hilo amplius. & deinde in cælo
 tantum te gloriæ adepturam, quantum
 retuleris de appetitibus, de affectibus
 tuis victoriarum.

Si non sufficiant hæc, lege prima quinque
 capita Tract. 7. quæ de Passione Christi
 sunt, in secunda parte Rodericij. Aut
 cap. 12. l. 2. de Imitatione. Post lectio-
 nem renoua deuotiones tuas, erga pas-
 sionem seruatoris. Plures in *sancto fauore*
 à me conscripto, reperientur. Lectio 45.
 Deuotionis seruire poterit, pro præpa-
 ratione Meditationis sequentis.

II. MEDITATIO.

*De Amore Eslij Dei erga proximum
 tempore Passionis.*

Oratio preparatoria solita.

I*P* *Racidiu*. Propone tibi seruatorem
 Discipulis suis dicentem: *Baptismo
 habeo*

habeo baptizari, & quomodo coarctor, donec perficiam! Baptismus hic sanguinis est, quem in Passione sua pro nobis effundere desiderabat.

II. *Prelud.* Pete gratiam pernoscendi istum Amoris excessum, quem Dei Filius, postremis vitæ suæ horis, erga homines testatus est, quasi per triginta tres annos non tatis eum declarasset.

I. *Punctum.* Nullo certius indicio proditur Amor, quàm si Amans pati desideret, pro Amato. Votum hoc fuit maximum seruatoris nostri, vnde nulla loca declinabat, quibus prævidebat, se aliquid passurum. Ita adiit Hortum Oliuarum, vbi capiendus erat, ita rogare noluit Patrem, vt ad tutelam suam mitteret Legiones Angelorum; ita facultatem se inuadendi dedit militibus, quos verbo in terram prostrauerat; ita nullum apud Herodem miraculum parauit, ne liberaretur. Denique ex vi huius desiderij, Cruci affixus se sitire dixit: *Sitio.* Verè quidem istud de Siti corporali, multò tamen magis significabat.

cabat sitim spiritualem animarum nostrarum, & salutis hominum. Et verosimile est, post singula tormenta dixisse illum: Sitio pati hæc & ampliùs, tum ex amore, quo erga Patrem feror, tum ex vehementi desiderio saluandi genus humanum. O quis mihi det tale desiderium, tantam sitim patiendi pro IESU in signum affectus mei, & satisfactionem meorum delictorum! ah quid est quod desidero, si non desidero pro IESU, quod IESVS tantopere desiderauit pro me,!

II. *Punctum.* Eò illum abripit Amor, erga homines ardentissimus, vt desiderauerit pati omne genus tolerandorum, omni loco, & omni tempore; etiam usque ad mundi finem, si ita DEO Patri visum fuisset. Atque huc referri possunt verba illa: DEVS, DEVS meus, quare me dereliquisti? Tibi placet, vt Clemens Ancyranus longum plurium annorum Martyrium subeat, vt in craticula torreatur Laurentius; vt Bartholomæo cutis detrahatur; lapidibus obruatur

inatur Stephanus; torque alij crudelissimis diuturnisque cruciatibus torqueantur, imò vsque ad finem mundi, erit continuus ordo patientium; cur mihi istam gratiam non facis, ô Pater, vt eorum loco solus omnia singulorum tormenta sustineam, ad diem illum extremum? abnuis hoc, Pater, & sic me derelinquis: me vnicum & dilectum Filium tuum? Mundi rerumque terrenarum amatores, cedite mihi amorem, tam insatiabilem, vt nunquam saturari possit patiendo pro eo, qui tanta pro me pati voluit, & vobis cedam delicias omnes, omnes quas, vel voto, offerre mihi possetis.

III. *Punctum.* Tantus fuit illius in proximum Amor, vt affixus Cruci orauerit, pro inimicis suis: *Pater ignosce illis, non enim sciunt, quid faciunt.* Quò progredi vlteriùs Amor potest, quam vt oretur pro ijs, qui maleficio nos impetunt, qui nobis iniuria summa, ignominiaque, crudelitatibus inauditis, & diabolicis vitam eripiunt, & deinde, o-

R

prima

ptima qua fieri potest ratione, excusentur? fecit id Dei filius. Expende quàm foret actus ille generosus, si condonaremus culpam non vni, aut alteri, qui in nos deliquisset, sed pluribus, maxime, si foret in potestate nostra, eos punire, aut vindicare; si conditione dignitateque excelleremus? Seruator eximius fuit in his omnibus, & in testificatione amoris sui incomparabilis. Quando tam beneuolè excepit Iudam proditorem suum; appellando Amicum: *Amice ad quid venisti?* quando ignouit Latroni peccata & iniurias, quibus illum petierat, Paradisum promittendo, & alijs quibusdam occasionibus satis declarauit benignam animi sui in hostes propensionem. O Deus bonitatis infinitæ! concede mihi gratiam, vt ignoscam hostibus meis, eos beneuolo animo excipiam; illos amem. Quod si à me hæcenus neglectum est, ignosce ô Deus misericordiarum, neque enim sciui, quid facerem.

Colloquium ad Patrem æternum, vt
me

me habeat in numero eorum, pro quibus Filius ipse orauit, deinde ad Filium gratias agendo, quod pro me Patrem orare dignatus sit. Pater, & Aue.

Recollectio. Visitatio Venerabilis Sacramenti. Examen Conscientiæ. Prandium. Recreatio. Tempus scriptionis, quod, si alia desit materia, impendes notandis eorum nominibus, qui singulari aliqua iniuria te nonnunquam affecerunt, aut quos à te scis auersos & alienos, ut subinde, maximè diebus Veneris, pro eis ores nominatim, eaque ratione ostendas te ijs ignoscere propter illum, qui Crucifixoribus suis ignouit.

Sequitur hora lectionis.

DISSERTATIO POME-

R I D I A N A.

De Lingua.

Admirabilis Prudentij Poetæ genius est, dum verba faciens de generosa Machabæorum Matre, metuentes ne timor cruciatuum ignauam aliquam effilijs vocem exprimeret, simul atque priori lingua est exacta, introducitur

R. 2. eam

eam præclare exclamantem: *satis: iam paria nobis gloria est.* Post amissam linguam optimum successum, & gloriam licet ominari.

*Linguam Tyrannus amputari iusserat
Vni ex Ephebis; Mater aiebat: satis,
Iam paria nobis gloria est.*

Videbat illum exemptum periculo fidei abnegandæ, neque posse quidquam linguâ profiteri, quod illi aduersaretur; unde magnis incedebat lætitijs, & malebat elinguem filium habere, quàm eius periculosi membrii damnis vitijque expositum. Vnicum verbum impertinens, vnica lingua lapsus corrumpere potest omnia. Lingua gladius est, sed furiosissimus, sed periculosissimus, sed quouis ense acutior. *Multi ceciderunt in ore gladij, sed non sic, quasi, qui interierunt per linguam suam.* Plures vna occidit, quàm omnes totius orbis acinaces. Quid à me expectas, Hagiophila, post hanc amputatæ linguæ felicitatem? fortè vt dicam ad euitanda innumera mala, & ad gloriôsè viuendum.

moriendumque, carere linguâ oportere? Deus auertat illam à me mentem, & intentionem. An potius vt te moneam, si viuere sanctè, religiosè, & in securâ perfectionis semitâ cupias, necessarium omninò esse, vt sæpe te geras quasi elinguem, & cui lingua exsecta sit? qui id profectò faceret, euidentius haberet suæ salutis argumentum, & cum illustri illa Matre dicere posset: *Satis, iam parata nobis gloria est.* Facile aduerteris, me illa hæctenus attulisse in dissertationibus meis, quæ ad spiritalem tuum profectum, maximè videbantur opportuna, verùm tibi persuadeas, velim, tanti esse momenti illud, quod modò de lingua dicturus sum, vt de commodo, & vtilitate nulli alteri materiæ concedat.

Plurima de lingua proferri in medium possent, sed quis modus tantillo otio, quod mihi tecum conceditur, cuncta pertexendi? quare sufficiet, si tibi commendem, vt malè de nullo loquaris, neque per modum querelæ, aut mur-

R 3 mura-

murationis, neque per calumniam, aut iniuriam. Atque hac in re potissima cura adhibenda est, vt sine lingua esse videamur. Vt verò mentem meam melius assequaris, duo notanda præmitto, quæ circa huius rei defectum in Communitatibus animaduerti. Multorum annorum vsus & experientia, magnus & sciens Magister est, qui sæpe plura nos docet, quàm scire desideraremus. Animaduerti igitur nonnullos ad fucorum, & Apum naturam proximè accedere, dum mordent, & linguæ spiculo eos configunt, qui volunt auferre mel, illumque dulcem liquorem fugere virtutis, tantoperè Deo, & Angelis acceptæ. Ita nimirum aliqui tam malè à natura compositi sunt, vt nihil illis sit familiarius, quàm pungere, vexare, & conuitijs prosequi eos, qui virtutum exercitio, & regularum obseruationi studiosè se dedunt, quique nihil aliud quærunt, quàm mel deuotionis, & sanctitatis. Illi homines tantis aculeis bonos illos Patres & Fratres, bonas illas

Ma-

Matres & Sorores impetunt, vt res sit commiseratione dignissima. Si quis in rebus suis peragendis exactus accuratusque sit, dicent esse scrupulosum; si paupertatis sit amans, de animi abiectione & tenacitate criminabuntur; si promptum & obedientem se præstet, aient esse simplicem atque seruilem; sibi ingenium esse liberalius, non ad seruitutem natum; & quisquis Quem se fecerit, eundem facile à Lupo deuorari. Adeo quidquid agant ij, qui virtutum studio incumbunt (quia tacite per bonam vitæ suæ rationem, mores aliorum tepidos, & liberiores reprehendunt) alij continuò obtreçant, improbant & in peiorem partem interpretantur, donec veluti in rabiem acti pessima quæque, seu clam, seu palam, indicto bello molliuntur, & inuoluant vesparum instar venatarum, aut tanquam spinæ igni iniectæ perstrepunt, insolentibus & detractorijs verbis; quemadmodum olim à nonnullis aduersus probum Dauidem factitatum est: *Circumdederunt me sicut*

*Apes, & exarserunt sicut ignis in spi-
ritu.*

Alterum quod notavi est, plures re-
periri Absolonis imitatores, qui malè
volunt Dauidi & ijs omnibus, qui cum
illo consentiunt, illique adherent; aut
qui saltem continuò ijs obtrectant. Fu-
nesti & ingrati Absolones! qui amare,
nequeunt, neque benè loqui de suis su-
perioribus; quique molestè ferunt, alio-
rum cum illis consensionem; vnde in-
Patrem & filios, sexcenta pessimæ lin-
guæ spicula intorquent; invidia & æ-
mulatione rumpuntur, & consumun-
tur, ita vt nullum leuamen, nisi à ma-
ledictis, in insontes vibratis haurire,
posse videantur. Reperies inter rebel-
les illos & occultos parricidas, qui pla-
nè dicere audebunt: Ne tali fidas, be-
nè illi cum superiore còuenit; ô si æ-
que tibi atque mihi perspectus foret!
non est, quod esse videtur, probè caue-
rò, ne me illi adiungam. Infortunati
Absolones quousque alieno sanguine,
& dispendio famæ alienæ pascetis ma-
ledi-

Iedicam sitim vestram? ecquando tandem vestro sanguini, in persona Patris & fratrum vestrorum parcetis? aliquidne optari in domo Religiosa melius & sanctius potest, quàm amor & vnio membrorum cum capite, & filiorum, cum Parente?

Ab his notis transitum faciamus ad iniurias, quas tales sibiipsis inferunt, & ad commendationem, quam facere tibi institui, ne vnquam de vlllo, ne minimum quidem, malè loquaris. Iniuria, quam sibi faciunt, in eo consistit, quòd ista linguæ lubricitate se præcipitent in grauissimas animi angustias, incredibiles poenæ & cruciatus intolerandi ab illa maledicendi licentia promanant, maxime cum transit in consuetudinem, aut in grauius verba erumpit, quemadmodum procliue est in vsu familiari, & quotidiano. Vnde Sapientis præclara sententia est: *a Qui custodit linguam suam, custodit ab angustijs animam suam; à presura, à torturis, alij legunt.* Prætereamus

R s

cas.

a *Proverb. 10.*

cas anxietates & angustias, quas subeunt hac occasione sæculares, siue in vita, siue in hora mortis; vti misero illi accidit, qui maledicendi vitio deditus, cum parum à morte abesset, linguam protrudit palam intumescentem, sæpe iterans voce lamentabili: *a Ista pessima lingua me dānavit*, quæ vltima fuerunt verba expirantis. Tantum loquamur de angustijs, quæ accidere possunt hominibus Religiosis, si fortassis hac in re delinquant. Et inprimis, video angustiam esse maximam, versari in periculo Deum lethallyter offendendi, & sollicitum esse, num id, quod diximus, lethale sit peccatum. Id maledicis vsuuenit; potestne animæ, quæ Deum amare debet, & cupit aliqua crux fingi acerbior, aut horribilior? posse autem facilius in hac materia committi peccatum mortale, quàm existimetur, certissimum est; neque puto id à te ignorari. Si verò dubitas, lege, quæ proponit Rodericius secundâ parte, capite nono Tractatus secundi, vix enim

ea

a Ex Histor. Angl.

ea legeris, quin illicò erumpes in Sapientis verba, paulò ante tibi còmmendata: *Qui custodit linguam suam, custodit ab angustijs animam suam:* Quòd si post serium examen eius, quod de altero dixisti, iudices aut saltem putes esse mortale peccatum, ò quantæ tum animi angustiae, quanti cruciatus, præsertim si aliquo perfectionis studio teneris? nam consultum tunc est, vt non priùs lecto te credas, quàm confessione culpam expiaueris, petierisque veniam ab offenso, si fortè læsa grauiter charitas est, vti in industrijs suis monet P. Claudius Aquauina. At istis omnibus obnoxium se reddere, fieri putas sine tormento? quin aio, tormentum esse grauissimum, maximè quibusdam ingenijs gloriosis, quæ naturæ quâdam propensione à talibus humiliationibus eximi percuperent. Putas ergo non esse aureum Sapientis pronuntiatum: *Qui custodit linguam suam, custodit ab angustijs animam suam?* quando verò instituenda erit confessio extraordinaria, quando exercitijs, renouationi,

& reddendæ conscientiæ rationi vacan-
dum (quo tempore lumina sunt maio-
ra, & velum, quod affectiones nostræ
oculis pratexebant, deponitur) arbitra-
re an pœnæ futuræ sint leues, præfertim
si notabiliter & sæpe peccatum est? age-
tur de reparando honore læsorum, for-
tasse plures existent, reparatio erit diffi-
cilis, ignominiosa; in ipsa etiam confes-
sione difficillimum erit se ritè explicare,
distinguere, & benè manifestare; & uti-
nam in hora mortis ob negligentiam,
hac in parte admissam, nobis conscien-
tia nostra & dæmon non exprobet eam
loquendi libertatem, quòdque tam faci-
lè nostras de alijs opiniones protuleri-
mus, & eo modo, quo loqui de nobis
alios nollemus; reuerà quò diutius ani-
mum aduerto, eò magis conspiro cum
Sapiente: *Qui custodit linguam suam cu-
stodit ab angustijs animam suam*; ita ut fir-
mum ratumq; mihi sit, (erit verò etiam
omni sapere volenti) nunquam malè lo-
qui de vllò, nunquam, neque vllâ ratio-
ne. Nec mihi dicas, Hagiophila, subinde
tibi

tibi excidere parua quædam maledicentia verba, sed de quibus loqui opæ pretium non sit. Itane verò? audi Sapientem de similibus pronuntiantem: *a Verba susurronis quasi simplicia. & ipsa perueniunt ad intima ventris*, legit Caietanus, *& ipsa vulnera, & percussiones*. Modicâ illa verba, vt simplicia videantur, vulnera sunt. Si læsus inaudierit, ab alienabitur, ij quibuscum communicas, minoris te facient, & tu, nisi cor habeas obdura- tum, rancorem animi senties, perdēsque tranquillitatem, & gaudium internum ob violatam proximi charitatem. *Verba quasi simplicia, & ipsa vulnera, & ipsa perueniunt ad intima ventris*. Et vt illa deessent, exiget à te poenam Deus, aut per desolationes, aut comunium gratiarum subtractionem, aut permittendo, vt in aliorum quoque ore verferis, & de te vera falsâque disseminentur, aut alia aliqua ratione. Animæ etiam sanctissimæ, & cum Deo coniunctissimæ, si hoc vitio linguæ delinquant, poenam non.

R 7 effu-

a *Prou. 26.*

effugiunt, iuxta peccati qualitatem. Nar-
rant Annales Cisterciensium, quendam
Religiosum eo favore fuisse cælitus affe-
ctum, ob præclara virtutū & sanctimo-
niæ merita, ut quoties sacra synaxi refi-
ciebatur, toties illo, & tribus proximis
diebus ingentem quasi mellis dulcedi-
nem in lingua experiretur: Accidit por-
rò, ut verbum paulò aculeatius in aliquem
intorqueret, & ecce subito cessavit ille
solitus fauor, tantumque abfuit, ut in pri-
ma sumptione sentiret pristinam dulcedi-
nem, ut etiam expertus sit magnam ama-
riciem in lingua, & in conscientia per-
turbationem, luctam rebellionemque,
quam dicti illius memoria excitabat.
Adeò consultum est, nunquam malè de
altero loqui, & existimare, quod leuissi-
ma detractionis verba, graue nobis ad-
ferant detrimentum, disponantque, ut
à diuina manu vapulemus. *Verba simpli-*
cia, & ipsa vulnera & percussiones. Nun-
quam aliàs melius affecutus sum acu-
leos D. Bernardi in rem præsentem: a

Lenis

a *Serm. de tripl. custodiâ manuum, cordis
& lingua.*

*Levis sermo, quia leuiter volat, sed graui-
ter vulnerat; leuiter penetrat animam, sed
non leuiter exit; facile volat, atque ideo
facile violat charitatem; vilis res est mu-
sca moriens, sed exterminat oleum suavi-
tatis.* Aliquidne verius & ad persuaden-
dum efficacius dici potest? discamus igi-
tur continere linguam nostram, & de
alijs non loqui, nisi optimè. Imò neque
illa dicamus, quorum certam habemus
notitiam, si alterius honori derogare
possit. *Audisti verbum aduersus proxi-
mum tuum, commoriatur in te, fidens, quo-
niam non te disrumpet.* ait Sapiens. Sed
vulgata iam res est, & nota omnibus:
nihil refert, loquantur alij, non tu, vt
etiam in rebus magis periculosis silere
consuescas. S. Ignatius, Patriarcha no-
ster, multa similia sciebat; non propa-
gabatur tamen ad alios, neque vllam de ijs
mentionem faciebat, tam erat illi cordi
nullius famam lædere, & de omnibus
honorificè loqui, ita vt quisque crede-
ret se optimà esse apud illum opinione.
At illa, quæ de proximo dissero, iam an-
tiqua

tiqua sunt, & pridem acta, quid accidere inde incommodi potest, si illa in sermonibus ingeram? iam præteriêre omnia, longâque obliuione sepulta sunt: idcirco & tu sepulta non effodias, neque iterum proferas in lucem, & sermonem. Nobiscum satis negotij habebimus, si recolamus propria peccata, vt illa defleamus, & non aliorum, quæ ad nos non spectant, vti olim optimè dixit sanctus Hugo Gratianopolitanus. Et S. Iohannes Alexandrinus Patriarcha affirmavit: *Iniquum esse ab homine petulanter exprobrari, quod à Domino clementer condonatum est.* Breuiter, nullo vnquam modo alterius fama vellicari debet, ne illorum quidem, qui nobis ignoti sunt, etsi vulgato rumore traducantur. Neapolitanus Nobilis, honorificè de P. Rudolpho Aquaiua, cùm Christi causa mortem oppetijisset, loqui non poterat, neque patiebatur, vt glorioso Martyris nomine compellaretur, Barbarorum crudelitas, aiebat, illi vitam eripuit eodem perfidiæ affectu, quo plures alios obruit.

truncant, non in odium fidei nostræ: hic honos illi debitus non est, habēant illum Martyrem, qui volent, non ego. Aduertendum autem est, huic homini nunquam cognitum fuisse illum insignem Dei famulum; vnde accidit, vt. proximā nocte, postquam sacros Martyrij honores summā pertinaciā illi denegauerat, sese in somnis Pater visendum præberet, rogarētque, vtrum se de facie & reliquo corporis habitu nosset? eo negante: Cur ergo, inquit, de me loqueris? ego sum Rudolphus ille, cui, iudicio tuo, Martyri esse non licet, quid commisi aduersum te, vt potissimum gloriæ meæ ornamentum mihi detrahas? postridie, summo manè, Nobilis ad Patres nostros accurrit. proditisque omnibus, quæ noctu acciderant, veniam honoris tanto Christi Athletæ denegati, postulauit.

Scire cupis, quandōnam licitum sit de malis proximi cognitis loqui? tum scilicet cū remedij gratia, & ex charitate eadem illis manifestamus, ad quos eorum cura pertinet, quique corrigere deli-

delictum possunt. Extra hunc casum, si me audis, geres te velut elinguem erga qualescumque proximi tui imperfectiones, & ea sollicitè obseruabis, quæ modò tibi commendaui, vt sis expers illarum, quas maledici sibi accersunt, angustiarum. Et quod generatim à me prolatum est, intelligi maximè debet de Superioribus, illisque personis, quæ non gubernant, vt aduersus eas nullæ querelæ, nullæ obmurmurationes instituantur, carpendo gubernationem, aut agendi modum, *Custodite vos à murmuratione, & à detractiōe parcite lingua.* Simul ac Iudæi contra Moysen, Ducem & Gubernatorem suum; murmurabant, illicò Deus ab ijs poenam sumebat, alia scelera negligere videbatur, sed hoc sine præsentī castigatione non præteribat, neque id leuiter, sed ad plurima millia, sine vllō personarum respectu, ne earum quidem, quæ sanguine erant cum dilecto suo Moyse coniunctissimæ. Testis est Maria illius soror, quam mox leprâ percussit, cum fratris actionibus obtrectasset;

set; & adhuc clementer cum illa actū est,
quandoquidem plures alij idem vitium
morte luerint. Nunquam Deus ijs par-
cit, qui in Superiores & P̄positos in-
surgunt, adeo vt contumeliam illam,
veluti sibi, non ijs, illatam vindicet. Ar-
gumento est historia, quam S. Bernardus
de maledica muliere posteris reliquit..
Pessima hæc assueta quibusuis obtrecta-
re, ausa est aliquando in publicā plurium
coronā calumniari S. Malachiā, & præ-
sentem iniurijs petere, caluum, hypo-
critam, alijsque probrosis nominibus
compellans. *At ille nihil respondit*, inquit
S. Bernardus, *quia mitis erat, & verecun-*
dus, sed Dominus respondit pro eo, seruique
sui causam ita complexus est, vt statim
impudens mulier in amentiam incide-
rit, pauloque post infami morte sit de-
functa. *Dominus autem respondit pro eo.*
Ausit subditus aliquis linguæ spiculō
Superiorem suum configere: *Dominus*
respondebit pro eo seriùs, aut ociùs poenā
exposcet; eam libertatem vindicabit;
culpa est, quam non relinquet impuni-
tam.

tam Et hinc discce, Hagiophila, quid ijs, qui tibi præsunt, debeas: sed siue Superior sit, siue alius, memineris nunquam malè de illo loqui, nunquam, etsi perpetuò eßes victura. Atque istud Sapientis consilium est, quod bellarij loco tibi relinquo. *Vnusquisque proximum suum non angustiat in aeternum.*

Si hæc Lectio non sufficit, aut displicet, perge ea legere in Rodericio, quæ manè incoepisti, aut lege cap. 19. & 52. lib. 3. de Imitatione Christi.

Sequitur Examen virtutis Patientiæ, omninò hodie ad rem, quando de maxima Christi Patientia agitur.

EXAMEN CIRCA PATIENTIAM.

EN signa veræ & sublimis Patientiæ. Primò, *Silentio præterire, neque respondere, aut par pari referre, quando iniurijs afficimur, aut accusamur.* Secundò, *Omne indiscium iracundia, & indignationis compescere, ne erumpat.* Tertiò, *Molestias illas secum dirigere, neque queri, nisi amanter apud Deum, orationis tempore; neque*

neque ullo signo externo laesionem prodere.
 Quartò, Eadem animi vultusque constan-
 tia irrisiones, despectus, calumnias, dolores,
 aegritudines, omniàque malorum genera,
 quin & mortem ipsam tolerare. Quintò,
 Existimare se dignum & promeritū qua-
 nis mala, ob scelera vite anteacla, ideo-
 que omni solatio & quiete indignum, imò
 graviora acerbioraque mereri, quàm pa-
 tiamur. Sextò, Pacem & letitiam inter-
 nam non dimittere, quidquid aduersi acci-
 dat. Septimò, In afflictionibus Deum lau-
 dare verbis S. Iob : Sit nomen Domini
 benedictum. Octauò, Vires ad toleran-
 dum à Deo postulare, cum ea fiducia, quod
 omnia possimus in eo, qui nos confortat :
 Domine, vim patior, responde pro me.
 Nonò, Maiores à Deo afflictiones petere,
 si sit ad illius gloriam, & salutem nostram,
 sed vnà, vt robur & patientiam necessa-
 riam subministret, exemplo Pij V. Domi-
 ne, auge dolorem, sed auge patientiam.
 Decimò, Suauiter & sereno vultu ijs re-
 spondere, qui te ledunt, si modò necessaria,
 aut utilis sit responsio. Vndecimò, Amare

Officia charitatis exhibere offendentibus, reddendo bonū pro malo. Duodecimō, Orare peculiariter pro illis, qui nos affligunt, aut animo sunt à nobis alieniore.

Adest tempus Officij, aut alicuius Precationis vocalis. Deinde huius Considerationis.

CONSIDERATIO.

L. **Q** Vale ijs probrum, qui Christo Crucem portanti ferre opem recusant. Hoc Crucis extremum non admodum grauat, solæ occasiones sunt, quas tibi offert, vt pro illo patiaris. Si id exigeret à te, vt manibus pedibûsque affigereris, vt sexies mille ictus flagellorum exciperes, aliquid foret argumenti, quo te difficilem præberes; tantoperè verò tergiuerlari, ob extremum Crucis, & propter tantilla, quæ nobis in comparisonem eorum, quæ ille sustinuit, toleranda occurrunt, nescio sanè quid excusationis prætexere aliquando poterimus, vbi eam ille ignauiam meritò nobis exprobrauerit.

II. Ex mente D. Bernardi, multa bo-

na agere, & multa mala pati, Christianum est. Vnde igitur ego, qui peculiari quâdam ratione virtutem, & nomen istud profiteor, mihi magis operè blandiar? ubi bona, quæ egi? ubi mala, quæ passus sum? ingens abusus est, credere, multum præstari, cum nihil, aut quasi nihil, præstatur.

III. Miles ad patiendum se resolvit, id enim militiæ ratio postulat; Cuius, ut loci more vivat, oportet enim aptare se consuetudinibus patriæ, in qua degitur. Militia huius vitæ, sine tolerantia non est, & consuetudo civium Mundi est bona malæque sustinere. In cælo nil nisi bonum est; in inferno nil nisi malum: Tertia, quæ his interiacet, vtriusque extremi particeps est. Iniuriæne ergo à te exigitur, ut statuas vivere more aliorum? præsertim cum id lubenti animo faciens, & pro expiatione peccatorum tuorum, cælum quoque promercearis?

IV. Nil absque Dei voluntate contingit, quod modo displicet, placebit aliquando. Militiæ, quò plus molestiarum

rum & vulnerum subitur, eò plus gloriæ accedit; manus Chirurgi dum secat, ingrata est, at ubi vulnus curauit, eandem deosculamur; sartor corrumpere materiam videtur, dum in partes illam discindit, dum serico infligit vulnera, & tot incisiones, diceres rem perdi, sed paulisper exspecta, & videbis vestem inde pulcherrimam prodire. Præstolare tu quoque tempus à Deo destinatum, & magnam ab omnibus afflictionibus tuis gloriam reportabis.

V. Quâ fronte quærimus huius vitæ voluptates, & delicias, postquam scimus, & seriò comprehendimus Iesum mortuum esse, & nostri causa mortuum? S. Elisabetha Hungarica, auditâ mariti morte, quâ nihil funestius illi accidere potuisset, manus in cælum sustulit, erupitque in has voces; quandoquidem mihi frater, & dilectissimus amicus defunctus est, iam mihi mundus esse desijt nullæ voluptates miseræ Elisabethæ reliquæ sunt! dicamus & nos: si Iesus mihi omnia est, & Pater, & Amicus, & Sponsus,

Sponsus, & vnica delicia cordis mei, & si ille pro me mortuus est, quid aliud possum, quàm serio constantérque mundo, & omnibus illius voluptatibus valedicere? vale igitur Munde, valete voluptates, valete creaturæ omnes quandoquidem Iesus meus mortuus est, & quidem amore mei mortuus est!

VI. Quisque cor suum vbi voluerit, defigat, ego meum ad pedes Crucifixi affigere volo, neque patiar inde auelli animum, & cogitationes meas. Et an non iure meritissimo? cùm antequam essem, & quàm mereri possem, Iesus in monte Caluarie mei meminisse voluerit, tantâque attentione & amore diuinissimam suam mentem mihi applicuit, quasi præter me nullus in rerum natura extitisset, pro quo pati, & sanguinis sui meritum accommodare debuisse.

Hora quietis tum Officij seu Orationis vocalis. Visitationis Venerabilis Sacramenti, & præparationis ad seq. Meditationem.

S

III.

III. MEDITATIO.

De Patientia Filij Dei, tempore Passionis.

Oratio præparatoria solita.

P*raludium.* Propone animo Iobum in fimo suo sedentem, miraculum istud Patientiæ in ferendis contumelijs, iniurijs, & doloribus atrocissimis.

I I. Prælod. Pete à Deo, ut tibi clare manifestet Patientiam Filij sui, cuius solum figura Iobus fuit.

I. Punctum. Considera Patientiam Iesu in sufferendis contumelijs. Prima, abnegari à Petro; 2. à Iuda prodi; 3. Vendi triginta argenteis. 4. à cæteris Apostolis deferri. 5. Cædi à lapâ; 6. Postponi homicidæ & latroni Barrabæ; 7. Sine causa damnari ad mortem, & mortem Crucis, nudum, & inter duos latrones medium. O Pater æterne, respice in faciem patientis Filij tui, & quandoquidē hæc contumelias tolerat propter peccatores, & me, qui illorū præcipuus sum, ignosce illis, & mihi in gratiam eorum, quæ pro nobis Filius tuus sustinuit.

II.

II. *Punctum.* Considera patientiam Filij Dei in tolerandis iniurijs, & calumnijs, quibus impetebatur. 1. Caiphas Pontifex illum publicè blasphemum nominat, quòd se esse Filium Dei dixisset. 2. Milites totà eà nocte, quā apud Cai-phā fuit, non omiserunt antiquas illi iniurias recantare, vocando Samaritanū, Dæmoniacū, Voracem, Potatorem, Publicanorum amicum, Seditiosum, Magum, & his similia. 3. Quando fuit Cruci affixus, tota illa innumera & presentium hominum turba irridebat illum, & mille iniurijs proscindebat. Tibi gratias, o dulcissime Iesu, quòd patientiā admirabili toleraueris abominādas hasce iniurias, & per eandē rogo te supplex, vt similem mihi, dū occasio exiget, largiri digneris, quin etiam ignoscas sceleribus meis, quæ causā fuerunt omnium istarum iniuriarū.

III. *Punctum.* Considera Patientiam Filij Dei in suis doloribus, & tormentis. Primò, quando spuebatur in faciem illius. 2. Quando atrociter velabantur oculi. 3. Quando genæ alapis cade-


bantur 4. Quando barba & capilli enel-
lebantur. 5. Quando pugnīs calcibū-
que impetebatur. 6. Quando flagella-
batur sexies mille verberibus. 7. Quan-
do coronabatur spinis. 8. Quando Cru-
cem suam gestabat. 9. Quando Crucē
affixus fuit. 10. Quando illic tribus ho-
ris vivus pependit. Admiratio. Dētesta-
tio impatientiæ nostræ, & Confusio,
quòd in ferendis exiguis doloribus tam
suum delicatus, & tener.

Colloquium ad Angelos huius tantæ
Patientiæ spectatores, vt aliquem dolo-
ris sui & commiserationis sensum no-
biscum communicent. Deinde ad ani-
mam nostram, vt se resoluat ad tria illa
malorum genera generoso animo cum
IESV toleranda.

Recollectio. Lectio Thomæ de Kempis:
Rosarium. V. sitatio Venerab. Sacra-
menti. Coena. Recreatio. Litanie San-
ctorum. V. sitatio Venerab. Sacramenti.
Præparatio crastinæ Meditationis. Exa-
men conscientie. Quies, ad quam re-
componens digito exprime in fronte
nomen Iesu. Iuvet subinde facere, quod
Dei servus est in usu.

OCTA-

Coelum & Terra clamat Domine ut amem Te. VII
Aug.



f
c
b
i
h
c
t
V
c
f
r
f
c
r

OCTAVVS DIES.

De Amore, quem Deo debemus.

QVandoquidem, Hagiophila, iam
 anima tua, vti oportuit, à morbis
 suis spiritualibus purgata sit, ac deinde
 diuinis luminibus, quæ ex vita virtuti-
 búsque Saluatoris emicant, illustrata,
 id vnicum deest, vt te Deo vnias, quòd
 hoc duobúsque sequentibus diebus, mo-
 dò in dies decem solitudinem tuam pro-
 trahas, cum eiusdem gratia factura es.
 Vt verò facias felicissimè, nihil, meo iu-
 dicio, aptius est Amore diuino Con-
 formatione suæ voluntatis cum Dei be-
 neplacito, & deuotione erga Augustis-
 simum Sacramentum. Per ista te dedu-
 cam ad vitam vnitiuam, initio ab Amo-
 re factò.

Visitatio Venerabilis Sacramenti, & præ-
 paratio ad meditandum.

— 06 (o) 50 —

S 1

I. ME-

.I. MEDITATIO.

De Motiuis ad amandum Deum.

Oratio preparatoria consueta.

I. Præludium. Imaginare Parentem, aliquem, qui omnia media adhibet, vt affectum Filij sui sibi deuinciat; rogat illum, blanditur, beneficijs obligat, hereditatem adpromittit, nihil denique negligit, vt ametur. An non naturam omnem exuisset Filius, si tam benignum Patrem non amaret?

II. Prælud. Pete à Deo gratiam, vt benè agnoscas excessum Amoris illius, quo erga te vsus est, vt iste erga filium suum Parens.

I. Punctum. Deus excepto, quòd violentiam nullam adhibuerit libero arbitrio, fecit, quidquid potuit, vt ab homine amaretur; omnia, vt hoc assequeretur, tentauit. Primò, creatum è nihilo conseruat, & momentis omnibus pro-rogat illi vitam, quod perinde est, atque si noua continuò creatione illum re-stauraret, siue quâ in nihilum suum re-

for.

forberetur. Et quò hæc, nisi vt otium sit illum amandi : neque tantum conseruat, sed conseruat cum sollicitudine & amore, veluti pupillam oculi sui, veluti oculos suos : Qui vos tangit, tangit pupillam oculi mei : inò huic officio impendit Angelos, Aulae suae Principis, nostrum vilissimus habet aliquem ex ijs Principibus continuò sibi assistentem, & aduigilantem noctu diùque, per triginta, per sexaginta annos, quamdiu vita prorogatur. Secundò, homini præcipit, vt amet, præceptumque illud minis mortis, & mortis æternæ stabilit, adeò vt omnis generis mala indicat, si non amet. Tertiò, illum rogat, & cor illius postulat, nimirum ad amorem : *Fili, præbe mihi cor tuum* ; & asseuerat isthuc esse delicias suas : *Delicia mea esse cum filiis hominum*. Quartò, innumeris illum beneficijs sollicitat ad Amorem suum ; istis tot recreationibus, tot pulcherrimis obiectis, istâ corporis valetudine, istâ Amicorum turba, & post hæc, præparatione gloriæ interminabilis ; inò

tantum ametur. Anima mea, non ista
 satis potentia sunt incitamenta, ut te-
 dones tam amanti Deo, utque deferas
 omnem amorem earum creaturarum,
 quæ te abstrahere possent ab hoc vnice
 amabili? si non sum rupes durissima,
 quin tedeinceps amem, ô omnium ama-
 bilium amabilissime! Protestatio. Fer-
 uor. Confusio quod tam serò.

II. *Punctum.* Magna mihi Deus pe-
 culiariter contulit, ut me ad amorem
 suum pelliceret. *Fecit mihi magna, qui
 potens est.* Primò, voluit me esse familiæ
 honestæ, & piæ. Ah, quid si ortum du-
 xissem in Turcia, aut ex Parentibus im-
 pijs, qui nullam educationis bonæ cu-
 ram habuissent! Secundò, dedit mihi
 corpus integerrimum, in quo anima
 se idoneam experitur ad illum cogno-
 scendum, & amandum; cum tot alij na-
 turæ infortunio priuentur eâ felicitate.
 Tertiò, non sum extinctus in vtero, aut
 prius, ratione quàm vterer. Vitam mihi
 & tempus, quò illum amare possem, im-
 pertiit; vbi tot alij prius interierunt,
 quàm

quàm fungi possent istis officijs. O Deus omni amore dignissime, vellem te amare mille millibus cordium si tot haberem ! quæ igitur foret impudentia, si istud vnicum & miserum, quod habeo, non totum integrumque impenderem, & consecrarem amorì tuo ?

III. *Punctum* Deus mihi demonstra-
uit singularia quædam Amoris & Bene-
uolentiæ argumenta, quæ non alijs; aut
in modo, aut in circumstantijs, aut in-
tuitu meorum meritorum. Quisque no-
uit, in quo peculiariter sit Deo obstri-
ctus. Tu tua nunc expende, anima mea;
ingentem numerum habes particula-
rium beneficiorum, vocationis, disci-
minum superatorum, misericordiarum
post tam grauias & toties repetita deli-
cta, & aliorum innumerorum. O Deus
amoris ! non fallo me, si me fateor inter
omnes creaturas esse obligatissimum ad
amandum te. Dignus sum tot infernis,
quot stellæ in cælo micant, si non per-
mitto, vt totum cor meum tibi dedica-
tum sit, & vt nullius alterius rei amore
tangatur, quàm tui, aut propter te.

Colloquium ad tres Personas Augustissimæ Trinitatis, agendo singulatim gratias de beneficijs & fauoribus, quibus animam ineam affecerunt, ut eam ad amandum inuitarent. Pater. Ave.

Recollectio. Diurnæ tessera electio, fortassis hæc prolixior videbitur:

Felix diuinus est Amor, felix Amoris vulnus est.

Sed multum est felicior, qui semper illo laesus est.

Illa breuior ex Augustino desumpta:

Serò te amavi, pulchritudo tam antiqua, tam noua, serò te amavi. Aut alia eiusdem: Celum & terra clamat, Domine, ut amem te.

Sequitur aliqua pars Officij, aut Oratio vocalis. Deinde Sacrum. Tum Lectio vel hæc, vel alia,

DISSERTATIO MATUTINA.

De cura rerum minimarum.

AMor diuinus, Hagiophila, quem exercere tantoperè desideras, non tantum magna inolitur, sed etiam ad res minimas sese demittit. Quare in harum commendationem hodie mihi tecum, differendum est. Et imprimis affirmo, eas maiori animatione dignas esse, quàm

passim

passim putetur, siue illas intuearis, vt à Deo, à natura, & ab arte industriaque hominum procedunt; siue vt in se sunt, consideres. Quid minus est capillo? & tamen nullus omnino est, quem Deus in numero non habeat, & cuius non gerat curam peculiarem. Quid vilius Corui pullo, qui ouo exclusus deseritur à parentibus, & ingrata crocitate victus subsidium implorat? & nihilominus se Deus illi impendit, cibumque præparat: *qui dat escam pullis coruorum, inuocantibus eum.* Nunquam Deus indignatus est manum rebus etiam minimis applicare, imo in templo Salomonico, vsque ad ipsa emunctoria, prouidere voluit. Natura sui auctoris æmula, minus non facit; & vt magnis præclarisque operibus producendis studiose incumbat, minima tamen in manibus nostris lineamenta ductusque non negligit. Ipse Plinius asserit illam magis in minutis istis reculis, & in muscis, cæterisque paruis animantibus formandis, quàm maioribus occupari: *Retra-*

*natura nunquam magis quàm in minimis
repta est.* Homines verò, qui naturam in-
dustria suâ æmulantur, semper videmus
maiores operam minoribus, quàm
magnis opificijs applicare. Horologio-
pœus impensiore studio conabitur ho-
rologium gemmæ annulari includere,
quàm vasto aliquo adornare domum,
Ciuiicam; & Pictor tanti facit modicum
vmbra ductum, quanti reliquam per-
spicuum colorum inductionem. Mos
iste omnium vsu sæculorum confirma-
tus est, vt apud peritos arbitros res par-
uæ magnarum pretia & æstimationem,
aut vicerint, aut æquarint. Exigua res est
bombyx, apes modica, & tamen meritò
magni fiunt, cum ille ad aularum ma-
gnificentiam plurimum conferat, &
hæc conuiujs præbeat suauitatem, ce-
ræque Dei viuientis aras illustret. Al-
tius hæc perpendamus, & dicamus, res
minutas, quæ in diuino obsequio & stu-
dio perfectionis occurrunt, parui pen-
dendas non esse, sed rerum maximarum,
gravissimarumque loco habendas. exa-
ctam

etiam diligentiam, curamque singularem ijs adhibendo, quasi ab illis tota nostra felicitas dependeret. Via regia, & moris diuini, & naturæ, & humanæ industriæ in suis operibus, satis nos doceant, quâ ratione, ad eorum exemplum, in virtutum exercitio, & profectu animarum nostrarum, procedere nos oporteat, & in magno pretio habere res minimas, quandoquidē, quæ magnæ sunt, ab his potissimum magnitudinem suam, & præstantiam fortiantur. Nescio utrū satis me explicem, & an rectè assequaris, quid velim nomine rerum minutarum, quas hoc loco tibi commendare proposui, quarum aliqua generosè fugiendæ, aliæ ardentè complectendæ sunt? Ad prius genus referuntur. Primò, Paruæ & veluti nascentes tentationes, quæ procedunt ab aliquo vanitatis obiecto, ab aspectu formæ alicuius, à curiositate lectionis minùs pudicæ, & alijs similibus, quæ paulatim appetitum ad vltèriora prouocant. Secundo, Leuia pericula & occasiones Deum offendendi,

di, cuiusmodi sunt: alloqui sine necessitate personam sexus differentis; ingredi, si in Religioso statu es, in cubiculum alterius sine facultate, vnde verba inutilia & silentij violatio consequuntur; Oritio indulgere, ex quo periculum cogitationum immundarum, & sic de cæteris. Tertiò, Modicæ affectiones aut amoris (statim amando, quidquid gratum videtur, & sensibus nostris arridet) aut iracundiæ aduersus aëris annique tempestates, aduersus homines; aut impatientiæ, contra calamum malè aptatum. contra scalpellum hebetius; aut inuidiæ, aut affectus alterius. Quartò, Exigua peccata venialia, in paruis mendacijs, in verbis otiosis, in vanis cogitationibus, atque alijs similibus defectibus. Quintò, Parui contemptus & leues transgressiones regularum, quibus nos subicimus. Sextò, Minimæ imperfectiones, cuiuscumque conditionis eæ sint, vti, altius vocem attollere inter loquendum, propius ad mouere faciem, & os illi, quem alloquimur; ægrè obuios
salu-

salutare, decentem vestium nitorem negligere, dentibus inter comedendum, stridere, inter bibendum circumferre, oculos, salivâ audientes conspergere, & sexcenta eius generis vitia, quæ omnia amolienda sunt, quantumvis exigua videantur.

Alterum genus rerum minutularum, quas negligere non oportet, imò, quæ magno animo prosequendæ sunt, est primò, parvæ sensuum mortificationes, quas S. Valerianus modicas victorias, & paruos triumphos appellat. Secundò, modicæ abnegationes nostræ voluntatis & proprii iudicii. Tertiò, parvæ excogitatæ industriæ ad frænandos appetitus nostros, benèque operandum. Quartò, faciles & leues poenitentia, quæ exordia quædam sunt, ad satisfaciendum peccatis nostris, & debita purgatorii dissoluenda. Quintò, observatio regularum etiam minimarum. Sextò, Exercitatio & praxis actuum cuiuscunque virtutis, quantumvis exigui sint. Atque hoc est, quod intelligo per res minu-

minutas, quibus toto conatu incum-
bendum ^{est} siue ad illas declinandas,
siue prosequendas, prout earum feret
conditio. Si quis plenè se Deo tradere
cupiat, & magnos in virtute facere pro-
gressus. Et, vt mentem meam tibi de-
clare, existimo maiorem consistere
sapientiam in cura rerum minimarum
(quales mox proposui) quàm vulgò pu-
tetur. *a Quatuor sunt minima terra, &*
ipsa sunt sapientiora sapientibus, inquit.
Sapiens. Nimirum formica, lepuscu-
lus, locusta & stellio etsi mole minima,
sapientiâ tamen maximis antestant. An
non licebit mihi tantundem affirmare
de præclaris illis animabus, quæ in ocu-
lis suis exiguæ, dum paruarum rerum
adminiculo ad perfectionem & profe-
ctum spiritalem nituntur, esse re ipsa sa-
pientiores ijs mundi sapientibus, qui
parua dedignantur, neque manum ad-
mouent, nisi rebus magnis & speciosis?
Quæ potest esse maior, aut sublimior
sapientia, quàm diuinam sibi benemo-
len-

lentiam conciliare? *a* In minimo fidelem esse, magnum est, ait Augustinus. Et dubitari non debet, quin Deus parvis illis victorijs magna in cælo præmia largiatur: *Quia in modico fuisti fidelis, supra multa te constituam.* Imò, nec omitit etiam in hac vita aliquam eorum prælibationem concedere, impertiendo suos ijs fauores, qui magno animo & curâ rebus modicis intendunt. Testis est S. Odo Abbas, qui loco micarum, quas studiosè iuxta Ordinis sui institutum collegerat, reperit manum vnionibus gemmisque pretiosis refertam. Id quod accidit Abbati Hellen (memorante Palladio) æquè admirandum est: *b* aliquo mellis comedendi appetitu tenebatur, aderatque opportunitas oblato mellis alucolo; sed potiùs, quàm vt illud gustaret, frænum mortificationis arripuit, iussitque facessere improbam cupiditatem, & ne contactu quidem mel libauit. Aliàs, posteaquam tres se-

pti

a l. 4. de doctr. Christ. cap. 18.

b Hist. Laus. cap. 59.

ptimanas cibo poene omni abstinuisset, reperit fructus à vento decussos, & vt sine lauiticia duo triaue poma comedere potuisset, reliquit tamen intacta; tanti faciebat aliquam, in rebus etiam minimis, mortificationem. Verùm istud ita Deo placuit, vt paulò post, quàm has de appetitu suo victorias reportârat, Angelum illi submiserit, qui fontem indicauit, vbi tali cibo, potuque refectus est, vt fateretur se lautiores delicias nunquam degustasse. Fauores illi, quos Deus, similibus occasionibus, famulis suis elargitur, in mentem mihi reuocant id, quod de sorore Ioanna de Lino, Bononiæ Religiosâ in Monasterio S. Mathiæ, memoriæ proditum est: Hæc adhuc ætate iunior statuit sæculum deserere, inque istud Monasterium ingredi, quod in somnis videre sibi visa fuisset B. Virginem (cuius imago imminabat gradibus, per quos ad Cubile sororum ascendebatur) tot rōsas sinu suo excipere, quot reuerentiæ & inclinationes corporis, à sororibus ascendentibus, aut

aut descendentes, exhibebantur. Di-
uinum illud somnium effecit, vt & pro-
posito suo quamprimùm satisfaceret, &
magnis suis actionibus, multas minutas
admisceret, quas videbat à Deo tam be-
nignè liberaliterque compensari. Quan-
do animum aduerto ad diuinam boni-
tatem, quæ tantoperè minutulis illis
actionibus, mortificationibusque suo-
rum fidelium amantium delectatur, vi-
dere mihi videor Parentem benignissi-
mum, qui lubenter à manu filioli sui
pomum pyrumue accipit, ac deinde ve-
luti magno aliquo munere deuinctus,
illius manui inserit aureum nummum,
aut clauem arcæ, vt pro libitu suo fac-
carum, reliquaque eius generis condi-
menta, excipiat. Tam benenolus Deus
est, vt pari ratione nobiscum agat, & vt
parùm illi offeramus, centuplo com-
pensat, aut per gratias actuales, aut per
sensibilia solatia, aut per nouas vires,
aut aliter. Gaudium, quo afficitur, dum
videt nos sibi intendere, & minimis istis
actionibus præbere spem maiorum, pro

sua gloria & amore, subeundorum (*qui fidelis est in minimo, & in maiori fidelis est*) efficit, ut minimas illas habeat gratissimas acceptissimasque.

Hanc exactam diligentiam magnum opus esse sapientiæ, mediumque excellens, ad insinuandum se penitiùs in Dei amicitiam, necesse est; quandoquidem animaduerto hostem humani generis quadam affieci voluptate, & diligenter annotare, si ea negligatur S. Gertrudis inter nendum, quodam die, lanæ flocculos in terram abijciebat, cæterà magnā puritate intentionis Deo consecrabat laborem suum: crederes, visum ab illa Daemonem colligentem cos flocculos, veluti totidē argumenta neglectæ paupertatis? & quale istud est quod cuidam, in Monasterio Gignacensi, Religioso accidit? permiserat ille inter cibi sumptionem micas delabi in terram, easque perire contra Ordinis Regulam: adfuit morituro Diabolus visibili specie, sacæque micis refertum illi ostendit, ut redderet anxiam, & spem salutis eriperet,

ret, neque terrere destitit, donec feruentibus aliorum Religiosorum precibus, abactus est. Adhuc hoc loco (in gratiam eorum, qui, sine facultate de rebus paruis liberè disponunt) memorandus est insignis ille pavor, quo afflicta fuit quædam Religiosa cuius meminit S. Odo Cluniacensis: eum morte colluctanti exprobrauit Dæmon, quod sine superiorum licentia acum abstulisset, eam illa subito adferri voluit, iussitque loco suo restitui; sed cum nihilominus Dæmon persisteret (quod illam vehementius terrebat) occurrit, esse etiam sine facultate paucillum serici in capsula; quod ubi redditum est superiori, tandem hostis disparuit. Ex hisce discimus non tantum Dæmonem delectari hac nostra in rebus minimis negligentia, verum etiam, quam accuratam Deus à nobis exacturus sit, Oeconomiae spiritualis rationem. Dixi. Oeconomiae spiritualis, quia ingentis sapientiae est, per res modicas, quarum negotiatio, quam credi possit, utilior est, magnum lucrum

lucrum quæstumque facere. Interrogatus aliquando Lampis sapiens & opulentus Mercator, quo pacto tantas diuitias accumulasset? respondit: parua lucra magnificiendo, & magna non paruipendendo. Asseuerare possum, idē in amplificatione opum spiritualium vsuuenire: facillē enim cæ augentur, quando nulla, ne minima quidem occasio quæstus faciendi præteritur: *quemadmodum opes corporis accumulantur, cum amatores illarum, ne minimum quidem lucellum negligunt, sic spirituales diuitie*, ait more suo, eleganter Chrysostomus. Aduertimus præterea, bonos vitæ spiritualis curatores similes esse magnis fluminibus, quæ alueum suum non implent, neque exonerant se in campos adiacentes, nisi per accumulationem minimarum, sed prope innumerarum guttarum ex alto depluentium aut imitari aurifabros, qui Aurum limantes maximo studio, solertiâque limatibus omnibus tenuissimosque auri puluicellos colligunt, cum certi sint, etiam minu-

minutiarum illarum pretium non esse
contemnendum. Diceret Seruatorem,
hanc nobis curam inculcare voluisse,
quando nos in persona Apostolorum
monuit: *Colligite fragmenta ne pereant.*
Ita prorsus faciunt egregij, & feruen-
tes Dei ministri: nihil paruipendunt,
quantumuis paruum videatur; & in-
credibili affluunt voluptate, quoties e-
molumentum inde prouenientis & gloriæ
aliquando capiendæ meminerunt. *a*
Iucundum est audire reflexiones, quas
in rem præsentem circa ceremonias, in
officio diuino exhiberi solitas, facie-
bat beata Ioanna de sancta Catharina:
quid foret, si cæterarum quoque rerum
minutarum, quibus nunquam decrat,
animaduersiones adnotasset? Ad hunc
modum loquitur: aliquando animi
gratia, & vt me stimulare ad quæ-
stum ex omnibus, præsertim ex tem-
pore, quo nihil pretiosius est, colligen-
dum, numeravi nos, per annum in offi-
cio

*a Ex vita eius apud Ioan: à sancta
Maria.*

cō diuino, facere quinquaginta millia
ducentas profundiores corporis incli-
nationes, novendecim millia, quadrin-
gentas, octoginta minores, quæ vnā se-
xaginta nouem millia, sexcentos & o-
ctoginta actus Religionis, virtutis scili-
cet post Theologicas præstantissimæ,
conficiunt. Prætereà, nos iterare duo-
decies millies quadringenties, sanctis-
simam potentissimamque Orationem
Dominicam *Pater noster*, millies quin-
genties *Salve Regina*, & plus quadra-
gies millies *Gloria Patri*: obsecro te, cui
rei mentem applicabat religiosa illa
anima, & lucro spirituali intenta? e-
nimuerò deberemus nos similibus re-
flexionibus animum occupare, vt vel
inde agnosceremus, quanti lucri, spa-
tio anni vnus, & spatio decem anno-
rum, iacturam faciamus; proptereà
quòd minutas virtutum actiones, &
exiguas mortificationes nostrorum ap-
petituum negligamus. Tu cogita Ha-
giophila, & tandem constanti animi
proposito decerne, exactam adhibere

curam

curam rebus minimis, quas Deo gratas,
 vocationi tuæ consentaneas, & spiri-
 tuali tuæ necessitati proficias esse co-
 gnoscis. *Minimum pro magno placeat*
tibi: a Dictum hoc ore sapientis pro-
 latum tibi offero, vt cum affectu, & ani-
 mi voluptate, minimis exercitandis in-
 cumbas. Nihil tibi facilius est, sed neque
 gloriosius: adeo vt eximius ille vir Lu-
 douicus Blosius asseueret, magis Deo
 placere, vt vim aliquam inferamus no-
 stris propensionibus, nostræ sensualita-
 ti, & appetitibus, quàm si plures ad vi-
 tam mortuos reuocaremus. *Minimum*
pro magno placeat tibi. Nihil ages, quod
 prius sancti non fecerint: in vita S. Igna-
 tij legitur, eum tanta contentione ani-
 mi, rebus etiam minimis incubuisse, vt
 in ipsa fronte oculisque ardor emicaret,
 B. Aloysius Gonzaga tam exactus in si-
 lentio fuit, vt illud nunquam ruperit,
 tam sollicitus, ne quid sine superiorum
 licentia faceret, vt ne folium quidem
 chartæ, Condiscipulo dare voluerit, quod

T

prius

a Eccles. 29. 30. b Inst. Spirit. c. 2.

prius facultatem obtinuisset. P. Balthazar Aluarez, quo nullus teste B. Tereſia, co tempore ſanctius perfectiusque vivebat, extra tempus menſæ nunquam bibebat, nunquam ſchedulam ſine venia aut legebat, aut ſcriptitabat. P. Thomas Sanchez incomparabilis in cura, obſervationeque rerum minimarum, nunquam aut florem, aut fructum, aut folium in horto decerpiſit, & parem in cæteris omnibus mortificationem uſurpauit, & verò propoſitum illi erat, ex rebus omnibus inſtar mercatoris induſtrij, quæſtum facere. Verba illius ſunt in paruo Codice manuſcripto reperta: *Vita mea quotidiana, atque vniuerſa, ſimilis eſſe debet negotiationi ſpirituali, nec non mercatori cupido, & ad omne lucrum intento. Ad eum modum, Hagiophila, loquere, viuere, & age. Ille eſt ad perfectionem via.*

Si non ſufficiat hæc lectio. Lege cap. 8. 9. & 11. Tract. 3. Part. 1. Rodericij. Aut c. 31. & 32. lib. 3. de Imitatione.

Post lectionem renoua tuam, erga ſanctos tuos.

tuos Patronos, deuotionem, & vide quid
facere deinceps in eorum honorem ve-
lis, vt propitios experiare. In Confede-
ratione mea dixi capite septimo, quid
quid exhiberi ijs debet.

Sequitur præparatio Meditationis.

II. MEDITATIO.

De Conditionibus veri Amoris Dei.

Oratio præparatoria consueta.

Prelud. I. Propone tibi illud, quod di-
cit sacer textus de Reginâ Elther: il-
lam fuisse principiò paruulum fontem,
qui deinde creuit in fluuium maximum,
ex quo fluuius ignis, & ex igne sol ortus
fit, denique ex sole inundatio aquarum
in terras depluentium.

II. *Prelud.* Peto à Deo gratiam co-
gnoscenti prodigia omnia, quæ sunt in
anima Deum amante; & vt ista quinque
memorata sint in te.

I. *Punctum.* Pauillum Amoris diui-
ni, modicum huius riuuli & fontis, de
quo dictum est: *fons aquæ salientis in vi-
tam æternam*, maioris pretij est, quàm
omnes totius terræ thesauri, quàm om-

nes huius vitæ voluptates; quàm vni-
uersi mundi honores, Pauper, & miser-
rimè pauper, est ille, qui non saltem pau-
xillum habet huius amoris diuini, sed
amoris veri sincerique. Modicum & bo-
num sufficit ad cælum obtinendum &
salutem consequendam. Anima mea,
aliquidne tibi est huius modici & boni?
multum vereor; at ex sequentibus con-
ditionibus statum tuum collige.

II. *Punctum.* Verus Dei Amor sem-
per it promouendo, crescendo & se di-
latando ad modum fluuij. Vide an non
hæc fuerit semita sanctorum. Ipse Ie-
sus eam rationem tenuit, vt eius Amor
semper augeri videretur. Factus est ho-
mo, infans, mendicans, obediens, labo-
rans, prædicans, patiens, se in cibum,
porrigens, moriens: quò longius viuen-
do it, hoc maiora sui in nos Amoris de-
clarat argumenta. Hoc proprium est
vero Amori & diuino. Amor Creatu-
rarum (cùm sincerus non sit) alia ra-
tione procedit, nam quò res amata me-
lius agnoscitur, quò vsus illius est fre-
quen-

quentior, eò magis Amor minuitur : non satisfit animo, prima specie quis deceptum se videt. Vah Creaturas! vah me! non illudor amplius.

III. *Punctum.* Amor debet esse Ardens, feruens omninoque igneus, hoc est igni simillimus : expendas effectus ignis : consumit omnia, lignum, paleas, plumbum, metalla & quidquid denique inijcitur. Eodem pacto vrit diuinus Amor, absumit & annihilat omnes nostras imperfectiones. Ex numero imperfectionum tuarum arbitrari potes : quantus sit Amor tuus. Cor illud purissimum est, & à vitijs omnibus purgatissimum, quod ardet diuino Amore, & feruet in exercitio actionum suarum. Quod si ita est; quantillum erit in me diuini Amoris, qui omnia perago sine feruore, cum ignauia & tepiditate? fuerit id hactenus, imposterum ardebunt feruebuntque omnia, Amen.

IV. *Punctum.* Verus Amor est illustrans, radians & coruscans solis instar. Qui solem aspicit, illius lumine illustratur,

tur, & incalascit, inuitaturque ad latitudinem Conditoris: qui videt verum Dei amatorem, ex omnibus illius actionibus fructum capit, accenditurque ad imitationem, & ad laudes Deo reddendas, quòd talem Creaturam, istaque optimorum exemplorum lumina, mundo indulgeat. Denique nihil mundus habet sole pulchrius, nihil speciosius Dei Amore. Hoc amore, hoc sole da operam, vt anima tua *amicitiatur*.

V. *Punctum*. Verus Dei Amor adferre nobis maximam affluentiam, & quasi inundationem caelestium benedictionum, cuiusmodi sunt virtutes, desiderium tuæ perfectionis, & gloriæ diuinæ amplificandæ. Vide an ista habeas. Desiderium. Propositum.

Colloquium ad animam suam. Proponendo illi incitamenta, quæ habet ad amandum Deum, & emolumenta quæ inde ei accident. Anima mea! cùm negari ista non possint: faciamus, quod fieri necesse est, & faciamus, quàm primum, quàm optimè, quàm libentissimè.

me. Aut amandum est, aut pereundum;
nihil hic medium intercedit. Magne
Deus! omnino rapitur anima mea in
amorem tuum; hic fructus est solitudi-
nis meae, ut tota tua sit, non amplius
mea, ut dicere semper possim tam eorde,
quàm lingua: uiuat Iesus, & eius Amor.
Pater, Aue.

Recollectio. Visitatio Venerabilis Sacra-
menti. Examen conscientiae. Prandium.
Recreatio. Tempus scribendi: si aliud
non occurrat, enumera beneficia parti-
cularia tibi à Deo collata, ut de ijs quo-
tidie in Examine illi gratias referas.

Deinde aggredere lectionem spiritualem.

DISSERTATIO POME-

R I D I A N A.

De felicitate vocationis Religiosae.

A Nimis mihi dictat, Hagiophila, te
Dei domesticam esse, & in secessu
sanctae Religionis alicuius commorari:
vnde rapit me desiderium differendi te-
cum de ea, qua frueris, felicitate, ut il-
lam serio agnoscens, validius inciteris,
ad eum toto affectu complectendum,

T 4 qui

qui huc te aduocare dignatus est, teque voluit suo peculiariter obsequio mancipari. Et rectè quidem dixi, illam esse felicitatē: verum, vt assequaris, quid de illa animo concipiam, eius mihi adiuncta enucleanda sunt. Atque vtinam exprimere verbis possem sensa mea, & æstimationem illam, quæ iam pridem mihi insedit! non propterea tamen, quòd id arduum videam, à proposito meo discedo, cum ex modico illo, quod dicturus sum, iudicari facile possit, quousque excurrere queat calamus instructor, & maius acumē ingenij otio abundantis.

Primum Encomium, quod felicitati Religiosę vocationis attribuo, est, quòd sit felicitas & beatitudo huius vitæ maxima, sit incomparabilis, sit gloriosissima, sit maximè eximia. Alibi, quàm in domo Religiosa, melior habitatio, & fors fortunatior esse non potest: pluri mi Principes & Reges, multi Orbis moderatores, sextus & huius & illius, dignitates suas & delicias contempsere, vt aliquius Ordinis habitu induerentur. Bea-

ta Ioanna Princeps Lusitaniæ ita flexit,
 Superos precum suarum assiduitate, &
 Regem fratrem lacrymis mouit, vt tan-
 dem velum monasticum obtinuerit, pro
 Corona Galliæ, vel Angliæ, quæ perma-
 trimonium, cum Monarchis illis con-
 trahendum, præsentabatur. B. Zedmira
 filia Regis Æthiopiæ, cum à parente ad
 nuptias vrgeretur, noctu sola se prori-
 puit, & superato ingenti flumine (quod
 aquis vtrimque suspensis discesserat, vt
 siccum fugienti præberet iter, arceret-
 que, qui illam persequiebantur) felicissi-
 mè inijt Parthenonem Ordinis S. Domi-
 nici, vt frueretur bono tam optato,
 quòdque illa omnibus mundanis honori-
 bus anteponebat. a Magnus ille Dei ser-
 uus Franciscus Cordubensis, ex Magna-
 te Hispaniæ oriundus, tam altè verita-
 tem hanc animo suo impresserat. vt cum
 aliquando in familiari sermone mentio
 vocationis incidisset, asseruerit, in con-
 ditione sua, se Regibus ipsis esse felicio-
 rem, & paratum iuramento contestari,

T 5

quòd

a Ex Ioanne à S. Maria in Vn, SS. Ord,

quòd nollēt vestem suam Iesuiticam, neque cum purpura Cardinalium, neque cum Pontificis tiara commutare. Omnium rectè sentientium fuit hæc communis & constans opinio. Quàm volupè erat audire celebrem illum Ordinis nostri Scriptorem, P. Petrum Ribadineiram, quoties in laudem suæ vocationis excurreret! Quanto perè, aiebat, diuinæ bonitati obstrictus sum, quòd me à Mundi abstractum periculis, in sanctam domum suam admiserit, idq; maturè, anno ætatis decimo quarto, priusquam innocentiae terminos excessissem: post Deum, potissimā obligationis partem debeo S. Ignatio, qui mihi adfuit, & veluti manu in gloriosum hunc secessum duxit; & tanti facio huius magnitudinem beneficii, vt nunquam futurus sim ingratus; optarem ex animo, mihi occasionem offerri, vt in testificationem amoris in illum mei, membratim in frustra dissecarer: non detrectarem. Ad cumulū meæ felicitatis hoc vnicum requirebatur, vt ab ipso statim vitæ exordio

ordio in hunc ordinem ingrederer. :
quod si accidisset, feliciorem me crede-
rem omnibus totius vniuersi creaturis.
Alius è Societate nostra vir eximius, mi-
norem, hac in re gratiam non habebat :
fuit is P. Ioannes Baptista Mauiado Lusi-
tanus, qui in Iaponia Martyrio affectus
est; quando ille nuntium mortis pro
Christo subeundæ accepit : Laudetur
Deus, inquit, lubens morior, tres in vita
mea dies bonos habui, quos mille Mun-
dis præfero: primus est ille, quo Religio-
nem inij; secundus, quo in carcerem,
Christi causa coniectus sum; tertius hic
est, quando pro illius amore vitam &
sanguinem profundero debeo: hi tres
dies mei boni sunt, hæc tria nuntia feli-
cia: ipsi Angeli cum suis Legationibus
faustiora nuntiare non possent, & si vel-
lent inter mortales viuere, nullus dubi-
to, quin vellent Religiosi, Captiui, &
Christi Martyres esse. Verùm arbitrare-
ris, Hagiophila, hanc tantum esse opi-
nionem eorum, qui Religioso statui ad-
scripti, illum cæteris omnibus ante-

ponunt. Ignosce, communis sensus est etiam mundanorum: fatentur omnes, quando agnoscunt, quid sit cælum, & finis, propter quem conditi sumus, nullos esse quàm Religiosos, beatiores; & quamvis subire ipsi detrectent, illorum tamen felicitatem pro merito deprædicare non omittunt. Præclara fuit responsio nobilis Matronæ, quæ abhinc viginti quinque annis præsens adfuerat primitijs filij sui; gratulabantur illi id solatium, quòd acceperat ab huius sacri auditione; & animi voluptatem, quòd eundem filium suum apud nos Religiosum videret; profectò, inquit, meritò mihi gratulamini: tam enim iudico me fortunatam ex eo, quòd hic sit illius sancti Ordinis Religiosus vnà cum fratre altero; vt longè gratius mihi accidat, eos ambos esse Iesuitas, quàm si alter foret Galliæ Cancellarius, alter supremus armorum Præfectus. Sanè, si loqui mihi fas est, post Christianam illam Amazonem, dicam liberè, nullam mihi videri gratiam à Deo maiorem conferri hominibus

nibus posse, hoc præsertim sæculo tam peruerso, corruptoque, quàm si eosdem vocet ad obsequium suum in bonam aliquam Religionem, eoque Mundo educat, Mundo, tantis animæ corporisque periculis, infami. Qualiscumque conditio illic sit & fortuna, Religiosorum tamen est melior, & sine comparatione, excellentior. Non quòd omnia iucunda in Religione sint, nullæque cruce reperiantur (sine his enim non ducitur vita mortalis) sed quòd cruce hæ dulciores sint, faciliusque portentur, quàm mundanorum; Religiosorum cruce grata sunt, & spontaneæ, plerumque ob Deum susceptæ; sæcularium verò molestæ & sæpe intolerabiles ob conscientia, quâ torquentur, remorsum; deinde vt ait S. Bernardus, illi si crucibus abundant, affluunt etiam consolationibus. Sed ea mali origo est, quòd sæculares ignari horum solationum, credant Religiosorum cruce, grauitate & molestiâ suis non cedere. Aduertunt aliquam Dei ancillam Monastarij claustro contineri,

sed non cogitant eandem ex hoc Amoris carcere euagari, quoties lubet, per considerationem celestium gaudiorum, quæ expectat, ut de sua testatur Blesilla Hieronymus: *Blesilla unius inclusa cellula angustijs, totâ calis latitudine fruebatur.* Notabunt vitam Religiosam quotidianum esse Martyrium, ut loquitur Hilarius Arelatensis, aut Purgatorium continuum ab assiduis mortificationibus, quas suis inculcat, sed non reputant. Mundum, vitamque mundanam infernum esse, si Religio purgatorium est. Quam aduersionem Nepoti suo in Societatem nostram ingressuro suggessit. Venerabilis P. Cæsar de Buz: Chare Ne-
pos, inquit, quoties in cælum, stellas & solem, oculos intendes; memineris sedis beatorum, cuius imaginem præferunt; quoties Mundum intueberis, recordare damnatorum: horum enim Idæa est; & quoties statum Religiosum considerabis, propone tibi Purgatorium: Cruces enim illic reperies, sed quæ leues sint, & cum certa cæli obtinendi fiducia, quâ
Mun-

Mundus caret. Experire quidem par-
uum aliquem dæmunculum, qui te di-
uexabit, hoc est, passionem aliquam im-
portunam, sed longè mitiùs tecum age-
tur, quàm in Mundo, vbi dæmones im-
moderatarum & violentarum affectio-
num cupiditatúmque, per omnem vi-
tam miserum sæcularem exercent, ita vt
penes se continuò infernum circumfer-
re videatur. Sed prætereamus hanc ma-
gni viri considerationem, vt ista frua-
mur, quam B. Ægidius S. Francisci Co-
mes nobis prodidit, quæque opportu-
nissima est, ad vitæ Religiosæ beatitatem
oculis subiiciendam. Penamus igitur.
Mundum tam malignum non esse, at-
que illum descripsi, neque esse infer-
num, imò procul inde abesse: nihilomi-
nùs certissimum est, præstare aliquam
in Religione gratiam habere, quàm mul-
tam in sæculo, ex opinione sancti illius
viri; & ratio illius est, quòd hîc pericu-
la sint magna, & subsidia spiritalia non
sint tam frequentia, nec æquè valida at-
que in Religione, Inter mundanos vi-
uenti,

uenti, dici potest illud Sapientis: *Agnosce, quod in medio laqueorum transis; illi verò, qui inter Religiosos degit, vt felicitatem suam agnoscat, sufficit præclaram D. Bernardi sententiam in mentem reuocare: Nonne hac est Regio sancta. & immaculata, in qua homo viuit purius, cadit rariùs, surgit velociùs, incedit cautiùs, irroratur frequentius, quiescit securius, moritur confidentius, purgatur citius, premiatur copiosius? Deus bone! quid locupletius, quid præstantius homini Religioso dici potuisset? an non deceret, quemque illorum, ante oculos, perpetuò habere magnis characteribus expressum, hoc verum æquè atque admirandum Religiosæ vitæ encomium? vt sit, certissimum est, pericula salutem amittendi, animamque inficiendi peccatis lethalibus, non esse in benè constitutis Religionibus, quemadmodum sunt in vita sæcularium. Quando contigebat, vt aliqua sororum in risum prorrumperet, B. Mariâ Magdalenâ Vrsinâ existen-*

a Ex vit. SS. Ordini,

existente Nouitijs Præfectâ, illa eandem
& reliquas ad profusorem risum inui-
tabat, dicens, magnâ animi hilaritate,
quòd in domo Dei sub Regula D. Domi-
nici viueret: Ridete, filia, ridete, quan-
doquidem eam felicitatem estis conse-
cutæ, vt Mundum deserueritis, ab illius
periculis immunes, & in Cœnobio de-
gatis, vbi certatim omnes ad virtutem
connituntur, *Non fecit taliter omni Na-
tioni.* Iure meritissimo sic illa loqueba-
tur, cum animæ Deum & salutem aman-
ti non possit offerri materia solidorum
sincerorûmque gaudiorum copiosior,
quam dum se occasionibus Deum offen-
dendi liberam aduertit. An non ineffa-
bilis ista lætitia est, vixisse decem, vigin-
ti, triginta annos in domo Religiosa,
nullo admissio peccato mortali, cum mi-
seri sæculares omni adhibito studio dili-
gentiâque ab illis eximere vix se possint?
Etsi nullum aliud foret in Religione,
commodum, quàm vel vnicum morta-
le crimen euitare (posito, quòd non nisi
unicum in sæculo relicto admissemus)
arbi-

arbitror tamen optimè tempus collo-
ri, quàmquam esset annorum plurium,
& multis crucibus, poenis & afflictioni-
bus asperum. Qui nouit, quid sit Deum
offendere, & quanta vel vnus mortalis
peccati miseria sit, satis mentem meam
comprehendit, & semper fatebitur, nul-
lam exillere in hac vita felicitatem, quæ
cum gratia Religiosæ vocationis con-
ferri possit.

Adhuc vnico laudis argumento hanc
felicitatem afficiam, priusquam te dese-
ro. Proposueram quidem demonstra-
re omnibus, bonum Religionis esse in-
æstimabile, & idcirco dictum olim à S.
Scholastica: si intelligerent homines,
delitias & solatia, quæ Deus ijs elargi-
tur, qui hoc pacto illi seruiunt, Mun-
dum non suffecturum ambitu suo, vt
omnes in Religione viuere volentes ca-
piat, totumque vniuersum, vnicum fore
Cœnobium; aut vt B. Magdalena de
Pazzis ominabatur, vndique muri Mo-
nasteriorum admotis scalis superaren-
tur, ad locum in ijs sumendum. a Hoc

Ex Mich. Hier.

eodem

eodem instituto volebam tibi exhibere
quandam Neapoli Principem; quæ Re-
ligiosarum habitum assumpsit: dum sa-
cra vestis illi inijcitur, subiit mentem
cogitatio, magnam se gratiam apud Deū
promereri, quod tantos honores, regna
& diuitias, cum vili veste commutasset;
dum voluit animo istam cogitationem,
aperuit illi Deus mentis oculos, apertis-
simèq; ostendit omnem aularum pom-
pam, omnes Principum delicias, & quid-
quid in terra speciosum est, nihil esse, si
cum minimis bonis & gratijs Religio-
nis componantur; & tam clarè perspi-
cuèque hoc ipsa agnouit, vt erubescens,
quod talem in animum cogitationem
admisisset, affluere lacrymis cœperit;
statueritque diuinæ bonitati imposte-
rū maiores, pro incomparabili voca-
tionis beneficio, grates referre. Vole-
bam te per otium huic ceremoniæ præ-
sentem assistere, sed quis modus tantillo
tempore, quod mihi superest? sufficit
igitur (reiectâ in aliam commoditatem
huius inæstimabilis pretij probatione.)

ut nunc dicam beneficium Religiosæ
vocationis, esse beneficium solis Dei in-
timis, & apud illum gratiosis conces-
sum, quod non leue, in gratiam Religio-
forum, sed maximum laudis argumen-
tum est, cum ne optari quidem ab ho-
mine aliquid excellentius apud Deum
possit, quam ut intima sit illi familiari-
tate coniunctus, eiusque fauoribus per-
fruatur. Hinc aduerto in vocationibus
magna fauoris indicia. Deipara visen-
dam se præbuit B. Stanislaſo Koſtkæ iu-
ueni, eiſque ut Filii ſui Societatem ingre-
deretur, præcepit. B. Catharina de Ra-
conis publicè professionem Regulæ ſan-
cti Dominici faciente, cælica vox audita
eſt, apparuitque illi Ieſus cum Matre, &
reliquâ cæleſti curiâ, qui præſentes vo-
uenti aſſeſſe, actumque cohonestare vo-
luerunt. Vir quidam eximiæ ſanctitatis
audiuit aliquando, dum ſacer Virgini
habitus indueretur, muſicam Angelo-
rum concinentium: *Gloria in excelsis*
Deo, & in terra pax, Sponſe Virgini. Di-
ces, & quidem meritò, illas eſſe ſingula-
rius,

rium, atque extraordinariorum fauor-
um testificationes: accipe igitur ali-
quid commune omnibus, quod tamen
gratiæ titulum meretur; videlicet Reli-
giosos ea frui prærogatiuâ, quod in do-
mo Dei sint, illiusque domestici. Non
solet Princeps cuius è famulitio, sui Pa-
latij habitationem concedere, fauor is
ad solos Nobiles & Aulicos pertinet: ad
eum modum Deus facit, teste Hierony-
mo, *q.* & quibus eam gratiam benefi-
ciumque præstat, Religiosi sunt. A quo
non dissentit Bernardus illos alloquens:
*b. Altissima est professio vestra, cælos tran-
sit, par Angelis est: aliorum est seruire Deo,
vestrum adhaerere.* Sed amplius aliquid:
illam habent gratiam, vt Christo coha-
bitent. Rogata aliquando Venerabilis
Mater Maria à Iesu Fundatrix, & prima
Cœnobij S. Catharinæ Tolosæ professa,
cur tanti vocationem suam faceret, duas
causas attulit. Prima, quod in Religio-
ne degens, omninò Dei esset, per votum
Obedientiæ, & consignationem propriæ
volun-

a Vers. 1. in Psalm. 133.

b Ep. ad frat. de Mon. Dei.

voluntatis. Altera, quòd in Religione habitaretur eadem domus, quam Iesus sub speciebus Eucharisticis incolit, vbi cum illo libeat noctu diuque conuersari, necessitates suas aperire, amantia vota prodere, tractare negotium salutis suæ, gratias agere, quòd à mille iam & sexcentis annis, veluti Amoris captiuus, includatur nostris altaribus ad solatium subsidiumque nostrum. Sufficiunt hæc, Hagiophila, vt agnoscas excellentiam vocationis tuæ, & tibi promanantem ex ea felicitatem. In gratitudinis testimonium saepe vestem tuam deosculare exemplo B. Mariæ de Incarnatione, quandoquidem securissimam ad salutem viam ingressa es;

Si hæc Lectio non sufficiat, aut aliena sit, edò quòd Religioni nomen non dederis, prosequere ea in Rodericio, quæ manè tibi designauit: opportunissima sunt ad inflammandum animum diuino Amore, cum eius iudicium sit pura Intentio. Lege præcipuè caput vltimum. Si otium est, addi poterit Lectio cap. 33. & 44. libri 3. de Imitatione Christi.

Sequitur Examen virtutis, & quia magnū
Amor

Amoris, quo aliquis in Deum fertur, argumentum est, ingredi in Religionem, seque tribus votis obligare; idcirco hodie proposui, & Dissertationem de Vocatione, & Examen de Votis, præterquàm quodd suspicer plerosque, qui hac solitudine Hagiophilæ vtentur, fore Religiosos, & ided putavi rationi consentaneum, illis hac occasione satisfacere, eaq. proferre, quæ propius ad illos spectarent; præterea etiam vtile erit, vt ii, quibus octo dierum Exercitationes sufficient, se hoc postremo die penitus inspiciant, quoad peculiare obligationes, quibus diuinæ bonitati, ob cuius Amorem blandis hisce vinculis sese strinxerunt, sunt deuincti.

EXAMEN CIRCA TRIA VOTA. Paupertatis, Castitatis & Obedientia.

Praeter illa, quæ ad finem Examinis pro Confessione annuâ produxi, vbi attuli defectus, qui contra tria vota committuntur, poterit hic melius agnosci perfectio, ad illorum obseruationem, requisita.

Circa Paupertatem. Primò, *Leto patientiq. animo ferre defectum rei aliquam.*

qua

qua nobis aliquo modo necessaria videretur. Secundò, Sese etiam rebus necessarijs indignum reputare. Tertiò, Curam nimiam & superfluam rerum necessariarum reijcere in diuinam providentiam, Deo, Patri pauperum, confidendo. Quartò, Res superfluas, si nobis offerantur, repudiare. Quintò, Erga res nostris vsibus concessas non vehementer affici, neque anxie timere, ne nobis auferantur. Sextò, Non habere seposita curiosa, aut delicata, qualia essent fructus, dulciaria, & cetera eius generis, aliquo prae-textu, qui nobis blandiatur. Septimò, ~~Oblatus~~ commoditatum, quas habuimus. Octauò, Nulla in vestibus singularitatem desiderare. Nonò, Non curare res pulchras, elegantes, affabre factas & exquisitas, siue in Imaginibus, Libellis, Rosarijs, Numismatis, aliâq; supellectile. Decimò, Non auersari res viles siue quod trita sint, siue materia humilioris, imò cogitare, tales nobis deberi, & tum demum nos rectè agnoscere, quando sic pro merito tractamur. Undecimò, Amare pauperes, usque libenter stipem & charitatem erogare iuxta facultatem nobis à Superioribus.

periore concessam. Duodecimò, Singulis mensibus excutere semel cubiculum suum, ut videatur, num aliqua sit superflui. & contrarium Paupertati.

Circa Castitatem. Primò, Non conversari cum personis sexus differentis ex inclinatione natura, qua ubiq³ se querit, etsi sub specie boni, aut obsequij spiritualis. Secundò, Non contrahere amicitiam cum quibusdam, propter eà quòd iuvenes, blandi, benè vestiti, & incandi sint conviciis. Tertiò, Abstrahere se à colloquijs & aspectibus, qui motus causant inordinatos, & testantur cor esse amore captum. Quartò, Evitare occasiones occurrende, videndi, aut tangendi obiecta, quæ ineptas cognationes suggerere possent. Quintò, Abstinere verbis amorem testantibus, etiam inter personas parvi sexus, cum nullum ista usum habeant, nisi ut accendant flammam, quæ tam facile, quàm vellemus, extinguere non poterit. Sextò, Nunquam proferre verbum puritati contrarium, siue occulti, siue duplici sensus, seu tale, quod speciem minus honestam posset animo imprimere. Septimò, Non loqui de forma, de venustate,

de alijs corporis dotibus, de blanda affabilitate alicuius, hac enim cor castum emolliunt. Octauò, Priuatim eam seruare decenciam, quasi in oculis virorum grauius essemus.

Quoad Obedientiam. Primò, Promptè exequi quod precipitur, sine oblocutione, sed generosè & humiliter. Secundò, Obtemperare etiam naturâ repugnante. Tertiò, In eo qui aliquid mandat, Deum agnoscere, eiq; tamquam Christo, obsequi. Quartò, Paratum esse ad obediendum in omnibus, in quibus manifestè peccatum non apparet. Quintò, Obedire etiam Superioribus, qui essent vita flagitiosa. Sextò, Dispositionem voluntatis nostra, rerumque aliarum ad nos spectantium integrè committere Superioribus, & accipere velut à manu Dei, quidquid de nobis constituerit. Septimò, Ad minimum Superioris nutum obedire. Octauò, Et in ijs libentius, quæ difficiliora abiectioraq; videbuntur. Nonò, Obedire cecè nullâ mandati ratione inquisitâ, subiectoq; iudicio proprio, iudicio Superioris. Decimò, Apud animum suum

& contra quoscumque tueri, quidquid fuerit de alijs, aut nobis ordinatum.

Tempus Officij, vel Precum vocalium.
Deinde huius Considerationis.

CONSIDERATIO.

I. **I**N negotijs Mundi cura est diuturnior, labor operosior, fructus minor, & consecutio eius, quod intenditur, difficilior. In Dei seruitio, & prosecutione Amoris eius, prorsus contrarium observatur: adeò verum est, quòd *omnia sint vanitas, prater amare Deum.*

II. Diuersi amantium, Deoque fervientium Ordines sunt: In primo numerantur, qui illum amant, neque ullius rei pretio inducerentur, vt eum lethali peccato offenderent, verum hìc consistunt & peccatis venialibus, vbi cumque sese offert occasio, liberè & sine cura indulgent. In secundo sunt, qui etiam peccata venialia non admittunt, nisi per subreptionem, adeò illa abominantur, sed de passionum & appetituum mortificatione parum sunt solliciti. In tertio, qui frangunt quidem & domant omnes

passiones suas, nulla neglecta. verum ad
 sublimium solidarumque virtutum ac-
 quisitionem non connituntur. In quarto
 denique sunt ij, fideles, egregij, & per-
 fecti amantes, qui nihil omittunt eo-
 rum, quæ ad virtutis consummationem
 amplificationemque diuinæ gloriæ faci-
 unt, quantacumque contentione & di-
 spendio opus sit, nunquam dicentes *suf-
 ficit*, sed ad vltiora semper se promo-
 nentes. In quo ordine tu consistis? quid?
 etiam nū in primo? Vah! istud est, quod
 Angelus tuus, & B. Virgo obstupescit.

III. Quod rebus omnibus bonita-
 tem & elegantiam conciliat, Amor Dei
 est: ita nihil deformius animā hoc amo-
 re destitutā, neque quidquam amabilius
 corde veri sincerique amantis. Atque
 hoc adeo verum est, vt Deus pluris fa-
 ciat vnā animā illius amore flagran-
 tem, illique soli placere cupientē, quā
 reliquam totius vniuersitatem naturæ.

IV. Erras, anima mea, non in magnis
 solum actionibus, quæque speciose sunt,
 Amoris diuini magnitudo reperitur;
 etiam in paruis, humilibus, & secretis
 exi-

existit. Amor inaurat & amplificat omnia; & Iesus laudibus extollit viduam illam, quæ duo æris minuta contulit, & silentio præterit Salomonem, qui, subductis rationibus, plusquam bis mille millones auri ad templi structuram contribuerat.

V. Semper audij, cogorque credere, scire neminem posse, vtrū in Amore Dei eiusq; gratia viuat; & illud est, quod me sollicitum tenet atque anxium. Optimè, quod thesaurus absconditus est Amor: talis illū possidet, qui possidere se nescit. Tantū existimemus, nos nihil hactenus dignū Deo fecisse, & vehementi desiderio optemus illū amare, & de virtute progredi in virtutem; sentiant alij, quod libuerit, ego aio, illic sedem esse Amoris.

VI. Nullius rei maiori cupiditate teneor, quàm vt æstimem me aliquo ferri in Deum amore. Nullam cupio ex vlla creatura voluptatē, sed tantū ex Creatore. Omnis mea delectatio est, vt delectetur Deus. Vtinam millies millena millia talium cordium haberem, quale fuit cor sanctissimæ Virginis, & omnes o-

inipium Beatorum virtutes vnus posside-
rem ! vt amarem & seruirem Deo meo
omnibus illis cordibus, & exercitatione
omnium illarum virtutum ! istud de-
mum esset illum amare, & certissimum
indicium Amoris, sub hac flamma, la-
tentis.

Hora quietis & relaxationis animi, deinde
Officij, vel alterius Orationis vocalis.
Visitationis Vener. Sacramenti, denique
præparationis ad Meditationem seq.

III. MEDITATIO.

De exemplis Sanctorum in amando Deo.

Oratio præparatoria consueta.

I. **P** *Preludium.* Proponere tibi sanctos Pa-
radisi Incolas, eos præcipuè, qui tibi
in veneratione sunt, & singulatim illos
interroga, quâ ratione sint istam glo-
riam consecuti. Respondebunt verbo
Dauidis: *Dilexi.* Idem pete à S. Maria
Magdalena; dicet: *Dilexi multum.*

II. *Prelud.* Pete gratiam, vt Sancto-
rum, Deum amantium, exemplo profi-
cias, amésque quemadmodum illi ama-
uère.

I. Pun.

1. *Punctum.* Considera primò Amorem, quem Deo testatus est Patriarcha Abraham, quando tantà animi magnitudine decreuit obtruncare Filium suum *unigenitum, quem diligebat*: insigne perfectò Amoris argumentum; vnde Deus videns gladium iam strictum & imminentem collo Filij, clamavit: Siste Abraham, iam nunc cognoui, quòd ames me, cum non peperceris Filio tuo unigenito propter me. Velle obtruncare id, quòd charissimum est, vt Deo obtemperetur, & in testificationem sui erga eum Amoris, hoc demum verè amare est. Secundò, Amor S. Pauli, desiderantis anathema esse, hoc est, vt nonnulli explicant, non tantum societate fidelium excludi, sed etiam addici inferno, sine iactura tamen gratiæ diuinæ, pro salute proximi obtinendâ, idq; ex amore Magistri sui Iesu, verè ingens & solidus fuit; vt etiam is, quando asserere ausus est: *Certus sum, quia neque mors, neque Vita, neque Angeli, neque Principatus, neque instantia, neque futura, neque fortitudo, neque altitudo, neque profundum,*
V & neque

*neque creatura alia poterit nos separare à
charitate Dei.* Tertiò, Nec minùs ama-
uit Anselmus, quando dicebat se tanto
Amore ferri in Deum, vt mallet eo præ-
ditus demergi in barathrum inferni,
quàm cum aliquo peccato euehi in cæ-
lum. O Deus amorum meorum! cur
non immolo tibi meum Isaacum, meas
voluptates, mea vota & desideria, quid-
quid denique mihi charissimum est? cur
non firmissimo animi decreto statuo, te
nunquam offendere qualicumque obla-
tâ occasione: imò statuo, & damnari
malo, quàm deserere Amorem tuum.

II. Punctum. Expende primò Amo-
rem Catharinæ Senensis offerentis se, vt
in inferni aditu collocetur, quo sui ob-
iectu corporis impediat, ne vllus impo-
sterùm eò præcipitetur, vtque Deus
ametur ab omnibus quamuis necesse
foret, ita illam beatissimo Dei aspectu
priuari. Secundò, illum S. Teresiæ di-
centis, se pati sine inuidia posse, vt alijs
cedat in gloria cælesti, vt tamen cui-
piam concedat in amando Deo, tolerare

non vel'e. Tertiò, illum amorem S. Alexij, qui patrem, matrem, ipſam, opes, honores & voluptates deſeruit, vt peregrinum totis ſeptendecim annis ageret, & totidem deinde annis ignotus ſub ſcalis domûs paternæ tranſigeret vitam: idque ex ſolius Dei Amore. Mortales, & tu, anima mea, cuius rei inuidia tangimini, ſi non horum amantium, vt paribus amoribus ardeatis?

III. *Punctum.* Meditare primò amorem S. Franciſci, verè Seraphici in amore. Nulli creaturæ adhæreſcebat: cor eius plenum erat Deo, & omnibus creatis rebus vacuum; ex hoc Lemmate colliges: *Deus meus & omnia!* Secundò, illum S. Auguſtini, qui in omnibus ſcriptis ſuis non aliter de Deo, & pro Deo loquitur, quàm amator vix ſui potens. Illum laudat, illi benedicit, illum glorificat, deſiderat vt ab omnibus ametur, in amorem illius toto affectu, toto corde, & conatu rapitur. Inde cor igneum illi appinxere artifices & à nonnullis aliquando Cor ſanctum dictus

est, vt ostenderent amorem Dei, si perderetur, in corde S. Augustini posse reperiri. Denique illum S. Magdalenæ, quæ per tricenos annos in speluncam se abdidit, vt prosequeretur cum amorem, quo eum iam *multum diligere* cœperat. O Dei amatores! aliquid de amore vestro mihi concedite: cui enim bono cor meum, & amor meus & quidquid in me est, si non pariter, atque vos, amo!

Colloquium ad hos & alios sanctos Dei amantes. Admirare illos, Gratulare, eodem anhela. Pater, Aue.

Recollectio. Lectio Thomæ de Kempis fortuita. Rosarium. Visitatio Venerabilis Sacramenti. Cœna. Recreatio. Litanïæ Sanctorum. Visitatio Venerabilis Sacramenti. Præparatio Meditationis crastinæ. Examen Conscientiæ. Quies, sed prius Terram ter deosculare in honorem SS. Trinitatis. Faciunt id nonnulli mandè, dum surgunt, & Vesperi, dum cubitum concedunt, vt coram Deo se humilient, & vt mortis, & pulueris, in quem reuersuri sunt, meminerint,

Fiat Voluntas tua sicut in Carlo. & in Terra IX



T. Hoffmann delin.

W. Kuhn sculp.

2. netto

NONVS DIES.

*De conformitate nostra voluntatis
cum diuinâ.*

Hagiophila, si otium & animus tibi est, vt duos adhuc dies solitudinî tuæ impendas, en materiam. Parum est amare Deum, nisi idem velis, quod ipse vult; & in eo cardo rei vertitur, vt scias qua id ratione fieri oporteat. Dabimus hodie operam huic studio.

Visita Venerabile, & ad Meditandum te para.

I. MEDITATIO.

*De incitamentis, ad conformandam
nostram voluntatem cum
diuina.*

Oratio præparatoria conclusa.

Pralud. I. Propone animo tuo Dei filium dicentem, nihil aliud sibi placere, nisi quod sit ex beneplacito, & voluntate Dei Patris, *Quæ placita sunt ei, facio semper.*

II, *Pralud.* Utinam possem semper

V

v

velle quod Deus vult, & me conformare cum sanctissima illius voluntate ?

I. Punctum. Nihil Dei voluntate, & Conformatione cum illâ, est amabilius. Ah quis illam non amet ! Ah quis hanc non amplectatur ! quandoquidem vivere cum hac consensione, sit primò, habere cor, secundùm cor Dei, quod de Davide sacrae paginae testantur, *vir erat secundùm cor Dei.* Secundò, est velle, quod Deus vult, & nolle, quod Deus non vult. Aliquâne certior securiorque regula excogitari potest ? Tertiò est acceptare omnia de manu Dei, & promptum paratumque esse, ad quiduis, quod paterna illius providentia disposuerit, seu prosperum, seu aduersum, seu ad modicum, siue ad longum temporis intervallum ; siue opera amicorum, siue hostium ; siue merearis, siue præter meritum tuum sit ; siue naturæ genio eò rapiare, siue inde abhorreas ; ut vt sit, semper amabile est, quidquid amantissima Dei manus porrigit & disponit. Ratum statutumque apud me est. ô Pa-

ter amantissime, sequi nutum adorandæ voluntatis tuæ. Homo committat Medico valetudinem suam, lites aduocato, & vitam suam (si oculis captus est) Puero, & Cani subinde, vt deducatur; & ego dubitem me tibi concedere, qui es bonitas ipsa, & qui maiore cura sapientiaque nos gubernas, quàm desiderare ipsi possemus?

II, *Punctum*. Omnia me sollicitant, vt me conformem diuinæ voluntati. Primò, peccato excepto, nihil euenit sine expressa Dei voluntate. Morbi, valetudo, honores, opprobria cuncta, ab illo accidunt. Vnde Iob facta omnium fortunarum suarum iactura dicebat; *Dominus dedit, Dominus abstulit, sit nomen Domini benedictum*. Secundò, creaturam iure meritissimo conuenit subiectam esse suo Creatori, & seruum Domino: *Nonne Deo subiecta erit anima mea?* Tertiò, omnes Creaturæ, etiam vitæ & sensus expertes, Dei voluntatem exequuntur. Quartò, sancti omnes, & quicumque aliqua perfectionis laude

floruerunt, hanc vitam regiam tenuere. Scilicet decebit, ô anima mea, vt hinc deflectas, aliamque ab illis semitam ingrediaris?

III. *Punctum.* Quod maximè ad hanc Conformitatem allicit, est singulare animi solatium promanans ex eo, quòd quis possit obsequi tanto Domino, velle, quod ille vult, omnia accipere veluti ipsius benignissima manu porrecta, nullius rei affectu duci, aut cupiditate; vt-cumque cadat, acquiescere, & consentire. Quanta felicitas, dicere posse diuinæ Maiestati viuendo moriendoque: *sic placitum est, sic fuit, ante te: Fiat voluntas tua.* Non me oppono: nollem aliter. Melius loqui non posset Angelus incarnatus, neque maiori lætitia animique voluptate deliniri, si inter nos ver-faretur.

Colloquium: magne Deus largire mihi hanc cum amabili tua voluntate consensionem: tam frequenter dico me amare te, ast vbi est amor meus, si non, idem volo, quod tu vis? quicumque
amant,

amant, idem velle habent & nolle ad omnia, in quibus virtus non offenditur; & ubicumque parùm amoris est, modica quoque reperitur hæc voluntatum consensus, vbi multùm, magna est: cur, ergo non penitus consentio diuinæ voluntati tuæ, vt vel isto indicio colligam magnum esse aduersus te amorem meum? Pater, Aue.

Recollectio Meditationis. Delectus tessera, dictum D. Pauli est: *Domine quid me vis facere?* Istud vsurpare poteris, vel illud ore seruatoris probatum & omnibus familiare: *Fiat voluntas tua sicut in calo, & in terra.*

Sequitur pars aliqua Officij, aut alia Vocalis Oratio. Deinde sacrum. Tum Lectio spiritualis, vel hæc, vel alia.

DISSERTATIO MARTINA.

De damnis voluntatis propriae.

SI in mundanos homines conijcias oculos, soli sapere, totaque frui prudentia videbuntur. Quando de suspecti operis confectione agitur, tangunt

illi præ cæteris nodum difficultatis, & qua parte arripi negotium debeat, no-
uerunt. Præsertim milites valde gnari
sunt, in votorum suorum prosecutione,
ut ab hostibus victorias reportent:
Ita sumus militiæ præfectus, ut res suas
asserat, nitetur viribus omnibus redige-
re in potestatem suam Regni Metropo-
lim, si cæterarum urbium occupatio-
nem meditetur; aut verò partis aduersæ
Ducem opprimere, si prælio decertare
constituat; cum non ignoret, Duce su-
perato facile subijci reliquos milites; &
capta Metropoli, secuturam cæterarum
urbium deditionem. Quam ob rem Go-
thi rectà Romam petiuere? nisi quòd à
prudencia militari didicissent, tum se
Imperij Occidentalis fore Dominos,
cum vrbe, orbis domina, potirentur?
Cur Artesiæ Comes author erat fratri
suo, S. Ludonico Regi, quando mare
traiecerunt, ut Babylonem tentaret? nisi
ut Regia vrbe occupatà, totam facile
Ægyptum suæ ditioni subijceret? unde
rebelles Hugonottæ toties ciuitati Pari-
sienfi

siensi sunt insidiati? nisi quòd illa do-
 mita, crederent cæteras sine labore
 spontè cessuras? quidquid hac ratione
 suscipitur, felici successu non caret:
 contere serpentis caput, & actum de
 vita illius est; fontem exsicca & fluere
 riuus cessabit; Conchæ vnionum geni-
 trices Regem habere dicuntur, illum re-
 tibus tuis include, & cæteras cepisti; e-
 uerte fundamenta, & domus concidet;
 Arcis portam occupa, & arcem vicisti;
 Cor serua & vitam asseruisti. In omni-
 bus negotijs sæcularibus, ad eum omni-
 nò modum, proceditur; rei principalis
 curam habe, & accessoria consequetur;
 hæc summa sapientiæ prudentiæque hu-
 manæ est, & mundanorum.

Sed bona illorum pace, reperinntur.
 Dei serui, filij lucis, qui in prudentia filijs
 tenebrarum non concedunt; præsertim
 quando de amore diuino, solidisque vir-
 tutibus comparandis, agitur: solum in-
 rem præcipuam intendunt, securi, quod
 cætera nullo negotio sequentur. Et quia
 grauiores hostes nò experiuntur, quam
 pas-

passiones & cupiditates proprias, illarum præcipuam adorianur, vt illâ deuictâ, cæteris quoque imperitent; Metropolitim petunt, & Babylonem, tum demum se victores, dominosque omnium reputantes, vbi hanc oppresserint.

Patere, Hagiophila, me nunc saltem augurem esse, & hodie vaticinari, quænam sit tuarum passionum Metropolis, quis Dux tuorum vitiorum, quæ scaturigo, vnde spirituales tuæ miseriæ emanent, vt secundum optima tua proficendi desideria, Babylonem hanc, hunc hostem capitalem aggrediaris, vt eorum iugum excutias, illoque prudentiæ in vita spirituali tam necessariæ officio ritè fungi possis. Optarem te esse, de filiis lucis, qui quâ oportet, gradiuntur, & de egregijs illis militibus, qui vt decet, hostem intadunt.

Aut grauitè erro; aut verum est, te plenam esse amore proprio, inclusamque in arce tuæ propriæ voluntatis detineri, vbi tui amans, & commoditatum tuarum, appetituum, sensualitatumque
recti-

retinens, velut in firmis aggeribus te,
Deo inexpugnabilem exhibes: effectus
gratiæ illius & robur inspirationum in-
ternarum parum, aut nihil apud te euin-
cunt. Neceſſe igitur eſt, id à te obti-
neam, vt maledictam illam propriam,
voluntatem procul amandes, quando-
quidem tacitè fatearis, eam plus nimio
in te dominari. Alio perſuaſionis arti-
ficio non vtar, quàm demonſtrando il-
lam eſſe malorum omnium peſſimam;
& puto, ſufficiet, vt diſcas eam cane pe-
iùs & angue abominari. Tam improba
eſt, inquit S. Bernardus, vt ludibrio ha-
beat omnia: illi, ſi frænum laxes, neque
lex eſt, neque Deus; cuncta implet fa-
ctionibus, ſeditionibusque, omne ratio-
nis bonarumque affectionum lumen,
extinguit. *a* *Illà natura docet nos non*
parcere, rationi non acquieſcere, non ob-
temperare ſaniorum conſilio vel exemplo.
Vnicus actus propriæ voluntatis in re,
paulò grauiore ſufficit, ad conuellendas
omnes animi vires, ad perturbandam

con-

a Serm. 19. in Cant.

conscientiam, eamque in periculum ruinæ adducendam. Conferens aliquando cum viro graui de quodam Religioso, qui à vocatione sua resilierat, quantumuis excellere virtutibus videretur, aiebam mirari me vehementer hanc luuenis ruinam: quid, inquit, tantoperè mirandum est? vnica indignatio sufficit, vt animum immutet, atque de malo in peius vsque ad ipsum præcipitium deducat. Et quid aliud indignatio est, quam actus propriæ voluntatis, & amoris erga se inordinati, qui præ rebus alijs omnibus infert animæ (cæco quodam impetu in perniciem ruenti, neque præuidenti secuturos euentus funestos) incredibilem vastitatem? Ea saltem D. Bernardi opinio est: *a Nihil sic extinguit spiritum discretionis, quomodo propria voluntas subuertens corda hominum, & rationis oculos claudens.* Sanctus ille vir satis habebat experimenti, vt istis coloribus pessimam creaturarum exprimeret, & velut perniciosissimam diffama-

a Serm. 19. in Cant.

famaret. Fortassis ab Apostolo didicerat, eam tali æstimatione prosequi : nãnt D. Paulus nullam ex omnibus creaturis, nisi hanc timebat, & quando cæteras omnes, quæ constantiam suam infringere, Deique amorem labefactare potuissent, in apertum quasi duellum provocauit, hanc aggredi nominatim, ausus non est. *Certus sum, inquit, quod neque mors, neque vita, neque Angeli, neque Principatus, neque virtutes, neque fames, neque nuditas, neque persecutio, neque gladius, neque periculum, neque angustia, neque fortitudo, neque creatura alia poterit nos separare à Charitate Dei.* a En inuictum Apostoli animum, qui nihilominus propriam voluntatem metuat, neque audeat illam vti cæteras prouocare, adeò sciebat illam, præ reliquis omnibus, nequam esse, atque formidandam. Quòd si illam citet, facit id dumtaxat sub generali creaturæ vocabulo : *neque creatura alia poterit nos separare.* Neque puta hanc meam esse animaduersionem

in.

a *Ad Rom. 8.*

in verba Apostoli, ipse D. Bernardus id egregie annotauit: *a* *Cum tot & tanta dixisset Paulus, unam scilicet propriam voluntatem reticuit, quæ saluationis, & damnationis est causa.* Illam ergo Apostolus non nominauit, etsi nequitiam illius & periculum haberet perspectissima. Sed ad eam aliquem maiori præditum fiducia, qui nobis naturam huius propriæ voluntatis exponat, dicatque, qualis bellua sit hæc detestabilis creatura. Facile illum reperiemus, neque aliò iri necesse est, quàm ad eundem S. Bernardum, qui iam mentem suam utcumque patefecit. Adeundus ille potius est, quàm alius, cum viam eius imaginem proponat, cum horrendum illi bellum indicat, cum detegat illius malitiam, & cumulum damnorum ex ea prouenientium, sensu, quàm alius, acutiore. Ex tanta malorum congerie, quæ de illa diuersis locis operum suorum enumerat, non attingam, nisi duotriaue, ut ex ijs arbitreris, num iniuriã dixe-

a *Lib. de Conscient. in proemio.*

dixerim, illam esse pessimam perniciosissimamque.

In declamationibus suis potissimum aduersus illam perorat, infamatque sanguisugæ nomine : *fuge hanc sanguisugam propriam voluntatem, & omnia reliquisti, hæc enim omnia trahit ad se : depone illam : & iugum tam importabile, quàm multiplex, abieciisti.* Soli sanguisugæ vocabulo inhæreamus, plurimos enim sensus comprehendit : sanguisuga trahit & exsugit omnem sanguinem, etiam valentem, si eius auiditati indulges, & vires vsque ad animi deliquium debilitat : ita prorsus voluntas propria : nihil tam valens, tamq; sanum apud te est, quod illa non sorbeat, cuique pestiferum suum os non applicet. Particeps esse vult actionum etiam sanctissimarum, & ex genere suo optimarum, sed eas sibi arrogando labefactat, corrumpitque. *a* In Isaia nonnullis res stupore digna videbatur, quòd Deus eorum ieiunijs, & submissionis actibus non afficeretur, adeoque queruli dicebant : *Quare ieiunauimus, &*

a Cap. 58.

non

non aspexisti; humiliamus animas nostras, & nescisti? paucis Deus respondit: *Ecce in die ieiunij vestri inuenitur voluntas vestra.* Mirari desinite, quòd quidquid agitis mihi displiceat, vestram voluntatem, non meam, facitis; hæc vnica ratio est, alia inquiri non debet. En Hagiophila, materiam, quæ terrorem incutiat Narcissulis illis, suarum tantum rerum amatoribus, quique viuere nolunt, nisi suo arbitrato, & iuxta beneplacitum suarum voluntatum, etiam in rebus, quæ speciem boni præferunt. Dicit hic: volo concionari, volo tali fungi officio, quod ad genium meum est, & quidem hoc loco, non alibi; ille animum obfirmabit aduersus adornationes, & vsum communitalis, vt viuat more suo: dedet se deuotionibus omninò peculiari- bus, assumet pœnitentias & mortificationes à recepta consuetudine alienas; quia ita vult, & voluntati suæ arbitrio- que obsequi placet. Horrendum! nihil horum Deo acceptum est, vana sunt omnia, sine merito, neque vllò gloriæ præ-

præmio remuneranda; hirudo ista delibavit, placere Deo non possunt. Hirudo execranda! quæ nonnunquam usque ad extremam stillulam, totum sanguinem exsorbet: ita maledicta propria voluntas, subinde ipsam quoque ex fugit gratiâ vocationis: imò verò, vidi quosdam quòd addicti essent propriæ voluntati suæ, nihilq; agere vellent, nisi quòd lubebat, turpissimè defecisse, malentes sæculum repetere, quàm se submittere Dei & superiorum voluntati; imò verò, noui, qui laqueum circumferunt, quique excussa vera libertate filiorum Dei, quæ in benigna submissione consistit, ut collum falsæ deceptoris quæ libertati subijcerent, ignorant, quò tandem deventuri sint, inter tot tamque periculosas huius mundi procellas, quibus continuò agitantur; eò quòd neglexerint tollere sanguisugam illam, & contererè perniciosam hanc propriam voluntatem, quæ illos calamitatibus inuoluit, quarum possent æternū poenitere. Imò verò, scio esse in domibus Religiosis, il-

los & illas, quibus ad emergendum con-
 tendendumque ad perfectionem vires
 defint: funesta illa hirudo aufert omne
 generosum sanguinem, & propria vo-
 luntas, quæ libita tantum exequitur,
 sic illos debilitat, ut vitam ducant lan-
 guentem, ignauam, imperfectionibus
 vitisq; refertam, quæque intuentibus
 stomachum & nauseam moueat; omis-
 sis molestijs incredilibus, quibus supe-
 riores affligunt, & pessimis exemplis,
 quibus alios integramq; familiam cor-
 rumpunt. Et quænam horum malorum
 causa est, & origo? nisi propria volun-
 tas, nisi peruersissima illa creatura, quam
 nominare Paulus non audet, nisi dete-
 standam illa hirudo, cui S. Bernardus, tam
 malè imprecatur? Licet et mihi, per o-
 tium, reliquos ipsius titulos recensere;
 non dubito, quin eam magis, quàm
 mortem reformidares, & velut Infer-
 num execrareris: posteaquam dixit eam
 esse sanguisugam, addit: *Non est Domi-
 nus crudelis ad illam, non est Tyrannus,
 tam impius & inhumanius, sic vrgens ser-
 uulum;*

*Malum; inquietum malum, nullum onus
importabilius, nulla grauior est sarcina.
Propone tibi ob oculos omnem crude-
litatem barbaricamque alicuius Tyran-
ni; & vastitates omnes, quas animæ in-
fert propria voluntas, vidisti. Adferam-
ne præterea, quod idem S. Doctor ali-
bi de illa pronuntiat? cum vipera com-
ponit: *Cauemus, inquit, à propria vo-
luntate tanquã vipera pessima, & nequis-
sima, qua sola deinceps damnare possit ani-
mas nostras.* a Istud profectò est, quod
terrorem ijs queat incutere, qui volun-
tati suæ contra diuinam & superiorum
voluntatem obsequuntur. Auertat à
nobis Deus hanc crudelem viperam,
quæ suam Matrem, hoc est, animam,
eviscerat atque interimit. Cuius for-
midanda est, quisquis enim suis opi-
nionibus vehementius adhærescit, &
propriam voluntatem, velut idolum,
adorat, duobus solum digitis ab infer-
no abest, & prodigij instar erit, si eua-
dat. Testis est deplorandus ille Mona-*

X. 2. chus

a Serm. de relinq. propr. volunt.

chus Heron, qui quadraginta annis benè sanctèque peractis, morsus ab hac diabolica vipera, corporis animæque iacturam fecit: *a Vipera pessima, qua sola damnare possit animas nostras.* Ex omnibus hisce discamus, quanta sit eorum, miseria, qui solam peruersæ suæ voluntatis directionem sequuntur. Nonnullos reperias, quibus nihil placet, nisi quod est ad palatum sensumque suum; diceres eos regi à Spiritu sancto, adeò nihil rectè factum est, nisi quod illi volunt, quodque approbant. Miserae victimæ sunt, quibus sanguisuga optimum sanguinem exhauriunt, sunt mancipia furori & violentiæ crudelissimi Tyranni subiecta; sunt creaturæ traditæ viperis, quæ eas dilaniant, & vitâ privant. Clariùs, quàm vnquam aliàs, video animæ Religiosæ abstinendū penitus à vocabulo illo: *Volo.* Esse debet, sine voluntate, aut ita se gerere quasi illius foret expers, nullum illi exercitium permittendo, sed velut mortuam sepul

a. Ex Cassiano, & Roder. Tract. de Obed.

sepultamque tumulo obedientiae habendo, quod egregie innuit S. Ioannes Climacus, dum ait: *Obedientia est sepulchrum propriae voluntatis.* a Quisquis ita fecerit, voluntatem suam, cum voluntate Dei, aut Superioris, eius Vicarij commutabit; eamque velut agendorum, omittendorumq; regulam certissimam sibi proponet. Quisquis relicta vita saeculari se Deo commisit, prudentius incedere non potest, quam si dictum huius diuinæ & amabilis voluntatis sequatur. Plerumque nescimus, quid appetamus; nobis ipsis blandimur; excecant nos passionibus nostræ: quid igitur æquius facere possumus, quam amplecti lumina huius voluntatis, quæ nouit optimè, quid sit in rem vtilitatemque nostram! An Angelos sapientiâ superamus? at ex ijs fuere, qui obsequendo suæ voluntati, perierint: b *In calum conscendam, sedebo in monte testamenti, in lateribus Aquilonis, aiebat eorum Princeps, pluraque addebat alia, quæ esse, aut facere volebat.* Ad

X 3

quæ

a Grad. 4. b Isa. 14.

quæ respondet Bernardus: *a Tu tibi miser sedem collocas in Aquilone, plaga frigida & nebulosa.* Et quid agis miser? volebat te Deus collocare in splendoribus Sanctorum, & tu deligere vis Aquilonē, quo nulla Mundi plaga frigidior est, aut maioribus nebulis obfuscatur? quidni negotium Deo committebas? periisti: quia tuæ voluntati obsecutus. O quot adhuc Luciferos tellus ista fert, qui occupationes sibi procurant, qui dimoueri se locis, quæ arident, non patiuntur, qui ambiunt officia, & dignitates, vnde ruant! *quid miseri, sedem collocatis in Aquilone, plaga frigida & nebulosa?* Filij Zebedæi estis: *Nescitis, quid petatis.* Petebant hi quādam honoris cupiditate obcæcati, adhibitā Matris intercessione, ut vni liceret ad dexteram Filij Dei, alteri ad sinistram confidere. At fatuam fuisse postulationem ostendit S. Chrysostomus, Christi loco respondens: *Nescitis, quid petatis; ego vos vocavi ad partē dextram de sinistra, & vos vestro consilio curritis ad sinistram.* Ad eundem modum

a Serm. 17. in Cant.

sa pe

sape nos insani facimus, Si Deo & Superioribus totam nostri curam relinqueremus, cederent melius omnia, meliusque collocaremur, quàm si voto nostro propensionique fuisset satisfactum, unde amitteremus bona præsèntia diuinarum gratiarum, & futuræ gloriæ incrementa: iuxta D. Bernardi sententiam: *Grande malum propria voluntas, qua fit, ut tua bona, tibi bona non sint.* Si huic malo subiecta es, Hagiophila, provide; si præcipua hæc tua passio est, viribus omnibus, & quouis impendio ab eadem te expedias: & vt vitam ducas hilarem tranquillamque, scias medium nullum esse efficacius, quàm vt voluntatē tuam nunquā facias, verùm eidem renunties, vt voluntatem supremi Domini exequaris; si aliqua huius vitæ felicitas est, illic consistit, *quoniā vita in voluntate eius.*

Addi poterit Lectio quatuor priorum capitum tract. 8. part. 1. Rodericq. vbi de conformitate voluntatis humanæ, cum diuina sermo est, Aut lege cap. 23. & 24. lib. 3. de Imitatione Christi.

X. 4

Abso.

a Psal. 49.

Absolutâ Lectione, renoua deuotionem tuam, erga Sanctos, quos quotidie in opem, & tutelam, ex Martyrologio, vel aliunde, eligis. Credo equidem. affici te erga Sanctum illum, quem totius anni Patronum instituiſti, & illum etiam, qui tibi ſorte ſingulis menſibus accedit, verum de quotidiano Patrono dubitare poſſe mihi videor, cum tamen ea inſignis & vtiliſſima deuotio ſit. Quare aucthor tibi ſum, vt hodie illam innoues. Et adiuumento eſſe tibi poterit, caput tertium & vltimum, ſederis mei cum caluibus contrahends, ſi ad manum eſt.

II. MEDITATIO.

De Excellentijs & Prærogatiuis Conformitatis cum diuina voluntate.

Oratio præparatoria conſueta,

1. **P** *Ralud.* Propone tibi S. Paulum, qui in tam præclarum Apoſtolum. nobilẽmque Dei miniſtrum ideò euasiſſet, quòd primo ſtatim Conuerſionis ſuæ exordio ſe diuinæ voluntati penitus comiſiſſet, dicens: Domine, quid me vis facere? paratus ad omnia ſum. Hoc verbum origo fuit, & princeps cauſa illius
exi-

eximiae sanctitatis, quam deinde consecutus est.

II. *Pralud.* Pete à Deo, vt tibi clarè manifestentur emolumenta perfectæ conformitatis, vt huius exercitatione, particeps eorum fieri merearis.

I. *Punctum.* Interna sui Resignatio & conformatio cum diuina voluntate, est nota eorum, qui sincero amore, fidelique obsequio Deum prosequuntur. *Fideles in dilectione acquiescent illi.* Æquissimum illud est, seruire enim oportet. Domino ex illius sententia & voluntate, neque benè seruiet, qui sibi hoc axioma non proposuerit. O amantium fidelissime! volo inter tuos fideles esse, imò si possim, cæteris exactior, vt exequar omnes voluntates tuas, etsi minimo eæ nutu significantur! volo, ô Dominorum optime, vt hoc indicio omnes agnoscāt me esse de numero seruorum tuorum!

II. *Punctum.* Sancta & perfecta ista, conformitas nobilissimum est munus, quod offerre possumus diuinæ Maiestati: per hanc enim præsentamus id, quod

proprie nostrum est, & reliquis omnibus præstantius. Aurum, argentum, opes, corporis afflictiones, & quidquid aliud, nihil est, si cum corde, voluntatèque, comparetur; qui cor donat & voluntatem, donat omnia, nihil seponit. Deo etiam sic placet, ut munus nullum ei acceptius sit, quandoquidē eā ratione sibi subiectas habet nobilissimas suas creaturas. O Deus vnicē supremo dignē imperio, & voluntatum omnium tam Angelicarum, quàm humanarum Dominator meam integrè penitusq; tibi consigno, & me gloriæ, quæ in voluntatum tuarum adimpletionem consistit, posse aliquid adijcere, vehementer lætor.

III. *Punctum.* Hæc conformitas mater est tranquillitatis animi, & gaudij interioris. Illud canebant Angeli in Salvatoris Natiuitate: *Gloria in excelsis Deo, & in terra pax hominibus bonæ voluntatis.* Quinam verò sunt bonæ voluntatis, si non ij, qui suam cum diuina conformant? Illud Iob dicebat: *Acquiesce Deo, & habeto pacem, eritq; omnipotens contra hostes*

*hostes tuos ; tunc super Omnipotentem domicilijs afflues. Hinc è contrario accidit, ut qui diuinæ voluntati aduersantur, ut satisfaciant suæ, nullâ pace, nullâ quiete perfruantur, sed magnis exagitentur tumultibus, inquietudinibûsque ; Quis refuit ei, & pacem habuit ? qui verò consentiunt, ei que se accommodant, Regulorum instar, vitam degunt solatijs plenam. Ita mendicus ille tam rerum inops, quàm virtutum diues respondit Taule-
ro, quis esset interroganti : Rex sum, & Regnum meum est anima mea, vbi omnia ex placito & voluntate Dei contingunt. O talium Regum Amator. Deus, fiat beneficio tuo anima mea Regnum Pacis ; malo enim mortem oppetere, quàm vel minimæ tuæ voluntati aduersari.*

Colloquium. Dic cum Dauidè : Paratum cor meum, Deus, paratum cor meum ; vis ut aëris & anni tempestates mihi graues sint, & frugibus inimicæ ? Paratum cor meum. Vis me diuitem, an pauperem ; honoribus elatum, an de-

pressum infamia; solatijs abundare, an
 moribus? quod vis, volo. *Paratum cor
 meum.* Vis me formam habere, an turpi-
 tudinem? valetudinem, aut morbos? in-
 genium, aut stupiditatem? vitam, aut
 mortem? *Paratum cor meum, Deus.* Vo-
 luntas enim mea, tua est. Optas, & de-
 cernis, vt parum, aut multum in virtu-
 bus proficiam? parum, aut multum in
 gratia, & amore tuo? magnam gloriam,
 aut exigua in caelo consequar? id ipsum
 optat cor meum. Ita enim promptum
 est ad omnes voluntates tuas, vt nihil
 aliud desideret, quam illas accuratè ad-
 implere. *Paratum cor meum, Deus, para-
 tum cor meum.* Pater, Ave.

Recollectio. Visitatio Venerab. Sacramen-
 ti. Examen Conscientiæ. Prandium.
 Recreatio. Tempus scribendi, aut pro-
 posita proximè concepta, aut rem al-
 liam, ad aliquod animi leuamen.
 Sequitur Lectio spiritualis.

—(o)—

DIS-

DISSERTATIO POME-
RIDIANA.*De felicitate eorum, qui Deo se totos
tradunt.*

NVnquam memini eius responsio-
nis, quam fecit (referente Theodo-
reto) Monachus Macedonius Principi
cuidam, quin maximum aliquid animo
concipiam de eorum felicitate, qui se
penitus Deo tradunt. Venationi incum-
bens hic Princeps, altiùs in Eremum pe-
netrauerat, vbi sanctum illum virum of-
fendit: stupere primùm, eo loci homi-
nem reperiri, deinde adire etiam & allo-
qui, quid in tam semotis nemoribus, &
horrendā solitudine actitaret. At rogo
humillimè, inquit Monachus, Celsitudo
tua id beneficij mihi præstet, dicâtque
prior, cuius rei gratia huc accesserit,
hinc enim aliquod responsioni meæ mo-
mentum accedet. Placet, subiungit
Princeps: *Ego veni, ut venarer apros &
ceruos. Ego autem veni, reponit Mace-*
donius, ut venarer Deum meum & ab hac
tam pulchrâ venatione nunquam cessabo.

Quibus dictis, submisso capite, humili-
que facta reuerentia se recepit.

Quid videtur, Hagiophila, de hoc ho-
mine, in quo dubites, virtutemne, an re-
spondendi acumen magis admireris?
quod ad me attinet, videre mihi videor
hominem, qui totum se Deo mancipa-
rat, per ingentem creaturarum omnium
abdicationem; & apud quem maiore lo-
co & æstimatione non erant omnes to-
tius Orbis Monarchæ, quàm quæuis an-
nosa arbor eius solitudinis, quam sum-
mâ animi voluptate incolebat. Et facile
apparet talem illum fuisse, qualem illum
mihi propono, tàm ex sancta gloriosâ-
que responsione, tum ex secessu, quem
illicò repetijt sine metu displicendi Prin-
cipi, cum quo colloquebatur. Quantum
istud est, semel se Deo integrè tradidisse?
summa huius vitæ felicitas est, tum ho-
minibus sæcularibus, tum ijs, qui in Re-
ligione degunt; status est (liceat mihi
vti eâdem sancti viri consideratione) vbi
Deo impenduntur eadem curæ, ijdem
labores, sed & eadem voluptates, quas
ille

Ille capit, qui venatione delectatur, hanc
solum differentiâ, quod curæ illius, qui
se Deo plenè consignat, sint quæstuosio-
res, & labores gratiores, & voluptates
millies, & sine comparatione sint magis
deliciosæ, quàm illæ, quibus fruitur, qui
tempus omne totâque vitam venan-
do consumit.

Aduertis, Hagiophila, me paulatim
insinuare velle, quid sit integrè se Deo
tradere; & verò facere id proposui,
priusquam excellentiam boni inde pro-
venientis declarem. Et vt solidiùs hunc
primum gradum figam, dico: Tradere se
Deo integrè, est: posito firmo animi de-
creto illum non offendendi culpa aliqua
sive mortali, sive veniali, saltem delibe-
ratè, ferri maximo illi placendi studio,
idque contentè constantèrque; est: pro-
culcare pedibus omnes considerationes
humanas commodi, æstimationis, satisf-
factionis propriæ, valetudinis, vitæ de-
nique ipsius, vt simus id, quod à nobis
Deus requirit; est: spiritualibus oculis
cuncta intueri, non regi alio lumine
quàm

quàm diuino, accuratissimè obtemperando omnibus illius inspirationibus; est: cor habere ab omni creatura vacuum, nullâ aliâ intentione, aut proposito, quàm vt illud Deo repleatur, rectâ in illum tendat, illique vni laboret, & viuat; est: ita nos Deo vnire, vt nihil tam forte validumque sit in tota rerum natura, quod nos queat ab illo separare, nihil boni, aut solatij quærentes nisi in illo, & propter illum; est: se omnino conijcere in sinum diuinæ illius prouidentiae, committendo curam & administrationem rerum omnium ad nos spectantium, in bonis fortunæ, in valetudine corporis & animi, in studijs & propositis, in vita, in morte, in æternitate, vt pro arbitrio cuncta disponat; est denique, se in rebus omnibus diuinæ illius voluntati conformare, nihilque aliud velle & desiderare, quàm quod ille vult, & desiderat; totum hoc est, Deo se penitus integrèque tradere.

Diem hunc mihi, Hagiophila, quin & tibi, felicissimum luxille iudicarem, si pos-

possem hanc sanctam abdicationem ob-
tinere à te & persuadere, vt te omnino,
re nullâ exclusâ, Deo Parenti optimo
consignares. Quidquid præ te feras,
nondum illius es; paruulis plicis inuolu-
tum est cor tuum, quibus obtegis vanos
illos tuos in aliquam creaturâ affectus;
Amor ille tui ipsius, quo cupis eminere,
amari, blandéque haberi ab alijs, opti-
mam cordis tui portionem occupat, vix
angulus Deo relictus est. Vbique te qua-
ris; quidquid cupis, appetis vehementer,
& cedere Deum, illósque qui te guber-
nant, necessum est. Non acquiescis eo-
rum voluntatibus, nisi aliquod tuum
commodum intercedat; tot inepta pro-
posita, tot insana desideria, tot vanæ ani-
mi occupationes, tot respectus humani
obsident miserum cor tuum, & circum-
uagantur, aut inuadunt, vt illud ditioni
suae subijciant, excludántque illum, cui
istud vni tradidisse videbaris. Itáne, Ha-
giophila, semper insanies, nunquam eris
circumspecta, & toties à creaturis illusa,
nondum sapiens, adhuc decipi te sines?
post

post tot acceptas ab ijs iniurias & afflictiones, nondum dolos & perfidiam illarum detestaberis? tantane deliberatione opus est, vt eas deferas, & vt tandem aliquando te dones tuo Creatori? quid per tot reciduias, tantamque inconstantiam tuam obtines? omnis vita tua, & flos annorum cadendo, surgendoque, & iterum recidendo resurgendoque peragitur: quæ, malum, ista infidelitas? post tot gratias & tanta lumina tibi à Deo concessa, potestne turpior perfidia excogitari? IESVS & illius Amor nunquam erunt Domini cordis tui? semper misella anima tua erit tuarum præda passionum, & cuiusvis arbitrio libidiniq; exponetur? ô vagam te & mutabilem! aperi tandem mentis oculos, & ingratitude, perfidiæ & inconstantie tuæ modum pone, & iam nunc te consigna Amatori animæ tuæ, trade te Deo penitus, ea quâ fieri par est, ratione ac seriò protestare nihil deinceps fore tam validum, quòd labefactare constantiam tuam poterit, aut minimum de iustis

iustis illis & solemnibus propositis decerpere. Quisquis volet, Hagiophila, aliò se conferat, tu caue, ne alteri quàm Deo te dones, sis tota illius, ad illū contende, neque aliud quære quàm ipsum, sanctissimamque ipsius voluntatem; & tunc demum, te reputa mortalium felicissimam: & si quando subierint mentem cogitationes, quæ auocare & contrarium suadere niterentur, memineris illicò trium prærogatiuarum felicitatis tuæ, quas tibi in solatium relinquo.

Prima prærogatiua eius, qui se Deo penitus tradit, est illa immunitas & exemptio à seruitute & fallacijs creaturarum, quæ subiectum miserum cor seriùs aut ocys opprimunt, atq; affligunt, scilicet verissimū est, quod quidam cecinit:

Sola salus seruire Deo, sunt cætera frangenda.

Neque magis aberrat Thomas de Kempis, dum ait: *Miser es, ubicunque fueris, & quocumque te verteris, nisi ad Deum te conuertras.* a Res manifesta est;

8c

a De Imit. lib. 1. cap. 22.

& experiētiā nimium probata, nullam dari creaturam, cui fidi securè possit. neque ullam esse idoneam, quæ plenè animis nostris satisfaciāt. Quis ambigit, quin omnes Orbis diuitiæ cunctæque voluptates, mera sint somnia & deliria? fuit hæc Regij Vatis opinio, qui diuitibus loquens ait : *Viri diuitiarum dormierunt somnum suum, & nihil inuenerunt in manibus suis.* Et quotquot rectè iudicant, in eandem sententiam concedunt. Iobi amicus, gaudium peccatoris ad instar puncti esse asserit, & Tertullianus voluptates omnes vocat momenta voluptatum; & sicut aggregata mille puncta, si Philosophis credimus, punctum vnicum non excedunt, ita omnes mundanorum voluptates, omnes dignitates, omnes pompæ, omnes honores, omnia denique illorum bona, cum puncta sint, etsi coaceruentur, non sunt nisi punctum. In Annalibus S. Dominici memoriæ proditum est, Rolandum, eximium illum Cremonæ Doctorem, postquam diem cum amicis in omni lætitiarum

rum genere consumpsisset, noctu domum reuertisse, tanto pressum animi dolore & fastidio, quanto per diem gaudio diffluxerat: quò nunc (secum tacitus aiebat) eæ voluptates, quas hodie cepi? vbi epulæ, vbi ioci, vbi choreæ. vbi tam chara amicorum societas, quò ista abiere? ex omnibus mihi nihil reliquum est, nisi nausea de celeri illorum transitu, & conscientiae vulnus de tempore malè collocato, alijsque sceleribus, quæ ibi contraxi. Hæc aduersio plurimum illi profuit, nam statim decreuit, animum suum à vanis illis solatijs abstractum, integre Deo consignare, cuius rei gratia Ordinem Diui Dominici ingressus est. Quis prætereà ignorat, non plus fiduciæ in hominibus (vbi magni potentésque sint) quàm in caducis illis delicijs collocari debere? non magis fidendum homini, qualiscumque ille sit, quàm asseri putrido cariosoque; inniti subsidio, authoritati, amicitiaeque personæ alicuius, est inniti ligno putrido, inquit Origenes, ad rem ingeniosè connectens duas propositiones.

positiones Moysis & Ieremiæ: *Maledictus
 Elus qui pendet in igno: & Maledictus ho-
 mo, qui fidit in homine; a quasi vnum
 idémque esset lignum cariosum, aut ar-
 bor mortis, cui scilicet malefici affige-
 bantur, & homo qui natura sua, & ab
 animi mobilitate mutari potest, & falte-
 re. I nunc, & fide creaturis, huic homini;
 huic Principi, huic amico, huic familia-
 ri, modò memineris, asserem esse cario-
 sum, & lignum, in quo funestum exitum
 consequaris, & fortasse mortem ipsam
 aut corporis, aut animæ. Nunquam Do-
 mino seruiam, qui mori possit, aiebat.
 B. Franciscus Borgia: tu fac ampliùs ali-
 quid, & dic: Nunquam amabo creatu-
 ram, vt in ea affectum & fiduciam collo-
 cem, quæ destituere aut fallere me queat.
 Re minimâ opus est, vt cor humanum
 immutetur, sufficit vna suspicio, mini-
 ma offensuscula, aliqua æmulatio, ap-
 prehensio leuis despicientiæ; ipsa de-
 mum temporis diuturnitas frigus ali-
 quod afflat cordibus amore mutuo ma-
 ximè:*

a. *Dent, 21. Ierem, 17.*

ximè incensis: & post hæc à tali incon-
stantia solidum aliquod fulcrum exspe-
cta. Carolus VII. neminem in toto Re-
gno agnoscebat, cui magis fidere posse
videbatur, quàm cuidam militiæ Duci.
Dederat is talia fidelitatis suæ argumen-
ta, vt Rex immobilem existimaret: ni-
hilominus cepit eum aliquando curiosi-
tas, vt inquireret, forétne aliquid, quo
posset ad defectionem, aliúmque quæren-
dum Dominum sollicitari? Serenissime
Rex, respondit, despicientia. Despicien-
tia, inquit Rex, facere id posset? imò ve-
rò, opposuit, despicientia meæ personæ:
id faceret, & Maiestatem tuam rogo, ne
lubeat experiri. Si me audis, Hagiophi-
la, nulli personæ te dedes, citiùs, aut se-
riùs mutabitur, & si te non faller, tamen
te destituet aliquando, nisi fortè sit im-
mortalis. Si verò tantum te tenet desi-
derium innitendi alteri, amandi, cor &
affectum tuum largiendi, innitere Deo,
vnice illū ama, & te integrè illi largire:
in eo solo vera quies solidúmque gau-
dium reperitur, quæ est altera illius præ-
roga-

rogatiua, qui se Deo plenè tradit. *Valde auarus est, cui Deus non sufficit; a* Ille supremum bonum est, & omnium bonorum gaudiorumq; excogitabilium fons, & origo, nullique subiectus mutationi, quid te illi donare reformidas? aut quies, & pax, & solatium non datur, aut ab hoc amico datur: *Dura sunt omnia & tu, Domine, solus requies, aiebat S. Augustinus: b* cætera affligunt, ij autem qui te fruuntur, tuique sunt, nouam semper in te reperiunt suauitatem. Nostrorum Regum aliquis olim monile pretiosum dedit mulieri, hoc inscriptum lemmate; *Qui me habet; non habet; quod ultra desideret.* Dictum audax & temerariū, cūm solus Deus ita loqui possit, plenèque uotis, & desiderijs satisfacere: Qui in Mundo sunt fortunatissimi, quamquam dissimulent, in spinis sunt, & maximis perturbationibus agitantur, si illos Deus destituerit, neque amicitia: suæ compotes fecerit; uti è contrariū qui Dei est, illique omninò deditus, parem cum Angelis conditionem obtinet, nec minori, quàm illi,

a *Fernand.* b *Lib. 6. Confess. cap. 16.*

illi, animi pace perfruitur, hanc etiam
deuotionem suam, minimaque solatia,
quæ Deus famulis suis impertit, omni-
bus terræ delitijs, & mille Mundorum
imperijs anteponebat. O quàm volupe
est audire egregias illas animas, quæ om-
nem affectum suum in Deo collocâ-
runt, neque alibi, quàm in eo quietem
reperiunt! Narrat P. Balthasar Alvarez,
sibi Superiori, quendam nostræ Socie-
tatis Concionatorem, dum conscientia
rationem redderet, dixisse, quod si
Deus gratum iucundumque in hac re-
rum natura condidit, accumularetur,
fieretque æternum, tanti istud facturus
non esset, quanti solatia, quæ ex Dei
communicatione per horæ quadrantem
hauriebat. Doctissimus Suarez ex nostro
Ordine fuit eiusdem opinionis, dum as-
seruit, malle se suam omnem scientiam
amittere, quàm negligere vnâ horam
Meditationis, & occasionem cum Deo
conferendi. Quædam alia persona id
frequenter in ore habebat, nolle se per-
mutare illa solatia, quæ ex vnica Com-

munione colligebat, cum omnibus ijs voluptatibus, quas homines simul omnes ex creaturis capiunt. O Deus quies vnica eorum, qui te quærunt, immitte nobis tantum creaturarum fastidium, vt blandè compellamur ire ad te! ó amor vnice amande imple corda nostra amaritudinibus, & satura fallacijs quas inferunt omnes ij, quos amandos iudicamus! fortasse hinc discemus sapere, & tandem quamuis serò, raptemur ad te, vt plene simus tui, vtque viuamus in ampla illa quiete, quâ fideles tui amantes perficiuntur.

Addamus aliquid de tertiâ prerogatiua, quæ complexæ felici aeternitatis eius donationis suipsius, quæ Deo fit: Est aliquid, exemplum esse seruitutis & fallacijs creaturarum: plus est, esse in quiete admiranda, & stabili; sed gaudium inde proueniens, quod quis Deo adhæreat, & intimè gratiam beneuolentiæque illius acquisuerit, nullo studio ad eam occupandam omisso, incredibile est, præstareque gaudijs omnibus, quæ pos-

sent

sent hinc in terris obtineri. Tale gaudium fuit B. Angela de Fulginio, quo sic afficiebatur, ut diceret se non permutaturam cum omnibus vel licitis, vel illicitis voluptatibus omnium creaturarum; addebátque, etsi anima illius capax foret tristitia (vti in hac mortali vita fieri necesse est) se nihilominus illic conclauē gaudiorum habere, dum se Dei filiam ancillámque reputaret. Magnum discrimen est inter gaudia Mundanorum, & gaudia filiorum Dei: illorum gaudia ficta sunt, & speciem tantum habent gaudiorum, internos animi dolores, & vulnera dissimulantium; at filiorum Dei solida sunt, interna, & continua, & ita illis propria, ut solis conueniant, nullá eorum spe alijs relicta; & quamquam subiecta sint quibusdam tristitiæ moribus, illa tamen sic ab affluentiā gaudij temperatur, ut vix tristitia dici debeat, quod S. Paulus his verbis diuinè innuit: *Quasi tristes, semper autem gaudentes*, in quæ sic D. Augustinus: *Tristitia nostra habet quasi, gaudium nostrum*

non habet quasi, quia in te spes certa est; & non dicit Apostolus, quasi gaudentes: a id est, Serui Dei. capaces non sunt veræ tristitiæ; sunt autem solidi gaudij, cum ab ijs gaudij fons, qui est à Deo, & in Deo solo, auferri non possit.

An non sentis, Hagiophila, aliquem huius gaudij appetitum? vis illud obtinere? affige te Deo. *Vis habere gaudium sempiternum;* inquit Augustinus, *adhære illi, qui sempiternus est.* Mundum mundanis relinque, pars tua sit Deus, cui te melius quàm antehac consigna; si istud nunc obtinere abs te possis, reperies in illo quietem tuam, tuam salutem, tua gaudia; & quandam omnium bonorum complexionem; hoc pretio hunc amicum repudiabis?

Si Lectio hæc non sufficit; aut non arridet; prosequere ea de Conformitate in Rodericio; quæ manè designaui; saltem quatuor aut quinque capita, ad quæ perueneras. Aut lege cap. 37. & 59. lib. 3. de Imitatione Christi.

Sequitur Examen.

EXA-

a. In Psal. 48.

EXAMEN CIRCA TEMPERANTIAM, & Sobrietatem.

Hinc cognosces, an habeas in Sobrietate perfectionem.

Primò, *Duas duntaxat in die refectiões sumere, nisi necessitas aliud exigeret: quam in rem dicere solitus erat S. Petrus Luxemburgensis, non comedere, esse Angelicum; semel in die comedere, esse Sanctorum; duplicem refectiōem sumere, esse hominum, & sapius id si fiat Brutorum esse.*

Secundò, *Inordinarijs refectiōibus, necessitatis modum non excedere.*

Tertiò, *Nunquam comedere ad saturitatem, aut tantum, ut ad studia, ad lectionem, ad orationem aliāque exercitia reddaris ineptus.*

Quartò, *Aliquantulum se mortificare, tum quoad ciborum qualitatem, tum quoad quantitatem.*

Quintò, *Non ita cibus immergi, ut non attendamus aut lectioni, quæ ad mensam sit, aut sermonibus aliorum, aut pijs considerationibus, quas habere nos oportet, dum soli sumus, vel ab alijs siletur.*

Sextò, *Non vorare, neque tantâ aviditate comedere, ut cibus non rectè masticeatur.*

Septimò, Non appetere delicatiora, neque in victu, neque in potu. Octauò, Vinum moderatè diuere. Nonò, Non bibere ultra necessitatem. Decimò, Sine eadem, extra consuetum refectionis tempus non manducare, nisi permissum sit, ne sensu-
 litati, aut inepta aliorum consuetudini obsequarè. Undecimò, Non indulgere, ni-
 la comedendo fructus, dulciaria alià, ne
 cupedias siue priuatim & furtim, siue pu-
 blicè, & cum alijs. Duodecimò, Diebus
 ieiunij nō excedere in sumenda collatione.
 Decimò tertio, Non plus idcirco sumere,
 quòd sequenti die ieiunandum sit. Decimò
 quarto, Diebus esurialibus, non ita se in
 prandio ingurgitare, ut cena, etiam quouis
 alio die, valetudinis causa omitti posset.
 Decimò quinto, Parcè cenare. Decimò
 sexto, De victu nunquam queri. Decimò
 septimò, Non loqui de bonitate vini, cibo-
 rum, aliarumque lautitiarum. Decimò
 octauò, Interdum de cibis non cogitare.
 Decimò nonò, Conuiuia declinare, & ab-
 stinere ab escis calidioribus, quæ aliquod
 castuati detrimentum adferre possent.

Sequi-

Sequitur tempus ad aliquam partem Officij diuini, aut alterius Orationis vocalis, quam excipit Consideratio.

CONSIDERATIO.

L. Quanta felicitas, exemptum esse tyrannide insatiabilium desideriorum, quæ sola nos reddunt infelices! desideria desiderijs crescunt, & vno expleto, quatuor, vel plura alia subito enascuntur. Vnicum est desiderium rebus omnibus pretiosius præstantiusque, scilicet, nihil aliud velle, neque desiderare, quàm facere Dei voluntatem.

II. Placeat hominibus, quisquis velit, ego nolo alteri placere quàm Deo, cum certus sim, me eius famulatio indignum: si cupiam placere creaturis. Maiorem mihi arrogare gratiam non possum, quàm Paulus qui dicebat: *Si hominibus placerem, Christi seruus non essem.* Quid præstat, an Christo placere, an homini? quisque pro se iudicet, ego, quid mihi agendum sit, noui.

III. Tota vita mundanorum nihil aliud est, quàm quædam compositio

vultus affectata: nunquam risum. & lætiti-
 am magis simulant, quàm quando cor
 lacrymis diffluit. Forment effigantque,
 quantum voluerint, nunquam perue-
 nient ad lætitiā eius animæ, quæ nihil
 præter Deum quærit, quæ rectā in illum
 tendit, quæque aliud non vult, quàm
 obsequi eius diuinis voluntatibus.

IV. Nescio, quo spectet eorum glo-
 riosorum ambitio, qui cuperent esse exi-
 mij, & à nemine dependere; facessat,
 hæc insania: si mihi optio daretur, vt
 vel à me vno dependerem, vel in omni-
 bus, & per omnia à Deo, facile delige-
 rem: gloriosum mihi foret ab eo depen-
 dere, & infelicissimum, si meæ volunta-
 tis dominus & arbiter esse permetterer:
 cessit mihi istud semper pessimè. Volo,
 & placet, vt Deus sit vnicus mei rerum-
 que mearum moderator.

V. Accidat quidquid euenire potest,
 pestilentia, bellum, fames, infamia, vi-
 tuperium, calumnia, iactura bonorum,
 valetudinis, vitæ: plus oculis meis ista
 diligam, quòd illic reperiam diuinam
 volun-

voluntatem; inopiam oscularer, si me-
adiret, amplecterer ambabus vlnis o-
mnes Cruces vniuersi, si eas Deus impo-
nere dignaretur; postquam didici, nihil
citra diuinam voluntatem, in tota re-
rum natura, accidere, quamquam caro
obluctetur, molestéque ferat, animo ta-
men læto alacrique excipio omnia, &
complector.

VI. Sumne maior Dominus quàm
Christus I E S V S? sumne dignior Prin-
ceps quàm Seraphini? sumne Monar-
cha excelsior, quàm omnes ij Reges Re-
gni cælorum? at hi omnes non alio no-
mine magni, digni, excelsique sunt,
quàm ob magnam submissionem, qua
se omnibus Dei voluntatibus subiece-
runt. Dixere: Tua voluntas fiat, ô Deus!
hac semper vsi, in hac omne studium,
suum, omnemque gloriam collocarunt.
Quæ isthac foret impudentia, vt aliter
facere velit terræ vermiculus, & ex æ-
quo cum diuina, suaque voluntate pa-
cisci! nihil sapientiùs, quàm sapientes
imitari.

Ita relaxandi animum, deinde Officij di-
vini, aut aliarum Precum vocalium, Vi-
sitationis Venerabilis Sacramenti, tum
preparationis ad sequentem Medita-
tionem.

III. MEDITATIO.

*De exemplis Sanctorum in hac Con-
firmate.*

Oratio preparatoria solita.

P*Prelud.* I. Propone tibi animas non-
nullas ad tantam gloriam euectas, vt
inter Seraphinos confideant, easque in-
terroga, qua ratione illum gloriæ gra-
dum sint consecutæ. Respondebunt:
conformando voluntatem nostram cū
diuina: quemadmodum aliquæ respon-
derunt aliquando B. Stephani de Son-
cino, in quadam illi facta reuelatione.

II. Prelud. Pete gratiam, vt sancto-
rum exemplo stimuleris ad nihil volen-
dum, nisi quod vult Deus.

I. Punctum. Considera primò, opti-
mi Isaaci Resignationem, qui etsi præ-
uide-

videret paterni animi decretum, posset-
que fugâ sese eripere, vti iam perfecta
ætate & viginti quinque annorum vir,
acquieuit tamen omnibus modis, &
flexis genibus Parentis gladio caput
subiecit. Secundò Davidis, dicentis Deo:
Vi iumentum factus sum apud te, quæ est
aptissima similitudo ad veram indiffe-
rentiam significandam. Iumentum enim
obsequio promptum est, nulla habita-
temporis, aut loci, aut vectoris, aut on-
eris ratione. Tertiò IESV Christi, cui ni-
hil intererat, seu in Nazareth fabri offi-
cio & colligendis lignorum sarmentis
exerceretur, seu Concionibus per lu-
dam habendis, patrandisque miracu-
lis insudaret. O insignem superbiam
neam! qui semper id volo, quod hono-
rificum est, quasi aliquid dignius nobi-
liusque sit eo, quod est secundum Dei
voluntatem!

II. *Punctum*. Attende primò ad Re-
signationem alicuius Angeli, cui cura
miserrimi homuncionis commissa est: sit
improbus, sit deformis, sit monstrum.

Y 6 homi-

hominis: eum curat Angelus per totos quadraginta, quinquaginta & plures annos, eâ promptitudine & voluptate, atque si foret sanctus quispiam, aut aliquis ex terræ moderatoribus. Secundo ad illam excellentis istius serui Dei, qui dicebat; malle se ex Dei voluntate, vt vermiculum, repere per terram, quàm ex sua, inter Seraphinos considerare. Ad illam S. Gertrudis, de qua Dei filius aliquando Mechtildi reuelauit, illam adeo promptè solitam consentire omni nutui diuinæ voluntatis, vt magis membra cum corde non conspirarent. Quid ad hæc cor meum! nonne istæ lectiones sunt, quibus omne meritò studium operamque impendas;

III. *Punctum.* Expende primò Conformitatem, quam habuit cum diuinâ voluntate Catharina Genuensis, exclaimare solita: volo quidquid Deus vult, & serio animi decreto optarem, vt pars illa mei, quæ Deo vel in minimis contradiceret, in puluerem redacta ventis traderetur, aut annihilaretur potius. *Secun-*

Secundò illam huius Religiosi, de quo meminit Cæsarius, dicentis, quòd si Deus condemnare illum vellet, nihil se refragaturum, imò ne impediturum quidem, etsi id posset vnica Oratione Dominica recitata: Id dumtaxat postulaturum, vt nullam tota æternitate cogitationem, contrariam diuinis dispositionibus admitteret. Tertiò. Et hanc viri illius Deo deuoti, qui, teste Salmerone, loco precationum decursis Alphabeti litteris, Deum rogabat, vt cum sciret omnem illarum litterarum collectionem combinationemque; id ex ijs colligeret, quod foret ad ipsius arbitrium & voluntatem; nihil aliud se velle, quàm quod esset illi consentaneum. O Deus consentientium amator voluntatum! cur non in mentem mihi veniunt similes sententiæ, & inuentiones, quibus approbem in omnibus, & per omnia, diuinæ voluntatis tuæ dispositiones?

Colloquium ad sanctos, vt tibi donum huius sanctæ Conformitatis obtineant. Pater, Aue,

Recollectio. Lectio Thomæ de Kempis.
Rosarium. Visitatio Venerabilis Sacra-
menti. Cœna. Recreatio. Litanie San-
ctorum. Visitatio Venerabilis Sacra-
menti. Preparatio Meditationis cra-
stinæ. Examen. Quies, sed prius tripli-
ci genuum flexione honora imaginem
B. Virginis, quæ in cubiculo tuo exposi-
ta est. Cultus ille magis tibi proderit,
quàm existimas: delectatur eo Deipa-
ra, & mirum in modum compensat.



7
Vbi est absconditus Pulcher quem desidero Aug. x



Y
C
C
C
t
C
n
C
F
f
f
C
n
C
i
h
f

DECIMVS DIES.

*De Amore erga Venerabile Sacra-
mentum.*

Proximè ad metam confistis, Hagio-
phila & in tertio die Viæ vnitivæ. Et
quamvis non ignorem, Orationem, Ex-
ercitium Præsentivæ Dei, & deuotionem
erga Virginem Matrem, esse media effi-
cacissima ad nos Deo vniendos; quia
tamen omnia, spatio octo vel decem
dierum tractari non possunt, & certissi-
mum sit, nulla re facilius hanc internam
cum Deo communicationem, & quam
prosequimur in hac vita, vñionem cum
summo nostro bono acquiri, quàm con-
sideratione, Amore & frequentatione
diuinæ Eucharistivæ, quæ merito nomi-
ne Communio, tanquam vñio hominis
cum Deo appellatur, hodiernum diem
illi concedemus; fructus, quem inde
hauries, clariùs patefaciet rationem in-
stitutum meum.

*Visitatio Venerab Eucharistivæ. Et præpa-
ratio ad meditandum.*

I. M. E.

I. MEDITATIO.

*De Amore, quem Deus in Venerabili
Sacramento nobis testatur.*

Oratio præparatoria consueta.

P*ralud.* I. Repræsentabo mihi visionem illam, S. Catharinæ Senensi perquam familiarem. Intuens sacram Hostiam in manibus Sacerdotis, videre sibi videbatur fornacem ardentem, ad inflammandos omnes illos, qui propius accessissent, idoneam.

II. *Pralud.* Utinam accendar hoc igne amoris, qui est in diuinissimo Sacramento! quandoquidem illic Deus se collocauerit, ut eum amarem.

I. *Punctum.* Quantum fieri potest, Amicus Amico præsens esse desiderat, idque vnum est Amicitiae argumentum. Omnia Deus excogitauit, egitque, ut suum erga homines Amorem testaretur; cumulauit illos beneficijs, contulit naturam vitæ, sensûs, rationis participem, illam ipse suis manibus ad imaginem & similitudinem suam efformauit:
dedit

dedit illis cor proclive propensumque
ad Amorem, addidit præterea seuerissi-
mum mandatum, vt toto illum corde
digerent: & vt nihil omitteret (ne
obijci ab hominibus posset, rem esse ar-
duam, illum amare, qui sub aspectum
non caderet) oculis nostris & sensibus
visibilem palpabilemque se præbuit sua
Incarnatione: *Verbum caro factum est,*
& *habitaui in nobis*, vt, Teste, Augusti-
no, *Familiarius diligeretur ab homine*, &
quia hoc tantum erat ad triginta tres
años, vt se futuris quoq; sæculis præsen-
tem sisteret, abdidit se sub speciebus pa-
nis & vini, vt indicaret se eos amare,
quibuscum esse continuò volebat; id-
que modo tam admirabili, vt non sit in
vno dumtaxat Orbis loco, vti dum viue-
ret, sed in omnibus regionibus, quacum-
que terra hominibus culta se porrigit,
vt præsentiam suam omnibus indul-
geat; illudque beneficium vsque ad
mundi interitum prorogabit. O Deus
hominum amantissime! quis te vicif-
sim non amet! meritò te Filium homi-
nis

nis indigitabas, cum tanto in hominem amore rapereris. Qua in re animum meum, & ingenium occupo, si non excogito modos, quibus testificer me diligere te, nihilque mihi esse æquè in votis, quàm vt semper sim tecum?

II. *Punctum.* Amico non sufficit præsentia, sed quoad fieri potest, coniungi vnique desiderat. Vbi vera amicitia est, ibi vnum cor, vna voluntas, vna res est. IESVS in hac vnione excessit omnes amantes, vt sciremus, quanto nos diligeret affectu. *Qui manducat meam carnem, & bibit meum sanguinem, in me manet, & ego in eo.* En vnionem, cui par esse alia non potest; maior est, inquit, Cyrillus, quàm si duæ ceræ liquefactæ in vnâ commisceantur. Hac vnione vitam Dei viuimus. *Qui enim manducat me, & ipse viuet propter me.* Ita vt susceptum Christi corpus idem in animabus nostris operetur, quod in corpore cibus alius in stomachum demissus: hinc nobis vitam gratiæ conseruat. *Ego sum panis vite, qui de calo descendi.* Quis

vnquam aliàs audiijt similem vnionem? tales amores? nunquam Amicus substantiam suam, seu totum se dedit, vt nutriret sustentaretque Amicum. O eximie in Amore! nunquam te tantum amabo, quantum amare te vellem. Vellem si fieri posset, me tibi ita vniri, vt in permissione huius tam amabilis vnionis, me ipse perderem, neque amplius essem nisi in te!

III. *Punctum.* Tandem Amicus dat omnia sua & cum Amico facit communia. Facit id Iesus in Sacramento, tam mirabili, quàm amabili profusione. Dat nobis corpus, animam, vitam, sanguinem, quo nihil in rerum natura, præstantius est, cum sit pretij inæstimabilis. Dat diuinitatem suam, veniens cum Patre & Spiritu Sancto; participes nos facit suæ gratiæ, & virtutum nobis necessarium, iuxta dispositionem, qua ad hoc Sacramentum accedimus. Venit etiam instructus suis perfectionibus: nam Amor illius, illius Clementia, Patientia, Humilitas, Omnipotentia mi-

rum in modum se produnt in hâc diu-
nissima Eucharistia. Maiorine Amore
communicare se quis potest? O DEVS
liberalitatis infinitæ! desidero te amare
plusquàm vlla vnquam Creatura te a-
mauit: imò Amore infinito opus foret,
vt Amorem rependerem Amori.

Colloquium ad tres Personas SS. Tri-
nitatis de tanto collato beneficio. Ad-
mirando, Obstupefciendo, Amando. Pa-
ter, Aue,

Recollectio Meditationis, Electio Tessere,
apta erit hæc ex D. Augustino: *Vbi est ab-
sconditus pulcher, quem desidero? aut illa fan-
cti Bernardi: Valde auarus est, cui Deus non
sufficit.*

Lege partem Officij, aut alterius Oratio-
nis vocalis, Audi sacrum, deinde vaca
lectioni spirituali.

DISSERTATIO MA- TUTINA.

De Communione.

PRomisi tibi, Hagiophila aliquem de
Communione sermonem, & opinio
mihi pridem infixæ, quòd origo nostra-
rum imperfectionum, & fructus exigui,
quem

quem in vita spirituali colligimus, æquè
à Communionibus tepide, & ex con-
suetudine susceptis, atque à malè insti-
tutis Confessionibus oriatur, facit, vt in-
re tanti momenti & quàm maximè ve-
lim tibi impressam, stem promisso, dicti-
que mei fidem exequar. *a* Sumo exor-
dium à facto memorabili, quod Ciui
Ferrariensi accidit: traduxerat illè ado-
lescentiam in magnis difficultatibus pu-
dicitæ suæ; imò ad probrosos lapsus, at-
que inordinatam viuendi licentiam de-
uenerat; nihilominus desiderium salu-
tis magnos in anima stimulos, & me-
tum damnationis æternæ excitabat;;
vnde consilij gratia adiit Confessarium
suum, petijtque, quæ tandem ratione,
posset ab hac miseria, & istis pessimæ
consuetudinis occasionibus emergere:
Viam, inquit Sacerdos, compendiosio-
rem non video, quàm vt vxorem ducas,
duc & modò illa non abutaris, in saluo
es. Obtemperauit consilio, vxorem
duxit, & conscientiæ pace fruitus est.
Verùm, quia Matrimonia æterna non
a *In stimulo virtut.* sunt,

sunt, intra annos aliquot vxor fatis concessit; & en veteres rediere molestia, eademque, vt olim, carnis pugna; itur ergo in antiquam siluam, & nouæ infamesque libidines magis, quàm antehac, animum ipsius lancinabant. Quare iterum statuit virum Religiosum, consulere, vt animæ remedium inueniret; rationem præteritorum illi reddidit, & exiguo se teneri desiderio nouæ ducendæ vxoris, ne in malam incideret, & ne iisdem rursus periculis exponeretur, quæ iacturam salutis adferrent. Optimâ fortunâ Pater hic, aliud omnino à priori, medium suggessit: Domine mi, inquit, si aliquid tribuis fidei meæ, frequenta sacram synaxim, sæpius ad hanc mensam accede, octauo quoque die sume hunc panem Angelorum, & intra pauculas septimanas ab hisce tentationibus liberaberis, nullaque inter virtutes omnes tibi charior erit, castitate. Acceptissimum illi fuit, istud consilium, eoque vsus per aliquod temporis interuallum, ita se leuatum.

sen

sensit ab eo Amoris appetitu, omnibusque carnis rebellionibus, vt in nouo quodam solationum orbe viuere sibi videretur, diceretque identidem: heu! cur vnquam vxorem duxi! ah cur in primis meis difficultatibus homo non occurrit, qui mihi frequentationem Sacramentorum suaderet! non periissem, nunquam matrimonio me copulaissem, & per cupiditatum mearum moderationem reddidissem me parem Angelis. Utinam reperissem tum temporis Confessarium, qui talem agro mihi medicinam propinasset! viuerem nunc hominum fortunatissimus; non tamen omnino miser sum, quandoquidem post tot toleratas misérias iam castum me, & ex animi voto, continentem experior.

Ab hac historia transeamus ad insolitum stuporem, quo sæpe defigor. Verissimum est, & hac proximâ experientia luculenter comprobatum. idcirco mundanos homines diu in sordibus scelerum suorum volutari, semperque

que in peius ruere, quòd Sacramento-
rum & maxime Eucharistiæ frequen-
ti usu abstineant: *a Aruit cor meum,*
quia oblitus sum comedere panem meum.
Panis est vitæ (*Ego sum panis vita*) ani-
mam nutriens & vitam gratia conser-
uans, & corroborans aduersus tentatio-
nes. Reipsa experimur; etiam scelera-
tissimos, aliquot diebus, post huius sa-
cratissimi cibi sumptionem, à peccatis
se continere, non aliunde quàm ab ef-
ficacia huius Sacramenti recens vsur-
pati, quod animos illorum aduersus
hostiles imperus obfirmat. Extra du-
bium est, quin maxima hominum pars
defectu frequentis Communionis, in-
dicionem peccati dæmonisque rediga-
tur. At vnde euenit (atque id me re-
net attonitum) quòd plures & in sæ-
culo & in domibus Religiosis, qui di-
uina hac esca sapissime fruuntur, tam
parum in virtute promoueant, post
centenas & sexcentas Communiones,
æquè ac antè superbi, æquè maledici,
ambitiosi, vani, impatientes, æquè sen-

a Ps. 101. Ioan. 6.

sum.

